





---

Ex Bibliotheca  
majori Coll. Rom.  
Societ. Jesu

48.6.17.

48 48

B B

17 13

J. <sup>+</sup>  
H9H  
6

12/2



DE SANCTISSIMO  
ET ARCANO  
TRINITATIS  
MYSTERIO

DIVI PATRIARCHÆ AVGVSTINI  
S. R. E. Doct̃oris Maximi Axiomata Selecta .

*Controuersijs , & Dubijs explicata à P. Benedicto à S. Iacobo  
Ferrariensi Congregationis Fratrum Eremitarum  
Discalceatorum Definitorẽ Generali.*

EMINENT.<sup>MO</sup> ET REVER.<sup>MO</sup> D.  
D. CAROLO PIO  
S. R. E. CARDINALI

Nationis Germanicæ Comproteçtori , ac Prouinciarum  
S. Cæsareæ Maiestatis Hereditariorum Proteçtori  
Dicata .



ROMÆ ,  
Ex Typographia Iacobi Antonij de Lazza is Vareſij . MDCLXXIV.  
SUPERIORVM PERMISSV.

1871

1872

1873

1874

1875

1876

1877

1878

1879

1880

1881

1882

1883

1884

## P R I N C E P S



PIETATI Deo sacra dicanda ipsa eius ratio, & natura demonstrat: ea propter Sanctissimæ Trinitatis arcana ex Diuo Patre Augustino deprompta, breui inclusa opusculo in lucem prolaturus, cum de Patrono illi diligendo deliberarem, illico Eminentissimum tuum Patrocinium implorandum esse Pietas ipsa suavit, Iustitia tributum iure deuinctum ostendit, omniumque Chorus Virtutum tibi debenda esse consensit. Quandoquidem testante, Chrysologo *Panes Deum, nec Pietas sine Iustitia, nec sine Pietate Iustitia: celesti sensu sine bonitate equitas, sine equitate bonitas non habetur. Virtutes si separata fuerint dilabuntur; Aequitas sine bonitate scintilla est, & iustitia sine Pietate crudelitas.* Cernens igitur in tanto Patrono harum omnium fœdera iuncta omnibus lætitiæ gradibus exhilaratus ad opus incesse, comperiens non casum, aut fortunam, sed virtutes ipsas votis respondisse; illas inquam, quæ Eminentix tuæ tantum dignitatis & splendoris contulerunt, ut merito se felicem arbitretur, quem tuæ lætæ frontis benignitas patrocinari non dedignatur; Et quis enim non ambiat illius Pij Generis protectionem, in quo veluti transmissa ab origine per successiuos heroes immaculata Pietas cum Iustitia coniuncta, & iustitia cum pietate connexa elucescit: Quorum omnium mihi dolendum memorias, aut edaci tempore absumptas, aut in archiujs latentes ad meam non peruenisse notitiam, ex his paucis;

quæ lectorum oculis subiicio, facillè discet Lector Pij Leonis, & Aquilæ magnitudinem. Piam fugam vt ad Religionis asyllum, confugerent Eurides illa Constantij Imperatoris filia prisca Orphei Euridice iustior, ac fælicior, & Manfredus ex clarissima Saxonum Ducum stirpe progenitus maritali foedere iuncti arripuere. Ra- uennam appulsi eorum trinam prolem vno foetu ortam benigno vultu Cælum aspexit Pio enim virtutis locum tenente Pico & Papazono adstantibus vnus pijssimi generis tres clarissimæ Personæ plurimorum Principum Protoparentes futuri apparuerunt. Horum aspectus sic cæsaream Constantij ad indulgentiam flexit maiestatem, vt Trinam amplexatus prolem Natæ & Genero non tantum innocua donarit errata; Verum & latissima terrarum spatia dulci Pietatis paternæ stimulis actus elargitus, Manfredo etiam arces & oppida condendi imperiale munus concesserit. Hæc felix Piorum origo mirificè inter Proceres Lanfrancum vnum, & alterum excrefcens in Friderico successiuo ordine adulta, in Manfredo sexto maximè enituit; Hic enim à Cæsare Generalis militiæ Dux, & Galliæ Cisalpinæ Imperialis Vicarius constitutus Tosabellorum prauis artibus se opponens immeritò occupata paterna iura cedere coegit; exinde etiam à Ioanne Bohemorum Rege pro coercendis Tyrannis præfectura decoratus, quæ vi occupant eripuit oppida, Mutinam libertate donauit, ciues seruauit incolumes; Tyrannidem ipsam longè latèque sæuientem profligauit: Subditis iura, liberis pietatem, & amicis fidem semper illibata seruauit: Sub eius regimine Mutinenses fælicissimè quievere, illius auctoritatem vniformis eorum consensus venerari decreuit, eius virtuti fortunas, & arbitria moderandi sponte iura cedere. Heroicarum virorum actionum æmulæ extitere Heroinæ. Elisabet enim inter sæculi, & domus pompas misco ordine Seraphicum Diui Francisci institutum inuexit. In Diui Patris Nostri Augustini honorem Templum

plum crexit, quod Eremitanis vt veris tanti Parentis Filijs plurimis locupletatum redditibus elargita est: Cuius eximiae probitatis hæres Camilla Primogenita filia non contra Pium, vt illa Volscorum Regina, sed pro pietate ipsa re, ac nomine semper verè pia decretauit: Diuinis enim iugiter intenta, assidua corporis castigatione sicut Deo Spiritum, ita & Spiritui feruentissimo robore, sensus subegit; cui semper ciliciorum, & flagellorum, atque incendiarum asperitates familiares fuere; Quæ pompas sæculares contemnens in Seraphica Diui Francisci Familia adscripta, ad Innocentium Octauum Summum Pontificem Romam perueniens, extruendi insigne suarum Monialium Cœnobium, facultatem obtinuit, quo munificentissima liberalitate electo, in eo actionum magnitudine, & Crucifixi Sponsi imitatione clarissimum perfectionis speculum ceteris omnibus se præbuit; cuius etiam nunc virtutum, & rectè gestorum præclara monumenta testantur; Eorum non tam exploratrix, quam Aemula Margarita ad eundem scopum animum intendens, easdem Spiritus, & perfectionis semitas tenuit: quæ continuata serie in alijs propagata etiam nunc perseverant. Alberti Tertij pietatem quis dignis efferat laudibus; quæ Lutheranae hæresi semper infensa infandum caput erigenti forti certamine restitit: Erasmusque Lutherizantem sæpè deicere studuit. Quam Leo huius nominis Decimus non nisi sui Pontificij diplomatis testimonio meritis encomijs celebrari posse censuit. Eximiae huius Fortitudinis & Religionis præclarissimum alterum extitit lumen Rodolphus S.R.E. Cardinalis amplissimus iam ab ineunte ætate virtutibus omnibus ornatus, quem Sancta Sedes Apostolica ad depellenda hæresum monstra, & Sacrosanctum Generale Concilium indicendum ad Franciscum Primum Galliarum Regem, exinde ad Romanorum Imperatorem Carolum Quintum legatione Pontificia dignissimum destinauit: Cuius & hodie pia munificen-

tia

tia Sacra Lauretana Domus, & munerum, & Sacerdotum numero aucta gaudet: Cuius protectioni inuictissimus Imperator Carolus Quintus & regna, & Romanum commisit Imperium. Quem Summus Pontifex Paulus Tertius Niceam proficiscens, quem totæ Ecclesiasticæ ditioni, & ipsi Vrbi Legatum præficeret meritissimum inuenit: Quem Iulius Tertius egregium in omnibus heroem expertus pro componendis belli Parmensis controuersijs ad Cæsarem iterum Legatum transmisit: Cuius iam defuncti eximia merita Beatissimæ Memoræ Pius Quintus suo celebri non tam Epitaphio, quam Elogio digna iudicauit. Huic Carolus sicut Purpuræ, ita & Pietatis successor demandatam sibi Piceni Prouinciā ea rexit prudentia, iustitia, & Religione, vt omnium plausu & ære monumentum ad perpetuam præclarè gestorum memoriam, & grati animi Tesseram ciues crexerint: Cuius deuotione, & munificentia Diui Caietani Religiosi Filij Ferrariam adducti, & ad sacra ministeria celebranda commodissimo in loco constituti, hercule in via mirificè clarescunt: E cuius prospectu eiusdem ope, & sumptibus Diuo Carolo Borromeo sacrum excitatum Templum refulget: Qui semper erga cunctos & maximè viros Sacerdotali honore insignitos, litteris & Christianæ Religionis zelo ornatos non tam Protectoris, quam Patris munus, & partes exercuit: Nouumque Piarum Scholarum institutum, quarum fructibus orbis Catholicus excultus perfruitur, ex Summi Pontificis indulto eximiè promouit. Protectio Regnorum Hispaniæ, Sacræ Congregationis Indicis per quatuordecim annos exercita Præfectura, sacri & amplissimi Cardinalium Collegij Decanatus, vna cum Hostiensis Episcopatus dignitate totius orbis Theatro in pia stirpe tam sæculari, quam Ecclesiastica dignitate fulgentes numquam defuisse Heroes monstrauit, sicut nec defuturos esse speramus. Huius germanum Fratrem, & Eminentiae tuæ dignissimum Genitorem Ascanium

nium oculatus testis, nec dignis Encomijs celebrare possum, nec ingrato silentio præterire debeo; Cuius Beneficientiam ciuium familiæ senserunt, & quilibet eam ingenuo grati animi testimonio concelebrat. Nec minor erga Deum illius extitit pietas, quam inter cætera Monialium S. Claræ, quas Capucinas vocamus nouum excitatum cænobium ostendit. Eius iacturam etiam nunc dolent virtute præditi, eternisque elogijs testantur non interituras resonare in dies acclamationes, quæ eo sincerius pronunciantur, quo benefica grati animi vox iustius in laudes erumpit: Et merito vnus enim fuit, cuius virtus nulli interclusa iacuit, de quo viuente concors cordium plausus per ora volitaret, cuius antiquæ regulas prudentiæ, incorruptæ notas iustitiæ, liberalium artium ornamenta demirantur vniuersi; Cuius defuncti tristem ingentium beneficiorum amissionem Patria deplorat. Reflorescere in Filijs Auitam Pietatem & Magnanimitatem non tantum Ferraria, sed & Catholicus Orbis lætatur. Nam & Christiana Religio propugnata à Giberto contra infensissimos hostes suos inuictum eius robur & Fortitudinem perpetuis & meritis laudibus celebrare non desinit. Et Eminentiam Tuam tot Piorum Heroum coronam esse, negare nullus, nisi aut maximè inuidus, aut summè ingratus, poterit. Inter puciles annos senilem gessisti vitam, in adolescentia non minus liberalibus artibus, ac scientijs, quam virtutibus excultus more sapientum in terras alienigenarum Gentium pertransisti. Cataphractorum equitum à Summo Pontifice Urbano Octauo Tribunus electus non exigua discrimina perferens pro Sancta Sede gloriosè dimicasti: Ab Innocentio Decimo ex sæcularibus ad Ecclesiasticas dignitates euectus Generalis Thesaurarij munere decoratus Cardinalatus dignitatem adeptus cunctis magnanimitatis, & Pietatis clarissimum lumen effulges; quas adhuc Vrbinateenses, in quos non tam Legati, quam Patris partes exercuisti, vniuersæ conditionis, ac sexus Personæ

textan-

textantur . Ab Alexandro Septimo ad Patriam Ferrariensem Ecclesiam meritissimus Antistes electus omnium plausu exceptus , iustitiæ , & Pietatis tuæ plebei , & patricij ciues , & hospites ; fora , & templa ; sæculares , & Ecclesiastici emolumenta sensere . Inde Romam , deposito pastoralis onere , recuperandæ pristinæ valetudinis causa rediens , primarijs Sacrarum Congregationum cætibus adscriptus , Romani comprotector Imperij , toto venerabilis orbi te præbes . Vbi inter cætera munificentia tuæ opera , ne aliquid magnanimitati , quam præcipuè erga incolas Oppidi S. Gregorij excuisti , deesset , voluisti , vt minimahæc nostra Eremitarum Discalceatorum S. Augustini Congregatio tantæ benignitatis in S. Mariæ Nouæ Conuentus erectione eximijs decorata muneribus frueretur . Vnico textu complectar , quæ pagina non capit ; Omnes tua misericordia prosequeris , cuncti te plausu sequuntur , nullæ hominum de te querelæ , sed vota . Romæ degis , & vbique viuis , orbem complecteris , & foues ; Ea igitur magnanimitate , quæ minima non despicias munuscula ex immenso doctrinarum Sancti Patri Nostri Augustini oceano oblatam exiguam non exiguo cordis affectu vndam excipe : tuisque fruire virtutibus , quarum fructus ad Catholici orbis vtilitatem confers , vt nos quoque illis fruamur , & ad Reipublicæ Christianæ augmentum & decus felix perpetuo . Vale .

Eminentia Tuæ .

Humillimus , & addictissimus Seruus .

*Fr. Benedictus à S. Iacobo .*

Quanta



**Q** Vanta potui diligentia, iussu Adm. R. P. Matthæi à S. Eustachio Vicarij nostri Generalis, Opus, inscriptum *De Sanctissimo & Arcano Trinitatis Mysterio D. P. N. Augustini Axiomata Theologica, Dubijs explicata à P. Benedicto à S. Iacobo Ferrariensi*, in nostra Congregatione *Sacra Theologiae Lector*, perlegi, singularique animi delectatione acuratè perpendi. In quo nec vel minimam Fidei Catholicæ, ac bonis moribus aduersantem umbram offendi: Quin potius nihil animaduerrere potui, quod non Augustinianæ doctrinæ radijs effulgeat, nec non Tanti Patris in Filio germanum appareat vestigium. Quamobrem illud luce communi censeo dignum; non modicum luminis S. P. Augustini sententiæ fideliter Addictis allaturum. Datum Romæ in Conuentu nostro Iesu Mariæ die 8. Februarij 1673.

*Fr. Cælestinus à Iesu Maria Augustinianus Excalceatus  
Sacra Theologia Lector.*

**D**E mandato Adm. R. P. Matthæi à S. Eustachio nostri Generalis Vicarij, attento studio perlustravi opus inscriptum; *De Sanctissimo, & Arcano Trinitatis Mysterio D. P. N. Augustini Axiomata Theologica, à R. P. Benedicto à S. Iacobo Sacra Theologiae Lector nostræ Congregationis Religioso explicata*; Nec aliquid in eo inueni, quod Sanctæ Fidei puritatem, bonorumque morum integritatem offendat, imò multum, quod prædicta confirmet, grauissimasque ac difficillimas huius Mysterij Quæstiones summa facilitate explicet. Quapropter vt ad tanti Mysterij gloriam, & honorem, publicamque Sanctæ Ecclesiæ vtilitatem in lucem edatur, dignissimum iudico. Datum Romæ in Conuentu nostro Iesu Mariæ die 4. Aprilis 1673.

*Fr. Fabianus à S. Maria Magdalena Augustinianus Excalceatus  
Philosophia Lector.*

*Nos Fr. Matthæus à S. Eustachio Vicarius Generalis Fratrum  
Excalceatorum Ordinis Eremitarum S. Augusti-  
ni Congregationis Italie.*

**L**icentiam, quæ ad Nos spectat, concedimus, typis demandandi  
opus à Patre Nostro Benedicò à S. Iacobo Ferrariensi elaboratum,  
quod inscribitur (*De sanctissimo, & Arcano Trinitatis Myserio  
D. P. N. Augustini Axiomata Theologica dubijs explicata &c.* cum ac-  
curatiores ex nostris Patribus Theologis illud de mandato nostro  
finè vlla exceptione apud nos approbauerint. Datum Romæ die x.  
Aprilis 1673.

*Fr. Matthæus à S. Eustachio Vicarius Generalis.*

*F. Io: Bartholomæus à S. Claudia Sec. Gener.*



*Imprimatur,*

*Si videbitur Reuerendissimo Patri Magistro Sacri Palatii Apostolici.  
Io: de Angelis Archiepisc. Urb. Vicefg.*



*Imprimatur,*

*Fr. Raymundus Capisuccus Ordinis Prædicatorum Sacri Palatii Apo-  
stolici Magister.*

INDEX

I N D E X  
CONTROVERSIARVM  
AXIOMATVM ET DVBIORVM  
DE S A N C T I S S I M O  
TRINITATIS MYSTERIO :

CONTROVERSIA PRIMA.

De Processionibus Diuinis .

**A**xioma I. Filius à Patre , & spiritus sanctus à Patre , & Filio procedit. pag.1.

Dubium I. Quot sint processioncs Diuinæ , & an sint per Intellectum , & Voluntatem . pag.2.

Axioma II. Vna Processio in Diuinis est generatio , altera non . pag. 13.

Dubium II. Cur vna ex Diuinis Personis sit generatio , & non altera . ibid.

CONTROVERSIA SECVNDA.

De Relationibus Diuinis .

**A**xioma I. Dantur in Deo Relationes. pag.28.  
Dubium I. An & quomodo dentur in Deo relationes reales . pag. 29.

Axioma II. De Identitate & distinctione relationum Diuinarum cum , & ab essentia Diuina . pag.33.

Dubium II. Quomodo Essentia, & Relationes distinguantur in Deo.	pag.	34.
Axioma III. In conceptu Essentiæ non includitur Relatio, nec è contra.	pag.	46.
Dubium III. Vtrum in conceptu formali, & quidditativo Essentiæ includantur relationes, & è conuerso.	pag.	47.
Axioma IV. Quomodo Relationes Diuinæ dicunt perfectionem.	pag.	63.
Dubium IV. An Relationes Diuinæ addant aliquam perfectionem relationum ad Essentiam, & quomodo.	pag.	64.
Axioma V. Quomodo se habeant ad inuicem Relationes Paternitatis Filiationis, Spirationis Actiuæ, & Spirationis Passiuæ.	pag.	85.
Dubium V. Quomodo relationes istæ distinguuntur inter se.	pag.	86.
Axioma VI. Dantur in Deo relationes Æqualitatis, & Similitudinis.	pag.	93.
Dubium VI. An relationes Æqualitatis & Similitudinis, & identitatis inter Diuinas Personas sint reales, vel rationis.	pag.	64.

## CONTROVERSIA TERTIA.

### De Diuinis Personis.

Axioma I. De Ratione Personæ, Subsistentiæ, & Hypostasis.	pag.	100.
Dubium I. An sint idem Persona, subsistentia, Hypostasis, & Essentia.	pag.	101.
Axioma II. De subsistentia Diuina.	pag.	104.
Dubium II. An sit concedenda in Deo subsistentia absoluta.	pag.	105.
Axioma III. De Vnitate, & multiplicatione subsistentiæ in Deo.	pag.	117.
Dubium III. Vtrum relationes Diuinæ ex propria ratione subsistant.	pag.	118.
Axioma IV. De Constitutiuo, & distinctiuo Diuinarum Personarum.	pag.	133.
Dubium IV. Vtrum Personæ Diuinæ vltimo constituentur, & distinguantur per relationes.	pag.	134.
Axioma V. Quomodo Personis conueniant actus notionales.	p.	155.
Dubium		

Dubium V. Quomodo Actus Notionales respiciant, & identificentur  
Essentiæ, Relationibus, & Personis. ibid.

## CONTROVERSIA QUARTA.

De Notionibus Sanctissimæ Trinitatis, & singularum Personarum.

**A**xioma I. solo lumine naturali non potest cognosci hoc Mysterium. pag. 161.

Dubium I. An, & quomodo Mysterium Sanctissimæ Trinitatis possit cognosci ab intellectu creato. pag. 162.

Axioma II. De Notionibus Diuinarum Personarum. pag. 170.

Dubium II. An, & quot sint admittendæ notiones in Mysterio sanctissimæ Trinitatis. ibid.

Axioma III. De Actibus Notionalibus. pag. 177.

Dubium III. Vtrum Actus Notionales sint Voluntarij, & priores prædicatis essentialibus. pag. 178.

## CONTROVERSIA QUINTA.

De singulis Personis Diuinis.

De Persona Patris.

**A**xioma Primum. Esse ingenitum conuenit Patri solum. pag. 186.

Dubium Primum. Quomodo esse ingenitum conueniat Patri. pag. ibid.

## D E F I L I O.

Axioma secundum. Verbum in Diuinis est nomen Personale. pag. 192.

Dubium secundum. An Verbum in Diuinis sit nomen Personale. ibid.

**Axioma**

Axioma III. Verbum Diuinum est expressum eorum omnium , quæ nouit Pater .	pag. 198.
Dubium III. Vtrum Verbum Diuinum procedat ex cognitione omnium Personarum , & creaturarum .	pag. 199.
Axioma IV. Spiritus Sanctus procedit etiam à Filio .	pag. 200.
Dubium IV. Vtrum Spiritus Sanctus procedat à Filio .	ibid.
Axioma V. Necessè est Spiritum Sanctum procedere à Patre , & à Filio .	223.
Dubium V. An si spiritus sanctus non procederet à Filio distingueretur ab eo realiter .	ibid.
<u>Axioma VI. Pater &amp; Filius sunt vnum principium Spiritus Sancti .</u>	<u>pag. 234.</u>
Dubium VI. De eodem .	ibid.
Axioma VII. Spiritus Sanctus Patris , & Filij Spiritus est.	p. 240.
Dubium VII. Vtrum Spiritus Sanctus petat per se produci à duobus .	pag. 241.

## CONTROVERSIA SEXTA.

### De Missione Diuinarum Personarum .

<b>A</b> xioma I. Alicui Personæ Diuinæ conuenit mitti .	pag. 247.
<u>Dubium I. Vtrum alicui Personæ Diuinæ conueniat mitti .</u>	<u>ibid.</u>
<u>Axioma II. Missio in Diuinis dicitur solum temporaliter .</u>	<u>p. 249.</u>
<u>Dubium II. Vtrum Missio Diuinæ Personæ sit æterna .</u>	<u>pag. 250.</u>
Axioma III. Missio inuisibilis fit solum secundum donum Gratiz sanctificantis .	pag. 252.
Dubium III. Vtrum Missio inuisibilis fit solum per donum Gratiz gratum facientis .	ibid.
<u>Axioma IV. Filio solum , &amp; Spiritui Sancto conuenit mitti .</u>	<u>p. 256.</u>
<u>Dubium IV. Vtrum Patri conueniat mitti .</u>	<u>pag. 257.</u>
Axioma V. Missio inuisibilis fit ad omnes , qui sunt participes Gratiz .	pag. 259.
<u>Dubium V. De eodem .</u>	<u>ibid.</u>
<u>Axioma VI. Conueniens fuit Filium &amp; Spiritum Sanctum visibiliter mitti .</u>	<u>pag. 261.</u>
Dubium	

Dubium VI. Vtrum conuenienter fuerit facta mixtio uisibilis Filij, & Spiritus Sancti. pag. 262.

Axioma VII. Persona Diuina mittitur ab ea, à qua procedit, & etiam à se ipsa. pag. 266.

Dubium VII. Vtrum aliqua Persona mittatur ab alia, quam ab ea, à qua æternaliter procedit. ibid.



A NIMA.

# ANIMADVERSIO.

**E** Rare humanum, confiteri errores correxisse est, plura in hoc opusculo crimina Impressoris, & multo plura Auctoris reperies. Vnicum tantum opto, vt aduertat, & emendes, quod est in pagina 50. vbi referuntur verba illa S. Thomæ Doctoris Angelici ex Quæst. Octaua de Potentia Articulo secundo ad 6. Cum ergo dicitur *essentia Diuina est Paternitas*, non prædicatur Paternitas de Essentia Diuina + propter identitatem rei lege. Non prædicatur Paternitas de Essentia Diuina propter identitatem rationis, sed propter identitatem rei, &c. Cætera aut Censor Æquus puni, & corrige; aut beneuolus Lector dimitte, & ignosce.





# A X I O M A T A DE SANCTISS. TRINITATE

EX S. P. AVGVSTINO.

## CONTROVERSI A P R I M A.

De Processionibus Diuinis:

A X I O M A P R I M V M.

*Qualiter Filius procedat à Patre, & Spiritus Sanctus  
à Patre & Filio.*

Ex Lib. 3. contra Maximinum Cap. 14.



*de substantia Patris est Filius, de substantia Patris  
est etiam Spiritus Sanctus, cur vnus Filius sit, &  
alius non sit Filius? Ecce respondeo, siue capias, siue  
non capias. De Patre est Filius, de Patre est Spi-  
ritus Sanctus; sed ille genitus, iste procedens: ideo il-  
le Filius est Patris, de quo est genitus, iste autem Spiritus vtrius-  
que quoniam de vtroque procedit. Sed ideo cum de illo Filius loque-  
retur, ait: De patre procedit: quoniam Pater processionis eius est au-  
ctor, qui talem Filium genuit, & gignendo ei dedit, vt etiam de  
ipso procederet Spiritus Sanctus.*

# CONTROVERSIA PRIMA D V B I V M I.

Quot sint Processiones diuinæ, & an sint per intellectum, & voluntatem.

**P**remitto 1. Rectè à s. Thoma, & cum eo ferè ab omnibus alijs Theologis explicari Processiones Diuinas esse non per modum effectus à causa, vel causæ in effectum; sed secundum emanationem intelligibilem, quæ procedens manet in eo, à quo procedit; cum hoc tamen quod nullam ab eo diuersitatem habeat in Natura, seu Essentia; prout Fide Catholica sanctum est, quæ docet, in Diuinis Filium à Patre, & Spiritum Sanctum ab utroque procedere salua identitate substantiæ, & Essentiæ, ac propterea Christum Dominum esse verum Deum, & eiusdem Naturæ cum Patre contra Arrianos, & Iudæos, qui dicebant Verbum esse creaturam. Vltcrius Spiritum Sanctum esse verum Deum contra Macedonianos, qui oppositum somniarunt, negando illi Diuinitatem: esto de Patre, & Filio rectè sentirent.

Premitto 2. Intelligere, & vel in Deo esse in duplici differentia, & primo quidem accipi, quatenus dicunt rationem absolutam, & essentialẽ communem omni-

bus personis, idest representationem obiecti, & inclinationem, siue tendentiam in illud. Secundo verò quatenus notionalia sunt, & respectiua, quò pacto identificantur quidem cum Diuina Essentia realiter, quæ propter suam infinitatem identificat sibi omnem rationem absolutam, & respectiuam in Deo repertam, sed non reperiuntur in singulis personis, eo quod produciens necessariò distinguitur realiter à producto; nam *Dicere*, quod supra intelligere absolutum importat esse productiuum verbi, ita reperitur in dicente, quod non reperitur in verbo producto; & *Spirare*, quod supra diligere absolutum significat esse productiuum Spiritus Sancti, ita reperitur in spirantibus, vt non sit in Spiritu Sancto. Cum verò in diuinis personis nihil sit aliud, quam ratio absoluta essentialis, & respectiua personalis; & præterea, quælibet ratio absoluta sit communis omnibus; *Dicere* ita reperitur in Patre, quod non sit in alijs Personis, & *Spirare* ita in Patre, & in Filio, quod non sit in Spiritu Sancto; necessario sequitur, intellige-

ligere, & velle, vt includunt relationem, & proprietatem personarum, esse idem, ac *Dicere* importare relationem constitutiuam primæ personæ; *Spirare* verò relationem communem primæ, & secundæ personæ; & *Dicere* soli Patri conuenire, & *Spirare* solum Patri; & Filio; quatenus spirator sunt; quemadmodum in illis solum est proprietas superaddita rationi absolutæ; sicut e contra *Dici*, vt est idem, quod produci per intellectum, quia includit passiuam originem, soli filio conuenit; & *Spirari*, soli Spiritui Sancto; & hanc doctrinam fusè tradidit S.P.N. Augustinus lib. 15 de Trinit. Cap. 7.

Præmitto 3. Processiones Personarum in diuinis esse quasdam emanationes; quia secundum illas producitur aliquid à producente distinctum; quod satis est ad emanationem. Has emanationes aliqui recentiores contendunt, non esse appellandas actiones, eo quod de ratione actionis sit, vt terminus productus essentialiter differat à producente, quod non habet locum in diuinis. Punctus iste pertinet ad modum loquendi; nam re bene percepta rectè plurimi alij D.D. vsurpant nomen actionis seclusis imperfectionibus illis, quas in creatis secum trahunt actiones creaturarum. Sic etiam ad quæstionem de voce spectat illud dubium,

vtum dicendum sit, processiones istas intrinsecè includere intelligere, & velle, an solum illa connotare. Cum enim secunda, & tertia persona procedant per actus intellectus, & voluntatis, necessario in ipsa origine passiuæ debent includi intellectio; & volitio. Pater enim intelligendo generat, & filius intelligendo generatur, vt sæpe docet S.P.N. Augustinus, asserendo Verbum procedere sapientiam genitam ex Sapientia inginita. Et cum intelligere non conueniat Patri; ac Filio ratione proprietatis personalis vt sic (conceptus enim paternitatis, & filiationis, vt sic, non est ratio intellectio- nis) non poterit sola relatio Paternitatis generare, nec sola relatio filij generari; sed Pater erit generans, & Filius genitus. Cum igitur Pater, vltra relationem nihil includat nisi essentiam, & per consequens ipsum intelligere absolutum, dicetur ratione vtriusque generare; & sic de Filio passiuè; &c. Hoc idem seruata proportionē dicendum est de Spiritu Sancto; id est de velle respectu spirationis actiuæ, & passiuæ; nam Pater, & Filius volendo, siue amando spirant, & Spiritus Sanctus spiratur, vt Amor, ac proinde spiratio non dicit solam relationem, sed etiam amorem essentialem. Ad punctum igitur difficultatis R. Intellectio-

nem, quæ includitur essentialiter in Patre generante, ut est in illo, connotare se ipsam in Filio genito, & hanc eandem ut inclusam in Filio genito essentialiter connotare se ipsam in Patre generante; & sic pari ratione Amorem in Spiratore essentialiter inclusum connotare se ipsum in Spirato, & in Spirato inclusum essentialiter connotare se ipsum in Spiratore.

Præmitto 4. Aliud esse dicere, quod Pater intelligendo Filium producat; & Pater & Filius amando producant Spiritum sanctum; aliud, quod intellectio sit ipsa actiua productio Filij, & volitio actiua productio Spiritus Sancti; Intellectio enim, & volitio secundum se nullam dicunt oppositionem; ac proinde intellectio Patris communicatur filio, & volitio Patris, & Filij Spiritui Sancto; atque productio actiua est relatio producentis in ipso producente existens, identificata realiter, ac formaliter ex natura rei cum intellectione, ac volitione, & solum virtualiter distincta; quapropter intellectio non est formaliter productio actiua, sed quid in illa inclusum, ut iam dictum est. Et hoc est valde observandum ad habendam differentiam intellectiois increatæ à creatæ; In creatis enim per ipsammet actionem intellectiois producitur verbum, quod in re nihil

aliud est, quam ipsa intellectio in facto esse; In diuinis verò intelligere, non est formaliter ipsa productio Verbi, sed quid in illa inclusum; & necessario connexum. Quod adhuc magis ex infra dicendis clarescet. His positis.

Dico 1. Pro Responsione ad primam partem quæsitæ; esse in diuinis vnâ personam, quæ à nulla alia procedit, & duas procedentes; & sic duas esse processiones in diuinis. Prima pars probatur. Quia neque omnes personæ possunt esse productæ ab alijs, Sic enim daretur processus in infinitum; neque omnes possunt esse mutuo se producentes; quia produciens, ut sic debet supponi, ut habens esse, productum, verò, ut accipiens esse, siue non habens esse, antequam accipiat. Ergo non potest respectu eiusdem esse produciens, & productum. Hoc totum partim supponit, partim explicat S. Pater in Axiomate: Supponit, cum ait. *Pater processionis eius est auctor*: explicat cum ait. *Qui talem genuit filium, & gignendo ei dedit ut etiam de ipso procederet Spiritus Sanctus*.

Dices aduersus prædictam rationem. Nullum est inconueniens, quod supponatur idem, non habens esse, siue recipiens, quatenus productum, & habens esse, siue non accipiens, quatenus pro-

producens est: Ergo nulla est talis ratiocinatio.

Contra hanc instantiam pugnat, quod cum productum supponitur non habens esse, siue accipiens esse, vel illud aliud, à quo supponitur producendum, habet esse, vel non; si dicas non habet, quomodo poterit producere? Si dicas habet; quomodo habet? si dicas productum. Iterum quæro, vel ab eo quod est, vel ab eo, quod non est. Et sic in infinitum, quod repugnat. Sistendum igitur in aliquo, quod non sit productum, à quo alia producuntur.

Vtius certum est in demonstrationibus non posse admitti circulum; quia alias, idem esset notius, & ignotius; certius & non certius. Sed tale est etiam inconueniens; si ponatur esse mutuam dependentiam in eodem genere principij, & principati; idem namque esset magis, & minus natura independens; prius, & posterius natura existens; quæ omnia repugnant, & manifestam inuoluunt implicantiam. Ergo ne dentur huiusmodi absurda; concedatur prædictam ratiocinationem esse conuincentem, & in suo robore manere. Rationes istæ non solum conuincunt hoc non posse fieri naturaliter; sed nec etiam supernaturaliter; licet enim in

supernaturalibus admittantur plura supra Naturam; & rationem naturalem; numquam tamen conceditur aliquid contra naturam; & rationem euidentem; Et si semel daretur eandem rem esse producentem & productam modo dicto saltem supernaturaliter: vix posset conuinci hæreticus: dicens omnes Personas Diuinas ad inuicem produci.

Quæres hic, unde habeamus vnā tantum esse personam improductam & supposita fide de hoc mysterio. Probari ex eo, quod si essent plures personæ improductæ, iam differrent secundum esse absolutum, ac proinde secundum naturam, & sic essent plures Dii; id enim, in quo vnum differt ab alio, vel est aliquid absolutum, vel aliquid relatiuum; sed si essent plures personæ improductæ non possent distingui in aliquo relativo; Ergo distinguerentur in aliquo absoluto. Probatur Antecedens quia relatio illa, qua vna persona distinguitur ab alia, non est, nisi relatio originis actiue, vel passiue, nec potest esse alia; nam in æternis idem est esse, & posse, sed ex suppositione, quod essent plures improductæ, nulla esset origo vnius ab alia inter istas. Ergo iam differrent in absoluto, & sic in Deitate, quod est impium. Ex quo iam habetur per necessariam

con-

consequentiam, esse duas personas procedentes, siue productas. Cum enim iuxta fidem Catholicam tres tantum sint personæ, & vna solum sit improducta; sequitur, esse duas productas, & sic duas solummodo processiones passivas, quæ identificantur cum personis productis.

Circa secundam partem dubij, an scilicet Processiones Diuinæ sint per intellectum, & voluntatem, duæ sunt sententiæ. Vna est Durandi in 1. distin. 6. quæst. 2. & distinct. 27. quæst. 2. Vbi docet remotis per intellectum in Deo actibus volendi, & intelligendi adhuc fore in eo emanationes personarum; idque ex fecunditate naturæ radicaliter, ut ipse ait; quam fecunditatem habet natura Diuina ex sua infinitate. Hanc sententiam plures recentiores dignam censura iudicant. Altera sententia est communis in scholis s. P. N. August. & S. Thomæ: Processiones diuinas esse secundum intellectum, & voluntatem, cui inhærendo.

Dico 2. Processionem secundæ Personæ esse per intellectum, Quod probatur primo, quia communiter SS. Patres volunt Filium ideo dici Verbum in Scripturis, quia procedit per intellectum. Sic docent S. Cyrillus lib. 7. Thesauri, s. Basilius Hom. in 1. Cap. 10. s. Gregorius Nazianzenus oratione 4. de

Theologia, & S. P. N. August. lib. 7. de Trinitat. Cap. 1. vbi ait. *Verbo quod genuit, dicens est, non verbo quod profertur, & sonat, & transit, sed Verbo, quod erat apud Deum, & Deus erat verbum, & omnia per ipsum facta sunt. Verbo equali sibi, quod semper atque incommutabiliter dicit se ipsum. Non est enim ipse Verbum; sicut nec filius, nec imago. Dicens autem exceptis illis temporalibus vocibus (Verbi) Dei, que in creatura sunt: nam sonant, & transeunt. Dicens ergo illo coeterno Verbo, non singulus intelligitur, sed cum ipso verbo, sine quod non est usque dicens.*

Probatur secundo, quia alias nulla esset ratio, cur Filius diceretur imago Patris, & non diceretur talis Spiritus sanctus, ac etiam cur ipse solus diceretur genitus.

Probari 3. solet ex illo Psal. 2. *Dominus dixit ad me filius meus es tu ego hodie genui te.* Nam Pater extra se nemini dixit. Ergo interiorius: dicere autem interiorius terminatur ad Verbum, & pertinet ad intellectum. Ergo, &c.

Confirmatur ex cap. 24. Eccl. vbi Sapientia dicit de se. *Ego ex ore altissimi prodiui primogenita ante omnem creaturam.* Sed os, vnde produxit Sapientiam genitam, non potest esse aliud, quam intellectus Patris; non enim loquitur ore

cor-

corporeo. Ergo, &c. Sic etiam Io: Cap. 1. postquam dixit, quod id, quod dicitur Verbum, dicitur etiam filius; subiungit, esse in sinu Patris. sed per sinum, in quo latent mysteria; nobis à filio revelata non potest intelligi aliud, quam intellectus Patris omnia comprehendens. Ergo, &c.

Dico 3. spiritum Sanctum, quæ est tertia persona S.S. Trinitatis: procedere per voluntatem. Probatur 1. Ex S.P.N. qui lib. 9. de Trinit. Cap. 12. ait. *Sicut Dei verbum filium esse nullus Christianus dubitat, ita Charitatem esse Spiritum Sanctum.* Charitatem, & amorem à voluntate procedere, nullus dubitat. Idem docent alij SS. PP. supra relati, & plures alij.

Probatur 2. Quia in natura intellectuali reperiuntur solum operationes immanentes intellectus nempe, & voluntatis; sed secunda persona procedit per intellectum, ut probatum est; Ergo tertia procedit per voluntatem. Probatur consequentia, quia non est ponenda in Deo voluntas minus fecunda, quam sit intellectus, nec dici potest procedere per intellectum utramque personam, nam, & utraque esset filius; & præterea cum Verbum per intellectum procedens procedat necessariò, & infinitum, est terminus vnicus, & adequatus illius processionis.

Dices 1. Non potest esse in Deo processio immanens secundum intellectum, & voluntatem, quin admittatur etiam potentia passiva in eo, secundum quam possit recipere terminos illarum; sed hoc est inconueniens; tolleretur enim ab eo simplicitatem; & poneretur compositionem; Ergo non sunt admittendæ in Deo huiusmodi processionem. Resp. negando maiorem: in illis enim processionibus possunt considerari duo, illud videlicet, quod communicatur, & illud, quod producit. Primum est ipsa natura diuina, quæ cum sit idem realiter in, & cum omnibus personis, nec habeat oppositionem ad ullam ex illis, à nullo producit neque tamquam à causa (quod habent etiam relationes) neque tamquam à principio; eo quod inter producat, & productum debet esse realis distinctio. Secundum verò sunt relationes ipsæ filiationis, & spirationis passivæ, quæ sunt constitutiæ Filij, & Spiritus Sancti, qui producantur, ut quod; ipsæ verò relationes, vel producantur ut quò, vel producantur, secundum diuersos modos loquendi; quapropter siue consideretur terminus communicationis, siue productionis, vterque est substantialis, ac proinde per se subsistens; & non indigens aliquo, in quo recipiatur.

Dices:

Dices: etiam forma substantialis est per se subsistens, & tamen recipitur in subiecto informationis; Ergo etiam ille terminus productionis, etiam si sit subsistens, poterit recipi in subiecto. Resp. esse disparem rationem; nam forma illa substantialis habet rationem partis, & facit compositionem; quod non habet locum in Deo, qui est actus purissimus, vt supra ex alio capite ostensum est.

Dices 2. Processiones passiuæ debent correspondere productionibus; sed in Deo est tantum vna actio produciens, quæ simul, & semel est intellectio, & volitio; Ergo vna tantum processio passiuæ. Confirmatur quia vnus tantum est terminus, qui communicatur, natura videlicet diuina; sed processiones secundum terminos distinguuntur; Ergo vna tantum processio. Resp. verum quidem esse intellectionem, & volitionem in Deo esse realiter vnā actionem, siue potius vnā entitatem simplicissimā, sed nihilominus esse virtute duplicem; quatenus potest præstare, & de facto præstat id, quod præstaret, si esset actu, & realiter multiplex, & diuersa; Sicut enim ab vna volitione, sine villo absurdo, emanant omnes creaturæ: sic etiam ab vna actione, siue entitate simplicissima possunt emanare plures processiones, Ita-

que cum dicitur processiones passiuas correspondere productionibus, vel sermo est de distinctione numerica, vel de distinctione formali, & quasi specifica; de prima negatur, eo quod distinctio realis, quæ est inter Personas, oritur ex oppositione, quam illæ habent inter se, de formali verò conceditur, nam sicut emanatio passiuæ Verbi dicitur generatio passiuæ, sic eius productio actiuæ dicitur generatio actiuæ; & sicut passiuæ emanatio Spiritus Sancti dicitur spiratio passiuæ, sic spiratio actiuæ dicitur eius productio. Ad Confirmationem. Resp. esse quidem eundem terminum, qui communicatur in vtraque, sed non communicari eodem modo, nam in prima communicatur per intellectionem, in secunda verò per volitionem, quod sufficit ad formalem earum distinctionem; Præterea termini ipsarum productionum sunt diuersi; & distinctio realis, quæ est ex relationibus oppositis, attenditur penes terminos productionis, qui in præsentī sunt realiter diuersi.

Dices 3. Processio secundæ Personæ est infinita; Ergo exhaurit omnem vim productiuam, & omnem productionem, vel si relinquit locum secundæ processioni, cur non etiam tertiæ, & quartæ? Resp. negando consequentiam non enim



enim requiritur maior perfectio ad secundam processionem, quam ad primam; vtrâque enim productione communicatur eadem perfectio infinita simpliciter, cum actio illa sit realiter vna, & duplex virtualiter, & sic prima processio non exhaurit virtutem eius simpliciter, sed solum, quatenus dictio est; secunda verò quatenus spiratio; & præterea prima processio, quæ est identice infinita simpliciter ratione essentia, quam includit; formaliter tamen est infinita solum in ratione talis processionis, quæ est generatio: & sic non relinquit locum tertiæ, & quartæ, eo quod in natura intellectuali, non possunt esse aliæ processionem, quam secundum intellectum, & voluntatem.

Instabis saltem poterunt esse plures secundum intellectum, & plures etiam secundum voluntatem. Resp. non posse, eo quod vtrâque processio est infinita in suo genere formaliter, & præterea excludens quamcumque aliam eiusdem generis; & propterea non posset esse talis pluralitas sine distinctione quoad absolutum; duo enim Filij à Patre procedentes nullam haberent inter se oppositionem originis; ibi enim non datur distinctio realis, nisi ubi obuiat oppositio relatiua; & ponere distinctionem realem pe-

nes absoluta, esset ponere plures Deos.

Dices 4. cum Durando. Actiones immanentes intellectus, & voluntatis non possunt esse id, quo producitur Verbum, & spiritus sanctus, nisi sint vel productiones personarum, vel principia productiua: sed neque vnum, neque alterum habent: ergo productiones Diuinæ non sunt per intellectum, & voluntatem, nisi appropriatè. Probatur minor quoad primam partem; quia ad hoc, vt essent processionem, siue productionem, deberent esse actus notionales, sed actus intellectus, & voluntatis sunt actus essentialis, non verò notionales; ergo sub hac ratione non possunt esse id, quo producantur Personæ: sed neque vt principia (quod est altera pars minoris) habent enim actus illi conditionem oppositam fecunditati, quæ est, quod ex illis nihil sequitur, vt habet Aristoteles lib. 9. Metaph. textu 16. Ergo nullo modo possunt esse id, quo producantur personæ. Confirmatur primo quoad productionem, de quibus est maior difficultas; quia si actus illi essent productionem, cuiusque competeret intelligere, & velle, competeret etiam producere personam; & sic etiam competeret spiritui sancto. Confirmatur secundo, quia productio-

nes realiter differre debent sicut personæ productivæ, cum quibus identificantur; sed intelligere, & velle solum differunt per intellectum; ergo, &c. Resp. negando minorem. Ad probationem primæ partis Resp. verum quidem esse ipsum intelligere, & ipsum velle, ut sunt actus essentialis, & rationes absolutæ, non esse productiones neque activas, neque passivas, sed nihilominus esse aliquid in illis inclusum; cum quo tamen stat, quod, ut sunt, & important ipsum dicere, & ipsum spirare, non sint amplius, quid commune; hoc enim modo iam includunt ipsas relationes, & sunt ipsimet actus notionales. Et sic ad primam Confir. Resp. verum esse quod cuicumque competit tale intelligere notionale, siue quod sit etiam dicere, convenit etiam generare, quod idem dic de velle notionali respectu spirationis; sed ut sic sumuntur, primum competit soli Patri, secundum verò Patri, & Filio, ut sunt spirator. Ad secundam Confirmationem, Resp. intelligere, & velle essentialia sola ratione differre; intelligere verò, & velle notionale, quamvis inter se differant sola ratione ex parte principij, nihilominus à terminis productis distinguuntur realiter; eo quod cum illis habeant opposi-

tionen, relativam.

Dices 5. cum eodem A. fecunditas proportionaliter convenit Deo, & creaturis; sed non convenit creaturæ, quæ intelligens est, nam etiam irrationalia sunt productiva similis; & homo per aliquid prius, quam per intellectum est fecundus: ergo huiusmodi processiones non sunt per intellectum, &c. Resp. quod si sermo sit de fecunditate, quæ communicatur naturæ, ut debet esse in præsentis proposito, negatur maior; neque enim constitui debet idem modus communicationis in naturæ immateriali, & independenti, qui ponitur in naturæ materiali, & corruptibili; quod si sermo sit de quacunque potentia ad aliquid producendum, negatur minor; nam etiam homo, ut intelligens, producit verbum per intellectum, & amorem per voluntatem. Hac distinctione faciliè solvuntur alia argumenta similia.

Dices 6. pro eodem Dur. ex SS. PP. Hilar. Augustino & alijs: Filius dicitur genitus naturæ: ergo non est genitus per intellectum, qui est attributum ipsius naturæ, & ab ea ratione ratiocinata distinctus. Resp. communiter, hoc, quod est verbum naturæ produci, stare dupliciter: primo ut ly natura dicat principium gene-

generationis : secundo vt dicat modum , & tam in primo quam in secundo sensu verificari prædictum axioma : In primo dicendo ipsum intelligere esse non solum identicè , sed etiam formaliter ipsam naturam Diuinam , vt plurimi , & celeberrimi DD. docent, quibus adhæreo , & in Controuersia de Scientia Dei explicauit : & hoc modo esse principium vt quo generationis ; Secundo verò modo idem esse generari natura , ac generari necessariò , non autem liberè , quod est citrà vllam controuersiam .

Dixi supra : prædictam Durandi sententiam à plurimis DD. iudicari censura dignam ; eam enim , & Molin. Disput. 2. ad quæst. 28. primæ partis S. Thom. non solum falsam , & temerariam , sed etiam periculosam in fide , & erroneam appellat , cui subscribit Alex. Pefantius ibidem ad artic. 5. Disput. 1. §. 3. Vasquez tom. 2. Disput. 112. cap. 2. contra eam acriter agit , & eam putat redolere hæresim Alogianorum ex parte, idest in modo loquendi , quatenus illi non admittebant in Deo Verbum propriè dictum . Dissentit tamen ab eis in eo , quod illi negabant Trinitatem personarum , quam Durandus admittit . Sed re vera arbitror alium fuisse sensum Durandi ab eo Alogiano-

rum , negantium hoc Mysterium . Valentia Disput. 2. Tomi primi Quæst. 1. puncto 3. §. *Ceterum* , eam temeritatis arguit . (Fallitur tamen Valentia in eo , quod putat sententiam hanc Durandi esse eandem , quam tenuit Gregorius noster Ariminensis in 1. distinct. 10. quæst. vnica in resp. ad rationem primam principalem , & distinct. 13. quæst. vnica : nam vt rectè obseruat Vasquez loco citat. Cap. 1. num. 3. in illis locis solum disputat Ariminensis de principio quo generationis , &c Sed non negat processionem Verbi esse formaliter intellectiōem , & spirationem Spiritus Sancti esse actum volendi ; vnde , vt rectè ait ibi Vasquez , immerito ei attribuitur talis opinio) . Redundo nunc ad prædictorum DD. censuram de Durandi sententia , hanc posteriorem Valentia Recentiores arbitrantur eum in hoc puncto promereri : Primo , quia est contra communem PP. & DD. Scholasticorum sententiam . secundo , quia non tuctur , quomodo Filius dicatur Verbum , & Spiritus Sanctus Amor . Tertio , quia non saluat , quomodo secunda persona , non verò tertia dicatur Filius , quod optimè saluatur , si secunda per intellectum , tertia per voluntatem dicatur procedere . Quarto , quia nec etiam alio

modo saluari potest, quod Filius à solo Patre, & Spiritus Sanctus à Patre, & Filio procedat, & cur processio Spiritus sancti sit posterior origine processione Filij, quod optimè saluatur in communi sententia, ex eo quod operatio voluntatis supponit operationem intellectus. Nec sufficit, quod addit Durandus ad soluendum hunc nodum, nempe in tantum Filium dici productum per intellectum, Spiritum Sanctum verò per voluntatem, quia prima processio in creatura intellectuali est per intellectum, secunda verò per voluntatem; nam si non admittitur etiam in Deo talis ordo, non concluditur vlllo modo intentum. Quinto & ultimo: non potest assignare Durandus cur in Deo sint duæ processiones, & non vna tantum, aut plures. Cur enim, cum prima processio, quæ est infinita, non exhaurit fecunditatem naturæ diuinæ, exhaurit secunda? Nos rectè assignamus, quia in natura purè spiritali non est inuenire aliam processionem, quam per intellectum, & voluntatem: neque processio infinita per intellectum relinquit locum alteri secundum eandem rationem intel-

lectionis; & sic de voluntate, eo quod Deus comprehensiuè se intelligit, & se amat actu proportionali. Quapropter cum idem intelligere, quod est in Patre, communicetur Filio, & prout est in Patre habuerit terminum adæquatum, nempe Verbum productum; iam non potest in Filio habere alium terminum, & sic Filius non potest generare alium filium, sicut neque Pater potest generare duos filios, quia vnicum verbum explet, & adæquat fecunditatem intellectus Diuini; Et hoc idem dicendum de secunda Processione; cum enim idem velle Patris, & Filij communicetur Spiritui Sancto, & prout est in prima, & secunda persona habuerit terminum adæquatum, non potest in Spiritu Sancto terminari ad alium Spiritum Sanctum; sicut neque in Patre, & Filio poterat terminari ad duos amores productos. At in sententia Durandi, cum principia proxima productionis, non sint quoad numerum determinata, & prima processio non adæquet, aut exhauriat fecunditatem naturæ; non apparet cur debeat exhaurire, aut adæquare secunda.

## A X I O M A   S E C V N D V M .

*Vna processio in Diuinis est generatio ; altera non .*

Ex Lib. II. de Ciuit. Dei Cap. 24.



*Redimus & tenemus , & fideliter predicamus , quod Pater genuerit Verbum , hoc est Sapientiam , per quam facta sunt omnia , vnigenitum Filiam , vnus vnus , aternus coaeternus , summè bonus equaliter bonum , & quod Spiritus Sanctus simul , & Patris , & Filij sit Spiritus , & ipse consubstantialis , & coaeternus ambobus .*

## D V B I V M   I I .

Cur vna ex Diuinis ProceSSIONIBVS sit generatio ,  
& non altera .

**P**raemitto hic primo hanc questionem supponere duo sanctae fidei nostrae de hoc Mystério documenta . Primum est praeter processionem Verbi , dari in Deo aliam , per quam Spiritus Sanctus procedit . Secundum est processionem Verbi esse generationem , non verò illam Spiritus Sancti .

Praemitto 2. ex Sacris Scripturis rectè colligi Verbum à Patre procedere , & primo quidem ex

Prouer. cap. 8. vbi habetur *Domini possedit me .* Qui locus , & de generatione Christi , vt hominis rectè explicatur à S.P.N. lib. I. de Trinit. cap. 11. , & de generatione aeterna à quibusdam alijs PP. vt à S. Iustino in Dialogo triplici , à S. Basilio lib. 2. contra Eunomium , à Pamphil. in Apolog. pro Orig. à S. Hieronymo in eum locum , qui in Epist. ad Cyprianum monet nihil referre , quod alij legunt *creauit* ; in hebraeo enim

enim non est verbum significans *creavit*, sed *possedit*. Imò esto S. P. Augustinus iuxta versionem, septuaginta legat, *creavit*; & propterea illud exponat de Christo homine; nihilominus verba illa sequentia, *ante omnes colles ego parturiebar* explicat de Sapientia genita, vt verè exponendum est. Nam Christus Dominus, vt homo, non erat secundum esse reale ante omnes colles; nec sufficit dicere fuisse secundum esse obiectuum; quatenus scilicet erat in aeterna prædestinatione præcognitus, & prædefinitus; non enim benè postea subiungeretur, *cum eo eram cuncta componens*. Iuxta prædictam expositionem igitur idem erit *possedit*, ac *generavit* iuxta illud Gen. 4. *Possedi hominem per Deum*. secundo & fortius colligitur ex Cap. 24. Ecclesiastici. *Ego ex ore altissimi prodii primogenita ante omnem creaturam*; quem locum S. P. N. Augustinus lib. 1. de Trinit. Cap. 6. S. Ambrosius lib. 4. de Fide cap. 4. & alij PP. explicant de Sapientia genita, & rectè; neque enim potest intelligi de sapientia essentiali, quæ neque est primogenita, nec genita. Neque commodè potest explicari cum Iansenio de Sapientia creata; de hac enim non potest verè dici, quod sit primogenita ante omnem creaturam.

Quapropter cum Siricio Epist. 1. ex eo loco rectè PP. probant Filium esse eiusdem essentiae cum Patre. Tertio colligitur ex Cap. 5. Micheæ, vbi de Christi Domini Natiuitate dicitur. *Et egressus eius sicut initio à diebus æternitatis*. Hæc ita communiter à PP. exponuntur, vt postrema de æterna generatione, priora de Incarnatione, & Natiuitate eius dicta sint. Ita S. Hieronymus ibi. S. Ioannes Chrysostomus in psal. 44. Euseb. lib. 7. de Demonstr. Eu. 1. 2. Cyrillus lib. 2. de Trinit. Colligitur 4. ex illo Ioan. Cap. 16. *Exiui à Patre, & veni in Mundum*. Quæ verba licet cum S. P. N. lib. 1. de Trinit. cap. 10. exponi possint de Incarnatione per ly *exiui à Patre*, & de eius conuersatione cum hominibus per ly *veni in Mundum*. Communiter tamen à PP. ita exponuntur, vt prima de æterna generatione, posteriora de Incarnatione intelligantur. Ita S. Hil. lib. 6. de Trinit. S. Athanasius Epist. ad Epictetum. Basil. lib. 5. contra Eunom. &c. Dicunt aliqui hanc expositionem esse magis ad sensum Scripturæ, eo quod si ly *exiui à Patre* significaret incarnationem, non esset cur adderetur ly *veni in Mundum*, &c. sed frustra hoc obijcitur. Nam in communi vsu loquendi dicitur aliquis venire in Mun-

Mundum, quando exit ab utero Matris. Vbi aduertere esse phrasim Scripturæ, vt natiuitas exitus appelletur. His positis.

Dico 1. Processionem Verbi à Patre esse veram generationem. Hæc assertio est de fide, & tam certa, quam certum est Verbum esse Dei Filium; contenta in symbolo Niceno illis verbis *Genitum, non factum*, & in symb. Athan. in illis *Filius à Patre solo est, non factus, nec creatus, sed genitus*. Et probat. primo ex Scripturis. Primo quidem ex Psal. 2. *Ego hodie genui te*; quem locum de æterna generatione exponit S. P. N. ibi, cum ait *quo sempiternam generationem virtutis, & Sapientia Dei, qui est vnigenitus Filius, fides sincerissima, & catholica prædicat*. sic etiam exponit Cassiod. Basil. lib. 2. contra Eunom. Beda, & Primasius. Alij exponunt de Resurrectione; alij de Incarnatione, quod non latuit s. Patrem. Nam antea dixerat. *Quamquam etiam possit ille dies in Prophetia videri, quo Iesus Christus secundum hominem natus est*. Nihilominus videtur primario ibi intellectam esse generationem æternam; nam vt rectè obseruat ibi S. P. *Hodie, quia præsentiam significat, atque in æternitate, nec præteritum quidquam est, quasi esse desierit, nec futurum,*

*quasi nondum sit, sed præsens tantum; quia quidquid æternum est, semper est: diuinitus accipitur secundum id dictam*. Ergo, &c. secundo ex illo Psal. 109. *Ex utero ante luciferum genui te*. Vbi licet S. P. velit dictum de natiuitate ex Sanctissima Virgine, propter verba sequentia, idest *iurauit Dominus, & non pœnitebit eum: tu es sacerdos in æternum secundum ordinem Melchisedech*. Non flet tamen ibi generationem æternam; subiungit enim. *Nam secundum id, quod natus est de Patre, Deus apud Deum, coæternus gignenti, non sacerdos, sed sacerdos per carnem assumptam*, &c. vidit enim etiam hunc sensum posse tribui illis verbis; saltem secundario, & obliquè; ad æternam enim generationem referunt S. Ambr. lib. 4. de Fide cap. 4. S. Hil. lib. 6. de Trinit. S. Ioan. Chrysostomus hom. 2. in Matth. S. Leo Serm. de Natiuit.; & S. Hieronymus ibi, &c. Tertio ex cap. 8. Prouerb. de Sapientia. Diuina dicitur: *Nondum erant abyssi, & ego iam concepta eram*. Et ex cap. 24. Ecclesiast. vbi dicitur. *Prodiui primogenita ante omnem creaturam, & Isaia cap. 44. Generationem eius quis enarrabit: quæ loca ferè ab omnibus exponuntur de generatione æterna*. In nouo testamento nihil clarius: sæpissimè enim dicitur Chri-

stus

flus Filius Dei vnigenitus, qui est in sinu Patris, &c. Primogenitus, &c.

Probatur secundo ratione. Quia huic emanationi conueniunt omnes particulæ, quæ continentur in definitione generationis viuientium, quæ communiter sic traditur: *Generatio est origo viuentis à viuento in similitudinem naturæ*, & habetur lib. 2. de Anima, addunt aliqui *ex vi sue processions*. Est enim Processio Verbi origo viuentis à viuento, eo quod Verbum, quod non solum est viuens, sed etiam essentialiter vita, procedit à viuento, idest Patre, & est à principio coniuncto, quia principium huius emanationis est essentia Diuina, quatenus est in prima persona, quæ necessario est improducta, & terminatur proprietate personali, quæcunque illa sit; & est in similitudinem naturæ, quia procedit Deus de Deo, idque ex vi sue processions, &c. quod à multis additur, eo quod potest esse origo viuentis à viuento in similitudinem naturæ, quæ tamen non sit generatio, vt fuit origo Eux ab Adam.

Dices generatio propria viuentium includit generationem incommuni, quæ definitur: *Mutatio ex non subiecto in subiectum*, sed processio Verbi non est mutatio; ergo nec potest esse genera-

tio viuentis. Resp. generationem viuentium secundum se abstrahere à mutatione, & negatione mutationis; & in creaturis quidem communiter, & regulariter, ac etiam necessario includere mutationem, eo quod generans non potest suam naturam numericam communicare genito, sed solum aliam numero diuersam, & sic necesse est, quod introducat formam nouam in materiam iam præexistentem, quod non potest stare sine mutatione materiæ. Hoc in diuinis non habet locum, vbi nulla est materia, & eadem numero essentia generantis communicatur genito ab æterno. Per hæc iam satisfactum est primæ parti huius quæstionis.

Pro solutione secundæ partis, in qua quæritur, cur altera processio non sit generatio, quæ est difficilior prima.

Præmitto rationem dubitandi oriri ex definitione generationis, cuius singulæ partes videntur conuenire processioni spiritus sancti; oritur enim viuens à viuento, idest Deus de Deo, à principio coniuncto, idest à voluntate, in similitudinem naturæ, quia in eadem numero. Præterea ad hoc vt aliqua processio sit generatio, sufficit, vt ex vi illius communicetur similitudo in natura; propterea



pterea enim processio Verbi est generatio, & sic etiam productio- nes animalium infra eandem spe- ciem; sed ex vi spirationis com- municatur natura Diuina, proce- dit enim spiritus sanctus, vt Deus; nam ex vi suæ processionis est per- sona Diuina, & amor, non crea- tus, sed increatus; ergo Deus. Vltcrius spiritus sanctus habet naturam Diuinam, & non habet illam à se, sed communicatam à Patre, & Filio; at non habet aliter communicatam, quam per spirationem; ergo ex vi illius procedit similis in natura. Si dic- cas cum comuni processionem spiritus sancti esse productionem similis in natura, non formaliter, & ex vi processionis, sed materia- liter, & identicè; quatenus scilicet talis processio est diuina: ad generationem verò requiri, vt formaliter sit communicatio natu- ræ, ac similitudinis in natura. Contra est, quia hoc modo nec etiam productio Verbi esset gene- ratio; nam etiam huic productioni quadam formaliter conueniunt, quatenus dictio, & quadam identi- cè, quatenus intellectio Diuina; ad hoc enim vt illa dictio sit ge- neratio, non sufficit quod sit com- municatio naturæ identicè; nam sic etiam spiratio esset generatio; sed oportet, quod formaliter vt dictio est, siue intellectio, sit ta-

lis. Atqui intellectio Diuina, vt sic est tantum communicatio simi- litudinis intentionalis, seu in esse intelligibili, & repræsentatiuo, quæ similitudo si sufficeret ad ge- nationem; etiam nostra produ- ctio verbi esset generatio, cum per illam producatur similitudo intentionalis obiecti. Quod si opponas nostram non esse gene- rationem, quia terminatur ad accidens; bene tamen Diuinam, quia terminatur ad substantiam. Contra est primo quia intellectio Diuina habet esse substantiam ex natura Diuina identificata, non verò ex eo, quod sit intellectio. secundo ex eo præcisè quod in- tellectio Diuina sit substantia, ha- betur solum quod eius communi- catio sit communicatio similis in- esse repræsentatiuo substantiali, non verò accidentali; cum tamen præter hoc requiratur similitudo in natura. Tertio quia intellectio Patris non potest aliud dare, quam id, quod ipsa formaliter est; at ipsa non est formaliter si- militudo in natura, sed solum in esse intentionali: Vnde si ideò processio spiritus sancti non di- citur esse in similitudinem natu- ræ, quia per illam communica- tur formaliter amor, qui solum identicè est Deus, pari modo de- intellectione erit philosophan- dum, Denique similitudo in-

C

esse

esse intentionali, & similitudo in natura sunt diuersæ rationis. Ergo quantumuis prima perficiatur in suo genere nunquam attinget similitudinem naturæ; quemadmodum Veritas ex eo, quod in infinitum perficiatur in ratione veritatis, nunquam attinget ad rationem formalem Misericordiæ, aut intellectio ad rationem volitionis. Hæ, & similes sunt rationes dubitandi in hoc puncto; vt propterea S. Bernardus Sermonibus primo de Pentecoste dixerit processionem Spiritus Sancti esse obscurissimam, & posuisse tenebras latibulum suum; & S.P.N. lib. 3. contra Maxim. cap. 13. *Distinguere inter illam generationem, & hanc processionem nescio, non valeo, non sufficio*, & lib. 15. de Trinitate Cap. 27. *Difficillimum est generationem, à Processione distinguere*, & similia habent alij PP. scilicet s. Greg. Nazianz. orat. 5. de Theol. S. Ambros. lib. 1. de Fide cap. 5. S. Athanas. *Epist. ad Seraph.* Nihilominus Theologi, vt veritas magis elucescat, ad reddendam huius rei rationem aliquantulum congruentem, & probabilem laudabiliter insudarunt. Et plures explicandi modos inuenerunt: Ex quibus præcipui sunt, qui sequuntur.

Durandus in 1. distin. 6. quæst. 2. ait Filium procedere per modum

naturæ, quia est vt vnum ab vno, & non procedit à pluribus eiusdem gradus, & ordinis, quorum quilibet per se sufficeret ad producendum. At Spiritus sanctus procedit per modum voluntatis, quia procedit à duobus, quorum quilibet posset seorsum producere. Hanc rationem tetigit etiam S. P. lib. 15. de Trinitate cap. 27. vbi negauit Spiritum Sanctum esse Filium. *Quia cum à duobus procedat, ad illos compararetur tamquam ad Patrem, & Matrem, cum tamen etiam in humanis Filius ab vno procedat, à Patre in Matrem, & à Matre sine Patre.*

Sancti Patres, vt responderent Argumento Macedonij Heresiarchæ, qui contendebat Spiritum Sanctum non esse consubstantiallem Patri, eo quod nihil sit alteri consubstantiale, nisi ab illo sit genitum; vt refert s. Gregorius Nazianzenus orat. 5. de Theologia, variè conati sunt rationem aliquam congruentem asserre, quæ saluarent consubstantialitatem Spiritus sancti, quin admitterent eius processionem esse generationem.

Ipse S. Gregorius Nazianz. Respondet Adam, Euam, & Seth fuisse eiusdem substantiæ, & tamen diuersis modis productos.

S. Basilii contra Eunomium lib.

lib.5. negat Spiritum sanctum dici Filium, quia posset inde oriri suspicio, quod essent in diuinis plures Filij.

S.P. Augustinus lib.5. de Trinitate cap. 14. Respondet secundam personam esse Filium, quia procedit, vt natus, Spiritum sanctum non item, quia procedit, vt datus.

Contra hæc multa faciunt, & præcipuè contra sententiam Durandi hæc tria militant. Primum est, quod processio debet distinguì penes terminos, vel principia, non verò penes supposita, producentia; inspiratione verò idem est principium principale, producens, quod in generatione, & idem terminus, communicationis, idest eadem essentia Diuina. Secundum est, quod Pater, & Filius ita concurrunt ad spirationem, vt nec liberè in illam consentiant, nec possit vnus sine alio producere. Tertium est, quod notauit scotus in 1. distinct. 13. quæst. vnica. Si vnica albedo, & eadem numero poneretur in duobus subiectis, non ideo esset diuersa immutatio visus ab ea, quæ esset ab albedine existente in vno, quam ea, quæ esset ab eadem existente in vtroque. ergo neque processio ob distinctionem suppositorum. Ratio S.P. est ibi adducta, vt minus principalis.

Ad rationem S. Gregorij. Resp. eundem S. Doctorem tateri exemplum non adæquare, & esse disparitatem in eo, quod Eva non fuit genita ex Adam, iste enim merè passiuè se habuit; at Spiritus sanctus procedit à principio coniuncto, quemadmodum procedit Filius per productionem actiuam. Nihilominus exemplum hoc rectè infringit rationem Macedonij importunè querentis, vt assignetur, aliquid non genitum ex alio, quod sit eiusdem substantiæ cum illo.

Ad rationem S. Basilij posset Hæreticus respondere, quod si essent duo geniti nullum esset inconueniens, quod dicerentur duo filij; ac proinde in præsentì queri rationem, cur non sint. Cum quo tamen stat, quod ratio huius sancti rectè probet, eas processiones non esse eiusdem rationis; quia prima, cum sit infinita, expleuit fecunditatem principij, & si duæ admitterentur, non est cur non etiam admittantur tres, & quatuor.

Ad rationem S.P.N. Resp. neque hanc, neque illam adductam à Durando, esse adductas à Sancto Patre, vt conuincentes, sed solum, vt congruentes, & quæ videntur facere aliquam, sed non omnimodam probabilitatem; nullam enim ex his vrget, aut fuisse

explicat, sicut explicat illam, quam pro cardinali cum S. Thom. sequimur & amplectimur. Resp. igitur directe, quod cum per eundem S. P. esse datum solum addat respectum quendam ad nos, non apparet quomodo hoc obstat generationi. His igitur exclusis, de quibus hodie aut nulla, aut ferè nulla est in scholis mentio; venio ad præcipuos modos, quibus à diuersis DD. Scholasticis difficultas hæc explicari solet.

Primus est Richardi Victorini lib. 6. de Trinitate Cap. 19. quem postea secuti sunt Alensis 1. par. quæst. 42. memb. 2. §. 1. & Maior in 1. distinct. 13. quæst. 1. & est, quia de ratione Filij est, ut accipiat naturam à Patre cum virtute, quam habet Pater, eam alteri communicandi, quam cum accipiat Verbum in ordine ad spiritum sanctum, & non accipiat spiritus sanctus, cum potestate eam communicandi alteri personæ Diuinæ, propterea Verbum dicitur Filius, & eius processio generatio, non verò illa spiritus sancti.

Secundus modus est S. Thom. 1. par. quæst. 27. artic. 4. dicentis Processionem Verbi esse generationem, non verò processionem spiritus sancti, quia ex vi illius procedit Verbum per modum si-

mitudinis. At spiritus sanctus ex vi suæ processionis non procedit per modum similitudinis, sed per modum impulsus, inclinationis, & amoris. Hoc discrimen colligit S. Doctor ex modo operandi nostri intellectus, & nostræ voluntatis.

Tertius modus est Scoti in 1. distinct. 17. docentis has Processiones seipsis differre, atque adeo Processionem Verbi Diuini seipsa formaliter, & ex natura sua esse generationem; processionem vero spiritus sancti se ipsa, & natura sua non esse generationem; sed ab ea distingui.

Quartus est Caietani in Com. prædicti artic. S. Thom. explicantis eius rationem sic: Verbum generatur, & est Filius, non verò spiritus sanctus; quia Processio Verbi est per intellectum, quod autem procedit per intellectum, ex vi suæ processionis procedit simile principio producendi; at verò spiritus sanctus procedit per voluntatem, & quod per illam procedit, non producit simile principio producendi: & sic exponit particulam illam *ex vi suæ processionis*, quam existimat esse addendam definitioni generationis.

Quintus est Canariensis in Expositione artic. 2. quæst. 27. par. 4. quem postea sequutus est Vasquez tom.

tom. 2. disput. 113. cap. 7. Hi contendunt aduersus doctrinam S. Thom. & Caietani spiritum Sanctum ex vi suæ processionis non minus procedere similem in natura Patri, & Filio, à quibus procedit, quam procedat Filius ex vi illius similis Patri; ac proinde ex hoc capite non rectè assignari differentiam inter processionem illas; sed esse desumendam ex eo, quod Verbum ex vi suæ processionis procedit, vt imago sui principij, non verò Spiritus Sanctus; & ideo particulam illam *in similitudinem naturæ* esse explicandam non de similitudine, quæ prouenit ex unitate naturæ, sed de similitudine, quæ est imago; procedere verò, vt imaginem nihil aliud est, quam procedere ad repræsentandum suum principium, eo quod de ratione Filij, vt Filij, est, vt ex vi suæ processionis sit imago Patris. Ac propterea aliquem magis, vel minus dici Filium sui Patris, quo magis illum repræsentat, & quandoque aliquem dici non esse Filium sui Patris, eo quod illum non repræsentat.

Alios explicandi modos tam SS. PP., quam Scholasticorum adducit idem Vasquez, & explicat, ac reijcit in præcitata disputatione à cap. 3. vsque ad 6. in clusiue, quos modò non vacat

transcribere: prædicti enim hac tempestate sunt plausibiliores inter Scholasticos, iuxta diuersitatem Scholarum. Quibus positis.

Dico optimam rationem explicandi hanc difficultatem esse eam, quam tradit S. P. N. lib. 9. de Trinit. cap. 12. vbi sic eam proponit. *Cur non Spiritus quoque Sanctus à Patre Deo genitus, vel creditur, vel intelligitur, vt Filius etiam ipse dicatur?* Et quæstionem soluit ex principijs communibus notitiæ, & amoris sic. *Notitiæ paritur à cognoscente, & cognito. Itaque mens, cum se ipsam cognoscit, sola parens est notitiæ suæ, &c. Cur non etiam cum se amat? erat enim amabilis sibi, & antequam se amaret, sicut erat sibi noscibilis, sed ideo non rectè dicitur genitus amor, sicut notitiæ: quia notitiæ iam inuentum est, quod partum, vel repperitum dicitur. Quæ autem reperiuntur, quasi pariuntur. Vnde quasi proli similia sunt: vbi, nisi in ipsa notitiæ? Ibi enim expressæ formantur.* Hæc ratio S. P. non placet Vasquez, ac propterea illam reijcit loco citato cap. 3. S. Deinde lib. 9. de Trinit. cap. 12. eamque infirmam vocat propter duo. Primo, quia in Deo intellectus fertur in rem intellectam non minus sine inquisitione, & labore veluti parturiendi, quam voluntas



luntas in rem dilectam. Secundo, quia licet in nobis verbum mentis appelletur conceptus, & partus; metaphorice tamen sic dicitur. Vnde si ob eandem rationem Verbo Diuino ratio geniti tribueretur; metaphorice, & per quamdam appropriationem ei conueniret, quod est absurdum. His tamen non obstantibus: ratio S.P. recte intellecta, & iuxta germanum eius sensum explicata, inconcussa manebit.

Pro quo sciendum est, apud S.P. Sapientiam Dei, siue actualement eius intellectionem esse de primario, & formali constitutiuo ipsius; propterea in lib.6. de Trinit. cap.10. dixit. *Primus, & summus intellectus, cui non est aliud viuere, & aliud intelligere, sed id, quod est intelligere, hoc viuere, hoc esse est unum omnia.* Et pariter lib.7. de Trinitate cap.7. *Deo hoc est esse, quod sapientem esse, hoc autem est sapientem esse, quod intelligere.* De quo iam supra egi Controversia decima, quæ est de intellectione, & Scientia Dei, Dubio primo. Ex quò principio cum non detur in Deo vita, seu intellectus per modum actus primi, seu potentiae, siue radice, sequitur radicem virtualem actualis amoris, & cæterorum attributorum esse ipsam actualement intellectionem, ac proinde amorem, & reliqua

attributa esse veluti proprietates consequentes ipsam actualement intellectionem; quæ est metaphysicum, & formale constitutiuum diuinæ naturæ. sic ergo ad mentem S.P. est explicanda doctrina ipsius, reiecta à Vasquez; ut ratio, propter quam productio secundæ Personæ est generatio, non verò productio Spiritus Sancti, sit, quia productio per intellectionem per se terminatur ad personam similem in natura Diuina, quia talis persona procedit per intelligere, & intellectio est vltimum constitutiuum naturæ Diuinæ; non sic Spiritus sanctus, qui procedit per volitionem, & volitio est quædam quasi proprietas consequens diuinam essentiam: propterea S.P. in prædicto loco non facit vim in mente, seu intellectu per modum potentiae, sed in ipsa actuali notitia, siue intellectione. Vbi acutè ait. *Quod ergo cognoscit se, parem notitiam sui gignit; quia non minus se nouit, quam est, nec alterius essentia est notitia eius, non solum quia ipsam nouit, sed etiam quia se ipsam, sicut supra diximus.* Vbi aduerte illa verba non minus se nouit, quam est. Et illa, nec alterius essentia est notitia eius. Postea explicans quare amor productus non sit Filius, subdit statim. *Quid ergo de amore dicendum est,*

est, cur non etiam cum se amat, ipsum quoque amorem sui genuisse videatur? Et reddit rationem supra allatam, dicendo. In eo quidem manifestè ostenditur hoc amoris esse principium, unde procedit: ab ipsa quippe mente procedit, quæ sibi est amabilis, antequam se amet: atque ita principium est amoris sui, quo se amat. Est ergo actualis notitia essentia illa, ad quam, velut ad radicem, consequitur amor. Nec te moueat, quod hic mentem nominet, quæ videtur sonare potentiam; nam familiare est P.P., & Scholasticis, etiam ijs, qui tenent intellectiōnem esse de formali constitutiōe Dei, explicata sua sententia, uti verbis intellectus, & mentis, pro quibus iam venit in Deo ipsa actualis intellectiō, & cognitio, & tanto magis in præsentī loco S.P. cum immediatè ante, proponendo iterum prædictam quæstionem, se explicet de actuali cognitione; ait enim: *Cur itaque amando se, non genuisse dicatur amorem suum, sicut cognoscendo se, genuit notitiam suam.* Et ut hoc clarius innotescat; aduerte, quod hanc doctrinam superius explicauerat clarissimè, ad quam se refert illis verbis, *sicut supra diximus.* Hoc autem præstitit lib. 7. cap. 1. versus finem, ubi ait, *Quid aliud dicimus, cum dicimus.*

Hoc illi est esse, quod sapere, nisi eo est, quo sapiens est. Ergo & Pater ipsa sapientia est; & ita dicitur Filius sapientia Patris, quomodo lumen Patris, &c. id est utrumque unum lumen, & una sapientia: ergo & una essentia, quia hoc est ibi esse, quod sapere. Quod enim est sapientia sapere, &c. hoc est essentia ipsum esse. Et quia in illa simplicitate non est aliud sapere, quam esse: eadem ibi sapientia est, quæ essentia. Cap. 2. Eo Filius, quo Verbum, & eo Verbum, quo Filius, & non eo verbum, quo sapientia, &c. sapientia verò eo, quo essentia, &c. Id dici accipiamus, cum dicitur verbum, ac si dicatur nata sapientia, &c. In uno eorum, quod nata est, & Verbum, & imago, & Filius intelligatur, &c. At in altero, quod sapientia, etiam essentia demonstretur. Et hoc eius esse, quod sapere, &c. non hoc esse, quod verbum esse. Quot verba, tot mysteria! nec clarius, nec solidius profectò explicari potuit, qualiter, & ipsa sapientia sit formale constitutum essentia Divinæ, & quomodo Filius procedendo Sapientia genita ex sapientia ingenerata, habeat rationem generati, & sit procedens viuens à viuente, id est sapiens à sapiente in similitudinem naturæ, & essentia, id est illius sapientia, quæ est eius

eius essentia. Altior est ergo sensus S.P., quam ille, quem tribuit illi Vasquez loco citato. Nec est illa ratio infirma; quæ validior cæteris demonstratur: Quam propterea, ut talem docuit etiam Angelicus Doctor 1. par. quæst. 27. artic. 2. in Corp. Vbi ait ideò processionem Verbi esse generationem, non verò processionem Spiritus sancti, quia ex vi processionis communicatur Verbo natura diuina directè, seu intelligere diuinum: *quia in Deo idem est esse, & intelligere*. Et hoc idem repetit ibi in responsione ad secundum; & hæc profectò est germanissima sententia sancti Thomæ, & iuxta tradita in dicto articulo sunt accipienda ea, quæ docet postea in articulo quarto eiusdem quæstionis, cum ait Processionem Verbi esse generationem, quia ex vi eius procedit Verbum per modum similitudinis, non verò Spiritus sanctus, qui procedit per modum impulsus.

Hanc eandem sententiam amplexi sunt Suarez lib. 11. de Trinit. cap. 5. Alexander Pesantius in 1. par. ad quæst. 27. S. Thom. Disput. 1. ad artic. 4., & nouissimè Ludonicus Caspensis tom. 1. Tract. de Trinit. Disput. 1. num. 87., & plures alij recentiores.

Ex dictis sic formari potest ratio cardinalis ad probandum in-

tentum. Generatio est processio, per quam communicatur essentia, & natura, ut talis est, ex Arist. lib. 2. Phy. text. 14. sed Verbo diuino ex vi processionis communicatur formaliter intellectio diuina actualis, quæ nostro modo intelligendi est essentia diuina, & Spiritui sancto ex vi processionis, siue formaliter solum communicatur volitio diuina, quæ est quid consequens diuinam essentiam; ergo sola processio Verbi est generatio, non verò processio Spiritus sancti.

Secundo probari potest ex sufficienti refutatione aliarum rationum, & probationum. Prima enim, quæ est Richardi, communiter rejicitur, quia contra communem sensum Doctorum addit definitioni generationis aliquid, tanquam essentiale requisitum, quod re vera tale non est. Nam in creatis verè est filius ille homo, qui nascitur omnino impotens ad communicandum alteri naturam specificam. Præterea ratio illa, quæ pro hac sententia adducitur, nimis probat, ac proinde nihil probat: probat enim Filium debere procedere à Patre cum virtute communicandi naturam per generationem; unde Verbum Diuinum quod de facto non habet potentiam ad generandum sicuti habet Pater, non esset Filius.

Secun-



Secunda explicatio S. Thomæ, iam ex dictis elucescit esse cæteris meliorem.

Tertia, quæ est Scoti, non est sufficiens ad soluendam difficultatem; quia non procedit quæstio de distinctione reali personarum, sed de earum distinctione formali, siue quasi specifica; & quæritur ratio, ob quam vna sit generatio, altera non; in quo Scotus supponit id, quod est probandum.

Quarta probatio, quæ est Caietani rejicitur à pluribus, ex eo, quod additur definitioni generationis illa particula, *ex vi processionis*. Cum tamen in scholis Philosophorum, & Theologorum fuerit ab initio accepta sine tali additione; vnde si concedatur prohibito variare definitiones, quæ sunt potissima media argumentorum, & demonstrationum, nihil erit firmum in scientiis; sed quidquid sit de hoc. Si Caietani ratio non reducat ad explicationem S. Thom. non probat intentum, eo quod intellectio, vt intellectio non habet producere simile in natura, vt est clarum in intellectu creato, per quam producit solum aliquid simile in representando; quod idem dicitur de explicatione nostri Ferrariensis, qui in lib. 4. contra Gentes cap. 11. ait: Verbum diuinum

habere, quod procedat simile in natura, quia procedit per intellectioem, non tantum diuinam, sed etiam perfectissimam; quod non habet locum in spiritu sancto, qui procedit per actum perfectissimum voluntatis. Non satisfacit inquam, quia si semel præscindas intellectioem à creatura, & increata, iam præscinditur ab eo, quod sit formaliter natura Diuina; ac proinde ab eo, quod procedens per eam sit simile in natura; & solum manet similitudo intentionalis. Nisi fortè dicas præcisionem hanc non esse perfectam, sed imperfectam, quæ proinde includit confusè & eam, quæ est formaliter substantialis, & constitutum Diuinæ Naturæ, & creatam, quæ est accidentalis; quæ explicatione data absque dubio coincideret cum illa D. P. Augustini, & S. Thom. quam sequimur, vt supra explicatum est, & solum quo ad modum dicendi esset differentia.

Quinta explicatio, quæ est Carnariensis, & Vasquez rejicitur propter multa; primò, quia Filius non est Filius, quia imago, sed è contra est imago, quia Filius; & in hoc sensu S. Thom. lib. 4. contra Gentes cap. 11. probat Verbum esse imaginem, quia procedit secundum rationem similitudinis. secundo, quia sumitur

tur illa ratio ex principio minus certis: nam certius, & notius est absque dubio Spiritum Sanctum, non esse Filium, quam non esse imaginem. Tertio, quia ratio imaginis potest stare, sine ratione filiationis; nam ratio Verbi, ut sic, habet rationem imaginis, & non habet rationem Filij; alias quodcumque Verbum creatum, & quæcumque nostra intellectio haberet rationem filij, & veræ generationis, quod tamen est falsissimum. Etenim ratio imaginis in communi diuiditur in intentionalem, & naturalem, & ad filiationem veram non sufficit quæcumque, sed requiritur naturalis, quæ consequitur ad veram, & realem generationem; unde à primo ad vltimum, hæc semper est quid posterius, & consequens, ac proinde non potest esse, ratio à priori differentia inter generationem Diuinam, & Processionem.

Ex prædictis patet responsio ad objecta, relata in præmissa ad hanc difficultatem pro ratione dubitandi. Cum enim intellectio Diuina sit formale constitutum Diuinæ naturæ; iam in processione Verbi Diuini non communicatur solum identice, sed etiam formaliter ipsa Diuina natura, cum communicetur formaliter ex vi processionis diuinæ ipsa diui-

na intellectio, quæ est formalissimè ipsa vita diuina, & Diuina natura: ac propterea non est solum ibi communicatio similitudinis intentionalis, sed etiam naturalis; unde non dicimus esse generationem ex eo præcisè, quod sit substantia quocumque modo accepta, sed ex eo, quod sit talis substantia, quæ sit formaliter ipsa natura Diuina, & sic non est solum communicatio similis in esse, repræsentatiuo substantiali; sed etiam in esse naturæ. Vnde esto in Patre intellectio Diuina non sit formaliter similitudo in natura (ut opponitur in tertia replica), quia ut est in Patre, præcisè non est distinctio realis, quæ requiritur essentialiter ad veram, realem, & naturalem similitudinem; est tamen in eo formaliter ipsa natura Diuina, quæ est fundamentum sufficiens ad hoc, ut producta secunda persona, cui communicatur eadem natura, deatur naturalis similitudo.

Ad postremam instantiam. Resp. verissimum esse, similitudinem intentionalem, & similitudinem in natura esse diuersæ rationis, &c. Sed negamus similitudinem Filij cum Patre in intellectu Diuina esse solummodo similitudinem intentionalem, & dicimus habere etiam rationem simi-

similitudinis naturalis, vt patet ex dictis. Nam licet in creatis sint disjunctæ rationes istæ, nihilominus in Diuinis sunt identificate, quod non prouenit ex eo, quod similitudo intentionalis crescat intra suam lineam; sed ex eo, quod est intellectio

Diuina, quæ sicut habet esse in Deo independentis substantiæ, &c. habet etiam esse formaliter naturæ Dei, vt potè quæ est vita ipsius. Quæ non habet in creaturis. Et hæc de difficultate obscurissima indicasse. Satis.



# CONTROVERSIA SECVNDA.

De Relationibus Diuinis.

## A X I O M A P R I M V M.

*Dantur in Deo Relationes.*

Ex Lib. 5. de Trinit. Cap. 5.



**I**N Deo autem nihil quidem secundum accidens dicitur, quia nihil in eo mutabile est; nec tamen omne, quod dicitur, secundum substantiam dicitur. Dicitur enim ad aliquid; sicut Pater ad Filium, & Filius ad Patrem, quod non est accidens, quia & ille semper Pater, & ille semper Filius. Et non ita semper, quasi ex quo natus est Filius, & ex eo, quod nunquam desinat esse Filius, Pater non desinat esse Pater, sed ex eo, quod semper natus est Filius, nec capit unquam esse Filius. Quod si aliquando esse cepisset, aut aliquando esse desineret Filius; secundum accidens diceretur. Si verò quod dicitur Pater, ad se ipsum diceretur, non ad Filium, & quod dicitur Filius, ad seipsum diceretur; non ad Patrem, secundum substantiam diceretur, & ille Pater, & ille Filius; sed quia & Pater non dicitur Pater, nisi ex eo, quod est ei Filius, & Filius non dicitur nisi ex eo, quod habet Patrem, non secundum substantiam hac dicuntur, quia non quisque eorum ad se ipsum, sed ad inuicem, atque ad alterutrum.

*rutrum ista dicuntur; neque secundum accidens, quia, & quod dicitur Pater, & quod dicitur Filius, aeternum, atque immutabile est eis. Quamobrem quamuis diuersum sit Patrem esse, & Filium esse, non est tamen diuersa substantia, quia haec non secundum substantiam dicuntur, sed secundum relatiuum, quod tamen relatiuum non est accidens, quia non est mutabile.*

## D V B I V M I.

An, & quomodo dentur in Deo Relationes reales?

**P** Ræmitto id, quod in Logica indicaui Cap.8. de Relatione; idest eam in communi, & præcisè consideratam nihil aliud esse, quam absolutum; quid prout connotat terminum; v.g. similitudinem nihil aliud esse, quam hanc albedinem connotantem aliam: quæ sententia hodie est communior in Scholis, & vt docent etiam AA. Scholæ oppositæ, refelli non potest; cum quo rectè cohæret esse aliquid reale, non quidem superadditum, sed identicum cum extremis, quia intimè includit fundamentum proximum, quod est reale, & si sit mutua (vt in mea sententia est omnis relatio realis, propter ibi dicta) includit etiam terminum, non sub ratione termini, sed sub ratione alterius fundamenti, essentialiter requisiti ad relationem

mutuam. Quo posito, tres sunt in hoc puncto sententiæ oppositæ.

Prima est Gabriellis in 1. distinct.30. quæst.4. conclus.5. vbi docet posse dari viam negandi relationes reales etiam in Diuinis, ponendo personas constitui proprietatibus absolutis; quod aliqui dicunt à Scoto reputari non esse erroneum.

Secunda est Capreoli in 1. distinct.33. quæst.1. artic.3. ad 1. ac 3. Aureoli contra 3. vbi esto fateatur in Diuinis esse relationes reales, nihilominus vult esse reales, non sub conceptu relationis, sed quatenus sunt idem cum essentia. Quapropter ait aliundè haberi distinctionem personarum, aliundè quod illa distinctio sit realis, primum à relatione, vt relatio est, secundum à relatione, in

in quantum est res, idest quatenus est Diuina essentia. Cum eo videntur concordare Moderni illi, qui docent relationem secundum esse *ad* non esse quid reale, sed solum secundum esse *in*.

Tertia sententia, quæ est communior in Scholis, quam tradit. & probat Vasquez tom. 2. Disput. 114. cap. 3. est Relationes Diuinas non solum quoad esse *in*, sed etiam quoad esse *ad* esse reuera aliquid reale. Propterea.

Dico 1. esse ponendas in Deo relationes reales, vt docet S.P.N. Augustinus in Axiomate, & alibi, & Diu. Thom. quæst. 8. de Potentia artic. 1. vbi docet, sic dicendum esse iuxta principia Fidei. Vnde plures recentiores censura notant eam sententiam, quæ tenet Personas constitui proprietatibus absolutis, vt temerariam, & minimè concordem cum principijs S. Fidei, partim etiam vt hæreticam. Probatur nostra conclusio. Quia in ipsa sacra scriptura vna Persona dicitur Pater, alia Filius, & verus Filius: ergo per veram paternitatem, & per veram filiationem; ergo etiam per veram relationem.

Probatur 2. Auctoritate Concilij Toletani XI. in Confessione Fidei, & Florent. sess. 18. & 19.

vbi expressè fit mentio de relationibus Diuinis. Aliqui coaceruant alias auctoritates Conciliorum, quarum tamen plures solum faciunt mentionem proprietatum personalium, non definiendo vtrum sint relatiuæ.

Probatur 3. Auctoritate S. Patris loco citato in Axiomate, & cap. 5. eiusdem lib. 5. de Trinitate, vbi ait. *Nam si esse ad se dicitur, persona verò relatiuè, sic dicamus tres personas Patrem, & Filium, & Spiritum Sanctum, quemadmodum dicuntur aliqui tres amici, aut tres propinqui, aut tres vicini, qui sint ad inuicem, non quod unusquisque sit ad se ipsum.*

Probatur 4. ratione sic. Personæ non possunt ad inuicem distinguui per aliquid absolutum; eo quod omne absolutum adæquatè identificatur cum essentia, & sic reperitur in quocumque reperitur essentia; ergo debent distinguui per aliquid relatiuum; & cum distinctio sit realis, non verò solius rationis (vt volebat Sabelius) etiam relationes debent esse reales.

Dico 2. Relationes Diuinas esse reales, non solum ratione essentiae, sed etiam quatenus ab ea distinguuntur aliquo modo, & secundum proprium conceptum relationis. Hæc assertio est contra

tra Capreolum docentem oppositum. Probatur verò efficaciter. Primo, quia Pater, vt Pater est, (quod idem seruata proportione alijs personis est applicandum) constituitur in esse personæ ab alijs distinctæ per paternitatem realiter: ergo paternitas vt sic est realis. Antecedens apud omnes est certum. Consequentia probatur, quia non potest esse aliquid realiter distinctum, nisi per formam realiter distinguentem; Hæc forma non potest esse absoluta; cum hæc sit communis omnibus: ergo relatiua.

Probatur 2. Quia Pater est Pater, non solum per intellectum, sed verè, & realiter est Pater; sed non est realiter talis ratione essentialitæ tantum; ergo ratione relationis realis vt sic. Probatur minor, quia alias Pater, nihil haberet realiter, quod non haberet Filius, & sic non distingueretur ab eo realiter, &c. Quo sensu memini S. Gregorium Nazianzenum scripsisse: *Pater omnia dedit Filio; præter esse Patris.*

Dices 1. pro Gabrielle. Deus dicitur, & realiter est Creator per hoc, quod realiter producit creaturam, quin in se habeat relationem realem; ergo etiam prima persona poterit dici realiter Pater, eo quod realiter ab ipsa Verbum procedat; & prima, &

secunda poterunt dici spirator per solam realem processionem spiritus sancti, absque eo, quod sit in eis relatio realis spirationis; ergo nulla est necessitas ponendi relationes reales, positæ personis constitutis proprietatibus absolutis. Resp. negando antecedens: vt enim dixi in Philosophia rationali cap. 8. de ad aliquid pag. 299. Cum Philosoph. doceat ad relationem non dari motum per se, & consequenter posse aduenire, & recedere, nulla facta mutatione intrinseca in eo, quod dicitur de nouo referri; nullum erit inconueniens, si dicatur in Deo dari relationes reales ad creaturas; quia posito, quod relatio virtualiter solum, siue ratione ratiocinata solum distinguatur à fundamento, nulla sequitur in ipso Deo intrinseca mutatio, &c. habes ibi hoc totum fusè explicatum auctoritate S. P. Augustini pag. 301. à S. Dico 5. Quod non vacat modo hic transcribere. Quo posito, consequenter negatur etiam consequentia. Nam iuxta mea Principia est omnino impossibile aliquem producere alterum, quin referatur ad illum, & vice versa, & hoc eo magis, quod ipsa realis productio, seu actio est formalissimè, & essentialiter relatio, quod explicavi ibi pag. 358. vbi de Actione, &

Paf.

Passione ex mente Sancti Patris.

Dices 2. cum Capreolo. Deus est substantialiter sapiens; sed hoc non habet vel à sapientia, ut sic, vel ab essentia sua ut sic, sed ab illa ut sit sapiens, ab hac verò ut sit substantialiter, seu essentialiter sapiens; ergo etiam relationes in Deo sunt reales, non sub conceptu relationis, sed quatenus sunt idem cum essentia; & consequenter, ait ille, aliundè est desumenda distinctio personarum; & aliundè quod illa distinctio sit realis: primum enim habetur à relatione, ut relatio est, secundum verò à relatione; quatenus res est, idest quatenus est ipsa Diuina essentia. Resp. Capreolum ibi falli æquiuocatione illius vocis substantialiter; nam si idem sit, ac essentialiter, non omne id, quod dicitur, & identificatur cum Deo, dicitur de Deo essentialiter formaliter: licet enim verum sit intellectionem, ac proindè sapientiam esse formaliter ipsum formale constitutum Dei, etiam nostro modo concipiendi, propter rationes adductas in Controversia de scientia Dei dubio primo, & in præcedenti Controversia; nihilominus rationes illæ, quæ consequuntur ad ipsam, cum nostro modo concipiendi concipiantur ut proprietates, quæ

propterea attributa dicuntur, iam non dicuntur essentialiter, cum iam in nostro conceptu contradistinguantur ab ipsa essentia: si vero ly substantialiter sit idem, ac non accidentaliter, verum quidem est Deum esse amantem, iustum, misericordem, &c. per rationes illas attributales, quæ non sunt accidentia, sed sunt rationes substantiales; nullum enim accidens physicum habet locum in Deo; & sic negatur consequentia.

Dices 3. pro eodem. S. Thomas in pr. distinct. 26. quæst. 1. ar. 2. ad 3. ait, relationem ex hoc, quod est ad alterum, non habere, ut sit res quædam, sed secundum quod habet fundamentum in eo, quod refertur. Et præterea in 1. par. quæst. 28. artic. 1. docet relationem ut sic non esse realem, sed abstrahere à reali, & rationis; ergo etiam relationes Diuinæ habent esse reale, quatenus sunt Diuinæ, idest quatenus sunt idem cum Diuina essentia. Resp. S. Thom. ibi docere relationem esse realem ratione fundamenti radicaliter, non formaliter; cum enim relatio in suo amplissimo conceptu abstrahat à relatione reali, & relatione rationis, radix realitatis realium est fundamentum reale; esto se ipsa, & ex proprio conceptu sit realis formaliter;



ter; sic etiam cum in 1. par. scripsit rationem *ad* non esse realem, loquitur de *ad* communia ad relationem realem, & relationem rationis, nam alias contendit tale *ad*, quod est de prædicamento relationis, siue de conceptu formalis relationis realis, quæcumque illa sit, non solum ratione fundamenti, sed etiam secundum se esse reale: ait enim expresse in dicto articulo; quando aliquid procedit à principio eiusdem naturæ, necesse est, vt procedens, & id, à quo procedit sint eiusdem ordinis, & consequenter, quod habeant reales respectus ad inuicem.

## AXIOMA SECVNDVM.

*De Identitate, & distinctione relationum Diuinarum cum,  
& ab essentia Diuina.*

Ex Lib. 3. contra Maximinum Arrianorum Episc. Cap. 10.



*S* ergo in una Patris persona & plura inuenis, sed partes non inuenis; quanto magis Pater, & Filius, & Spiritus Sanctus & propter indiuiduam Deitatem unus Deus est, & propter uniuscuiusque proprietatem tres Personæ sunt, & propter singulorum perfectionem partes vnius Dei non sunt? Virtus est Pater, virtus est Filius, virtus & Spiritus Sanctus. Hoc verum dicis, sed quod virtutem de virtute genitam, & virtutem de virtute procedentem non vis eamdem habere naturam; hoc falsum dicis, hoc contra Fidem Catholicam, & rectam dicis.

## D V B I V M I I

Quomodo Essentia, & relationes distinguantur in Deo.

**P**raemitto primo, notissimum esse, Gilbertum Porrethanum, ut referunt S. Thom. 1. parte, quaest. 28. artic. 2. Alensis 1. par. quaest. 69. memb. 5. S. Bonaventura in 1. distinct. 33. quaest. 1. prius docuisse relationes Diuinas esse solummodo assistentes Diuinæ essentiae, & extrinsecus affixas, ac proinde ab illa realiter distinctas. Fundamentum huius erroris fuit principium illud metaphysicum: *Quæ sunt eadem uni tertio, sunt eadem inter se*; quod videbatur Porrethano, sine reali distinctione relationum ab essentia, non posse consistere. Hunc errorem retraxit postea ipse Gilbertus; Et damnauit Concilium Rhemensis, cui S. Bernardus interfuit, ut refert idemmet S. Bernardus serm. 80. in Cantic. Qui de eodem Gilberto loquens, sic ait: *Quippe qui in eodem conuentu sententia Episcoporum humiliter acquiescens, tam hæc, quam cætera, digna reprehensione inuenta, proprio ore damnauit.* De hoc puncto consule Gabrielem Vasquez, qui tom. 2. disput. 120.

cap. 1. narrat per extensum, quid Gilbertus senserit, & in quibus excusandus sit: quid, & quomodo ab Episcopis Prouinciarum cum S. Bernardo priuatim definitum fuerit; ac etiam quare postea ab Eugenio III. & à Cardinalibus non fuerit recepta tota illa definitio Episcoporum, & Sancti Bernardi; cur non habeatur in codicibus Conciliorum Romæ impressis, & denique quomodo discipuli Gilberti postea dixerint essentiam Diuinam sola ratione distinctam à relationibus Diuinis. Ibi plura de hoc puncto, scitu digna, reperies.

Praemitto 2. non multum distare ab errore, qui tribuitur Gilberto, errorem, quem in Doctrina Abbatis Ioachim damnauit postea Concilium Lateranense; habitum sub Innocentio III. & refertur in Capite *Damnauit de summa Trinitate & fide Catholica.* Imputauit enim Abbas Ioachim Magistro sententiarum, quod erroneè asseruisset in Deo esse quaternitatem, tres scilicet per-

personas realiter distinctas ab vna essentia. Hoc erat illatum ab Abbate ex eo, quod Magister sent. docet in Diuinis: Pater generat, essentia non generat; Filius generatur, sed essentia non generatur; ex quo arguebat Ioachim. Si essentia non generat, nec generatur, & Pater generat, & Filius generatur; & præterea essentia Diuina est quadam summa res; ergo est quadam res, quæ non est Pater, nec Filius, & ita erit quaternitas. Ipse Ioachim, vt vitaret hoc absurdum (quod falsò putabat sequi per necessariam consequentiam ex doctrina Magistri) incidit in aliud non minus detestabile: dicebat enim, in Deo esse tres personas, non vnitatem essentiae, sed vnitatem collectiuam; ex quo tres Deos videbatur asserere. Vtrumque autem ibi damnauit Concilium, nempe, & quod ipse assererat, & quod Magistro imputabat; & ab hac nota Magistrum vindicauit. His erroribus exclusis, Duæ manent Catholicorum DD. sententiæ examinandæ.

Prima est Scoti in 1. distinct. 2. quæst. 4. §. *Sed hic*, &c. admittentis ibi distinctionem formalem à parte rei. Quem sequuntur Lichetus ibi, & Gabriel in pr. distinct. 2. quæst. 1. artic. 1. Occam, quæst. 1. Durandus distinct. 5. quæst.

1. vbi ait oppositum esse impossibile; & distinct. 23. quæst. 4. ait, contra sentientes incidere in hæresim Sabellij. Hi cum Scoto sentiant relationes Diuinas paternitatis, filiationis, & spirationis, tam actiue, quam passiuè distingui ante omnem operationem intellectus, & sic ex natura rei, non audent tamen Scotus ibi illam appellare distinctionem realem, actualem, vt rei à re, aut etiam formalem, vt generis à differentia, ne ponat ibi compositionem; sed appellat non identitatem formalem ex natura rei. Durandus locis citatis appellat hanc distinctionem rei, ac modi.

Secunda sententia est S. Thom. in 1. par. quæst. 28. artic. 2. & communis inter Thomistas, Henrici quodlib. 5. quæst. 6. Aureoli in 1. distinct. 33. asserentium solam ratione differre. Aliqui loquuntur de distinctione rationis ratiocinantis; alij cum S. Thom. de distinctione rationis ratiocinatæ. De huiusmodi distinctionibus explicauimus quid sentiam in Axiomatibus Metaphysicis cap. 8. vbi de diuisionibus entis à pag. 175. propterea ibi dicta non repeto; sed ad illa me remitto. Quibus positis.

Dico primo: Relationes prædictas non distingui ab essentia realiter, siue, vt res à re. Hæc asser-

tio est de fide , nam Cap. *Damnatus* definitur , non esse in Deo quaternitatem , sed trinitatem , quia quælibet persona est illarum ; nempe essentia , substantia , siue natura Diuina . Et in Capite *firmiter* definitur , illam naturam esse omnino simplicem . Quæ definitiones stare non possent , si natura Diuina distingueretur realiter ab ipsis relationibus .

Probatur 2. ratione . Quia alias daretur in Deo compositio ex actu , & potentia , vel aggregatum per accidens ; quorum vtrumque repugnat Deo . Primum quidem ratione Diuinæ simplicitatis ; secundum verò ratione summe , primæ , & Diuinæ unitatis .

Probatur tertio , quia alias essentia Diuina non esset infinita simpliciter in ratione entis , quod illi repugnat . Hoc patet , quia non identificaret sibi rationes relatiuas , & hoc est , quod docet S. P. Augustinus in Axiomate , cum ait : *Quanta magis Pater , & Filius , & Spiritus Sanctus , & propter indiuiduam Deitatem unus Deus est* .

Dico 2. prædictas relationes Diuinas , nec etiam ex natura rei formaliter distingui , ita vt præcedat actualis distinctio . Hæc particula ponitur propter eos , qui

asserunt , Scotum non admittere talem distinctionem , sed docere eandem realitatem esse fundamentum , vt intellectus concipiat relationem , & essentiam diuersis conceptibus ; quod si esset verum , à nobis vix in solo loquendi modo differrent , quatenus scilicet in illo fundamento admitterent talem distinctionem formalem ex natura rei , qualem nos virtualiter tantummodo appellamus . Sed re vera , & Scotistæ alij , tum recentiores , tum antiquiores , & Scotus ipse clarè & loco citato , & distinct. 13. quæst. vnica §. *ad quæstionem* , distinctionem formalem ponit actu , sine operatione intellectus : in hoc enim sensu , & scripta , & voces eorum semper hoc profitentur . Contra hos igitur stat præsens assertio . Et probatur primo Auctoritate Concilij Florentini , in quo sess. 8. post medium in disputatione inter Ioannem pro Ecclesia Latina , & Marcum pro Ecclesia Græca , Ioannes nomine Ecclesie Latine sic loquitur . *Diuina substantia , & persona re quidem sunt idem , secundum autem modum intellectus nostræ differre videntur* .

Cui sententiæ Marcus pro Ecclesia Græca coram toto Concilio consensit . In sessione postea sequenti , quæ est 19. Andreas præsul Colossensis , volens conciliare

liare sensu, prædictorum Ioannis, & Marci, sic dixit. *In communi, tum Græcorum, tum Latinorum Doctorem Theologia multum differt, simpliciter proferre Diuinam substantiam, vel Patris, Filijque substantiam: haud quaquam tamen ex eo putare debetis, ut re differant; quandoquidem sola ratione, ac intelligentia differre creduntur. Doctores igitur ipsi Diuinam substantiam simpliciter proferentes, Patris, & Filij, Sanctique Spiritus commune quoddam intelligunt: substantiam verò Patris dicentes, Patris personam mente concipiunt. Ex quibus sic arguitur. Si essentia Patris aut essentia Filij sola ratione, & mente differt ab essentia absolutè, & simpliciter sumpta; ergo sola etiam ratione differunt relationes Diuinæ ab essentia simpliciter accepta; nam alioquin, & essentia paternitatis, quæ relationem addit, non differret sola ratione ab essentia simpliciter accepta. Consequenter ad hæc in vltima sessione, in qua fuit satis prolixum, & per dies protractum dissidium inter PP. Latinos, & Græcos, circa processionem Spiritus Sancti, Latini ad Græcos miserunt suæ fidei confessionem, in qua hæc continebantur. Porro autem, ne identitatem, coniunctionemque Diuinæ substantiæ distribuere, ac*

*ipsam substantiam re, non autem sola ratione ab hypostasis, & personis differre credere videamur, &c.* in quibus verbis clarum est Concilium, & totam partem Latinorum existimare, inconueniens esse inter personas, & essentiam esse maiorem distinctionem, quam rationis, & intellectus.

Probatur 2. ex Cap. *Damnatus de summa Trinitate & fide Catholica*; vbi damnatur quaternitas, quæ in Diuinis ab aliquibus ponebatur; sed ponere essentiam ex natura rei formaliter distinctam à relationibus, est ponere ibi quaternitatem; ergo, &c.

Durandus respondet primò ibi damnari quaternitatem personarum, non verò formalitatum. Sed contra est, quod ibi damnatur illa quaternitas, quam Abbas Ioachim falsò imponebat Magistro sententiarum; sed illa erat quaternitas essentiæ, & personarum, ut supra dictum est, ergo, &c.

Respondet 2. ad summum ibi damnari quaternitatem rerum; Essentiam verò cum relationibus non ponere in vilo numerum, eo quod includatur in qualibet persona. Contra est, quia licet includatur in qualibet persona, quæ ex essentia, & relatione constituitur, non tamen includitur

in

in relatione vt sic ; ac proindè , si relatio ex natura rei ab illa distinguitur , verè ibi erunt quatuor res ; nam essentia est res , & quælibet relatio est aliquid reale .

Probatur 3. Quia ex prædicta distinctione formali ex natura rei sequuntur eadem absurda contra simplicitatem Dei , quæ supra dictum est sequi ex distinctione reali .

Respondet Durandus : relationes esse veluti modos , ac proindè non facere compositionem cum essentia . Contra tamen est , quod in hac responsione petitur principium ; cum enim non detur medium inter simplex , & compositum ; & distinctio ex natura rei tollat omnimodam simplicitatem , esset necessariò concedenda aliqua compositio ; nec enim possunt intelligi aliqua , distincta actualiter ex natura rei , conuenire ad faciendum vnum , nisi vel componendo , vel faciendo vnum aggregatum per accidens . Quod si dicatur , esse compositionem minorem , quam rerum , Contra est , quod semper esset compositio antecedens operationem intellectus ; ac proindè tollens è medio omnimodam Dei simplicitatem .

Probatur 4. Quia vel relatio Diuina , vt est contradistincta

ab essentia , est entitas creata , vel increata ; non primum , quia alias non esset identificata cum ipsa Diuina essentia , vt patet ; si secundum , ergo est realiter Deus , & sic infinita formaliter , & per consequens identificans sibi realiter , & formaliter ex natura rei omnem perfectionem , cum qua non habeat oppositionem ; sed huiusmodi est essentia Diuina ; ergo cum ea ex natura rei identificatur , & sola ratione ab ea distinguitur .

Probari solet 5. quia distinctio ex natura rei non infertur , nisi , vel ex aliqua separabilitate , vel ex oppositione , vt est inter ipsas relationes Diuinas inter se , vel ex causalitate diuersorum effectuum ; horum autem nihil habet locum in præsentī . Ergo .

Dices : colligi etiam ex eo , quod essentia tribuitur aliquod prædicatum , quod non tribuitur relationi , vt communicari , non communicari : esse *ad* , non esse *ad* ; siue esse ens absolutum , & esse ens respectiuium . Resp. hinc solum colligi distinctionem per intellectum , siue rationis ratiocinata , non verò distinctionem formalem ex natura rei , propter prædicta ; & hoc non dubito esse magis ad mentem S. P. cum dicit *propter singulorum perfectionem partes vnius Dei non sunt* : data enim di-

distinctione illa actuali, omnes illæ formalitates haberent rationem partium.

Ad fundamentum illud Gilberti. *Quæ sunt eadem uni ter-  
tio, &c.* Resp. S. Thom. 1. par.  
quæst. 39. artic. 1. ad primum, non  
habere locum, ubi supposita per  
relationes subsistunt; eo quod re-  
lationes inter se non possunt iden-  
tificari propter oppositionem;   
identificantur tamen cum essen-  
tia, cui non opponuntur. Hæc  
explicatio est quidem verissima,  
eamque plures; & clarissimi AA.  
ex Thomistis sequuntur, & fu-  
se explicant, sed adhuc remanet  
ostendendum, quomodo argu-  
mentum Gilberti non conuincat;  
quod essentia non possit identi-  
ficari relationibus, quæ necessariò  
realiter ab inuicem distinguuntur.  
Aliam explicationem dedit idem  
Angelicus Doctor quæst. 28. ar-  
tic. 3. ad primum, sic. *Quæcum-  
que uni, & eidem sunt eadem;*  
*sibi inuicem sunt eadem in his,*  
*quæ sunt idem re, & ratione;*  
*sicut tunica, & indumentum;*  
*non autem in his, quæ differunt*  
*ratione: unde idem (idest Philoso-*  
*phus lib. 3. physic. text. 22.) dicit,*  
*quod licet actio sit idem motui,*  
*similiter & passio: non tamen*  
*sequitur, quod actio, & pas-*  
*sio sint idem, quia in actione*  
*importatur respectus, vt à quo*

est motus in mobili, in passione  
verò, vt qui est ab alio. Et simi-  
liter, licet Paternitas sit idem  
secundum rem cum essentia Diui-  
na, & similiter Filiatio, tamen  
hæc duo in suis proprijs rationi-  
bus important oppositos respectus.  
H. I.

Contra hanc responsionem op-  
ponitur communiter, quod, ca-  
stante, illud principium haberet  
locum solum in synonymis, &  
tamen in omnibus Scholis admit-  
titur in omnibus creatis.

Receptissima est illa responsio,  
qua admittitur, principium illud  
habere locum, quando illud ter-  
tium est quid finitum; tunc enim  
propter limitationem non potest  
identificari rebus realiter distin-  
ctis, ac proinde quando aliqua  
duo sunt idem realiter cum illo,  
erunt etiam idem realiter inter  
se: quando verò illud tertium  
est infinitum, & illimitatum,  
quemadmodum est essentia Di-  
uina, quæ potest sibi identifica-  
re omnem rationem entis sibi non  
repugnantem, esse falsum. Quod  
quidem necessariò, & rationabi-  
liter dicitur, habita huius myste-  
rij reuelatione; & hoc sine funda-  
mento diceretur, ea non habi-  
ta. Hanc doctrinam necessariò  
supponit illa alia Recentiorum  
expositio: nempe, tunc illud  
principium esse verum, quando  
illa

illa duo sunt idem actu, & virtute cum illo tertio, quod actu, & virtute est vnum; quod in proposito non reperitur; eo quod essentia Diuina, quæ actu est vna, virtute est multiplex, cum possit esse æquè in pluribus, ac si esset multiplex, & consequenter relationes actu esse idem cum essentia, virtute verò distinctas, eo quod præstent id, quod præstarent, si essent actu distinctæ; distinctio enim illa virtualis fundatur in infinitate Dei.

Ex his habes, plures ex illis Syllogismis, qui videntur expositi, eo quod constent terminis singularibus, nihil concludere; vt sunt illi; essentia Diuina est paternitas, essentia Diuina est filiatio; ergo filiatio est paternitas; & Pater est essentia; Pater non est Filius: ergo essentia non est Filius. Ratio adæquata illegitimæ illationis est, quia licet essentia Diuina sit actu singularis, est tamen virtute multiplex. Quapropter sicut syllogismus iste: homo est Socrates; Plato est homo: ergo Plato est Socrates, non valet, quia terminus ille, homo, non est vnus simpliciter, cum sit terminus communis secundum rationem; ita nec etiam valet ille primus, eo quod eadem numero essentia est realiter com-

munis pluribus; & eadem ratione, nec etiam valet secundus, quia Pater identificatur cum essentia, quæ est communis Filio.

Pro clariori intelligentia huius doctrinæ. Aduerte cum communi sensu dialecticorum, plura requiri ad bonitatem syllogismi expositi. Primo, vt medius terminus sit incommunicabilis. Secundo, vt medius terminus semel completè distribuatur in altera præmissarum, idest vniuersè accipiat pro omni re, pro qua accipi potest. Tertio, vt terminus, qui in consequenti distribuitur, fuerit etiam distributus in antecedente. Quarto, vt absit fallacia accidentis, idest, vt prædicatum, & subiectum non sumantur, quatenus aliquo modo sunt diuersa, sed quatenus omnino, & realiter, & formaliter idem sunt. Quibus regulis cum non conformentur prædicti syllogismi, & similes, vt videre est in exemplis, quæ adducit Becanus 1. par. tract. de SS. Trinitate cap. 2. quæst. 3. patet eos non aptè concludere.

Dices 1. pro Scoto. Non potest eadem entitas à parte rei esse actualiter ex natura rei communicabilis, & non esse actualiter ex natura rei communicabilis; siue, quod idem sonat, esse incommunica-



nicabilis: sed Pater communicat Filio actu suam essentiam, non communicando suam paternitatem; ergo necesse est, vt intercedat distinctio actualis ex natura rei inter essentiam, & paternitatem. Resp. communiter huic argumento, quod quemadmodum eadem res, propter infinitatem, & distinctionem virtuales in ea fundatam; est communis, & propria; sic etiam eadem formalitas realis habet vtrumque; nam quatenus significatur vt essentia, est communis; quatenus verò significatur vt relatio, est propria, & incommunicabilis. Hæc responsio patitur difficultatem in eo, quod prædicata illa communicabilitatis, & incommunicabilitatis non tribuuntur illi entitati simplicissimæ solum per intellectum, sed conueniunt illi à parte rei: ac proinde nisi admittatur maior distinctio, quam solius rationis, sequitur de eadem omnino entitate simplicissima verificari prædicata contradictoria. Scio quosdam modernos non abhoruisse, in re infinita admittere verificationem prædicatorum contradictoriorum. Verum imperceptibile est, quomodo re vera possint eidem rei, siue finitæ, siue infinitæ conuenire talia prædicata; cum per negationem vniuersaliter, & omnino tollatur à subie-

cto quidquid illi per affirmationem tribuitur; quomodo enim verè idem affirmatur, & negatur de eodem? Quod si dicas, id esse secundum diuersas rationes, iam sumus extra contradictoria: in contradictorijs enim sequitur affirmatio, & negatio eiusdem de eodem secundum eandem omnino rationem; nam cum negatur, negatur vniuersaliter, quia negatio distribuit prædicatum pro omnibus inferioribus, & cum affirmatur, destruit veritas negationis. Quapropter securius est asserere, si huiusmodi contradictoria tribuantur rei secundum se, & vt præscindit ab operatione nostri intellectus, negatiuam esse simpliciter falsam, affirmatiuam simpliciter veram; etenim quando dicitur: hæc realitas Diuina est incommunicabilis, vel non est communicabilis, sensus est, quod nulla ratione sit communicabilis, quod falsum est; cum sub ratione essentia sit communicabilis, licet sub ratione relationis sit incommunicabilis; ad veritatem enim affirmatiuæ sufficit, quod sub vna ratione sit communicabilis. Quod si in huiusmodi enunciationibus includatur ordo ad operationem nostri intellectus; qui necessariò, & essentialiter includitur, quando vtimur nomine essentia, & nomine re-

lationis, illius, vt entis absoluti, & istius vt respectiui, cum præscindatur vnum ab alio, tunc vitatur contradictio, propter diuersum modum concipiendi: si verò tollatur ordo ad intellectum, non potest absolute formari propositio negatiua; quod idem dicendum est de illis enunciationibus: *Essentia non generat; Pater generat*; nam licet illa sit vera, *Essentia non generat*, quia subiectum, significat entitatem Diuinam, vt præscindit à relatione paternitatis, qua ratione à Filio non distinguitur; hæc tamen non esset concedenda, *Res, vel realitas, qua est essentia, non generat*, quia sensus esset, quod nullo modo generaret, quod est falsum: licet enim, vt essentia præcisè sumpta, non generet, generat tamen vt Pater est.

Dices 2. S. P. N. Augustinus lib. 7. de Trinit. cap. 4. docet, quod *Deus, non eo Deus est, quo Pater est. Sed Deus est Deus deitate, & Pater paternitate*. ergo Deitas actû ex natura rei non est paternitas. Respondet S. Thomas quæst. 8. de potentia artic. 2. ad 14. Sanctum Patrem, per *ly non eo*, loqui, non quoad relationem, & entitatem, sed quoad modum significandi, eo quod Deus paternitate significatur, vt ad alterum, se habens, Deitate verò, vt in

se consistens. Et hunc esse S. Patris sensum constat ex eo, quod habet in cap. 6. dicti lib. nempe, *cum dicimus Personam Patris, non aliud dicimus, quam substantiam Patris*; Ibi etiam ait, quod *non aliud est Deo esse, aliud Personam esse, sed idem omnino*. Quod certè non dixisset, si aliquam distinctionem ex natura rei inter Diuinam essentiam, & paternitatem agnouisset.

Instabis S. P. ibi etiam docere hoc dari discrimen inter Sapientiam Diuinam, & paternitatem, quod Pater eo est Deus, quo est Sapiens, non autem eo Deus est, quo Pater: hoc discrimen non potest stare, nisi paternitas distinguatur re vera ab essentia; ergo aliqua distinctio à parte rei datur inter essentiam & relationes: cum verò non possit esse illa entitatiua, & realis, quam ponebat Gilbertus, vt docet fides, debet esse, vel modalis, qualem ponit Durandus, vel formalis, ex natura rei, quam ponit Scotus. Minor probatur, quia Sapientia virtualiter distinguitur à Diuina essentia; ergo; vt verum sit Deum non esse Deum eo, quo Pater est, benè autem eo, quo Sapiens est, inter paternitatem, & deitatem erit ponenda maior distinctio, quam virtualis, & consequenter, vel modalis, vel formalis ex natura rei.

Respondent aliqui S.P.N. non loqui ibi de constitutio Deitatis in ratione naturæ, & prout contradiſtinguitur ab attributis, ſed de eſſe abſoluto communi tribus perſonis, ſiue attributali, ſiue per modum naturæ; & ſic, loquendo de Deo, ſubſiſtere prædictum diſcrimen, quod conſtituit inter Diuinam Sapientiam, & paternitatem. Licet enim vtraque virtualiter ſolum diſtinguatur à natura Diuina per modum naturæ; prima tamen pertinet ad eſſe abſolutum diuinitatis, vt tribus perſonis communis, tamquam aliquid conſtitutum illius, non in eſſe naturæ, ſed in aliquo eſſe abſoluto; & attributali; non tamen altera. Et ſic eſſe verum dicere, quod Pater eo eſt Deus, quo eſt Sapiens, non verò eo eſt Deus, quo Pater.

Facilius, & breuius Reſponderi poteſt, iuxta principia Sancti Patris ſæpius repetita: Sapientiam, quatenus eſt ipſa actualis intellectio, eſſe formale conſtitutum ipſius naturæ Diuinæ in eſſe naturæ, vt ſupra explicatum eſt, quod non habet paternitas; ac proinde conſequenter loquendo, & re vera, & ſecundum noſtrum concipiendi modum rectiſſimè dixiſſe, Patrem eſſe Deum eo, quo eſt Sapiens, quia hoc eſt formale conſtitutum ipſius Deitatis:

non verò eo, quo eſt Pater, quia per hoc conſtituitur ſolum in ratione primæ Perſonæ, & genitoris.

Dices 3. non poteſt idem, ſecundum idem à parte rei, eſſe principium conueniendi, & ſimul diſferendi, ſiue diſtinctionis; ſed tres Perſonæ conueniunt in ratione eſſentiæ, diſferunt quoad relationes; ergo omnino neceſſè eſt dari differentiam actualem à parte rei inter has, & illam. Reſp. diſferre in ordine ad diuerſa connotata, & ſic nullum eſſe inconueniens, quod eadem entitas realis ſit principium conuenientiæ, & diſtinctionis; conuenientiæ, quatenus connotat negationem eſſendi ab alio, & eſſendi ad aliud; diſtinctionis, quatenus eadem entitas connotat ſuos terminos diuerſimodè; cum etiam in rebus creatis eadem entitas inuariata, & habeat eſſe abſolutum, & eſſe relationum, ac diuerſas relationes, iuxta diuerſos terminos, quos connotat; iuxta ea, quæ dicta ſunt in philoſophia rationali cap. de relatione, & in Axiomatibus metaphyſicis cap. de diuiſionibus entis.

Dices 4. vel Pater intelligit ſuam eſſentiam, & relationem, tamquam duas rationes formales diuerſas, vel non; ſi non; ergo intelligit vnā rationem

simpliciter communicabilem, aut simpliciter incommunicabilem. Si primum, ergo ante operationem intellectus distinguuntur. Si secundum, ergo iam non esset vna essentia in tribus personis, sed essent tres essentiae, sicut sunt tres Personae; quod est contra fidem; Ergo à primo ad vltimum semper est necesse ponere distinctionem actualem ex natura rei. Resp. Deum videre suam essentiam, ut est, ac proinde non distinguere in illa rationem absolutam, & respectiuam; sed videre vnam naturam identificatam tribus Personis, & videre illam entitatem, quae est sufficiens fundamentum, ut intellectus viatoris illam concipiat diuersis conceptibus inadaequatis, ac proinde virtualem illam distinctionem, ut antecedentem operationem nostri intellectus; & hoc certum est loquendo de cognitione Diuina, ut terminata ad suam essentiam, praecise. Neque enim potest dici, quod per suam cognitionem distinguat, vel attributa, vel relationes ab essentia, cum distinctio rationis non solum requirat fundamentum in re, sed etiam limitationem conceptus, & imperfectum modum concipiendi veluti per partes; nam hoc solum habetur, quando distinctio nulla est in re, & potest nihilominus in

ordine ad diuersa connotata intellectus noster res sibi repraesentare distinctas per diuersos conceptus; praescindendo vnam perfectionem ab altera, & vnam rationem cognoscere, altera non cognita, aut vna clarè penetrata, alteram solum implicite; & in confuso percipere. At Deus vnico intuitu clarè respiciens, & penetrans omnia, non potest hoc modo per inadaequatos conceptus distinguere. Quod si loquamur de cognitione Diuina, quatenus terminatur non solum ad essentiam Diuinam; sed etiam ad conceptus viatoris distinctos, quibus apprehendi potest, sic potest concipi à Deo aliqua distinctio; ut à nobis factibilis, vel facta, modo supradicto, sed hoc non est cognoscere ipsas rationes realiter, aut actualiter ex natura rei distinctas, ut patet.

Dices 5. si distinguerentur solum ratione; distinguerentur sicut attributa: sed attributa communicantur, communicata essentia: ergo etiam relationes communicarentur; hoc constat esse falsum, ergo etiam id, vnde sequitur. Resp. inde sequi solummodo nos habere maius fundamentum distinguendi relationes ab essentia, quam attributa, quod vltro damus; communicantur enim attributa, quia identifican-  
tur

tur naturæ adæquatè, relationes verò solum inadæquatè. Tunc autem dicuntur duo adæquatè identificari, quando vnum est ita, idem cum alio, vt sit omninò idem cum omni eo, cui alterum identificatur; inadæquatè verò identificari est, quando vnum ita alteri identificatur, vt non omninò identificetur cuicumque alterum identificatur. Quo posito habetur, in tantum attributa identificari adæquatè, in quantum nullam habent oppositionem cum relationibus: relationes verò non identificantur, quia habent oppositionem producentis, & produci; quam si non haberent, ipsæ etiam identificarentur, vt patet in spiratione actiua, quæ identificatur cum paternitate, & filiatione; cum quibus non habet prædictam oppositionem.

Dices 6. Ex Concilijs, & PP.

clare inferri prædictam distinctionem: nam in Cap. *Damnatus* definitur essentiam non generare, Patrem generare. In Concilio Florentino sess. 18. habetur substantiam, & personam differre, vt proprium, & commune. S. Ioan. Damasc. lib. 1. de Fide cap. 9. ait, Patrem omnia communicare Filio, præter innascendi proprietatem. Hæc non possunt stare sine distinctione actuali ex natura rei; ergo necessariò est admittenda. Resp. prædicta omnia sufficienter saluari per distinctionem virtualem in ordine ad diuersa connotata, explicatam à nobis sufficienter per distinctionem rationis, & quidem hoc esse de mente Concilij, expressis verbis eiusdem constat ex supradictis; quod etiam ad auctoritatem Cap. *Damnatus*, & S. Ioan. Damasc. necessariò applicandum est.



## AXIOMA TERTIVM.

*In conceptu Essentie non includitur Relatio, nec  
è contra.*

Ex Lib. 7. de Trinitate Cap. 2.



**P**ater igitur, & Filius simul una essentia, & una magnitudo, & una veritas, & una Sapientia. Sed non Pater, & Filius simul ambo unum Verbum, quia non simul ambo unus Filius. Sicut enim Filius ad Patrem refertur, non ad se ipsum dicitur, ita & Verbum ad eum, cuius est Verbum, refertur, cum dicitur Verbum. Eo quippe Filius, quo Verbum, & eo Verbum, quo Filius. Quoniam igitur Pater, & Filius simul non utique unus Filius, consequens est ut Pater, & Filius simul, non ambo unum Verbum. Et propterea non eo Verbum, quo Sapientia: quia Verbum non ad se dicitur, sed tantum relatiue ad eum, cuius Verbum est, sicut Filius ad Patrem: Sapientia verò eo, quo essentia. Et ideo quia una essentia, una Sapientia. Quoniam verò, & Verbum Sapientia est. Sed non eo Verbum, quo Sapientia: Verbum enim relatiue, Sapientia verò essentialiter intelligitur, id dici accipiamus cum dicitur Verbum, ac si dicatur nata Sapientia, ut sit & Filius, & imago: Et hæc duo cum dicuntur, idest nata Sapientia in uno eorum, eo quod nata est, & Verbum, & imago, & Filius intelligatur; & in his omnibus nominibus non ostendatur essentia, quia relatiue dicuntur.

## D V B I V M I I I.

Vtrum in conceptu formali, & quidditatio effentiaë includantur relationes, & è conuerso.

**P**ræmitto 1. aliqua posse inter se realiter formaliter identificari, & tamen vnum non esse de conceptu quidditatio alterius; vt patet in homine, in quo indiuidualitas realiter formaliter identificatur cum gradibus specificis, & genericis, & tamen non est de conceptu quidditatio speciei; & præterea rationalitas in eodem est identificata realiter formaliter cum animalitate, & tamen non est de conceptu formali, & quidditatio illius. Quapropter, esto relationes Diuinæ realiter formaliter identificentur cum essentia; adhuc tamen, restat difficultas, an essentia sit de conceptu quidditatio relationum, & relationes de conceptu essentiaë.

Præmitto 2. duobus modis aliquid posse pertinere ad essentiam, siue quidditatem alterius. Primò vt eius constitutum, quo pacto animalitas, & rationalitas ad essentiam hominis pertinent. Secundò vt modum, aut terminum

intrinsecum, à quo petit essentia liter modificari, aut terminari, sicut se habent modi essendi per se, & in alio, respectu entis. His præmissis.

Tres sunt celebres sententiaë, circa propositam difficultatem.

Prima, quæ est communior inter Thomistas, asserit essentiam esse de conceptu relationum, & relationes de conceptu essentiaë, quæ tamen, vt notauit P. Gonet Tomo 5. Disput. 3. artic. 2. non eodem modo defenditur ab omnibus; nam quidam distinguunt essentiam Diuinam, per modum transcendentis, & per modum naturæ, & primo modo asserunt, esse de quidditate relationum, non verò in posteriori acceptione. Alij huius distinctionis nullam faciunt mentionem. Alij denique expressè affirmant, Diuinam essentiam sub vtraque ratione esse de quidditate relationum, & relationes de quidditate essentiaë. Et hoc  
tertio

tertio modo defenditur ab ipso Gonet.

Secunda sententia tenet, essentiam Diuinam esse quidem de conceptu formali relationum, sed relationes non esse de conceptu essentiae. Pro qua citantur ex Thomistis noster Ferrariensis, Zumel, & Gonzalez, & ex PP. Societatis Suarez, Granado, & Arubal.

Tertia docet, nec essentiam esse de conceptu quidditatio relationum, nec relationes de conceptu quidditatio essentiae. Pro hac stant omnes Scotistae, Vasquez Disput. 121. cap. 2. Alarcon Tract. 5. Disput. 2. cap. 13. & hanc non dubito esse etiam expressam S. Thomae, si benè perpendantur ea, quae habet quæst. 8. de potentia artic. 2. ad 6. Propterea.

Dico 1. relationes non esse de intrinseco conceptu essentiae ut sic. Hæc est expressa sententia S. P. in Axiomate clarè explicata illis verbis. *Et propterea non eò Verbum, quò Sapientia, quia Verbum non ad se dicitur, sed tantum relatiuè ad eum, cuius Verbum est, sicuti Filius ad Patrem.* Vbi certum est S. P. non excludere identitatem Verbi cum essentia; nam apertè subdit. *Quoniam verò, & Verbum Sapientia est;* nihil aliud ergo remanet

exclusum per illa verba, *sed non eo verbum, quò Sapientia*, nisi conceptus formalis & quidditatio ipsius essentiae.

Probatur verò. Quia communis sensus omnium Theologorum ex Concilio Toletano XL, & ex S. P. N. tum hic in Axiomate, tum etiam in cap. 4. eiusdem lib. 7. *Deus dicitur ad se, non ad aliud. Verbum verò non ad se dicitur, sed ad eum, cuius est Verbum, sicut Filius ad Patrem.* Id est conceptus Dei essentialiter sumpti est conceptus entitatis absolutæ; conceptus verò Verbi, seu Filij (quod idem de alijs relationibus est dicendum) est conceptus entitatis relatiuæ: sed esse absolutum, & esse relatiuum sub eodem quidditatio, & formali conceptu repugnant: ergo, &c.

Probatur 2. quia in Cap. *Damnamus* definitur, Patrem communicare Filio totam suam substantiam, id est essentiam, non partem; sed non communicat paternitatem; ergo hæc non est de conceptu substantiæ, id est essentiae. Quod confirmatur etiam ex eo, quod antequam essentia communicetur Filio, est in Patre; sed, ut est in Patre, non includit filiationem, & tamen est perfectè in Patre; ergo omnino necesse est conceptum huius relationis-



lationis, & sic de alijs, non esse de conceptu ipsius essentiae. Propterea Vasquez Disput. 121. cap. 2. docet, hanc propositionem *Paternitas est essentia*, in sensu quidem identico esse veram, sed in sensu formali esse falsam; sicut Disput. 119. cap. 2. idem dixerat de illa propositione, *Intellectus est voluntas*. Vbi aduerte, essentiam Diuinam non posse comparari cum relationibus Diuinis, sicut comparatur ratio entis cum suis inferioribus, seu cum particularibus; sic enim, & ipsa essentia esset quid commune respectu personarum analogicè, idest cum sui diuisione, & inaequalitate à parte rei; quemadmodum & ipsum ens in suis inferioribus, quod repugnat: nam in ente sola vox est vna, & communis, proximè significans decem rationes particulares praedicamentorum, substantiam quidem simpliciter, alias verò cum addito, cum sint entis entia, (quem discursum latè, & doctè prosequitur ibi Vasquez). At hoc de essentia Diuina dici nequit; neque enim potest conferri cum relationibus Diuinis, sicut ratio analogicè significata cum particularibus, quia verè est vna, tota in multis, non quidem solum ratione, & conceptu communis, sicut ponitur animal, sed re ipsa; est autem impossibile concipere

essentiam communem tribus, quin in singulis particularem rationem concipiamus, quæ in suo conceptu non includat essentiam, sicut non possumus rationem generis cogitare communem, vt communem, quin etiam intelligamus rationes particulares específicas, quibus communis sit, in quarum conceptu non includatur, quales sunt differentiae (seclusis imperfectionibus, & seruata proportionem) quapropter cum non se habeat ad dictas relationes, sicuti se habet ens ad entia particularia, in quibus intrinsecè imbibitur, & à quibus non potest perfectè præscindi, manet necessariò, rationem, siue conceptum formalem essentiae esse extra conceptum formalem relationum. Hæ sunt rationes cardinales, quæ dilucidè explicant, & probant assertionem S. P. N. Alias addit ibi Vasquez, quas piget hic transcribere.

Dixi, hoc esse de mente S. Thome quod quæst. 8. de Potentia artic. 2. ad 6. ait. *Per se autem prædicatur aliquid de aliquo, quod prædicatur de eo secundum propriam rationem; quod verò non secundum propriam rationem prædicatur, sed propter rei identitatem, non etiam prædicatur per se. Cum ergo dicitur essentia Diuina est paternitas, non prædicatur paternitas*

G

de

*de essentia Diuina propter identitatem rei, & similiter, nec essentia de paternitate, quia alia est ratio essentia, & relationis.* Quibus verbis S. Thom. clarè docet essentiam Diuinam non esse de conceptu formali relationum, nec de illis prædicari in sensu formali, sed identico.

Thomistæ, vt euadant vim huius textus, opponunt alia loca, in quibus Angelicus Doctor videtur oppositum sentire, & 1. ex 1. par. quæst. 39. artic. 6. ad 2. ubi ait, quod tam ista propositio est per se *Pater est Deus*, quam ista *Deus est Pater*, ac proinde, quando loco citato dicit illam propositionem *Essentia Diuina est paternitas*, non esse per se, intendit solum non esse per se ex parte modi significandi, non autem ex parte rei significatæ; tanto magis, quod in respon. ad 4. ait: *Relationes Diuina, licet significant id, quod est Diuina essentia, non tamen per modum essentia, quia non per modum inexistens, sed per modum se habentis ad aliud eam significant.* Ex quo loco sic discurrunt. Diuinæ Relationes quantum ad modum significandi se habent per modum accidentis, & prædicantur veluti accidentaliter de Diuina essentia, quamuis ex parte rei significatæ sint de conceptu eius quidditativo, & de

illa prædicentur essentialiter. Denique in quæst. 33. eiusdem primæ partis artic. 3. ad 1. de communibus, & essentialibus prædicatis loquens, ait: *Ille includuntur in intellectu propriorum: in intellectu enim persone Patris intelligitur Deus.* Ex his verbis sic arguunt. Essentia Diuina, vt habet rationem transcendentis increati, includitur essentialiter in Persona Diuina; ergo & in Diuina personalitate. Probant consequentiam, quia in Diuinis nihil dicit concretum quoad rem, quod non dicat etiam abstractum, licet differant, quoad modum significandi: quod confirmatur, quia idem Angelicus Doctor, & loc. cit. & quæst. 8. de potentia artic. 2. eodem modo philosophatur de concretis, & de abstractis; vnde inferunt, quod totum id, quod est de conceptu formali Dei, est etiam de conceptu formali Deitatis: & pariter totum id, quod est de conceptu formali Patris, est etiam de conceptu formali paternitatis.

Multa inuoluit hæc doctrina Thomistarum, quæ indigent examine, & explicatione. Primo obseruandum, S. Thom. in dicto loco artic. 6. quæst. 39. loqui in concreto, & de entitate reali, nam vt notauit ibi Canariensis, agebat

bat ibi Angelicus Doctor contra Gilbertum Porrethanum, de cuius errore iam supradictum est; imò S. D. se explicat in corpore articuli, quod loquitur de identitate reali, non verò de identitate conceptus formalis, & obiectiui, de qua est quæstio præsens. Vtrò enim concedimus, & fatemur de intrinseca ratione essentia, vt est à parte rei, esse omnes, & singulas relationes Diuinas, & de essentia singularum relationum, vt sunt à parte rei, esse ipsam essentiam: Nam à parte rei essentia Diuina est Pater, Filius, & Spiritus Sanctus, siue paternitas, filiatio, & spiratio; loquendo verò de ipsa essentia, & relationibus, non vt sunt à parte rei, sed pro vt à nobis distinctis, & inadæquatis conceptibus cognoscuntur, iam datur distinctio conceptuum, quorum vnus repræsentat essentiam præcisam à relationibus, alter verò repræsentat relationem, vel relationes, vt præcisas ab essentia per intellectum. Et hoc est, quod in dicta quæstione de potentia ait S. Thom. cum dicit: *Cum ergo dicitur essentia Diuina est paternitas, de essentia Diuina non predicatur paternitas propter identitatem rationis, sed propter identitatem rei*; hæc enim identitas datur, illa verò non in prædicta

prædicatione abstractorum, vt subiungit ibi Sanctus Doctor, cum ait, *Et similiter, nec essentia de paternitate, quia alia est ratio essentia, & relationis*. Vbi clare ponit diuersam esse rationem, siue conceptum essentia à ratione, siue conceptu relationis.

Obserua vterius prædicationes illas quæst. 39. *Pater est Deus, & Deus est Pater*, fieri in concreto, ac proindè dici esse propositiones per se; à quo non licet inferre etiam illas prædicationes in abstractis esse per se, modo intento ab aduersarijs; Nam licet in hoc Mysterio abstracta, & concreta valdè promiscuè accipiantur, ita vt hoc nomen Pater, & idem est de alijs, quandoque vsurpetur, vt significat suppositum Patris nostro modo intelligendi constitutum ex essentia, & relatione, quandoque vt est indicatiuum solius paternitatis, siue primæ personalitatis; & pariter hoc abstractum paternitas quandoque vsurpetur vt abstractum à concreto explicato; quandoque verò independentè à nostris conceptibus vt significatiuum paternitatis, vt est à parte rei simul cum essentia vna simplicissima entitas. Nihilominus quando loquimur in subiecta materia de his rationibus, non

prout sunt à parte rei, sed prout substantiant nostris diuersis & inadæquatis conceptibus, proculdubio philosophandum est cum S. Patre *non eo Verbum, quo essentia siue Sapientia*, & cum S. Thom. *aliam esse rationem essentia, & aliam rationem relationis*. Quod idem confirmat discursus ille supra adductus Aduersariorum; Nam si Diuinæ relationes ex parte modi significandi se habent per modum accidentis, & prædicantur veluti accidentaliter de Diuina essentia, quamuis ex parte rei significatæ, prout est à parte rei, sint de eius conceptu quidditatio, iam vtrò fatentur id, quod nos intendimus, idest dari diuersitatem conceptuum formalium in nostra mente, quorum vnus repræsentet Diuinam essentiam, vt quid absolutum, & per se stans, alter verò, vel alij relationes veluti accidentaliter, siue per modum adiacentis, ratione nostri imperfecti modi cognoscendi, ac proinde vnum conceptum sic repræsentantem essentiam esse diuersum ab altero repræsentante relationem. Et propterea etiam conceptum obiectiuum esse diuersum, non in esse rei, sed in esse obiecti.

Dico. 2. Nec etiam essentiam esse de intrinseco conceptu rela-

tionum. Probatur ab aliquibus, quia tum à S. P. tum à S. Ambrosio, tum etiam à pluribus SS. PP. habetur, proprietates in Deo non significare substantiam, idest essentiam; esto alioqui sint rationes substantiales. Attamen, quia potest responderi, verum quidem esse, quod non significant illam sub proprio conceptu, sed vt includitur in relationibus; propterea aliter est à nobis probanda.

Et primo eam sic probo. De ratione essentiæ est, non esse rem productam ab alia (essentia enim nec generat, nec generatur) neque tamquam à causa, neque tamquam à principio; sed de ratione generationis, & spirationis passiuæ est concipi, vt productum ab alio; ergo, &c.

Probatur 2. quia relationes Diuinæ, de quibus loquimur, sunt constitutiue personarum simul cum essentia, sed si in suo conceptu obiectiuo includerent essentiam, non posset concipi quomodo constituerent; ergo, &c. Minor probatur, quia in tantum nos intelligimus hanc constitutionem, quatenus concipimus aduenire essentiæ, & illam modificare; sed si illam intimè includunt in suo conceptu obiectiuo, nulla erit differentia, nisi penes conceptum implicitum, & expli-

plicitum ; & iam non poterunt concipi , vt aduenientes , & modificantes , sed potius vt rationes totales personarum ; non verò , vt sint alterum constitutum illarum ; ergo illam in suo conceptu obiectiuo non possunt includere.

Confirmatur , quia Persona nihil aliud dicit , quam essentiam incommunicabiliter subsistentem , vel subsistentiam incommunicabilem essentiae ; sed hoc totum iuxta Aduersariorum sententiam dicit paternitas ; ergo secundum principia eorum est imperceptibile , quomodo persona constituitur ex essentia , & relatione.

Dicunt aliqui ex illis , constitutionem illam concipi a nobis secundum , quod relatio praecise addit supra essentiam ; quo pacto cum profertur nomen , simus , esto significetur nasus , & curuitas , nihilominus cum additur nasus , nomen illud stat solum pro curuitate , nè idem sine causa repetatur . Sed contra est , quod iam admittitur relatio contradistincta in suo conceptu obiectiuo ab essentia hanc non includens ; & per consequens vt contradistincta ab illa ; quatenus dicit respectum , iam sub hac praecisa ratione non includit essentiam ; & hoc est id , quod nos

contra eorum sententiam intendimus .

Probatur 3. Quia quando aliqua duo ita se habent , vt vnum non sit de conceptu intrinseco alterius , necesse est omnino , vt nec etiam istud sit de conceptu illius : distinctio enim in suo formali conceptu hoc importat , siue ponatur esse negationem vnius de alio , vt fert communior sententia ; siue ponatur esse relationem vnius ad alterum , ita vt sub ea ratione , sub qua distinguuntur , si vnum negat alterum , hoc etiam vice versa sit negatio alterius , vel si vnum respicit alterum et terminum , illud aliud respiciatur ab hoc vice versa vt suus terminus ; vel saltem sint fundamentum , & terminus extrinsece ad inuicem se habentes ; nam alias non posset , nec esse , nec concipi relatio , non solum realis , sed nec etiam rationis ; Atqui iam supra probatum est , relationes Diuinas non esse de intrinseco conceptu obiectiuo essentiae ; ergo vice versa necesse est , nec etiam essentiam esse de intrinseco conceptu obiectiuo relationum .

Probatur 4. & ultimo . Quia paternitas , vt est , proprietas personalis Patris , ita est in Patre , vt non sit in Filio , quatenus est proprietas Patris , iuxta illud commune

nunc proloquium Theologorum ex S. Gregorio Nazianz. *Pater omnia dedit Filio, prater esse Patris*; sed si paternitas intimè in suo conceptu quidditatio includeret essentiam, quatenus proprietas relatiua est, non esset secundum totam rationem proprietatis in solo Patre, quod nullus concedet; ergo nullo modo potest essentia esse de conceptu illius relationis; & consequenter nec etiam aliarum. Probatur minor. Quia essentia illa, quæ per illos ingreditur conceptum formalem paternitatis, est etiam in Filio, & consequenter ingreditur etiam conceptum quidditatum proprietatis filiationis, & spirationis passiuæ; ergo iam secundum aliquam rationem proprietatis esset quid commune, & non esset secundum totam rationem proprietatis in Patre.

Dices primo, contra primam assertionem: S. Gregorium Nazianz. Oratione in Sancta Lumina docere: *Proprietatem Patris essentiam Filij constituere*. Idem habet S. Athanasius serm. 4. contra Arrianos; ergo per hos SS. Doctores essentia est de quidditatio conceptu relationum, & è contra. Quod etiam habet S. Tho. 1. par. quæst. 28. artic. 1. & quæst. 39. artic. 1. Respondetur SS. PP.

loqui de essentia, ut est res quædam secundum se, non verò, ut concipitur à nobis: quo sensu loquitur etiam S. Thom. locis citatis, & cum eo Caietanus in commentarijs ad dicta loca; qui perperam ab Aduersarijs citantur pro opposita sententia: cum solum dicant ibi, quod si Diuina essentia posset omnino definiri, ut est in se, in eius definitione ponerentur relationes; quod non destruit, imò firmat nostram sententiam: cum enim tunc ponerentur, eo quod definiretur, ut est in se, & esset conceptus adæquatus; manet quod nunc non ponantur, cum non possit definiri ut est in se, & conceptus nostri sint inadæquati.

Dices 2. si relationes Diuinæ non pertinerent intrinsecè ad essentiam, essent concipiendæ à nobis, ut quid extrinsecus adueniens, & consequenter, ut quid accidentale; sed nihil accidentale potest admitti in Deo: ergo, &c. Confirmatur ex eo, quod esse Patrem non conuenit Deo, neque ut accidens commune, neque ut accidens proprium, neque ut modus; ergo conuenit ei ut prædicatum essentiale. Resp. communiter relationes non esse quidem accidentia in se, sed nostro modo intelligendi concipi à nobis ut accidentales natu-

ra; ac proinde distinguenda est illa vltima particula maioris, & si illud esse accidentale idem sit, ac non essentiales, idest prædicata essentia constitutiva Diuinæ essentia, concedendum est; si idem sit, ac contingentes, itaut possint adesse, vel abesse, quod est idem, ac esse de prædicamento accidentis, negandum est: Exemplum sit in creaturis personalitas, quæ est extra conceptum naturæ, & est ratio substantialis, & necessario consequens naturam. Quod si hoc est in creaturis; multo magis conueniet relationibus Diuinis, quæ identificantur omnino naturæ, esse substantiales, & necessarias. Ad confirmationem. Resp. cum S. Thom. 1. par. quæst. 39. artic. 6. ad 2. & quæst. 8. de potentia artic. 2. ad 6. prædicationem illam esse identicam, non, verò per se in sensu formali, sed ad modum accidentis; nam vt rectè in dicta quæstione de potentia ad 6. ait, licet in Deo non sit accidens, est tamen similitudo accidentis; & propterea Caietanus in Commentario quæst. 39. primæ partis artic. 6. explicando id, quod ait S. Thom. videlicet illam prædicationem *Pater est Deus*, & istam, *Deus est Pater* nullo modo esse per accidens, explicat ly nullo mo-

do identicè, non formaliter.

Dices 3. Relationes Diuinæ non distinguuntur formaliter ex natura rei à Diuina Essentia, vt supradictum est: ergo non solum sunt identificate cum illa, sed etiam formaliter sunt ipsa Diuina essentia. Confirmatur ex S. Thom. qui quæst. 37. 1. par. artic. 2. ad 3. dicit in perfectione Diuini esse contineri Verbum. Resp. Quod si hoc argumentum aliquid probaret, eodem modo probari etiam posset rationalitatem esse de essentia animalitatis, & è contra, quia sunt idem realiter, & non datur distinctio ex natura rei inter hæc duo prædicata in homine, in quo sunt identificate; & similiter posset probari lapidem esse de ratione entis, quia identificatur in lapide ratio entis, & ratio lapidis. Quo posito. Resp. directè ad argumentum, quod ad hoc, vt aliquid sit de essentia alterius, non sufficit identitas realis, siue etiam formalis ex natura rei, sed vltèrius requiritur, vt vnum taliter includat alterum, vt vbique reperitur vnum, reperiatur & alterum, & vt non possit concipi vnum, quin concipiatur & alterum; quod non contingit hic: Quia verò à parte rei essentia Diuina, & relationes Diuinæ sunt planè idem, si loquamur de

de essentia secundum se, potius dicendum est essentiam secundum se esse ipsas relationes, quam relationes esse de essentia naturæ; eo quod illud, *de*, importat, seu denotat quamdam distinctionem illius, quod dicitur esse de essentia, ab altero; & ob eandem causam non est dicendum relationem includi essentialiter in natura, quia iam denotatur aliqua distinctio inclusi, & includentis; Et propterea S. Thomas dixit quidem ibi, in perfectione Diuini esse includi Verbum, non verò de perfectione illius esse.

Dices 4. si relationes Diuinae non essent de intrinseco conceptu Diuinæ essentiae, conceptus isti, & distinguerentur ab inuicem, & se se mutuo excluderent: sed hoc implicat; ergo dicendum omnino relationes esse de conceptu formali quidditativo, & obiectiuo Diuinæ essentiae, etiam secundum nostrum concipiendi modum. Probatur minor, in qua est difficultas: ex conceptibus mutuo se excludentibus, & concurrentibus ad constituendum vnum quid, necessario resultat compositio saltem rationis; sed hæc non potest stare cum simplicitate Diuinarum Personarum; ergo, &c. Quod si dicamus Diuinam simplicitatem

excludere quidem omnem compositionem realem, & formalem ex natura rei; ac etiam compositionem metaphysicam ex genere, & differentia, non tamen omnem compositionem virtualem, aut rationis, quæ non sit ex genere, & differentia. Contra opponitur ab Aduersarijs; non esse minoris imperfectionis compositionem rationis ex forma, siue modo, & subiecto, quam ex genere, & differentia; cum in vtraque aliquid potentialitatis admisceatur necessario, eo quod non minus comparetur vt potentia subiectum ad formam, quam genus ad differentiam; at compositio admissa est ad minus ex forma, siue modo, & subiecto: ergo non minus excludenda est à Deo, quam compositio ex genere, & differentia. Hoc argumentum, eo quod est vnum e potissimis Aduersariorum, sic vltius vrgent. Semel data inter formalitates Diuinas mutua conceptuum exclusionem, infertur necessario compositio metaphysica ex genere, & differentia; ergo si ista excluditur à Deo, etiam remoueri debet distinctio conceptuum cum mutua exclusionem obiectiua. Probant antecedens. Quia eo ipso quod est possibilis mutua exclusio conceptuum, poterit dari conceptus aliquis communis à particularibus



bus omnibus præcisus v. g. ratio communis personæ à tribus personis omnino præscindens; sed admissa hac communitate, cum omnimoda præcisione statim ponitur vniucatio, cum in tali conceptu nulla importetur actu diuersitas; & vniucatione admissa, conceptus ille communis erit genericus: ergo admissa mutua exclusione obiectiua conceptuum, per bonam consequentiam inferitur possibilis compositio metaphysica ex genere, & differentia.

Resp. quod, sicut communiter dicitur personam esse constitutam ex essentia, & relatione per intellectum, non verò re ipsa, & hoc non derogat vllō modo simplicitati Diuinæ, sic nec etiam asserere esse compositam, non ex natura rei, sed per intellectum. Nam, vt rectè notat Vasquez, Eodem modo repugnat simplicitati, & vnitati Dei compositio, quo repugnat multitudo, & distinctio; & tamen cum summa eius vnitatem, & identitate conceditur distinctio, & multitudo per rationem, ita vt S. Thom. 1. par. quæst. 13. artic. 4. ad 3. dicat: *Deus est vnus re, & plures secundum rationem, quia intellectus noster ita multipliciter apprehendit eum, sicut res multipliciter ipsum repræ-*

*sentant*: sic eodem modo compositionem concedere debemus. Cum quo tamen fiat, quod non possumus dicere absolutè Deum esse compositum, tum quia ea, quæ conueniunt rei solum per intellectum, non prædicantur de ea absolutè, & huiusmodi sunt in Deo compositio, multitudo, &c. Tum quia nomine compositionis videtur significari aliquid oppositum Diuinæ simplicitati; & idèò additur semper per intellectum, vt nihil illi derogare videamus. Hac limitatione regulariter non vtimur, quando dicimus Personam esse constitutam; quia iam vsu factum est, vt, cum loquimur hoc modo, intelligatur, quod intendimus solum per intellectum; & insuper cum Deo tribuimus constitutionem, non ita significatur aliquid oppositum directè simplicitati; sicuti significatur nomine compositionis, & idcirco illo absolutè vtimur. Ad instantiam illam, quòd hæc compositio sit ex forma, siue modo, & subiecto; ac proindè non minus repugnet Deo, quam compositio ex genere, & differentia, eo quod in vtraque semper misceatur aliquid potentialitatis: Resp. aliud esse loqui de compositione ex subiecto, & forma, seu modo informantis physicis, aliud de subie-

cto prædicationis: ibi enim requiritur potentialitas vera, & realis à parte rei; non sic in subiecto prædicationis, siue denominationis. Quando enim dico, Deus est simplex, ly Deus habet locum subiecti, ly simplex formæ, cum sit prædicatum; & nihilominus ab omnibus Catholicis firmiter tenetur hæc prædicatio, & nihil potentialitatis refunditur in Deum, sed solum in nostrum conceptum; sic etiam in præsentī tota potentialitas se tenet ex parte nostrorum conceptuum, ratione nostri imperfecti modi cognoscendi, sicut se tenet multitudo, & pluralitas, non verò ex parte ipsius Dei, prout est à parte rei. Ad ultimam instantiam de compositione ex genere, & differentia, deducta ex concessione compositionis rationis, modo explicato: Respondent aliqui compositionem generis, & differentia semper ortum habere ex aliqua compositione reali, vt in rebus corporalibus ex compositione materiæ, & formæ, in rebus verò spiritualibus ex compositione naturæ, & suppositi; sed hoc falsum est, vt notauit Vasquez loco citato; vbi etiam dicit, falsum esse, quod genus sumatur à materia, & differentia à forma, vel ab alijs rebus distinctis. Quapropter ex

hac parte non repugnabit Deo compositio ex genere, & differentia, quatenus prædicabilia sunt. Qua verò alia ratione repugnet, iam dixi in Controuersia de simplicitate Dei; & quando alia non esset, sufficeret illa, quæ habetur ex Antepredicamentis cap. 4. de incomplexis, vbi communiter docent Commentatores, infinitum secundum essentiam non posse poni in prædicamento; & consequenter, non posse constare ex genere, & differentia: quapropter, cum ea omnia, quæ sunt in Deo, sint infinita per essentiam, cum sint vel ipsa essentia, vel identificata realiter, & formaliter ex natura rei cum illa; nullo modo poterit ex illis, iuxta regulas sapientum, in scholis communiter receptas, formari compositio ex genere, & differentia. Et hoc est adeò inconcussum apud S. P. N. vt lib. 4. suarum Confessionum cap. 16. reprehendat se ipsum, quod reponeret Diuinam Maiestatem in serie prædicamentali.

Dices 5. Sanctus Bernardus ferm. 80. in Cantica ait: *Recedant nouelli non dialectici, sed heretici; qui magnitudinem, quam magnus est Deus, & item bonitatem, quam bonus est, & Sapientiam, quam Sapiens est, & iustitiam, quam iustus*

*iusus est, & postremò Diuinitatem, quæ Deus est, Deum non esse impuissimè disputant. Sed si Deus non est, quid est? Ex hoc loco arguit P. Gonet Disput. 3. de Trinit. artic. 2. §. Denique probatur Conclusio, &c. sic. Cum paternitas, vt distinguitur virtualiter à natura Diuina, sit essentialiter ens, & non sit creatum, vt patet, si non est essentialiter ens Diuinum, & increatum, quid essentialiter est? cum inter ens à se, & ab alio, inter creatum, & increatum nihil possit assignari medium.*

Respondet Vasquez vbi supra, & Disput. 119. cap. 3. num. 10. Quod licet inter ens à se, & ab alio, inter creatum, & increatum in re non detur medium, facta tamen aliqua reduplicatione, vel addito aliquo modo, potest medium assignari; sicut inter esse album, & non album in re medium non datur, si tamen reduplicatio fiat de homine discursiuo, prout sic, nec albus, nec non albus est. Ita pariter inter hoc, quod est relationem à parte rei esse ens creatum, vel increatum non datur medium, vnde relatio Diuina à parte rei ens increatum est: reduplicando tamen supra relationem, vt virtualiter ab essentia distinctam, nec est essentialiter ens

creatum, nec increatum, sed solum relatio.

Contra opponit P. Gonet, quod reduplicatio illa distinctionis virtualis ab essentia non tollit, quin essentialiter prædicetur de illa ratio entis, vt sic; alioquin Diuinæ relationes sub tali reduplicatione essent purum nihil, aut merum ens rationis; ergo nec tollit, quod de illa essentialiter prædicetur aliquid ex membris, per quæ adæquatè diuiditur ens: sed non est ens creatum; ergo ens Diuinum, & increatum. Minor subsumpta, & vltima consequentia patent. Prima autem probatur: nam, verificato ente vt sic, si nullum ex membris diuidentibus verificetur, illa non adæquabunt rationem diuisi, & consequenter diuisio adæquata non erit.

Opponit 2. quod de quocunque affirmatur ens, & negatur ens Diuinum, affirmatur ens creatum, non solum in re, sed facta quauis reduplicatione: ergo pariter affirmato ente, & negato ente creato, rectè colligitur affirmatio entis Diuini, non solum in re, sed etiam sub quacunque reduplicatione. Ad exemplum adductum respondet, esse extraneum, eo quod diuisio hominis in album, & non album non est essentialis, sed subiecti in accidentia;

tia ; unde cum accidentia non competant subiecto, nisi ut existenti, & sint extra rei essentiam, nec ratione essentiae cum reduplicatione subiecto conueniant; consequens fit, quod addito ly essentialiter, vel reduplicata essentia, nec vnum, nec alterum, extremum de subiecto affirmetur, sed subiectum præscindat ab utroque extremo. In nostro autem casu diuisio est essentialis, & diuisum cum illa reduplicatione conueniens est essentialiter, ac proinde aliquod extremum, siue vnum ex membris diuidentibus cum illa reduplicatione ei competere debet.

Aliter ergo soluendum est argumentum. Propterea. Resp. S. Bernardum ibi non agere de puncto nostræ difficultatis, sed disputare contra Gilbertum Porrethanum, qui ponebat distinctionem realem inter essentiam, & relationes Diuinas; ut est omnino certum ex ferie citati sermonis, & hoc non est dubium esse errorem in fide. Quo posito, ad Argumentum, quod inde deducit P. Gonet: Respondeo, paternitatem, etiam virtualiter, & ratione nostra contradistinctam ab essentia Diuina, esse ens increatum, & Diuinum; nam latius patet ratio entis increati, quam Deitatis, siue essentiae Diuinæ,

cum illa sit communis etiam omnibus attributis, & relationibus; hæc verò non nisi naturæ, ut ab illis virtualiter, seu ratione nostra contradistinctæ; nam rationes illæ essendi à se, improducti, independentis, & increati sunt veluti transcendentes respectu eorum, quæ Deo tribuuntur, non ita ratio essentiae Diuinæ. Hoc pacto etiam nomen substantiæ, quandoque significat essentiam, quandoque verò rationes substantiales; hoc secundo modo est transcendens, & de quolibet attributo, ac etiam de ipsis relationibus Diuinis affirmatur, quod sint substantia; non sic primo modo. Addè, quod ad rationem entis à se, siue increati sufficit, si sit ens, non habens causam, à qua dependeat, siue accipiat esse per veram, & realem causalitatem, & efficientiam; siue postea habeat principium influens, quemadmodum habent Filius, & Spiritus Sanctus, siue non habeat, ut non habet nec essentia, nec paternitas. Ex quo sic arguo: sicut non tollit rationem entis Diuini, essendi à se, & independentis ratio essendi ab alio, tamquam à principio; eo quod in ratione sua dicat identitatem cum essentia Diuina, & neget dependentiam ab alio, tamquam à causa; ita non tollit

lit

lit esse ens Diuinum, & increatum contradistingui virtualiter, & ratione nostra ab essentia Diuina, manente identitate reali, & formali ex natura rei eorum inter se.

Si dicas. relatio Diuina non est ens creatum formaliter; ergo formaliter Deus, & ens increatum; ergo non solum identicè, sed formaliter est Deus, & ipsa essentia Diuina. Resp. esse quidem ens Diuinum, prout ens Diuinum dicit, non solum identicè, sed etiam formaliter ex natura rei, non esse ab alio tamquam à causa, cum quo tamen fiat, vt virtualiter, & ratione nostra, siue formaliter per intellectum distinguatur ab ipsa essentia Diuina, vt præcisè concepta, sicut vice versa.

Si dicas: de ratione entis Diuini est, vt sit infinitum in genere entis; sed relatio, tali modo sumpta, non est infinita in genere entis; ergo non potest habere rationem entis Diuini. Resp. esse infinitum stare dupliciter, idest simpliciter, vel in tali linea, seu ratione; & relationem Diuinam esse quidem identicè simpliciter infinitam, formaliter verò esse infinitam in tali ratione, paternitatis scilicet, filiationis, &c. vt de attributis etiam communiter dicitur.

Dices 6. Pater est essentialiter Deus; sed paternitas, & Pater differunt solum in modo significandi; ergo etiam paternitas, quantumvis præcisè, est essentialiter Deitas. Resp. ly Pater, secundum communem loquendi usum, aliquando sumi pro constituto ex essentia, & relatione, aliquando verò pro ipsa relatione præcisè; ac proinde, si sumatur primo modo, est essentialiter Deus; si verò sumatur secundo modo, est solum identicè ipsa essentia, & Deitas; utroque tamen modo est semper formaliter ens increatum, & independens, vt dictum est.

Dices 7. Essentia Diuina intimè imbibitur in singulis attributis; nam quodlibet attributum est infinitum: ergo etiam in relationibus. Resp. negando primam partem antecedentis, si sumatur prout ratione nostra est ab illis contradistincta. Ad secundam. Resp. quodlibet attributum esse quidem identicè illimitatum simpliciter, sed non formaliter; nam Sapientia ita dicit Sapientiam infinitam, vt ratione nostra formaliter non dicat bonitatem, iustitiam, &c.

Dices 8. Essentia Diuina comparatur ad relationes, vt ens ad entia particularia, sed ens intimè imbibitur in conceptu cuiuslibet

bet entis particularis; ergo & essentia Diuina in conceptu relationum. Resp. iam supra esse assignatam differentiam entis in ordine ad inferiora, & essentia in ordine ad attributa, & relationes; consequenter ad ibi dicta subiungo, negando paritatem, & dico, Essentiam, quatenus dicit naturam Diuinam, quæ est radix attributorum, & personalitatum, non includi intimè in istis, sicut includitur conceptus entis in quolibet suo quantumvis minimo inferiori. Ratio est, quia ens dicit conceptum communissimum, ita necessariò inclusum, & imbutum in quolibet inferiori, vt si non esset ita inclusum, esset verum affirmare de illo, quod sit aliquid, & non sit ens, quod lumini naturali repugnat. Essentia verò Diuina, nostro concipiendi modo, est veluti fundamentum aliorum; & consequenter, nostro illo modo sumpta, habet conceptum diuersum à conceptibus relationum,

Dices 9. Quæ ita distinguuntur, vt neutrum includat alterum in suo conceptu, distinguuntur formaliter ex natura rei; sed extra Scholam Scotistarum non admittitur talis distinctio inter essentiam, & relationes; ergo necessè est, vt in conceptu vnus

includatur alterum, saltem implicite. Resp. illud gratis assumi à Suarez, & habere apertam instantiam in sententia Thomistarum in animalitate, & rationalitate, quarum neutra alteram includit; & in communi sententia de paternitate, & spiratione actiua, in quibus conceptus vnus non includit conceptum alterius.

Dices 10. cum Henrico. Nulla ratio refert aliquid ad aliud, nisi ratione alicuius absoluti, ratione cuius relatio inest subiecto, ita vt relatio nullam addat realitatem supra illud absolutum: relatio autem Diuina refert vnā personam ad aliam; ergo ratione alicuius absoluti, ex quo habeat rationem *in*: nihil autem est in Deo absolutum, præter essentiam; ergo relatio illam includit in suo conceptu, Resp. Vasquez Disput. 121. cap. 3. relationem quidem esse in subiecto, vt videmus in creaturis, sed in Deo, in quo non dantur accidentia (saltem physica) concipi nihilominus à nobis per modum inhærentis, & ita unicuique relationi suo modo competere rationem *in*, & rationem *ad*, hoc est, aut realiter, aut nostro modo concipiendi: verum rationem illam *in* non esse absolutam, vt falsò supponit Henricus; sed aut ab-

abstrahi ab absoluta, & respectiua, aut, quod verius ipse putat, esse eandem cum ratione *ad*, neque ab ea diuersa, nisi solo nomine: eo quod accidens, sicuti ens, analogicè de nouem prædicamentis dicatur: & ita ratio *in* proximè significet nouem rationes prædicamentorum; & propterea rationem *ad* sine ratione *in* nullo modo posse cogitari; & sic relatio Diuina nostro more intelligendi concipitur, vt quid inherens essentia, & inde dicitur habere rationem *in*; sed, cum intelligatur, vt inherens essentia, non potest includere in suo conceptu ipsam essentiam, vt iam fusè supra probatum est; nec ratio illa *in* Diuinæ relationis esse potest Essentia Diuina, sed aliquid præter

eam in nostra cogitatione. Hoc eò magis verum censeo, quod in philosophia rationali in cap. 8. prædicamentorum, in quo explicatur relatio, pag. 297. dixi, relationem, sumptam secundum illud, quod præcisè dicit in recto, siue secundum id, quod est intrinsecum fundamento, virtualiter, & ratione ratiocinata, ab eo distingui. Et præterea, quia relationes istæ sunt subsistentes, & tres ex illis formaliter constituentes tres subsistentias Diuinas, paternitas scilicet, filiatio, & spiratio passiva; quas subsistentias certum est in suo conceptu contradistingui ab ipsa Diuina Essentia; Hæc enim est communicabilis; illæ verò sunt incommunicabiles.

## A X I O M A   Q U A R T V M.

*Quomodo Relationes Diuinæ dicant perfectionem.*

Ex Lib. 6. de Trinit. Cap. 8.



*N* ipso Deo cum adhaeret equali Patri Filius equalis, aut Spiritus Sanctus Patri, & Filio equalis, non fit maior Deus, quam singuli eorum, quia non est quo crescat illa perfectio. Perfectus autem siue Pater, siue Filius, siue Spiritus Sanctus, & perfectus Deus, Pater,

ter,

ter, & Filius, & Spiritus Sanctus, & ideo Trinitas potius, quam triplex.

## D V B I V M I V.

An relationes Diuinæ addant aliquam perfectionem relatiuam ad essentiam, & quomodo.

**S**ensus difficultatis est: an sicut communiter dicitur attributa Diuina addere ad essentiam perfectionem aliquam absolutam, virtualiter distinctam à perfectione essentiae, ita etiam relationes, præter absolutam perfectionem essentiae, insuper ratione conceptus relatiui, dicant perfectionem aliquam relatiuam, virtualiter distinctam à perfectione essentiae: vel solum importent perfectionem absolutam essentiae. Duæ sunt de hoc puncto sententiae.

Negatiua in Schola Diu. Thom. est communior, quam ferè omnes Thomistæ antiquiores constanter tenuerunt, & ex nouissimis subscribunt PP. Salmaticenses Disput. 6. de hoc mysterio, P. Ioannes à S. Thoma, & P. Ioan. Baptista Gonet Tomo 5. Disput. 3. artic. 1. §. 1. Extra Scholam S. Th. eam tuetur Scotus in 3. distinct. 1.

quæst. 1. & 4. & ex professo quodlibeto 5. artic. 1. & 2. Durandus in 3. distinct. 1. quæst. 3. num. 13.

Affirmatiuam ex antiquis DD. tenuerunt Okamus, & Gabriel in 1. distinct. 7. quæst. 3. artic. 3. Aureolus in 1. distinct. 19. artic. 3. Ex recentioribus Suarez lib. 3. de Trinit. cap. 9. & 10. Granado Tomo 3. Disput. 5. sect. 2. Valentia, Arrubal, & Ruitz. Ex Thomistis Ledesma de Diuina Perfectione quæst. 3. artic. 2. & Gonzales Disput. 6. de Trinit. sect. 1. In hac quæstione plura puncta à recentioribus solent pertractari. Primo quidem: an Diuinæ relationes in suo conceptu formali dicant specialem perfectionem, ab essentia Diuina distinctam. Secundo, posito, quod dicant: an ea sit finita, vel infinita. Tertio an simpliciter simplicem. Quarto an possint dici tres



très perfectiones relatiuæ. Quinto an secundum propriam rationem dicendæ sint inter se omnino æquales in perfectione. Sexto an quælibet Diuina Persona habeat in se formaliter omnem perfectionem, etiam ex relatiuis alterius. Totidem conclusionibus singula prosequar. Propterea.

Dico 1. Diuinas relationes in suo conceptu formali dicere specialem perfectionem, distinctam ab essentia Diuina: Pro hac sententia citatur S. Hilarius lib. 6. de Trinit. & S. P. Epist. 173. & 178. Probatur primo. Quia Perfectio entitatiua (de qua quæritur) est illa, quæ in suo conceptu formali exprimit actualitatem entis, vt consummatam, & cui nihil desit, vel per modum totius integri consummati, vel per modum partis, vel quasi partis adintegrandi, requisitæ ad consummationem, & absolutionem totius; sed relationes Diuinæ se habent saltem secundo modo; licet enim verè non sint partes, se habent tamen per modum quasi partis: ergo dicunt specialem rationem perfectionis. Maior admittitur communiter etiam à Philosophis, & patet ex dictis in Axiomatibus Metaphysicis S. P. Cap. 12. Vbi de bono, & perfecto egi à pag. 312. Minor probatur. Quia relatio-

nes Diuinæ, licet non dicant totam Deitatem, & quasi integrum, & absolutum esse Diuinum, sunt tamen aliquid per modum veluti partium, deseruiens in ordine ad consummatum, & integrum esse Diuinum.

Probatur 2. Quia relationes Diuinæ verè sunt entia realia, & in suo conceptu veram entis realis rationem habent, tam secundum esse *in*, quam secundum esse *ad*; ergo & specialis bonitatis, & conuenientiæ rationem, quæ est passio entis; ergo etiam specialem perfectionem, quæ est inseparabilis ab ipsa entitate, & bonitate; omnis enim entitas, quæ habet esse reale, est integra, & consummata in sua ratione, saltem quoad sua prædicata quidditatiua, sine quibus non posset esse vera entitas realis, nec talis entitas, in quo consistit perfectio entitatiua, de qua in præsentī disputamus.

Confirmatur. Quia saltem de tribus Diuinis relationibus negari non potest, quin in suo conceptu formali importent veram rationem talis entis realis, qualis est substantia Diuina; sed substantia necessariò dicit specialem perfectionem; ergo, &c. Probatur minor. Quia in creatis

certum est perfectius esse subsistere, quam non subsistere, ergo à fortiori in Diuinis: & propterea humanitas Christi Domini maximam perfectionem habet à subsistentia verbi, per quam ipsa humanitas subsistit, & quia Verbum Diuinum terminat ipsam naturam humanam, quam utique perfectionem non posset Verbum communicare, nisi ipsum in suo conceptu formali esset talis perfectio: nemo enim dat quod non habet.

Probatur 3. Quia si relationes istæ non essent perfectiones in se, & in suo conceptu quidditatio, nec etiam possent esse perfectiones entitatis Diuinæ, imò essent imperfectiones illius; atqui hoc esset summè inconueniens; ergo, &c. Probatur sequela maioris; nam vel istæ relationes sunt conuenientes entitati Diuinæ, vel non sunt conuenientes; neque enim potest hic dari medium, cum versetur inter contradictoria. Si dicatur primum; ergo sunt perfectiones; nam quidquid est conueniens subiecto, eo ipso est illius perfectio, siue sit conueniens illi, tanquam subiecto physico, siue tanquam subiecto metaphysico, siue prædicationis, vt fert communis opinio: siue dicatur hanc con-

uenientiam esse quidditatem, siue passionem perfectionis: licet enim, iuxta mea principia, perfectio quidditativa non consistat in conuenientia vniuersaliter loquendo, nihilominus certum est, quidquid est conueniens alicui, vt subiecto, esse perfectionem illius. Si secundum, iam manifestè sequeretur esse imperfectionem illius; nam quidquid non congruit, aut conuenit subiecto, in quo est, eo ipso est illius imperfectio. Ne igitur admittatur in Deo tale absurdum, detur huiusmodi relationes esse, & dicere in suo conceptu formali specialem perfectionem.

Ex prædicto argumento deducunt aliqui in confirmationem nostræ assertionis, quod absque Diuinis relationibus, nec Pater esset perfectus Pater, sed potius imperfectus Deus, nec ipsa Diuina natura esset perfecta, sed imperfecta. Prima pars huius illationis probatur; quia deficiente paternitate in Patre, vel in Deo, nec esset fecundus; nec posset generare; esto enim natura Diuina, seu Diuinus intellectus sit potentia proxima generatua, nihilominus complementum huius potentie provenit à relatione: vt est clarum, & in confesso apud Theologos. Esse autem Deum

Deum infocundum, & impotentem; est idem, ac non esse perfectum Deum; imò & non esse Patrem: nam deficiente paternitate non esset actualis generatio, seu processio actiua; & consequenter non esset terminus generationis, idest Filius, ideoque nec Pater. Secunda pars probatur, quia, deficientibus Diuinis relationibus, natura Diuina non existeret sub omnibus modis, quibus potest existere; & deesset illi Trinitas, quæ est perfectio simpliciter simplex. Si dicas, ex hoc sequi Patrem indigere Filio, & Spiritu Sancto ad sui perfectionem. Resp. negando illationem, eo quod indigentia importet imperfectiones alienas ab esse Diuino. Primo enim indigentia dicit, vt aliquis in se ipso, & à se ipso non habeat omne requisitum ad sui perfectionem, sed debeat illud accipere, & quasi mutuare ab aliena substantia, & essentia distincta. Secundo requirit distinctionem propriam causæ, & effectus; & consequenter dependentiam, & extrema distincta in essentia. Hæc omnia longè absunt à Diuinis, in quibus admittitur quidem exigentia, quo pacto actus Diuinæ scientiæ, & voluntatis exigunt obiecta creata, in quæ tendunt, non tamen possunt di-

ci illis indigere; non verò indigentia, quæ est ab illa diuersa, vt pater.

Dico 2. Relationes Diuinas esse perfectiones infinitas, non quidem in genere entis absolute, quæ est primaria ratio essendi à se; nam hac ratione sola Diuina essentia potest dici infinita perfectio, sed secundum propriam lineam, & quatenus rationes essendi à se, non primariò, sed secundariò.

Conclusio hæc, sic explicata, probatur. Relationes Diuinæ secundum propriam rationem includunt rationem entis à se, licet secundariam; ergo includunt perfectionem infinitam in propria linea. De antecedenti non est dubium; quemadmodum enim ratio entis ab alio includitur in quacunque ratione entis creati; ita ratio entis à se, quæ includit essentialiter negationem cuiuscunque causæ, propriè dictæ, sic debet transcendere Diuinam entitatem, vt in quacunque illius ratione formali includatur. Consequentia ergo probatur ex eo, quod ratio entis à se, cum essentialiter importet negationem cuiuscunque causæ, vt dictum est, quæ possit perfectionem limitare, essentialiter includit infinitatem, & perfectionem, sine limite, & mensura. In tantum enim

ens ab alio est finitum, in quantum essentialiter respicit causam, quæ potest limitem, & mensuram perfectioni eius præfigere.

Probatur 2. à pari. Quia in tantum Attributa Divina secundum proprias lineas sunt perfectiones infinitæ, in quantum includunt rationem entis à se, licet secundariam, nam eo ipso, quod vnumquodque secundum propriam lineam habet perfectionem sine mensura, & limite, habet infinitudinem: sed hoc idem habent relationes; ergo sunt perfectiones infinitæ.

Probatur 3. Si Relationes Divinæ non essent perfectiones infinitæ secundum propriam lineam, essent finitæ; nam in ente inter hæc duo extrema non datur medium; quodlibet enim ens aut est formaliter finitum, aut est non finitum, quod est omnino idem, ac esse infinitum; sed repugnat relationes illas esse formaliter finitas; ergo necesse est omnino eas esse infinitas.

Respondet Vasquez, relationes Divinas, ut ab essentia præcisas, neque esse finitas, neque infinitas, sed præscindere: eo quod nihil prohibeat, quod à nobis cogitentur, ut relationes, & concipiantur neque ut finitæ, neque

ut infinitæ: ac proinde ut cogitatione nostra neque vnum, neque alterum habeant, esto res ipsa à parte rei, ratione essentiae, cum qua sunt vnum, & idem, sint perfectiones infinitæ.

Sed contra hanc responsionem, fiat primo, quod licet quodlibet ens possit præscindi imperfectè à finitudine, & infinitudine, non tamen potest præscindi perfectè, sicut non potest præscindi perfectè ens ab esse à se, & ab esse ab alio, & ab esse per se, & ab esse in alio. explicando enim conceptum confusum cuiuslibet per singula prædicata, quæ implicitè continet, necesse est tandem determinare, an ille conceptus præcisus sit entitatis finitæ, vel infinitæ: & hoc non solum identicè, sed etiam formaliter; nam de ratione formalis cuiusque entitatis, quantumvis præcisæ, est, vel esse finitam, vel infinitam formaliter; sicut de ratione cuiusque entitatis, quantumvis præcisæ, est, vel esse à se, vel esse ab alio. Stat secundo, contra prædictam Responsionem. Quod tres ex istis Divinis relationibus sunt constitutivæ trium Personarum infinitarum; sunt enim personalitates, & subsistentiæ, & hoc non solum identicè, sed etiam formaliter: nam constituunt infinitum Patrem,

trem, infinitum Verbum, & infinitum Amorem notionalem; sed Personæ Diuinæ sub hac ratione non possent esse formaliter infinitæ, nisi relationes, quæ illas constituent, essent & ipsæ formaliter infinitæ: ergo, &c. Stat tertio, quod illæ relationes terminant naturam Diuinam infinitam, & comparantur cum illa, tamquam modi, & perfectiones, non finitè; ergo infinitè.

Dices iterum cum eodem Vasquez; huiusmodi relationes non posse aliundè habere infinitudinem, nisi ex terminis, ad quos referuntur, qui termini, cum non sint infiniti, nec etiam possunt constituere infinitas relationes. Supponit hæc ratio illud vulgatum axioma: Relationes specificantur à termino. Resp. nihilominus relationes Diuinas etiam aliundè, quam à terminis, habere infinitudines suas; ex eo nempe, quod sint ens à se modo supra explicato; & præterea ex eo, quod sunt substantiæ, & Personalitates Diuinæ intrinsecè, & non dependenter à terminis; præter quam quod falsissimum est, terminos ipsos, idest personas, ad quas referuntur, non esse infinitas; nam & Verbum Diuinum, quatenus verbum est; & Amor spiri-

tus, quæ talis est, sunt personæ infinitæ.

Scotus, qui iecit fundamenta doctrinæ Vasquez, ex eo infert relationes non posse esse perfectiones infinitas, quod si paternitas, exempli gratia, deberet esse perfectio infinita in genere relatiuo, deberet in se continere perfectionem filiationis, & spirationis; nec dum actiua, sed etiam passiva; alioquin non posset esse infinita in genere relationis Diuinæ. Verum, ex eiusdem Scoti doctrina, iste ipsius discursus redargui potest; concedit enim ipse Attributa Dei ex natura rei inter se distingui, & singula in propria linea esse infinita; quia infinitudo vniuscuiusque non extrahit illud extra suum genus, sed in genere suo reddit infinitum, ita vt infinita perfectio Sapientiæ non contineat formaliter ex natura rei infinitam perfectionem voluntatis; ergo, licet asseramus, paternitatem esse perfectionem infinitam, non tamen propterea debemus asserere, quod sibi identificent perfectionem filiationis; nam ad hoc vt sit infinita, sufficit, si contineat infinitudinem in propria linea, idest in genere paternitatis; quemadmodum in ratione absoluti, ad hoc vt Sapientia sit infinita, satis est, si in suo

suo genere sit talis, licet non sit talis in genere Amoris.

Dico 3. Relationes prædictas in Deo esse perfectiones simpliciter simplices. Probat. Quia quælibet relatio ex illis in se ipsa melior, & perfectior est, & Deo conuenientior, quam quævis alia forma opposita, quæ in Deo induceret negationem relationis illius, per quam Deus non esset Pater, Filius, & Spiritus Sanctus.

Dices: paternitas non est melior filiatione, quæ non est ipsa paternitas; ergo non est perfectio simpliciter simplex. Resp. hoc non obstat, quo minus sit talis; nam excessus perfectionis simpliciter simplicis non exigit esse supra omnem aliam perfectionem, quæ non sit ipsa, sed supra omnem aliam oppositam, quæ in suo subiecto asferret negationem illius: quo pacto una relatio non comparatur cum alia: quia licet inter se opponantur, sunt tamen compatibles in vno Deo.

Dices: eidem Personæ, v. g. Filio filiatio inducit negationem paternitatis; ergo paternitas respectu illius non est perfectio simpliciter simplex, & vice versa. Resp. subiectum, cui comparatur relatio in Deo, vt dici possit perfectio simpliciter sim-

plex, non esse personam, sed naturam Diuinam, siue Deum, qui continet in se formaliter tres relationes; cui procul dubio melius est esse Patrem, Filium, & Spiritum Sanctum, quam esse cuiusvis alterius formæ oppositæ, quæ in Deo induceret negationem relationum. Præterea, cum in vnaquaque Persona sit omnis alia per admirabilem circuminflectionem; idè, quamvis in Filio non sit paternitas per identitatem, est tamen cum illo alio perfectissimo modo, idè per identitatem cum essentia, quæ est communis omnibus personis; idèque paternitas non inducit negationem filiationis in eodem subiecto, neque est causa, vt Filius non sit; sed optimè inuicem in eodem subiecto, modo explicato, compatiuntur.

Dico 4. Relationes Diuinas posse rectè dici tres perfectiones relatiuas, quod sic probatur. Quidquid prædicatur de relatione secundum propriam rationem formalem, prout est ab essentia distincta, multiplicatur, sicut relationes ipsæ multiplicantur; sed perfectio ita prædicatur de relatione; ergo multiplicatur iuxta numerum relationum. Probat. maior; quia idè multiplicamus entitatem,

tem, vnitatem, &c. quia dicuntur de relatione secundum propriam rationem formalem, vt ab essentia distincta, & sunt prædicata transcendentalia; & propterea in linea relationis dicimus tres entitates, tres vnitates, tres subsistentias relatiuas, &c. Probatur secundo, quia quælibet relatio habet perfectionem sibi propriam, & realiter distinctam à perfectione alterius relationis, à qua realiter contradistinguitur; ergo sicut sunt tres relationes, quæ hoc modo distinguuntur, ita sunt etiam tres perfectiones; Agimus enim hic de perfectione entitatiua, quæ est ipsa bonitas transcendentalis, quæ, sicuti est passio entis realis, ita multiplicatur, multiplicato ipso ente reali; quapropter sicut ens reale multiplicatur in relationibus, quia quælibet habet propriam entitatem distinctam ab entitate alterius, ita necesse est, vt multiplicetur bonitas, & perfectio, ita ut vnaquæque ex illis tribus relationibus habeat propriam bonitatem, & perfectionem distinctam realiter à bonitate alterius.

Si quæras, an huiusmodi relationes debeant dici tres perfectiones, sumpta perfectione secundum illam vulgatam acceptionem, idest pro eo, quod

est conueniens, & pertinet ad integritatem rei, vt ipsum perficiens; Aliqui negant. Nos cum affirmantibus sentimus, & sic probamus. Vnaquæque relatio maximè conueniens est Personæ, quam constituit: & singulæ habent singulas conuenientias inter se distinctas; conuenientia enim, quam habet paternitas respectu Patris, est distincta à conuenientia, quam habet filiatio respectu Filij; ergo, &c.

Probatur 2. Quia constitutiua Personarum, quatenus talia sunt, pertinent ad integritatem Personarum, & consequenter sunt earum perfectiones, sunt tria constitutiua personarum; ergo sunt tres perfectiones.

Sed Vasquez opponit: Ad perfectionem in hac acceptione, necessariò requiri realem distinctionem ab eo, cuius est perfectio; eo quod hæc ratio perfectionis consistat in respectu conuenientie, quo vnum dicitur conueniens alteri, qui respectus non potest esse solum rationis: quapropter, cum relatio in Deo non differat realiter à natura, vel persona, concludit non posse dici realem perfectionem Naturæ, vel Personæ. Confirmat hoc totum ex eo, quod hoc modo integrare importat ordinem

inter

inter rem integram, & integratam, qui ordo non potest esse inter relationem, & Deum, eo quod non sit inter extrema realiter distincta, quod iuxta ipsius principia requiritur, ad hoc, ut possit dici aliquid integrare realiter.

Resp. fundamentum Vasquez non subsistere; nam attributa Diuina sunt perfectiones reales Dei, quamuis ab illo non distinguantur realiter; & in nobis gradus rationalis est maxima perfectio naturæ humanæ, esto ab illa non distinguatur realiter. Vnde ad confirmationem. Resp. relationem Diuinam realiter integrare naturam, & Personam; esto realiter ab illis non distinguatur: cum ad hoc sufficiat, quod re ipsa est, ut ita possimus enunciare, quamuis ille ordo sit solum rationis; quemadmodum verè dicimus relationem realiter identificari cum essentia, quamuis relatio identitatis non sit realis, sed rationis.

Ex his clarum manet in hoc puncto difficultatis, qui est de modo loquendi, nullum esse scrupulum asserere, esse tres perfectiones relatiuas; nam & ipse Vasquez, licet sit in opposita sententia, nihilominus Cap. 7. cit. Disput. num. 27. concedit, si

absit scandalum, & rectè intelligatur, quod dicitur, secundum proprietatem sermonis, dici posse esse in Deo tres vnitates, sicut dicitur esse numerus ternarius. Nam & Concilium Rhemense, cui interfuit S. Bernardus, in suo decreto concedit tres res, tres singularitates, tres vnitates, dummodo dicamus eas esse omnino idem cum essentia, & ipso Deo. De veritate, loquendo de ea, quæ est passio entis, idem admittit: ac proinde consequenter loquendo, etiam de perfectione entitativa, quæ est idem formaliter cum ipsa bonitate transcendentali, quæ est & ipsa passio entis, ut ipse docet, hoc deberet concedere; vel saltem assignare maiorem rationem, cur de illis concedat, non verò de ipsa perfectione, seu bonitate, prout concedunt plures, & eruditissimi DD. tam moderni, quam antiqui.

Dico 5. tres Diuinas relationes, secundum propriam rationem esse inter se omnino æquales. Conclusio ista sequitur ex prædictis, & sic probatur. Quælibet ex Diuinis relationibus est entitas infinite perfecta etiam secundum propriam rationem; ergo sunt omnino inter se æquales; infinitas enim non admittit inæ-



inæqualitatem, & maximè in entitatibus Diuinis, in quibus non potest assignari à quo limitentur nec materialiter, nec formaliter.

Contra hanc doctrinam arguunt primo Doctores illi, qui censent, relationes in Deo, secundum propriam rationem formalem, non dicere perfectionem, sic. Si relationes Diuinæ essent tres perfectiones infinitæ, inter se realiter distinctæ, rectè posset dici tres Personas Diuinas, illis relationibus constitutas, aliquid maius, & perfectius continere, esto quælibet esset infinita, quam contineat vnica sola; sed hoc non benè sonat: ergo, &c. Sequela maioris sic probatur. Vnica persona v. g. Pater non habet alias duas relationes, quæ sunt in alijs duabus personis, cum non identificet sibi, neque filiationem, neque spirationem passiuam; ergo non est ita perfecta vna persona, sicut sunt omnes tres simul.

Resp. communiter huic argumento. Perfectiones illas relativas contineri eminenter in Essentia, propter eius infinitam, fecunditatem, ac proinde, sicut quælibet Persona gaudet eadem omnino essentia, ita gaudebit etiam omni alia perfectio-

ne relativa, quæ est in alijs personis.

Contra hanc Responsionem fiat, quod hic agimus de relationibus Diuinis, vt dicunt specialem perfectionem multiplicatam proportionaliter in tribus Personis, & quatenus vna est contradistincta ab altera. Quoposito, ex data responsione sequerentur duo inconuenientia. Primum est, quod adhuc quælibet relatio secundum specialem perfectionem, quam importat in recto, & prout est contradistincta ab essentia, esset inæqualis respectu perfectionum, quas aliz relationes important in recto: nam duæ relationes excedunt vnicam vna relatione, & consequenter vna perfectione. Alterum inconueniens est, quod perfectio propria relationum, eo quod relativa est, esset inæqualis respectu perfectionis essentia; cum hæc sit perfectio absoluta; & sic diceretur maioritas, & minoritas in perfectionibus Diuinis; vnde necessariò sequeretur inæqualitas. Cum enim Diuinæ perfectiones ad instar specierum differant, & species sint veluti numeri, consequenter essent inæquales.

Resp. tamen, quod etiam sumptis eo modo relationibus, adhuc nullum ex dictis inconue-

K

nien-

nientibus sequitur. Nam, quoad primum, excessus ille non habet locum in infinitatibus, quia, ut est in confesso apud philosophos, etiam in quantitate molis, seu corporea, quodlibet infinitum continet infinitas infinitates; & consequenter vnicum infinitum æquiualeat infinitis infinitatibus; quanto magis hoc habebit locum, ubi est solum quantitas virtutis, & consequenter, vna tantumdem habebit, quantum duæ, imò quantum tres simul: ut ex illis tribus globulis gloriosissimis, (repertis in corde nostræ Beate Claræ de Monte Falco, representantibus hoc altissimum Mysterium) deprehenditur, ex quibus vnusquisque tantum ponderis habet, quantum omnes tres simul.

Pulchrè Explicauit hoc S. P. lib. 3. contra Maximinum Episcopum Arrianorum, sic: *In Trinitate ergo, quæ Deus est, & Pater Deus est, & Filius Deus est, & Spiritus Sanctus Deus est, & simul hi tres vnus Deus: nec huius Trinitatis tertia pars est vnus, nec maior pars duo, quam vnus est ibi: nec maius aliquid sunt omnes, quam singuli, quia spiritualis hæc, non corporalis est magnitudo. Qui potest capere capiat: qui autem non potest, credat, & orat, ut, quod credit,*

*intelligat.* Ex hac doctrina S. P. satis plausibili in scholis, sequitur Trinitatem Personarum collectiue, non esse magis perfectam, quam singulas Personas diuiniue. Hæc sequela, vltra prædicta à SS. PP. inferitur ex vnitatem essentia, communis omnibus Personis, quam sic placet in præsentia explicare. Perfectio, quæ posita est in integritate Dei, & confurgit in eo ex omnibus, tam absolutis, quam relatiuis, quæ in Deo formaliter reperiuntur, est vnica, & communis Deo, & singulis Personis diuiniue, ac etiam omnibus collectiue sumptis; ergo ab hac perfectione, in qua posita est tota diuinitatis plenitudo, Deus, & singula personæ diuiniue, & omnes simul collectiue dicuntur æquè inter se perfectæ; atque adeò tres Personæ simul non poterunt dici magis perfectæ, quam singula diuiniue: & Pater seorsim acceptus æquè perfectus erit, ac tota Trinitas; cum totam ipsam plenitudinem perfectionis Diuinæ formaliter in se habeat: quæ perfectionis plenitudo conuenit Personis ratione essentia communis, ut dictum est. Hanc rationem adduxit Caspensis Tract. de Trinit. Disp. 2. sect. 4. membro 7. num. 108.

Si dicas: Id quod excedit aliud

aliud in aliqua perfectione, habet in se aliquid maius, & plus perfectionis, quam illud; sed tres personæ collectiue excedunt Patrem in duplici perfectione; ergo &c. Respondet, tres Personas, simul comparatas cum Patre, secundum id tantum, quod affertur in recto, excedere quidem illam in duplici perfectione, id est filiatione, & spiratione, quæ non affertur in recto à Patre, sicut affertur in recto à tribus Personis collectiue; Verum, secundum id, quod quouis modo formaliter affert, siue in recto, siue in obliquo, tres Personas collectiue non excedere Patrem in aliqua perfectione, eo quod filiatio ipsa, & spiratio formaliter, licet in obliquo, affertur à Patre tamquam sui perfectio per mirabilem circuminfusionem.

Si replices: semper aliquam maiorem perfectionem dicunt tres perfectiones æquales, quam vnica perfectio; sed tres personæ collectiue sunt tres perfectiones; & vna persona est vna tantum perfectio; ergo &c. Respondet: distinguendam esse maiorem; ita vt dicamus, tres perfectiones omnino æquales inter se non esse maiorem aliquam perfectionem intensiue, sed tantum dici posse maiorem,

perfectionem extensiue, quatenus numerus perfectionum excedit vnitatem perfectionis.

Puto tamen, huic responsioni esse addendum; hoc habere locum solum in entibus, seu entitatibus infinitis: nam in entibus finitis, quando perfectiones sunt æquales non solum extensiue, sed etiam intensiue, maiorem perfectionem dicunt tres, quam vnica tantum. Quoad secundum verò, in quo confertur essentia Diuina præcisè sumpta, cum relationibus præcisè sumptis: Resp. non esse nouum in scholis, quod essentia Diuina, sic accepta, iudicetur simpliciter perfectior, non solum qualibet relatione, sed etiam omnibus tribus simul sumptis: Conceptus enim Diuinæ essentiæ dicit formaliter in recto ipsam naturam Diuinam radicem, vel, vt alij loquuntur, mare, seu rationem à priori omnium perfectionum attributalium, & relationum Diuinarum, quas exigit vt sibi intrinsecas, & quas continet eminenter; & quælibet relatio Diuina, imò, & omnes simul sumptæ solum in recto, formaliter dicunt propriam entitatem relatiuam; & quasi supponunt ipsam naturam Diuinam, vt rationes posteriores, ad illam consequentes, quæ illam non

continent eminenter. Verum neque hinc sequitur inæqualitas propriè dicta, tum quia talis inæqualitas requirit extrema, inter quæ sit comparatio, realiter distincta, vt patet ex æqualitate, & inæqualitate, quæ est inter corpora; & natura Diuina non est realiter distincta à prædictis relationibus: tum quia in entitatibus infinitis non datur excessus sufficiens ad inæqualitatem propriè dictam, vt iam dictum est. Ad illud de speciebus: Resp. (quidquid sit de illo axioma, quod non admittitur ab omnibus, vt omnino certum) tale principium non habere locum in Diuinis, vbi non reperitur nec propria ratio generis, nec speciei.

Dico 6. Quamlibet Diuinam Personam formaliter in se habere omnem perfectionem, etiam ex relatiuis alterius, non solum secundum essentiam communem omnibus tribus, sed etiam secundum personalem proprietatem, ita vt vna relatio in alia relatione formaliter existat. De hoc puncto est necesse determinare in præsentī; eo quod alterum ex potissimis fundamentis eorum, qui docent Relationes Diuinas in suo conceptu formali non dicere perfectionem, est, quia sequeretur vni Personæ de-

esse aliquam perfectionem, quæ est in alia; Et hoc probant illo syllogismo expositorio. *Paternitas non conuenit Filio, paternitas est aliqua Diuina perfectio; ergo aliqua Diuina perfectio non conuenit Filio.* Et, cum ex alia parte, omnes scholæ Theologorum conueniant in hoc, quod nulla est perfectio in vna persona, quæ non sit in alia, necesse est probare, & explicare propositam quæstionem. Quod sic præsto.

Primo quoad primam partem Conclusionis: Catholica Fides docet, Diuinas personas esse in se inuicem; ita vt Pater in Filio, & Filius in Patre, & vterque in Spiritu Sancto, & Spiritus Sanctus in vtroque esse dicatur; Quam mutuam inexistentiam Theologi circuminseccionem dicunt; & est idem, ac si dicatur, vnā in alia sedere; hoc autem est idem, ac vnā personam habere in se omnem perfectionem personalem, & relatiuam alterius, siue aliarum; ergo &c. Maior probatur ex Sacra Scriptura Ioan. 10. ver. 38. *Vt cognoscatis, & credatis, quia Pater in me est, & Ego in Patre.* Quod pulchrè explicat S. Thom. 1. par. quæst. 42. artic. 1. docendo Patrem esse in Filio, & è conuerso secundum essentiam, rela-

relationem, & originem. Secundum essentiam, quia essentia Patris est in Filio, & Pater est sua essentia, & tam communicat Filio; & essentia Filij est in Patre, & Filius est sua essentia. Secundum relationem, quia vnum correlatiuum est in alio secundum intellectum. Secundum originem verò, quia processio verbi intelligibilis non est aliquid extra, sed manat in dicente, & quod verbo dicitur, in verbo continet. Quapropter modus iste essendi in alio est omnino diuersus ab illis octo, quos philosophus lib. 4. Physic. enumerat.

Nec obstat, quod Filius dicatur procedere, & exire à Patre, & habere cum eo oppositionem relatiuam; nam exitus ille est solum secundum distinctionem realem relationum, & Personarum, non verò secundum aliquam essentialem distantiam. Nec etiam obstat illa oppositio relatiua; neque enim vnus opponitur alteri secundum essentiam, quod sufficit ad hoc, vt vnus possit esse in alio etiam secundum relationem, vt dictum est. Sic Philosophatur ibi S. Thomas cuius doctrina applicari debet etiam Spiritui Sancto.

Si opponas: etiam in nobis est Deus, & nos sumus in eo, & ta-

men non potest dici, nos habere in nobis formaliter omnem perfectionem Diuinam; ergo nec etiam benè infertur hoc in Diuinis ex illa inexistencia. Resp. S. P. N. Augustinus Tract. 48. in Ioan. explicando prædicta verba, Evangelistæ, hoc modo. Non sic dicit Filius, in me est Pater, & ego in illo, quomodo possunt homines dicere. Si enim benè cogitemus, in Deo sumus, & si benè viuamus, Deus in nobis est. Fideles, participantes eius gratiam, illuminati ab ipso, in illo sumus, & ipse in nobis; sed non sic vnigenitus Filius. Ille in Patre, & Pater in illo tamquam equalis in eo, cui est equalis. Denique nos, aliquando possumus dicere, in Deo sumus, & Deus in nobis. Ego, & Deus vnum sumus, numquid nos possumus dicere, in Deo es, quia Deus te continet: Deus est in te, quia templum Dei factus es, sed numquid quia in Deo es, & Deus est in te, potes dicere, qui me videt, & Deum videt: quomodo Vnigenitus dixit, qui me videt, videt & Patrem: & ego, & Pater vnum sumus? agnosce proprium Domini: & minus seruis. Proprium Domini est equalitas Patris: minus serui est participatio Saluatoris. Nihil clarius, aut verius. Certum igitur est, vnā personam secundum rela-

tio-

tionem in alia eminenter contineri; cum qualibet formaliter contineat essentiam, & hæc in se eminenter contineat relationes aliarum Personarum, & unaquæque sit in alia etiam secundum relationem; & originem; ut infra dicetur, & per hæc iam satis demonstrata manet prima pars nostræ assertionis.

Secunda pars habet specialem difficultatem, ratione distinctionis realis, & oppositionis relationæ. Verum nihil horum obstat, quominus verè dicatur, Diuinas personas esse in se ipsis inuicem formaliter, secundum relationem vniuscuiusque propriam; ita ut relatio vnius personæ in relatione alterius formaliter esse dicatur. Hoc non obscure indicauit S. P. & cum eo S. Thomas locis supra citatis; Cum quibus sentiunt etiam S. Bonaventura in 1. distinct. 19. quæst. 4. Scotus ibidem quæst. 2. ex recentioribus Vasquez tom. 2. in primam partem Disput. 169. cap. 2. Montoya Disput. 117. sect. 4. & Caspensis in Tract. de Trinitate Disput. 2. sect. 4. num. 95.

Probatur 1. auctoritate S. R. Ecclesiæ, quæ in hymno S. Ambrosij, quem concinit in laudibus feriæ secundæ, habet. *In Patre totus Filius, & totus in*

*Verbo Pater.* Si totus, non ergo solum secundum essentiam.

Probatur 2. ex Sancto Hilario, qui lib. 7. de Trinitate, circa finem ait: *Inesse autem, non aliud in alio, ut corpus in corpore; sed ita esse, ac subsistere, ut subsistens in subsistenti insit, ita verè inesse, et ipse subsistat.* Si ergo vna persona inest in alia, ut subsistens in subsistente, manet non solum secundum essentiam, sed etiam secundum relationem, unicuique personæ propriam, vnam personam esse formaliter in alia.

Probatur 3. ratione S. Thomæ loco citato; qui mutuum personarum inexistentiā ex ratione originis deducit; quia processio verbi intelligibilis non est aliquid extra, sed manet in dicente; quod est idem, ac dicere; quia est terminus operationis vitalis, quæ ex genere suo requirit immanentiam termini producti in producente, quod sicut dicitur de Verbo, sic etiam dicendum est de Spiritu Sancto, qui Amor productus est & consequenter exigens, ratione suæ formalis productionis, manere in suo principio producente. Cum autem principium productiuum in Deo sit Persona, necesse est totum Verbum in Persona Patris, & to-

& totum Spiritum Sanctum in personis Patris; & Filij formaliter manere; ac proinde, non solum secundum essentialiter, sed etiam secundum relationes ipsas, quæ ad rationem Verbi; atque Amoris spiritalis spectant.

Hoc etiam modo, Patrem in Filio, & in Spiritu Sancto formaliter manere, Probatur ratione, desumpta ex S. Thom. Quia tota ratio, propter quam in creaturis principium productiuum operationum, & terminorum vitalium non dicitur manere in illis formaliter, est, quia terminus est accidens, & diuersæ naturæ à suo principio, non solum specificè, sed etiam genericè: ut in Deo, & essentia est omnino eadem principij productiui, & termini producti, ac præterea ipsæ relationes, & Personalitates Diuinæ sunt substantiales: (nullum enim omnino accidens physicum reperitur in Deo) & sunt infinitæ, ac immanentes: & consequenter impossibile est totum principium non manere in termino producto, sicut terminus ipse manet in principio: ergo, sicut totus Filius in Patre, & Spiritus Sanctus in Patre, & Filio, ratione vitalis originis, dicuntur manere: ita etiam totus Pater in Filio, & uterque totus in

Spiritu Sancto, ob eandem rationem, formaliter manere dicendi sunt.

Probari vltimo solet hæc formalis immanentiæ ex eo, quod relatio vnius Personæ complet in alia plenitudinem perfectionis: & consequenter vna persona non solum secundum essentialiter, sed etiam secundum relationem formaliter existit in alia.

Dices: ex hac doctrina sequi plura inconuenientia, propter quæ huiusmodi immanentiæ non videtur admittenda. Primo enim sequitur, vnam, & eandem rem esse formaliter habentem, & habitam ab eadem persona; quatenus enim Filius est in Patre, Pater dicitur habens Filium, quatenus verò Pater est in Filio, Pater diceretur formaliter habitus ab ipso Filio. Secundo sequeretur, vnum esse in alio, sine identitate, vel vniione reali, nam adhuc personæ manerent, rediret distinctio. Tertio, manere terminum formalem in aliquo, cui non tribuit suam denominationem; nam filiatio in Patre non tribuit ipsi Patri denominationem Filij; & sic de alijs, quod communiter in alijs, rectè philosophando, censetur repugnare. Quarto, Filium, v. g. habere in se formaliter paternitatem

tatem, non productam, neque communicatam; non productam, quia ex sua ratione est improducta; nec communicatam, quia in Concilio Florentino in litteris vnionis habetur. *Omnia, quæ Patris sunt, ipse Pater unigenito Filio suo dedit, præter esse Patrem.* Præterea relatio paternitatis est ipsa personalitas Patris, & de ratione personalitatis est incommunicabilitas. Hæc omnia sunt absurda. Ergo non est admittendum id, ex quo sequuntur, prædicta scilicet immutabilia.

Resp. ex prædictis, in hoc altissimo mysterio nihil incommodi sequi. Et quoad primum negatur, illud esse non posse; nam, & beati dicuntur habere Deum in se ipsis; & Deum habere illos in se. Similiter relationes Diuinæ dicuntur habere in se essentiam Diuinam, & vice versa, essentiam Diuinam habere in se ipsas relationes.

Ad secundum Resp. non requiri talem identitatem, aut vnionem; nam & Angeli sunt in Deo, & Deus in Angelis, absque eo, quod intercedat talis identitas, aut vnio substantialis. Præterea, dato etiam, quod requireretur, patet Diuinam essentiam satis congruè posse dici substantialem vnionem (sublati im-

perfectiōibus, quæ reperiuntur in vnione substantiali, quæ est in creaturis) immediatam inter ipsas personas; est enim communis omnibus tribus personis, & connotat relationes inter se realiter distinctas; ac proinde est sufficiens fundamentum mutuae inexistentiæ ipsarum personarum.

Ad tertium Resp. relationem vnā non esse in alia relatione, seu Persona, tamquam formam denominantem, & propterea esse impossibile, vt Filius à paternitate Diuina denominetur Pater; cum sit in eo per modum subsistentis in subsistente; neque enim semper id, quod est intrinsecum, seu intimè existens in alio, se habet vt forma illius; Deus namque est intimè præsens, & intrinsecè existens in omnibus, & singulis suis creaturis, & tamen non est forma illarum.

Ad quartum Resp. Filium non habere quidem paternitatem communicatam à Patre per realem identitatem, ita vt per eam sit Pater, quemadmodum est Pater. Et hoc est, quod ibi docuit Sacrosanctum Concilium Florentinum: cum quo tamen rectè fiat, vt habeat eam ita communicatam, vt sit ei intimè præsens, & intrinsecè in eo existens, tam-



tamquam principium vitale, media existentia Diuina vtriusque communi; nihil enim impedit, communiter loquendo, duas relationes oppositas, secundum immanentiam vnus in alia posse inuicem inter se coherere. Neque est vlla repugnantia, vt subsistentia communicetur subsistentiæ per circuminfectionem modo dicto.

Dices 2. contra prædicta omnia, hanc doctrinam, quatenus asserit Diuinas relationes formaliter dicere perfectionem, esse contra mentem S. P. Augustini, qui lib. 5. de Trinitate cap. 8. ait. *Magnus Pater, magnus Filius, magnus Spiritus Sanctus: non tamen tres magni, sed vnus magnus; & bonus Pater, bonus Filius, bonus Spiritus Sanctus, nec tres boni, sed vnus bonus.* Et cum sit idem esse tres bonos, ac esse tres perfectos, vt ex supradictis est certum, si non possumus (ex sententia S. P.) dicere esse tres bonos, nec etiam poterimus dicere esse tres perfectos.

Si Respondeatur: ideo non posse dici tres bonos, aut tres perfectos, quia non multiplicatur essentia Diuina; & ad multiplicationem concretorum requiritur, vt, cum multiplicatione formæ, multiplicetur etiam

subiectum, siue id, quod habet rationem subiecti. Contra instant primo, quod, sicut ad multiplicationem vnitatum, & subsistentium sufficit multiplicatio suppositorum, esto ipsa natura Diuina non multiplicetur; consequenter etiam, sine hac multiplicatione, dummodò multiplicarentur bonitates, seu perfectiones, deberent multiplicari ipsi boni, & perfecti, quod tamen S. P. negat posse fieri; licet illam priorem multiplicationem admittat. Contra instant secundo, quia idem S. P. lib. 7. de Trinitate cap. 1. & 6. ait: *Bonitatem, & magnitudinem perfectionis in Diuinis non relatiuè, sed ad se dici.* Vnde, cum relationes ad essentiam nihil addant absolutum, distinctum ab illa ratione, & per S. P. ratio perfectionis in Deo, non relatiuè, sed absolute dicatur, manet esse omnino de mente eiusdem, relationes Diuinas non addere perfectionem ad essentiam, ab illa ratione distinctam.

Sed Resp. ad primam instantiam, eadem omnino ratione probari, esse tres perfectiones relatiuas, qua ostenditur esse tria supposita relatiua; cum enim hic quærat de perfectione essentiali, quæ est idem formaliter cum bonitate transcenden-

L tali,

tali, ut in Axiomatibus metaph. cap. 12. pag. 284. notauimus, manet, quod multiplicata unitate transcendentali supposito- rum, necesse est etiam sit multiplicari bonitatem transcendentalem eorundem; cum implicet contradictionem multiplicari unum aliquod transcendentium entis, quin simul multiplicetur & alterum; ac proinde S. P. studio ibi loquutum esse in concreto, non verò in abstracto, ut indicaret se loqui de Bonitate absoluta essentiae, non autem de bonitate relatiua personarum.

Ad secundam instantiam Resp. S. P. ibi in 1. cap. non resolvendo, sed inquirendo, de hoc puncto loquutum fuisse; ait enim ibi: *Iam nunc quæramus diligentius &c. Vtrum & singula quæque in Trinitate persona possit, & per se ipsam, non cum cæteris duabus, dici Deus, aut magnus, aut Sapiens, aut verus, aut omnipotens, aut iustus; & si quid aliud de Deo dici potest, non relatiuè, sed ad se ipsum: an verò non dicantur ista, nisi cum Trinitas intelligitur. Hoc enim quæstionem facit, quia scriptum est Christum Dei Virtutem, & Dei Sapientiam &c. Quibus verbis certum est ipsum quæstionem mouere, quam in eo primo ca-*

pite non resoluit; sed totus in eo est, ut ostendat Patrem ex se Sapientem esse, non autem Sapientia à se genita. In cap. 6. postea ratione, quam assignat, cur dicantur tres Personæ, omnino potius nostræ fauet, quam oppositæ sententiæ: ait enim ibi: *Quo circa ut substantia Patris ipse Pater est, non quo Pater est; sed quo est; ita & Persona Patris non aliud, quam ipse Pater est; ad se quippe dicitur persona, non ad Filium, vel Spiritum Sanctum &c. Cur ergo non hæc tria simul unam personam dicimus, sicut unam essentiam & unum Deum, sed tres dicimus personas, cum tres Deos, aut tres essentias non dicamus, nisi quia volumus vel unum aliquid vocabulum seruire huic significationi, qua intelligitur Trinitas, ne omnino taceremus, interrogati, quid tres, cum tres esse fateremur? Vbi, præterquamquod non recusat dicere tres personas, esto persona ad se dicatur: Aduerte, quod assignat pro ratione, cur dicantur tres Personæ, & non una solum; ne interrogati, quid essent illi tres in Trinitate, taceremus, idest non haberemus, quid possemus respondere; cur ergo & hoc non militabit ad hoc, ut interrogati, an, sicut sunt tres entitates,*

tes, & vnitates relatiuæ, sic etiam posset dici, quod sint tres bonitates relatiuæ, cum militet eadem ratio de vna passione entis, ac de alijs, cum sint ab eo omnino inseparabiles. Sublato ergo periculo erroris (vt aufertur omnino, specificando multiplicationem ibi accipi non penes absoluta, sed penes relatiua) omnino est, & secundum rationem, & de mente S. P. admittere tres perfectiones, seu bonitates relatiuas. Quod totum non obscure aperuit idem S. P. in fine dicti capitis 6. vbi est terminus illius libri septimi, cum ait. *Aus si iam places, propter disputandi necessitatem, etiam exceptis nominibus relatiuis, pluralem numerum admittere, vt vno nomine respondeatur, cum queritur, quid tria, & dicere tres substantias, siue tres personas; nulla moles, aut interualla cogitentur, nulla distantia, quantulacumque dissimilitudinis, vt ibi intelligatur aliud ab alio, vel paulo minus, quocumque modo esse minus ab alio potest, vt neque Personarum sit confusio, nec talis distinctio, qua sit impar aliquid. Quod si intellectu capi non potest, fide teneatur, donec illucescat in cordibus ille, qui ait per Prophetam: Nisi credideritis non intelligetis. Est igitur citra controuerfiam nomina relatiua plu-*

ralem numerum admittere in Diuinis; dummodo ibi non admittatur inæqualitas, dissimilitudo, apte similes imperfectiones, quæ Deo repugnant, quarum nullam ibi ex nostra sententia admitti iam demonstratum est; & hoc eo magis in præfenti admittendum est, quod disputandi necessitas nos cogit, ad inferendum istud per necessariam consequentiam ex alijs transcendentibus, quæ ibi sine scrupulo ab omnibus necessario multiplicantur; cum quibus hoc, de quo agimus, habet necessariam connexionem, imò & identitatem.

Remanent nunc soluenda argumenta, quibus plures, & graues Auctores contendunt, relationes Diuinas non posse dicere perfectionem formaliter in eo sensu, quo nomine perfectionis importatur integritas Dei.

Primum est, quia si huiusmodi Relationes pertinerent ad Diuinam integritatem, prima Persona non esset integer, & perfectus Deus, eo quod, cum Pater non sit tres relationes, non poterit esse in eo perfectio Deitatis, quæ consurgit ex illis tribus, ac propterea non esset perfectus, & integer Deus. Resp. ad hoc, vt Pater dicatur Deus omnino integer, & perfectus, sufficere, quod

habeat in se formaliter aliquo modo ea omnia, quæ concurrunt ad Diuinam integritatem, vel per identitatem, quo pacto habet omnia essentialia, vel per circumfessionem, quemadmodum habet omnia notionalia, quæ constituunt alias personas.

Secundum argumentum est: quod ex huiusmodi perfectione data sequeretur, perfectionem Dei nec esse absolutam, nec relatiuam, sed ex vtraque conflata, ac ideò fore compositum aliquod, vel ens per accidens, coalescens ex rebus etiam genere inter se distantibus. Resp. sequi solummodo perfectionem Diuinam esse simul, & semel & absolutam, & relatiuam; quod nullam importat inconuenientiam, cum Deitas sit fons, & Origo cuiuscumque entitatis; imò esse formaliter ens absolutum, & formaliter relatiuum omnes tenentur admittere, siue dicant relationes importare formaliter perfectionem, siue non; & quemadmodum ibi non inueniunt imperfectiones, sic neque hic, cum vtroque militet eadem ratio. Neque sequitur compositio realis, absolute loquendo; cum

non confurgat huiusmodi perfectio ex rebus dissolutis, & nullo modo inter se identificatis; sed ex rebus summè connexis, media vnitate, & identitate cum Diuina essentia. Nec obstat distantia generica entis absoluti, & relatiui, quemadmodum non obstat in creatis, quo minus in eodem indiuiduo inueniantur identificate relationes cum prædicatis absolutis.

Tertium est: Filiatio eo modo, quo est in Filio, non est in Patre; sed filiatio eo modo, quo est in Filio, est aliqua perfectio: ergo aliqua perfectio non est in Patre, quæ est in Filio, & sic de alijs. Resp. distingo maiorem, non est eo modo, ita vt Patrem constituat Filium, concedo maiorem; non est in Patre per circumfessionem, tanquam terminus vitalis operationis ab intellectu Patris, nego maiorem. Cum enim totus Filius sit in Patre, vt dictum est, est etiam in eo modus ille, quo filiatio constituit secundam personam Filium, esto non constituat ipsum Patrem Filium; hoc enim nullo modo requiritur. Et sic, concessa minori, negatur consequentia.

## AXIOMA QVINTVM.

*Quomodo se habeant ad inuicem Diuina Relationes Paternitatis, Filiationis, Spirationis actiue, & Spirationis passiue.*

Ex Lib. 5. de Trinitate Cap. 14.



*D se inuicem in Trinitate si gignens ad id, quod gignitur, principium est, Pater ad Filium principium est, quia gignit eum. Vtrum autem, & ad Spiritum Sanctum principium sit Pater, quoniam dictum est: de Patre procedit, non parua questio est. Quia si ita est, non iam principium ei tantum rei erit, quam gignit, aut facit; sed etiam ei, quam dat &c. Fatendum est Patrem, & Filium Principium esse Spiritus Sancti, non duo principia. Sed sicut Pater, & Filius vnus Deus, & ad creaturam relatiue vnus Creator, & vnus Dominus, sic relatiue ad Spiritum Sanctum vnum Principium. Ad creaturam verò Pater, & Filius, & Spiritus Sanctus vnum Principium, sicut vnus Creator, & vnus Dominus.*



## D V B I V M V.

Quomodo distinguantur Relationes  
istæ inter se.

**E**X quatuor Diuinis Relationibus, Paternitate scilicet, Filiatione, Spiratione actiua, & Spiratione passiuâ aliquæ inter se relatiuæ opponuntur, vt sunt paternitas, & filiatio ex vna parte, & spiratio actiua, cum spiratione passiuâ ex altera parte. Aliquæ verò non opponuntur, vt sunt paternitas, & spiratio actiua, ac etiam filiatio cum eadem spiratione actiua. Quæritur nunc de omnibus utroque modo comparatis, quomodo distinguantur. Propterea,

Dico 1. Relationes, ad inuicem oppositas, esse realiter distinctas. Hæc assertio est de fide, definita in *Capite firmiter de summa Trinitate*, ubi dicitur. *Hæc Sancta Trinitas secundum communem essentiam indiuidua, secundum proprietates personales distincta*. Idem habetur in Concilio Toletano XI. Eam probat S. Thom. 1. par. quæst. 28. artic. 3. ex eo, quod, cui attribuitur relatio realis, est etiam

attribuenda realis oppositio, quæ est de ratione illius. De ratione enim relationis est respectus vnius ad alterum, secundum quem aliquid alteri opponitur relatiuè. Et cum in Deo realiter sit Relatio; oportet, quod realiter ibi sit oppositio: relatiua autem oppositio in sui ratione includit distinctionem. Unde oportet, quod in Deo sit realis distinctio, non quidem secundum rem absolutam, sed secundum rem relatiuam, Sic discurret ibi A.D.

Aliqui putant hanc rationem, ad hoc vt sit efficax, esse intelligendam in subiecta materia de oppositione, quæ est secundum originem vnius substantiæ completæ ab alia, eo quod oporteat, hanc esse inter rem, & rem; alioquin si latius sumatur pro quacumque oppositione existente à parte rei, censent, eam non semper conuincere distinctionem rei à re, sed quandoque vt rei à modo, vel formalitatis à formalitate, ac proinde asser-

sertionem S. Thom. esse intelligendam de relationibus realibus oppositis, & sic intellectam, esse certissimam; cum sit penè de fide Personas Diuinas constitui proprietatibus relatiuis; & personas esse realiter distinctas, definitum habeatur, & contra Sabellium, & in Cap. *Firmiter*.

Verum hanc limitationem arbitror esse superuacaneam; eo quod S. Thom. arguit à priori de distinctione reali, quæ est inter relationem realem, & terminum realem illius, essentialiter requisitum, siue talis distinctio sit ratione originis, siue proueniat aliundè; non enim minus distinguuntur realiter ea, quæ opponuntur relatiuè ratione originis, quam ea, quæ sine origine habent relationem realem intermediam inter se. Nec ratio adducta conuincit oppositum; nam in sententia, quam ego ueriores arbitror, non dantur huiusmodi entitates modales; & inter formalitates, quæ dantur à parte rei, non datur relatio realis, nec oppositio realis, nisi etiam simul detur distinctio realis.

Dices: in hoc Sanctissimo Mystero quælibet distinctio realis est ratione originis; sed una relatio non originatur ab alia;

ergo neque distinguitur. Resp. distinguendo minorem: non originatur adæquatè, concedo, eo quod reuera Paternitas, ut sic abstracta, non est principium; inadæquatè, & nego; quia Filius est à Patre, qui constituitur paternitate; & propterea negatur consequentia. Vel dic cum S. Thom. loco citato in resp. ad 3. quod, esto relationes propriè loquendo non oriuntur, vel procedant ab inuicem, tamen accipiuntur per oppositionem, secundum processionem alicuius ab alio; quod sufficit ad distinctionem.

Maior difficultas est de illis relationibus, quæ inter se non opponuntur; cum enim certum sit, esse vnâ Spiratiopem actiuam, communem Patri, & Filio; & hanc distingui realiter à Spiratiopne passiuâ, propter realem oppositionem cum illa: quæstio non leuis confurgit, quomodo hæc spiratio distinguatur à relatione paternitatis, & filiationis; siue à generatione actiuâ, vel passiuâ, cum quibus nullam habet oppositionem. In qua duæ sunt sententiæ extremè oppositæ.

Prima est Durandi in 1. dist. 13. quæst. 2. docentis, distingui realiter, quam dicit esse Magistrorum sui temporis.

Secun-

Secunda sententia est communis in scholis, sola ratione distingui. Sed ex ijs, qui eam sequuntur, aliqui dicunt cum Gabriele non esse quatuor relationes: eo quod, alias posset dici, esse quatuor res, cum multiplicato inferiori necessario multiplicetur etiam superior. Alij verò absolute concedunt esse quatuor relationes, non verò quatuor res, & hæc est communior. Propterea.

Dico 2. Spirationem actiuam non distingui realiter à Paternitate & Filiatione, vt rem à re. Hæc assertio est adeò certa apud Theologos, vt communiter sententia Durandi habeatur pro temeraria, & errori proxima. Quod probatur primo: quia ex ea sequitur in Deo esse admittendam quaternitatem, quod est damnatum in Concilio Lateranensi Cap. *Damnamus*. Sequela est clara; positis enim quatuor relationibus realibus, realiter distinctis, quarum vnaquæque sit substantia per se subsistens, nullo modo potest negari, esse quatuor res.

Durandus respondet damnavi ibi solummodo quaternitatem personarum expressè, & concomitanter quaternitatem ex personis, & essentia. Verum,

est hoc effugium defendat hanc sententiam ab hæresi, non tamen eximit eam à prædicta censura; Concilium enim definiuit, in Diuinis esse tantum Trinitatem, quia quælibet persona est illa res, seu essentia communis; ergo consequenter definit nullam esse aliam rem in Diuinis, cum qua tres personæ ponant numerum, alias non esset ibi solum Trinitas: & tamen iuxta Durandum tres personæ non sunt illa res, quæ est spiratio.

Probatur 2. Quia spiratio actiua est per se subsistens, & iuxta Durandum realiter distincta ab alijs relationibus; ergo si esset vera hæc sententia, esset admittenda necessario quarta persona; cum non possit assignari maior ratio, cur aliæ tres relationes constituent tres personas, & hæc non constituat.

Respondet Durandus, esse quidem per se subsistentem, sed non esse incommunicabilem, quod requiritur ad rationem personæ. Sed contra est, quia nec communicatur per identitatem, iuxta ipsum, alias iam nobiscum sentiret; nec per compositionem, quia tolleretur simplicitas; nec apparet, quo alio modo possit communicari.

Præ-



Præterea: quid est aliud incom-  
municabiliter subsistere, quam  
esse substantiam realiter dis-  
tinctam à quolibet subsistente?

Probatur 3. ex illo communi  
axioma: *In Diuinis omnia  
sunt unum, ubi non obuiat oppo-  
sitiu relatiu*. Sed spiratio acti-  
ua non opponitur nec paterni-  
tati, nec filiationi; ergo est  
vnum cum illis. Et hoc procul-  
dubiò intendit S. P. cum ait:  
*Fatendum est Patrem, & Fi-  
lium principium esse Spiritus San-  
cti, non duo principia, sed sicut  
Pater, & Filius unus Deus, &  
ad creaturam relatiuè unus crea-  
tor, & unus Dominus: sic rela-  
tiuè ad Spiritum Sanctum unum  
Principium*. Sicut ergo ad crea-  
turam relatiuè dicitur per S. P.  
& tamen non propter hoc po-  
nitur relatio distincta realiter  
ab illis tribus; sic nec etiam in  
ordine ad Spiritum Sanctum. Hæc  
argumenta militant etiam  
contra distinctionem formalem ex  
natura rei aliquo modo, non ta-  
men ita euidenter, vt contra rea-  
lem.

Dices primo cum Durando:  
sunt ibi duo termini realiter dis-  
tincti; ergo & duæ relationes  
realiter distinctæ. Resp. negan-  
do consequentiam: non enim  
reperitur semper, aut requiri-

tur tanta distinctio in principiis  
producentibus; quanta reperit-  
ur in terminis productis; vt  
patet in creatis, in quibus vni-  
ca causa plures effectus, non so-  
lum numero, sed etiam specie  
differentes producit, sola dis-  
tinctione rationis, seu virtuali  
in ipsa causa existente. Non  
est igitur par ratio de terminis,  
ac de relationibus; ideò namque  
sunt duo termini realiter distin-  
cti; quia inter ipsos est oppo-  
sitiu originis; Filius enim à Pa-  
tre, & Spiritus Sanctus à Pa-  
tre, & Filio procedit; quare  
ex eo, quod hi termini differant  
veluti specie, non aliud sequi-  
tur, quam quod relationes ip-  
sæ, in ratione relationis, de-  
beant differre virtualiter, seu  
ratione, siue terminatiuè, quod  
vtrò conceditur, non verò enti-  
tatiuè; nam, & in creatis passim,  
vt dicebam, conceditur plures  
relationes, quibus Sol v. g. re-  
spicit plures terminos specie dif-  
ferentes, quales sunt metalla,  
plantæ, animalia &c. inter se in  
ipsa causa identificari, & so-  
lum ratione ratiocinata, seu vir-  
tualiter diuersificari: sic etiam  
in substantia in ordine ad suas  
proprietas, quæ ab ipsa ema-  
nant.

Dices 2. sunt quatuor rela-  
tiones reales; ergo inter se

M om-

## CONTROVERSIA SECVNDA

omnes realiter distinguuntur; distinctio enim virtualis non sufficit ad ponendum numerum realem. Resp. negando consequentiam; alias etiam omnia attributa realiter distinguerentur; cum omnia sint realia; esto enim in rebus corporalibus non habeatur numerus, nisi per separabilitatem realem, ratione quantitatatis molis, nihilominus in rebus spiritualibus, ubi habetur solum quantitas virtutis, numeramus etiam per solam separabilitatem, siue separationem rationis ratiocinatae, & sic dicimus Misericordiam, & Iustitiam esse duo attributa realia: Vnitatem, Veritatem, & Bonitatem esse tres passiones reales entis: Memoriam, Intellectum, & Voluntatem esse tres passiones reales animae intellectualis; & similia.

Dices 3. quæ non possunt conuenire eisdem respectu eiusdem, non sunt vnum, & idem realiter, saltem in relatiuis, quorum totum suum esse est, ad aliud se habere; sed generare competit Patri respectu Filij, non verò respectu Spiritus Sancti, & spirare è contra; & sic proportionally, generari competit Filio respectu Patris, non verò respectu Spiritus Sancti; & spirari respectu spiratoris, non

verò respectu Patris, aut Filij; ergo distinguuntur realiter. Resp. negando maiorem; nam, ad illam diuersitatem, ubi non obuiat oppositio relatiua, sufficit distinctio virtualis relationum, & actualis terminorum.

Dices 4. sicut se habet generare ad generari, ita se habet spirare ad spirari; & commutata proportionem, sicut se habet generari ad spirari, sic se habet generare ad spirare; sed illa duo distinguuntur realiter: ergo etiam ista duo. Resp. Argumentum à commutata proportionem non valere; nisi in quantitate molis, ubi retinetur eadem proportio; sic enim respondetur ad illud argumentum Auerrois: sicut se habet causa antiqua ad effectum antiquum, ita se habet causa noua ad effectum nouum; ergo, sicut effectus antiquus non potest esse à causa noua, ita nec effectus nouus à causa antiqua. Ratio est, quia in argumentis, quæ non desumuntur à quantitate corporea, non reperitur illa rigorosa proportio, quæ requiritur ad verificandam paritatem; quod in presenti sic ostendo: inter generari, & spirari est oppositio originis, quia spiratus est à genito; quæ oppositio non reperitur

ritur inter spirare, & generare.

Dices 5. si Paternitas, & Filiatio essent idem re cum Spiratione actiua, essent etiam idem inter se; nam ea, quæ sunt eadem vni tertio, sunt idem inter se; consequens est falsum; ergo & id, vnde sequitur. Resp. quod si hoc argumentum probaret de spiratione actiua, probaret etiam essentiam Diuinam non esse communem tribus personis, quod tamen est hæreticum asserere. Si dicas ideo essentiam esse communem, quia non habet oppositionem cum vlla personarum, seu relationem; at spirationem actiuam habere oppositionem cum spiratione passiuâ, ac proinde non posse esse communem. Resp. hac instantia solum probari non posse esse communem tribus personis, sicut est essentia; non verò non posse esse communem duabus; imò indè potius habetur intentum; nam si essentia ideo est communis tribus personis, quia cum illis non habet oppositionem; sic pariter spiratio actiua erit communis duabus, cum quibus nullam habet oppositionem. Quod si iterum dicas: Essentiam ideo esse communem tribus personis, quia est infinita simpliciter in omni genere, quod non habet spiratio actiua,

quæ solum in proprio genere est infinita. Resp. sufficere hanc infinitatem, vt identificetur cuiusque non opponitur, vt patet in attributis, quorum vnumquodque est infinitum solum in propria linea, & tamen identificatur & cum essentia, & cum omnibus alijs attributis, & cum singulis personis.

Dices 6. Generari, & Spirari sunt duæ processiones passiue: ergo debent procedere à duabus productionibus actiuis. Resp. eodem modo philosophandum esse de actionibus, seu productionibus, ac de relationibus: passiue enim multiplicantur propter oppositionem, quam habent ad inuicem; quod non habet locum in actiuis, quæ cum non opponantur, ad hoc, vt multiplicentur, sufficit distinctio virtualis, vt supra dictum est.

Dices 7. Implicat esse omnino eandem relationem producti, & producentis: ergo implicat identificari relationem spirationis actiue cum filiatione. Probatur antecedens. Si Spiritus Sanctus esset filius Filij, ad ipsum referretur Filius relatione paternitatis, & ad Patrem relatione filiationis; ac proinde relationibus realiter diuersis: ergo etiam nunc est realiter diuersa spiratio actiua à filiatione;

cum militet eadem ratio. Resp. quod, sicut in supposito creato, pro diuersitate relationum paternitatis, & filiationis, sufficit distinctio virtualis, seu rationis ratiocinatae, multò magis in Diuinis, vbi ea, quæ sunt dispersa in inferioribus, sunt omninò vnita, & identificata.

Dices 8. si Pater non spiraret, adhuc tamen generaret; ergo non est idem realiter generare, & spirare. Resp. data illa suppositione, tolli alterum terminum; ideòque etiam relationem, sola ratione distinctam ab alia, remanente eadem realitate; sicut dixi, loquendo de relatione in communi in Philosophia rationali, sublato termino, remanere absolutum cum sua realitate relatiui quoad suum esse, non verò quoad suum denominari; eo quod ad suum denominari requiritur terminus, & relatio mutua, quæ in eo casu, seu hypotefi deesset.

Dices 9. Non possunt duæ res absolutæ esse ab inuicem realiter distinctæ, & esse idem cum aliqua tertia absoluta; ergo nec etiam duæ relationes cum tertia. Resp. duas res absolutas realiter distinctas, ob sui limitationem, non posse identificari alicui tertio; eo quod talis distinctio inter

absoluta non reperiatur, nisi in creatis: loquendo verò de relationibus infinitis, nihil impedit, quo minus vna identificetur duabus, si non obuiat oppositio relatiua.

Si opponas: Paternitas vt sic adæquatè respicit Filium, ergo non potest respicere alium terminum; nam vna relatio non respicit nisi vnum terminum adæquatè, & quando respicitur alter terminus, alia relatione respicitur; ac idcirco si prima persona respicit Spiritum Sanctum, illum necessariò respicit alia relatione, à paternitate realiter distincta. Resp. Paternitatem, vt sic, dicere illam relationem primæ personæ, vt præcisè à nobis concipitur cum ordine ad genitum; & vt sic habere pro termino adæquato Filium; sed Paternitatem, vt est à parte rei idem cum spiratione, non respicere solum Filium, sed etiam Spiritum Sanctum. Quapropter si significetur aliquo nomine transcendentali communi ad absoluta, & relatiua, vt si dicas res, vel entitas, quæ est paternitas, respicit solum Filium, erit falsa propositio. Per hæc manent soluta Durandi argumenta.

Ad rationem Gabriëlis, supra adductam. Resp. Tunc, multipli-

plicato inferiori realiter, debere etiam multiplicari superius realiter, quando identificatur cum inferiori; sed multiplicato inferiori secundum rationem, non adesse necessitatem multiplicandi superius absolute, eo quod potest esse in inferiori aliqua ratio, propter quam possit absolute multiplicari, quæ non sit in superiori, ut est in presenti; ubi, secundum communem usum loquendi in scholis, multiplicantur relationes etiam in creatis in eodem individuo, secundum multiplicationem termino-

rum; nunquam tamen illæ plures relationes verè dicuntur esse plures res, nec etiam in sententia eorum, qui eas distinguunt plusquam virtualiter à fundamento, sed ad summum dicuntur esse, vel plures modi, vel plures formalitates; quod multò magis debet habere locum in Diuinis. Non enim propterea dicimus esse ibi tres res, quia ibi sint tres relationes simpliciter, sed quia sunt tres relationes realiter distinctæ, constituentes tres diuersas Personas.

## A X I O M A S E X T V M.

*Dantur in Deo relationes Aequalitatis, & similitudinis.*

Ex Lib. 1. de Doctrina Christiana Cap. 5.



*Adem tribus aternitas, eadem incommutabilitas, eadem maiestas, eadem potestas. In Patre unitas, in Filio aequalitas, in Spiritu Sancto unitatis, aequalitatisque concordia. Et tria hac vnus omnia propter Filium, connexa omnia propter Spiritum Sanctum.*

## D V B I V M V I

An relationes æqualitatis, similitudinis, & identitatis inter Diuinas Personas sint reales, vel rationis.

**P**Ræter prædictas quatuor relationes paternitatis, filiationis, spirationis actiue, & spirationis passiue, de quibus certum est esse reales, dantur aliæ, de quibus est difficultas inter Theologos, an sint reales, vel rationis: huiusmodi sunt relationes identitatis, æqualitatis, & similitudinis. In hac quæstione sunt duæ celebres sententiæ.

Prima est communis inter Thomistas, qui vno ore tuentur, esse relationes rationis; eamque dicunt esse expressam S. Thom. 1. par. quæst. 42. artic. 3. ad quartum, ac eam sequuntur plures alij extra scholam S. Thomæ.

Secunda sententia est Scoti quodlibeto 6. artic. 2. & in 1. distinct. 31. quæst. 1. affirmantis esse reales. Becanus autem Tract. de Sanctissima Trinitate cap. 2. quæst. 2. num. 7. putat Scotum hoc docere solum de duabus, idest de æqualitate, & simili-

tudine: sed re vera, ipsum hoc docere etiam de identitate, tenent communiter Scotistæ.

Præmitto solutioni, esse citra controuersiam dari in Diuinis personis, independentem ab operatione nostri intellectus, identitatem; idest vt sint vnus, & eiusdem numero naturæ, & æqualitatem fundatam, non in quantitate molis, sed in quantitate virtutis; quæ dupliciter in Deo spectari potest, primo secundum perfectionem essentialem; secundo in perfectionibus attributalibus, & personalibus, seu relatiuis: & huiusmodi æqualitatem habere in Deo omnia requisita ad hoc, vt sit veræ æqualitas; ad quam hæc tria requiruntur, & sufficiunt: primo distinctio realis; secundo quantitas eiusdem rationis, nam si sit diuersæ rationis, vt sunt linea, & virtus Angeli, non potest haberi æqualitas; tertio, vt huiusmodi quantitas non sit maior in vno,

vno, quam in alio, vt docet Philosoph. lib. 10. metaph. quæ omnia reperiri inter Diuinas personas, nullus dubitat. Demum reperiri etiam ibi similitudinem non est dubium; non quidem eo sensu, quo eam ponebant Arriani, qui illam vocem græcam (Omoion) perperam accipientes, explicabant per solam similitudinem essentia, negando vnitatem numericam naturæ, & æqualitatem in perfectione; sed in sensu Catholicorum, qui ponunt similitudinem in Diuinis, cum vnitatem naturæ singularis, & æqualitate perfectionis, quæ maxima est; vt propterea S. P. lib. 7. de Trinitate cap. ultimo docuerit Personas Diuinas dicendas esse similes, non dissimiles, quia hoc ad substantiam refertur. His positis.

Dico 1. cum S. Thoma loco citato in sensu, quo communiter agitur hæc quæstio, has tres relationes identitatis, æqualitatis, & similitudinis esse relationes rationis; esto identitas, æqualitas, & similitudo sint reales. Ratio est eadem, quam affert S. Thomas, quia ad relationem realem non sufficit, quod fundamentum sit reale, sed præterea, vt sit realiter distinctum in vtroque extremo; sed fundamentum identitatis, æqualita-

tis, & similitudinis in Diuinis est ipsa Diuina essentia, siue etiam ipsa Diuina attributa, quæ non distinguuntur in vtroque extremo, cum in omnibus personis sit omnino eadem numero essentia, & sint eadem numero attributa; ergo identitas, æqualitas, & similitudo, secundum hanc considerationem, non sunt relationes reales in Deo. Dixi in sensu, in quo communiter disputatur hæc quæstio; nam, si loquamur in alio sensu, nempe quatenus tres personæ Diuinæ conueniunt in hoc, quod sint tres substantiæ relatiuæ, tres subsistentiæ, seu personalitates, & tres perfectiones relatiuæ, vt supra probatum est, non video cur non. Ideò.

Dico secundo, iuxta hanc acceptionem, posse admitti inter illas relationes reales: quod probò à pari. Ideò inter homines, habentes eandem naturam, quantitatem, & qualitatem, admittitur, relationes identitatis, æqualitatis, & similitudinis esse reales, quia substantiæ, quantitates, & qualitates illæ distinguuntur realiter; sed etiam in Diuinis Personis rationes illæ substantiæ relatiuæ, subsistentiæ, seu personalitatis, quantitates, & ipsæ perfectiones relatiuæ distinguuntur realiter: ergo in hoc sensu.

sensu nihil impedit, quominus dicamus esse ibi relationes reales identitatis in subsistentiis, æqualitatis in infinitate, & similitudinis in perfectionibus relatiuis. Hoc totum esse de mente S.P. facile perspicies, si attentè legas caput sextum lib.7. de Trinitate.

Dices 1. cum Scoto contra primam nostram assertionem. Ad relationem realem sufficit si extrema habeant inter se distinctionem realem in aliquo, esto fundamentum, siue ratio fundandi sit eadem in utroque extremo; ergo gratis ponitur relationes huiusmodi esse rationis ex eo, quod essentia, & attributa absoluta sint eadem numero in tribus personis. Probatur antecedens: quia paternitas, & filiatio sunt relationes reales, & tamen fundamentum illarum est essentia Diuina, quæ in utroque extremo est eadem. Præterea, si in duobus subiectis esset eadem numero qualitas, puta in duobus parietibus eadem albedo, quod non implicat, adhuc inter illos esset relatio realis; ergo ad relationem realem non requiritur, ut fundamentum, aut ratio fundandi sit in utroque extremo realiter distincta. Resp. tunc fundamentum debere esse distinctum in utroque extremo,

quando extrema ratione solius fundamenti, siue rationis fundandi referuntur. Ratio ex D. Thoma desumpta est, quia eiusdem ad se ipsum non datur relatio realis; alias eiusdem ad se ipsum esset oppositio realis, & distinctio realis, quod inuoluit contradictionem. Et propterea identitas, æqualitas, & similitudo in personis Diuinis, secundum priorem considerationem, non possunt esse relationes reales, quia extrema, ratione solius fundamenti, idest ratione essentia Diuinæ, & attributorum, quæ sunt eadem in extremis, inter se referuntur. Tres enim Personæ sunt inter se eadem, æquales, & similes, ratione Essentia, Magnitudinis essentialis, & Bonitatis, Potentia &c. quæ priori modo attentæ sunt eadem numero in singulis personis. Hoc idem eueniret, si duo parietes haberent eandem numero albedinem; tunc enim ratione albedinis non esset inter illos oppositio, & distinctio realis: ac proinde nec etiam relatio realis; licet aliundè, v.g. in ratione duritiei, aut frigiditatis diuersæ realiter, posset esse relatio realis, ut est in præsentī in perfectionibus relatiuis. Ad instantiam de paternitate, & filiatione. Resp. esse

dispa-



disparem rationem ; nam ista non faciunt extrema inter se referri præcisè quoad fundamentum , sed per se primo distinguuntur , opponuntur , & referuntur . Etenim Pater non est præcisè Pater ratione essentiae , sed ratione paternitatis , neque refertur ad Filium per essentiam , sed per paternitatem . Per quæ patet hoc argumentum non ita grauiter torquere Theologos , vt aliqui putant . Alias , & acutius solutiones adhibent Thomistæ , quas non vacat modo hic referre , & videre potes apud P. Gonet Disput. 11. de Trinitate artic. 1. S. 3.

Dices 2. fundamentum æqualitatis est vnitas in quantitate , seruata distinctione reali extremorum ; ergo quo magis conueniunt extrema in vnitate quantitatis , eo magis sunt æqualia : sed personæ Diuinæ summè conueniunt in vnitate quantitatis ; ideo in vnitate numerica essentiae Diuinæ , & magnitudinis eius ; ergo personæ Diuinæ sunt summè inter se æquales ; ergo æqualitate reali , quæ sit relatio realis . Resp. aliud esse rationem æqualitatis perfectius , ac verius in aliquibus reperiri , aliud verò talem æqualitatem esse realem formaliter , aut solum fundamentaliter . Quo po-

sito , datur quidem rationem æqualitatis verius , ac perfectius reperiri inter personas Diuinas , quam inter creaturas , quia maius , & arctius fundamentum est in illis , quam in istis ; sed negatur æqualitatem illam esse relationem realem ; nam , vt realis sit , debet fundamentum in vtroque extremo esse distinctum . Exemplificant hoc aliqui in ratione dominij , quæ verius , ac perfectius reperitur in Deo , quam in creaturis , & tamen relatio dominij in Deo ponitur à multis esse relationem rationis ; & in homine relationem realem .

Dices 3. S. P. lib. 3. contra Maxim. Arrianum cap. 14. dicere : *Ideo non est Pater maior Filio , quia æqualem eum genuit .* & lib. 6. de Trinitate cap. 9. *In Filio est prima æqualitas .* Ergo æqualitas in Filio est realis . Probatur consequentia . quia vi productionis non potest esse quidquam in Filio , nisi reale ; sed æqualitas , & similitudo sunt in Filio vi productionis realis , per S. Patrem ; ergo sunt relationes reales , & non solum rationis . Resp. communiter æqualitatem , & similitudinem esse quidem in Filio vi productionis realis , non tamen esse tamquam terminum productum ; sed tamquam

N

ali-

aliquid consequens productionem, ac terminum productum, & sic nullum esse inconueniens, si vi productionis realis conueniat termino aliquid rationis, tamquam quid consequens terminum, ac productionem ipsam. Hoc explicant ex simili de productione creaturarum, ad quam consequuntur in Deo relationes Creatoris, & Domini; & exemplo Incarnationis Dominicæ, ad quam in Verbo consequitur relatio vniti ad humanitatem unitam, quæ tamen sunt omnes relationes rationis. Hæc nihilominus non habent locum in sententia, quam sequor de huiusmodi relationibus, vt patet ex dictis in Philosophia rationali, & in naturali. Propterea. Resp. hæc magis confirmare secundam assertionem supra positam, nempe, præter illam identitatem in natura, & essentia, æqualitatem, & similitudinem in prædicatis absolutis, esse danam aliam identitatem, æqualitatem, & similitudinem in subsistentijs, & perfectionibus relatiuis, quæ sint relationes reales; & hoc eo magis, quod Sancta Ecclesia in Præfatione solemnitatis Sanctissimæ Trinitatis canit: *Vt in Personis proprietas, in essentia unitas, & in maiestate adoretur æqualitas.* Quod non diceret, si omnis æqua-

litas in Diuinis esset essentialiter relatio rationis, non enim adorantur entia rationis, sed entia realia.

Dices 4. contra secundam nostram assertionem, cum P. Marthia Hauzeur in sua Anatomie tom.2. ad cap.6. lib.7. de Trinitate: sicut Personæ sunt incommunicabilis existentia, ita & sunt incommunicabiles in hoc nomine (persona) quo ita significetur pluralitas, vt eodem non possit significari aliqua unitas &c. Ita, vt, si quæ ratio communis Personarum humanarum, aut creaturarum non est ita communis Personis Diuinis; sed singulae sunt singularissimæ, & prorsus incommunicabiles sub illa ratione personæ Diuinæ, non tantum reali communicatione, sed nec conceptionali, seu obiectiua, imò nec nominali; frustra, & falsò fingatur ibi identitas ratione subsistentiarum, seu personalitatum, qualis in hominibus ratione plurium naturarum humanarum, Et hoc putat esse de mente S. Patris in eo capite. Resp. hunc Auctorem eadem auctoritate S. P. quam pro ratione dubitandi adducit, posuisse satisfacere suæ obiectioni. Ait enim S. P. *Quia volumus, vel unum vocabulum* (loquitur de hac voce persona) *seruire huic significationi,*

qua

qua intelligitur *Trinitas*. Sentit ergo prædictum nomen esse commune tribus *Divinis* Personis, & consequenter etiam significatum illius nominis, ut attentè consideranti illud caput clarum fiet. Offendit enim ibi *S. P.* non dari quidem unitatem nume-

ricam inter Personas, sicut est essentiae, alias esset solum una Persona, non tamen negat rationem personalitatis reperiri in singulis Personis, imò in dicto Capite totus est in eo, ut ostendat pluralitatem Personarum sub hoc nomine, Persona.



# CONTROVERSIA T E R T I A.

De Diuinis Personis.

## A X I O M A P R I M V M.

*De ratione Persona, Subsistentia, & hypostasis.*

Ex Lib. 7. de Trinitate Cap. 6.



*Uamquam, & illi (ideſt Græci) ſi uellent, ſicut dicunt tres ſubſtantias, tres hypotheſes, poſſent dicere tres Perſonas, tria Proſopa. Illud autem maluêrunt, quod fortè ſecundum lingue ſue conſuetudinem aptius diceretur; Nam & in perſonis eadem ratio eſt. Non enim aliud eſt Deo eſſe, aliud Perſonam eſſe, ſed omninò idem. Nam ſi eſſe ad ſe dicitur, Perſona uerò relatiuè, ſic dicamus tres perſonas Patrem, Filium, & Spiritum Sanctum, quemadmodum dicuntur aliqui tres amici, aut tres propinqui, aut tres vicini, quod ſint ad inuicem, non quod unusquiſque eorum ſit ad ſe ipſum. Quapropter quilibet ex eis amicus eſt duorum ceterorum, aut propinquus, aut uicinus, quia hæc nomina relatiuam ſignificationem habent. Quid ergo? num placet, ut dicamus Patrem perſonam eſſe Filij, & Spiritus Sancti, aut Filium perſonam eſſe Patris, & Spiritus Sancti, aut Spiritum Sanctum perſonam eſſe Pa-  
tris,*

*tris, & Filij? Sed neque persona ita dici alicubi solet, neque in hac Trinitate, cum dicimus personam Patris, aliud dicimus, quam substantiam Patris: Quo circa, ut substantia ipse Pater est, non quo Pater est, sed quo est; ita & persona Patris non aliud, quam ipse Pater est: ad se quippe dicitur Persona, non ad Filium, vel Spiritum Sanctum, sicut ad se dicitur Deus, & Magnus, & Bonus, & Iustus, & si quid aliud huiusmodi.*

## D V B I V M I.

An sit idem Persona, Subsistentia, Hypostasis,  
& Essentia.

**P**Lura dixi de subsistentia, & personalitate in explicatione Axiomatum metaphysicorum S.P.N. in Cap.7. ubi de subsistentia: idcirco ad ibi dicta me remitto, & illis suppositis. Breuiter

Dico: Personam, suppositum, hypostasim, & subsistentiam, ut contracta ad naturam intellectualem, idem significare; Essentiam verò, seu naturam quid diuersum. In hac doctrina explicanda immoratur S. P. in eo cap. vnde desumptum est Axioma; ac etiam in capite præcedenti. Cumque hæc assertio indigeat magis declaratione, quam probatione, propterea eam sic expli-

co. Subsistentia sumitur tum pro ratione subsistendi in abstracto, tum etiam in concreto pro eo, quod subsistit; sicut etiam hoc nomen Intelligentia quandoque naturam significat. Vtroque modo dupliciter accipitur, primo, ut subsistentia dicat rationem subsistendi simpliciter, idest essendi per se, vel id, quod subsistit, & est per se. Secundo, ut dicat rationem subsistendi incommunicabiliter, siue id, quod incommunicabiliter subsistit; quo sensu in Concilijs definitur, esse in Diuinis tres subsistentias, idest tres personas. Totidem modis sumi potest nomen hypostasis, cui latinè correspondet subsistentia.

ria. Verum communius accipitur pro substantia incommunicabili in concreto, siue pro supposito: quo nomine refert Eusebius lib. 10. hist. Eccl. cap. 15. in hac significatione primo usum fuisse. Osium Episcopum, ut contra Arrium unitatem essentiae, & contra Sabellium Trinitatem personarum rueretur. Sed cum hoc nomen, quandoque à Græcis usurparetur etiam ad significandam essentiam, ita ut anceps videretur, ad significandum id, quod subsistit, & id quod subsistat; propterea antequam trita esset huius vocis significatio, PP. latini ab ea refugiebant, ne, admittendo tres hypostases, viderentur admittere tres essentias. Hoc fuit in causa ut S. Hieronymus Epist. ad Damasum scriberet: *In hoc nomine venenum sub melle latere*: & S. Boetius Seuerinus, in lib. de duabus naturis, negauerit conuenire Deo, eo quod significet id, quod subijcitur accidentibus, & S. Paulinus Episcopus Nolanus nollet admittere tres hypostases. PP. Græci è contra volebant admittere in Deo tres personas, & sic D. Gregorius Nazianzenus in oratione de laudibus D. Athanasij Græci dicit, quod illi, qui tres hypostases dicebant, Latinis videbantur tres vsus, siue essentias cum

Arrio dicere, eo quod, ut refert S. Hieronymus Epist. 57. *Tota prophanorum schola discrimen inter hypostasim, & usum ignorabat*. Latini verò, qui reiecto nomine hypostasis, personas dicebant, Græcis videbantur distinctionem, solum rationis, & non realem inter tres Diuinas substantias ponere; idest ratione muneris, seu officij inter Patrem, & Filium, & Spiritum Sanctum cum Sabellio agnoscere, eo quod personæ vocabulum, ad auctoritatem officij accommodari solet. Et ob hanc verborum ambiguitatem *eo res adducta est*, referente eodem S. Greg. Nazianz. loco citato, *ut periculum esset, ne orbis terrarum fines* (idest Orientalis, & Occidentalis Ecclesia) *una cum syllabis à se inuicem distraberentur, & abrumperentur*. Litem illam, in Concilio Alexandrino excitatam, composuit magnus Athanasius, qui huic Concilio interfuit, ut refert Niceforus lib. 10. Cap. 16. & S. Greg. Nazianz. loco citato, qui idipsum præstitit Constantinopoli, ut ipse testatur in oratione ad 150. Episcopos, quæ est 32. in ordine; cum enim fuissent à Theodosio conuocati, & similis inter eos controuersia orta fuisset; Nazianzenus probauit, nullam de rebus esse distinctionem inter

inter eos, qui vnam, eandemque rem, & fidem faterentur. Quapropter deposita nominum controuersia, quemadmodum, vt Græci *ὑπόστασις*, seu Persona vocabulum pro hypostasi acceptarent, effecit S. Athanasius, vti-  
cissim etiam, vt Latini hypostasim pro persona dicerent, effecit apud Pontificem Damasum. Diuus Hieronymus Epist. 57. Ac idem etiam, quod hypostasis, & persona, vocabulo suppositi (quod Græci *ὑποκείμενον* vocant) itemque subsistentiæ significaretur, ex ratione ipsa nominum, & vsu Scriptorum Ecclesiasticorum factum est, vt S. Thom. ostendit 1. par. quæst. 29. artic. 1. Explicata igitur notione vocis, passim à Sacris Concilijs, & à Doctõribus tres hypostases in Deo conceduntur, quia, licet illud, à quò nomen hypostasis est desumptum, subsistere, vel subsidere importet, quod in Deo non habet locum, in eo tamen reperitur illud, ad quod significandum est impossibile, idest res incommunicabiliter subsistens. Hypostasis igitur, & subsistentia in concreto, ac suppositum idem planè significant, & à persona solum differunt, vt magis commune à minus communi: illa enim, sine restrictione sumpta, signifi-

cant rem subsistentem in quacunque natura; persona verò in natura rationali, quatenus rationale significat, quancumque naturam intellectualem. Propterea à S. Boetio definitur persona, quod sit: *Rationalis natura individua substantia*.

Essentia in præsentī significat Naturam, & quidditatem, quæ est fundamentum proprietatum; quapropter, cum nomen substantiæ quandoque significet essentiam rei, quandoque hypostasim, seu suppositum, ne daretur occasio errandi, Patres antiqui veriti sunt, tres substantias in Deo concedere, ne viderentur ponere tres essentias; propterea S. Hieronymus epist. cit. ait: *Sufficiat nobis dicere, vnam substantiam*. Sic etiam loquitur Concilium Toleranum XI. & S. P. N. lib. 5. de Trinitate cap. 9. ait: *Sed quia nostra loquendi consuetudo iam obtinuit, vt hoc intelligatur; cum dicimus essentiam, quod substantiam &c. non audemus dicere vnā essentiam, tres substantias, sed vnā essentiam, tres autem personas*. Et re vera non est dicendum sine vlla restrictione, in Diuinis esse tres substantias, sed, cum addito, tres substantias relatiuas, & tres incommunicabi-

les dicere possumus; quia tunc substantia sumitur in alia significatione; Et S. P. lib. 7. de Trinitate cap. 6. non omnino improbat hanc vocem in plurali; ait enim ibi: Cum conaretur humana inopia proferre, quod in secretario mentis pro capto tenet, timuit dicere tres essentias &c. quæsit, quid tria diceret: Et dixit tres substantias, siue personas. Ex dictis clarum fit, quod

habet S. P. prædicto lib. 7. cap. 5. ubi docet, Deum non dici propriè substantiam à substando; sed essentiam; & cur in cap. 6. vnde desumptum est Axioma, notet, Græcos posse, si uellent, sicut dicunt tres substantias, tres hypostases, dicere tres personas, & tria Prosopa: lite enim composita, ut erat tempore S. P. nullus supererat scrupulus.

## AXIOMA SECVNDVM

### De subsistentia Diuina.

Ex Lib. 7. de Trinitate Cap. 5.



Manifestum est, Deum abusiue substantiam vocari: ut nomine uisitatione intelligatur essentia, quod uerè, ac propriè dicitur: ita ut fortassè solum Deum dici oporteat essentiam, est enim uerè solus: quia incommutabilis est, Exodi 3. Ego sum qui sum. Sed siue Essentia, siue substantia &c. utrumque ad se dicitur, non relatiue. Vnde hoc est Deo esse, quod subsistere: Et ideò, si una essentia Trinitas, una etiam substantia. Fortassis igitur commodius dicuntur tres persone, quam tres substantia.



## D V B I V M I I.

An sit concedenda in Deo subsistentia absoluta.

**D**Eum esse ens subsistens, est citra omnem controuersiam. Sed difficultas est inter scholasticos, an subsistat formaliter per essentiam, quatenus virtualiter distinguitur à relatione; an verò solum formaliter per relationes; ita, & per essentiam solum radicaliter, quatenus scilicet est fundamentum relationum. An etiam utroque modo formaliter possit dici subsistere, essentiam quidem absolute, personas verò relative. Agitur autem quæstio de subsistentia, tam in abstracto, quam in concreto, non tamen quatenus subsistentia dicit rationem subsistendi incommunicabiliter, vel id, quod incommunicabiliter subsistit; hoc enim modo certum est, essentiam secundum se non esse personam à tribus personis distinctam: sed quatenus importat rationem subsistendi simpliciter, siue id, quod subsistit. Quæstio igitur est, magna ex parte, de voce, ut notauit etiam S. P. doctor lib. 7. de Trinitate cap. 4.

quatenus scilicet in ea quæritur, vtrum talis perfectio existendi Diuinæ essentia sit vocanda subsistentia: sed partim etiam de re, quatenus inquiritur, vtrum Deitas præcisa à relatione sit per se, non solum ut id quo, sed etiam ut quod. Quo explicato, facile postea determinatur numerus subsistentiarum in Deo. Vtrumque simul breuiter expediam.

In hac difficultate tres sunt Theologorum sententiæ præcipuæ. Prima est Durandi, Paludani, & Capreoli in 3. distincta prima, apud Becanum Tract. de Sanctissima Trinitate cap. 3. quæst. 9. num. 2. quibus videtur fauere S. Tho. quæst. 2. de Potentia artic. 1. & quæst. 8. artic. 3. & 7. asserentium vnam esse subsistentiam absolutam, seu essentialem, & nullas personales, siue relatiuas; licet enim concedant tres personas Diuinas constitui, & distingui per relationes, negant tamen subsistere per relationes, sed volunt eas subsistere per essentiam.

O

Se-

Secunda sententia est Alensis 3. par. quæst. 2. memb. 4. S. Bonaventuræ in 3. distinct. 2. artic. 1. quæst. 3. Marsilij in 3. quæst. 2. artic. 3. asserentium, tres esse subsistentias relatiuas, & nullam absolutam, siue essentialem: cum quibus magna ex parte consentit Henricus quodlib. 5. quæst. 8. ubi negat suppositum absolutum commune.

Tertia est Caietani in 1. par. quæst. 3. artic. 3. & in 3. par. quæst. 2. artic. 2. & alibi; & videtur esse de mente S. Thom. 1. par. quæst. 30. artic. 2. ad 2. Richardi, Gabrielis, Okami. & nouissimè Suarez in 3. par. disput. 11. sect. 3. vnam esse subsistentiam absolutam, & tres relatiuas.

Præmitto solutioni, subsistentiam tria significare: Primo rationem existendi per se, & non in subiecto inhærationis, quod conuenit omnibus substantijs. Secundo rationem existendi per se, & independentem, quo pacto conuenit etiam animæ rationali separatæ à corpore. Tercio rationem existendi per se, & independentem, & incommunicabiliter; & sic conuenit omnibus, & singulis suppositis. Ex his.

Dico primo: Essentiam Diuinam, vt ratione nostra præcisam à relationibus, existere per se

existentia perfecta, quæ in creaturis dicitur subsistentia. Probat hęc assertio, quia Deitas vt sic habet existentiam propriam, non emendicatam à relationibus; sed illa existentia est existentia per se, omnino independentens ab alio, tanquam à subsistente; ergo existit existentia illa perfecta, quæ in nobis habet rationem subsistentiæ. Maior probatur, quia hoc nomen (qui est) Deus ipse, vt proprium, & essentialē sibi imposuit; vt propterea S. P. lib. 2. de moribus Manich. cap. 1. dicat: *Hoc enim maximè esse dicendum est, quod semper eodem modo sese habet, quod omnino sui simile est, quod nulla ex parte corrumpi, aut mutari potest, quod non subiacet tempori, quod aliter nunc se habere, quam habebat antea, non potest. Id enim est, quod esse verissimè dicitur. Subest enim huic verbo: manentis in se, atque incommutabiliter se habentis naturæ significatio. Hanc nihil aliud, quam Deum possumus dicere &c.* Similia habet Rup. cap. 14. in Cap. 1. Exodi. Sanctus Ambrosius Epist. 63. & S. Dionysius in lib. de Diu. Nominibus. Significat igitur existentiam, & cum sit essentialē significat existentiam absolutam, & communem. Minor probatur, quia existentia Deitatis, vt sic, est in-

infinita simpliciter in ratione essendi; nam per illam, & non per relatiuam, habet quælibet persona, vt sit infinita simpliciter in genere entis; sed non potest esse infinita in ratione essendi, quin includat per se existere omnino independentem ab alio, tanquam à sustentante; & tale existere est subsistere; ergo &c.

Si opponas, ad hoc satis esse, vt sit radix, à qua, nostro modo intelligendi, fluat perfectas in relationibus, quas sibi identificat. Contra est, quia existere per se est perfectio simpliciter simplex, quæ non solum identice, sed etiam formaliter debet conuenire essentia: vt sic. Præterea in Diuinis abstractum, & concretum idem planè significant quoad rem, & differunt solum in modo significandi; & propterea de essentia, vt à relationibus contradistincta, dicitur, quod sit Deitas, & Deus; sed concretum non potest prædicari nisi de subsistente per se; ergo &c. Confirmatur, quia humanitas Christi, eo quod subsistat in alio, non potest dici homo, & inter illam vt sic, & Deitatem vt sic, est ista differentia, quod humanitas ita existit, vt possit ab alio sustentari, & de facto sustentetur; Deitas autem,

seu essentia Diuina vt sic, sola ratione distincta, concipitur, vt independentem ab alio sustentante.

Dico 2. talem existentiam posse dici subsistentiam. Hæc conclusio, quæ est quoad quid nominis, non potest aliter probari, quam ex vsu loquendi. Probatur igitur primo ex Agathone Papa, qui in epistola, quæ habetur in sexta Synodo Act. 4. ait: *Constituimur trium subsistentiarum, sue personarum vnā subsistentiam.*

Probatur 2. ex S. P. N. qui lib. 7. de Trinitate cap. 4. ait: *Omnis res ad se ipsam subsistit, quanto magis Deus.* Sic etiam loquuntur S. Hieronymus Epist. 17. quæ est ad Damasum, S. Hilarius lib. 7. de Trinitate S. Ioan. Damasc lib. 3. de fide Orthod. & S. Cyrillus, & alij SS. PP. quos referunt Salmanticenses Disput. 9. de Trinitate Dubio 5. §. 2.

Probatur 3. ex S. Thom. qui in 1. distinct. 21. quæst. 2. artic. 1. ait: *Natura Diuina est in se habens esse subsistens, nulla intellecta personarum distinctione.* Et in 3. distinct. 6. quæst. 2. artic. 1. ad 2. ait: *In Deo ipsa essentia subsistens est; unde ei secundum se habetur esse, imò ipsa est suum esse subsistens.* Et lib. 4. contra Gentes cap. 14. ait: *In Deo sunt plures*

*res subsistentes, si relationes consideremus, & una res subsistens, si consideretur essentia.* Ultimo in quæst. 9. de Potentia artic. 5. ad 11. *Ipsa, inquit, Essentia est secundum se subsistens, & ab illa habent proprietates personales, quod subsistant, ipsæ verò proprietates personales ex se habent, quod personas ad inuicem distinguant.* Diu. Thomam sequuntur ferè omnes Thomistæ, & plures alii extra scholam ipsius. Ex quibus apparet, immeritò, & sine fundamento Becanum in Tract. de Trinitate cap. 3. quæst. 9. §. 5. scripsisse: hos Auctores errare in modo loquendi, & non loqui propriè. Qualis enim verior loquendi modus, & magis propria loquutio, quam illa, qua vtuntur Summi Pontifices, Sacra Concilia. SS. PP. & DD. nec non & celebriores Theologorum Scholæ?

Opponit Vasquez tom. 2. Disput. 125. cap. 5. multa, & primo respondet, testimonium S. P. supra adductum nullius esse momenti pro nostra sententia; eo quod nos non concedamus vnâ solam subsistentiam absolutam in Deo, sed vterius admittamus etiam tres relatiuas; & S. P. Augustinus, omnem subsistentiam relatiuam neget, ait ille, & vnâ solum absolutam asserat, cum

dicat, Deum, non relatiuè, sed ad se subsistere; & propterea S. P. nunquam vsum fuisse hoc nomine latino subsistentia, & nomen græcum Hypostasis fuisse illi suspectum: ac proinde, cum in dicto cap. 4. timeret, tres hypostases, aut substantias latinè concedere, iure optimo dixisset: Deum ad se, non ad aliud subsistere, sicut ad se, non ad aliud substantia, & essentia est. Quod si tres ipse subsistentias fateretur, non negaret Deum ad aliud subsistere; eo quod intelligeret, idem esse subsistere, quod incommunicabiliter existere; & quia ratio incommunicabilitatis provenit ex relatione, inde quoque diceret, Deum relatiuè subsistere, sicut etiam nunc dicitur, in Deo relatiua subsistere: quare non assereret, in Deo esse vnâ absolutam subsistentiam, sed tres solum relatiuas fateretur: Nos verò (ait ibi Vasquez) qui iam ex usu Ecclesiastico, nomine latino, subsistentia, pro græco hypostasis, vtimur, & ita græcè dicimus in Deo tres hypostases relatiuas, vt non audeamus concedere aliquam absolutam, eodem modo pronunciamus nihil in Deo esse absolutum, & commune, cui nomen latinum, subsistentia, quadrare possit.

Ad testimonium Agathonis Summi Pontificis Respondet: litteram

teram esse mendosam, cum legitur: Trium subsistentiarum, seu personarum vnam subsistentiam. Sed legendum: *Vnam substantiam*, sicut in pluribus latinis exemplaribus reperitur, nec credibile esse, in tam paucis verbis, eadem voce usum fuisse Agathonem, in sensu tam diuerso.

Ad Auctoritatem S. Hieronymi respondet eodem prorsus modo, quo supra respondit auctoritati S. P. eo quod & iste seuerius reijceret tres hypostases, vt, nulla ratione hunc loquendi modum admittendum esse, diceret: & interpretabatur nomen græcum *hypostasis*, sicut Augustinus, non subsistentiam, sed substantiam; propterea, non mirum, si diceret, Naturam Diuinam ex se subsistere, & non aliundè, concedens absolutè, & ad se subsistere, sicut Augustinus.

Similiter ad alios SS. PP. respondet: verba S. Hilarij malè citari, eo quod S. Hilarius ibi non habeat: *Vt subsistentia natura habeant perfectam unitatem*. Sed, *vt subsistentis natura habeant &c.* Se autem non negare, quod Diuina natura subsistat in tribus personis; sed quod negat, esse subsistentiam illam absolutam, distinctam virtualiter à tribus relatiuis, qualis à nobis ponitur. Sic etiam ad alios

SS. PP. respondet: vel eos perperam citari. Cum enim D. Dionysius lib. de diu. nom. dicat: *Bonitatis subsistentiam per suam esse, causam esse omnium subsistentium*. Respondet: cum non dixisse Bonitatis subsistentiam, eo quod græcè non habeatur hypostasis, sed *usiam*, quod significat essentiam; & idè Perionius transfert *essentiam*. Vel cum dicunt, naturam Diuinam subsistere, intelligendos esse in tribus personis; non verò subsistentia absoluta. Sic interpretatur S. Gregorium Nyssenum: qui in lib. de vita Moyſis col. 13. dicit: *Supremam essentiam verè subsistere*.

Pro solutione harum difficultatum Vasquez. Noto, cum Suarez Disputat. 33. metaph. sect. 1. ex S. P. Augustino, & D. Isidoro, substantiam dictam esse, vel à subsistendo, vel à substando, vel ab utroque; & præterea communiter subsistentiam tribui, non solum substantijs completis, sed etiam incompletis, & partialibus; ita vt dicatur Animam rationalem, etiam separatam à corpore, subsistere subsistentia partiali, & materiam primam, si separata à composito conseruetur, habituram subsistentiam propriam partialem, & ex ipso Vasquez tom.

tom. 1. in 3. par. Diui Thom. disput. 32. In substantijs compositijs ex materia, & forma, naturalem subsistentiam totius nihil aliud esse, quam naturalem subsistentiam partium, eo quod, sicut ex duabus naturæ partibus fit vna natura integra, ita ex partium partialibus subsistentijs vna fit integra, & totalis. Ex his deduco necessariò, nomen subsistentiæ latius patere, quam persona, hypostasis, & suppositum; nam, vt notauimus in Axiomatibus metaph. S. P. cap. de subsistentia, esto anima rationalis, adhuc separata, dicatur subsistens, & subsistere, nihilominus hypostasis, & persona, seu suppositum non dicuntur, nisi de toto composito completo; licet enim manus hominis separata possit dici subsistens, & subsistere, non tamen potest dici persona, hypostasis, vel suppositum. Hæc adeò vera sunt, vt Franciscus Zumel in Commentarijs ad 1. par. S. Thom. ad artic. 1. quæst. 30. disput. vnica concl. 1. dicat: necesse esse, ponere in Deo Naturam Diuinam per se subsistentem essentialiter ex propria ratione absoluta, & non tantum propter relationes, & consequenter necesse esse, ponere subsistentiam absolutam communem, & essentialem. Quod

probat, non solum prædictis Auctoritatibus Sanctorum; sed etiam, quia subsistentia sumitur pro substantia, vel essentia; eo quod nomen græcum, illi correspondens, omnia hæc significat. Similiter etiam Hieronymus Fasolus tomo 3. in 1. par. quæst. 29. artic. 2. num. 5. in confirmationem huius sententiæ adducit explicationes S. Hieronymi in Epist. 57. ad Damasum: vbi refert, se fraudulenter ab Arrianis requisitum, vt concederet tres hypostasies; & subdit: *Tota secularium litterarum schola nihil aliud hypostasim, nisi Vñam nouit*. Et præterea adducit etiam auctoritatem S. P. lib. 5. de Trinitate cap. 8. & lib. 7. cap. 4. post medium, vbi ait: *Licuit, loquendi, & disputandi necessitate, tres personas dicere, non quia Scriptura dicit, sed quia Scriptura non contradicit*.

Quibus prænotatis, facilè est retundere responsiones, & rationes Vasquez. Propterea ad primam Resp. dico, ex ipso contextu S. P. apertè constare, ipsum Vasquez falli; nam, antecederet ad prædictum locum, in eodem capite sic loquitur: *Certissimè quidem, & de Scripturis cognoscitur, quod piè credendum est, & aspectus mentis indu.*

indubitata perceptione perstringitur, & Patrem, esse, & Filium, & Spiritum Sanctum, nec eundem Filium, qui Pater est, nec Spiritum Sanctum eundem esse, vel Patrem, vel Filium. Quasiuit quid tria diceret: & dixit substantias, siue personas, quibus nominibus, non diuersitatem intelligi voluit, sed singularitatem noluit, ut non solum ibi unitas intelligatur, ex eo, quod dicitur, una essentia; sed & Trinitas, ex eo, quod dicuntur tres Persona, vel substantia. Tres ergo substantias relatiuas admittit ibi S. P. nam pro eodem accipit ibi substantiam, ac substantiam, non solum quia pro eodem accipit ibi tres personas, ac tres substantias, sed quia, ut infra in dicto capite se explicat: Sicut ab eo, quod est esse, appellatur essentia; ita ab eo, quod est subsistere, substantiam dicimus. Ex quibus patet, falso ibi dicere Valquez, quod timuit eo capite tres substantias latinè concedere. Nam licet in fine capitis dicat, absurdum est autem, ut substantia relatiue dicatur. Nihilominus in capite sequenti statim explicat, se loqui de substantia, quatenus subiectum est accidentium physicorum, & à substantando illis dicitur substantia, ut dicitur de corporibus. Vnde concludit,

quod: nefas est dicere, ut subsistat, & subsist Deum bonitati suae, atque illa bonitas non substantia sit, vel potius essentia, neque ipse Deus sit bonitas sua, sed in illo sit tanquam in subiecto. Quo sensu ait: Manifestum est Deum, abusuè substantiam vocari. Et, eodem sensu excluso, in principio cap. 6. postea admittit Græcos, sicut dicunt tres substantias, tres hypostases posse dicere, tres personas, tria prosopa. Et in fine capitis liberè concedit quibusque disputantibus, si iam placet propter disputandi necessitatem; etiam, exceptis nominibus relatiuis, pluralem numerum admittere, ut uno nomine respondeatur, cum queritur, quid tria, & dicere, tres substantias, siue tres personas, nulle moles, aut interualla cogitentur &c. Ex his clarum est, & tres hypostases admisisse, & tres substantias, & vnā substantiam, & consequenter vnā substantiam absolutam, & tres relatiuas; cum ab eo, quod est subsistere, deducat nomen substantia.

Ad id, quod Valquez addit, pro ratione prædictorum, idest, quod, si tres substantias latere, non negaret, Deum ad aliud subsistere. Resp. primo, petendo ab ipso; an sit idem formaliter hypostasis, & persona,

ac

ac subsistentia relatiua, an verò præcindat ab eo, quod est esse absolutam, aut relatiuam: primum non potest asserere, nam alias quæcumque hypostas, & persona creata esset relatiua; tenetur igitur dicere, quod præcindat, & propterea esse diuersum conceptum personæ à conceptu relationis cum illa identificata, & conceptum hypostasis esse ad se, quia substantia incommunicabilis; & esse ad aliud in quantum identificat sibi relationem. Fatetur ergo S. Pater, & vnam subsistentiam absolutam, & tres relatiuas, si attentè legatur, & secundum germanum sensum interpretetur, ut eum legit, & interpretata est schola Thomistica, & alij plures, eruditissimique Doctores, qui, fulti prædictis Sanctorum DD. Auctoritatibus, subsistentiam latius patere hypostasi, & Persona agnouerunt; ac proinde communiter à SS. PP. admissam subsistentiam communem in Deo, & tres relatiuas, in quibus ratione nostra distinguendus est conceptus subsistentiæ à conceptu relationis, quam sibi identificat in Diuinis Personis.

Ex his patet: non esse admittendam censuram ipsius Vasquez, qui in prædicta Disput. 125.

cap. 4. à num. 13. hæc scribit. *Nec ullus est ex Sanctis PP. tam latinis, quam grecis qui post compositam litem, quam diximus, concedat in Deo absolutam aliquam subsistentiam, aut hypostasim. Nam, ut infra dicemus, Hieronymus, & Augustinus, qui eam concesserunt, non satis intellexerunt significationem nominis hypostasis &c. Quare dubium non est Scholasticos, qui hoc nostro tempore, ob testimonia Hieronymi, & Augustini, concedunt in Deo subsistentiam communem, & absolutam, ignoratone vocis lapsos fuisse. Mirandum tamen est, eos id ignorasse, quod tam ab Ecclesia græca, quam latina, & iamdiu sine controuersia receptum erat: nempe, subsistentiam idem esse, quod suppositum, & Personam. Quod enim Hieronymus, & Augustinus hoc ignorauerint, mirum non est, quia nondum vis nominis græci apud Græcos ipsos satis nota erat. Nam & S. P. loco citato ex lib. 7. cap. 6. apertissimè concedit tres hypostases, & S. Hieronymus in dicta Epist. quæ est 57. ad Summum Pontificem Damasum, non detrectat admittere tres hypostases, modo absit periculum ponendi tres Vías, idest substantias absolutas, siue tres essentias: optimè enim nouerat S. Doctor tunc, hoc nomen hypo-*



hypostasis potuisse habere vtrunque sensum. Legatur tota illa Epistola, & clarè videbit Lector in fine Sanctum Doctorem, sic loquentem. *Si rectum putatis, tres hypostases, cum suis interpretationibus, debere nos dicere, non negamus &c.* Benè interpretantur *hypostasim*, & cum id, quod ipsi exponunt, habere me dicam, hereticus iudicor. Quid tam anxie unum verbum tenent? Quid sub ambiguo sermone latitant? Si sic credunt, ut interpretantur, non damno, quod retinent. Si sic credunt, ut ipsi sentire se simulant; permittant, & mihi meis verbis suum sensum loqui. Nouerat ergo benè S. Hieronymus vim nominis hypostasis, & rectè explicatum, sublata ambiguitate, habere bonum sensum, quem nunc habet in S. Ecclesia.

Quod spectat ad Auctoritatem Summi Pontificis Agathonis, concedo libenter, & ego ipse vidi in recentioribus codicibus Conciliorum, ac eo loco legi: *Vnam substantiam*; sed nego esse mendosos codices antiquiores, in quibus omnibus habetur *Vnam subsistentiam*: imò, cum illi omnes in hoc concordent, verosimilius est Summum Pontificem scripsisse *subsistentiam*. Neque vllum est absurdum, quod opponitur. Cum enim hoc nomen

latius pateat persona, & hypostasi, ut dictum est, & vtraque sit propria significatio; nullum est inconueniens, ut repetitum secundum diuersitatem, & exigentiam subiecti, cui applicatur, diuersificetur eius significatum.

Ad alias explicationes, seu extortiones auctoritatum aliorum Sanctorum, ex supradictis patet responsio; ex sola enim, & nuda inspectione, & lectione ipsorum constat, eos admisisse Naturam Diuinam subsistentem subsistentia absoluta. Et quando alius non esset, sufficit nobis Auctoritas S. Thomæ promille Vasquez.

Dices 1. cum dicto Auctore: Nunquam inuenitur apud PP. Græcos nomen *hypostasis*, nec apud Latinos nomen *subsistentia* pro essentia, vel pro aliquo communi essentiali, postquam illa antiqua controuersia in Ecclesia Dei explicata, & definita fuit: ita ut Imperator Iustinianus, & ipse latine scribens ad Pontificem Ioannem Secundum in edicto, seu confessione, ad eum missa, quæ habetur in tomis Conciliorum post Concilium Toletanum secundum, columna 9. intelligens hunc communem sensum, PP. sic scribat. Quoniam non est idem natura, & subsistentia. Omnes enim SS. PP. consonanter

*nos docent, aliud esse naturam, seu substantiam, & formam: aliud substantiam, siue personam: & naturam quidem, vel substantiam, & formam hoc, quod est commune, significare: substantiam autem, siue personam hoc, quod est speciale.* Ergo substantia nullo modo potest sumi pro eo, quod est commune, sed solum pro eo, quod est speciale. Respondeo: sufficere nobis, quod Ecclesia, aut SS. PP. numquam improbarint loquutiones illas SS. DD. S. R. E. quales sunt Hieronymus, Augustinus, & Thomas; imò plurimos classici Doctores Scholasticos eas approbasse, & vnam substantiam absolutam usque hodie in pluribus celebrioribus vniuersitatibus propugnari. Ad auctoritatem Concilij Toletani secundi sub Ioanne Papa Secundo. Respondeo haberi quidem Epistolam Iustiniani Imperatoris, directam ad dictum Summum Pontificem. Quæ incipit: *Victor Iustinianus Pius Felix*; sed in ea nihil tale omnino habetur; profitetur enim ibi Imperator fidem Catholicam, sed de substantia, contradistincta à natura &c. nec verbum quidem habet; nec alia Epist. Professio, aut edictum ibi continetur huius, vel alterius Imperatoris: sed immediate subsequitur Concilium Aurelia-

nense Secundum. Quapropter vnum è duobus necessario dicendum est, vel prædictam auctoritatem esse supposititiam, & fictam: aut, si habetur, contineri in illis codicibus, quos, ut mendosos, reijcit ipse Vasquez. Nam in correctissimis, & castigatissimis, quales sunt illi, qui sub Summo Pontifice Sixto V. Venerijs apud Dominicum Nicolinum excussi fuerunt anno Domini 1585. nihil tale habetur; quod si sublata fuerunt illa verba, signum evidens est, quod talem doctrinam non approbabat Ecclesia. Et sic ruit Conclusio Vasquez, & discipulorum, qui nisi huic, aut fictæ, aut reprobæ auctoritati, contra DD. S. R. E. classicum cecinerunt.

Dices 2. In Sexta Sinodo Actione vndecima: Sabelliana prauitas dicitur, tres personas in vnam colligere, vel confundere substantiam; ergo nullo modo ponenda est vna substantia, ne videamur consentire Sabellianis. Resp. longè diuersam esse mentem Concilij. Nam in eo damnabatur directè error Sabellij, qui tres personas in Diuinis realiter distinctas negabat; vnamque solam personam, sola nomen, & officiorum diuersitate, ratione nostra distinctam ponebat. Et hoc est, quod ibi damnat S.Sy.

S. Synodus , non verò eos , qui , admissa vna subsistentia absoluta , communi , tres personas realiter distinctas , & cum illa identificatas , admittunt .

Dices 3. Operari non est , nisi subsistentium : sed Diuina essentia non operatur , nisi vt est in personis ; ergo non subsistit , nisi prout est in illis . Aliqui Respondent , quod , licet essentia nec operetur , nec existat , nisi in tribus personis , non tamen pendet ab illis in existendo , vel operando ; Deus enim vt sic creat , & existit , non verò quatenus est Deus Pater , Filius , & Spiritus Sanctus . Mihi aliter respondendum , qui in Axiomatibus Metaphysic. cap. 7. quod est de subsistentia , teneo cum S. P. Tract. 1. in Ioannem , personalitates Diuinas , etiam secundum proprias rationes , esse actiuas . Respondeo igitur , quidquid sit de maiori , ad minorem ; aliud esse , loqui de Diuina essentia , prout est à parte rei ; & aliud , prout à nobis ratione nostra præcisâ . Verum quidem est , Diuinam essentiam non operari , nisi vt est in personis , quia est cum illis realiter identificata & tam ipsa , quam hypostases sunt operatiuæ , & operatio indiuisibiliter profuit & ab essentia , & à personis . Quod si per impossibile

realiter separaretur ab illis , adhuc nihilominus esset operatiua , quod , arguit potius subsistentiam illam absolutam , quam eius negationem . Exemplum habemus in operationibus , in quibus ita concurret prima causa cum secunda , vt etiam , si tolleretur operatio causæ secundæ , adhuc causa prima se sola operaretur ; eo quod etiam sola sit operatiua ; & propterea negatur consequentia ; cuius oppositum potius erat inferendum .

Dices 4. Si Natura Diuina non esset nisi vna Persona , quemadmodum ponunt Hebraei , & Gentiles ; tunc essentia Diuina , vt contradistincta virtualiter , seu ratione nostra à personalitate , non posset dici subsistere huiusmodi subsistentia absoluta communicabili ; ergo nec etiam ex eo , quod sit in tribus personis , cum vtroque sit eadem ratio . Resp. negando consequentiam ; ex ea namque hypotesi impossibili idem omnino esset in Deo id , per quod existeret per se , & id , per quod incommunicabiliter existeret ; & solum differret essentia à persona ex modo concipiendi ; vnde considerata essentia , vt præscinderet nostro concipiendi modo à personalitate , non solum non subsisteret incom-

municabiliter, sed neque subsisteret absolute & esset tantum id, quo Deus est, non verò, quod est. Vt de facto res se habet: aliud est in Deo, non quidem realiter, sed virtualiter id, per quod Deus est per se, & aliud id, per quod subsistit incommunicabiliter: & sic mirum non est, si, præcisa essentia ab ea ratione, per quam incommunicabiliter subsistit, adhuc possit concipi ut subsistens; nam seclusa subsistentia relativa ut sic, manere potest absoluta: supposita verò vnica subsistentia absoluta, & nulla alia omnino, ut esset ex hypotesi, non posset, ea præcisa, concipi essentia, ut subsistens; eo quod esset exclusum totum id, per quod formaliter redderetur subsistens.

Dices 5. Subsistentia est ultimus terminus constitutivus personæ; idcirco enim dicitur actus suppositi, quemadmodum communiter dicitur existentia actus essentiae: sed non datur vna persona absoluta; ergo nec etiam vna talis subsistentia. Confirmatur ex S. Thom. qui 1. par. quæst. 29. artic. 2. docet, subsistentiam, & suppositum idem esse. Resp. terminum constitutum personæ non esse subsistentiam quamcumque, sed solum subsistentiam incommunicabilem.

Nam, licet hæc duo in subsistentia creata, propter eius limitationem, separari non possint, quia id, quod ultimatè subsistit in creatis, non potest esse commune multis; in Diuinis tamen virtualiter distinguuntur, ita ut per aliud essentia Diuina habeat subsistere, per aliud subsistere incommunicabiliter; aliud, inquam, non re, sed ratione, & virtualiter solum diuersum. Et ideo hæc subsistentia absoluta, cum sit communicabilis, nullo modo potest dici esse, aut constituere personam incompletam, aut semipersonam (ut perperam admisisse Caietanum refertur). Nam licet essentiae conueniat subsistere tale, quod, addita incommunicabilitate constituat personam; ratio tamen personæ consistit in indiuisibili, idest in re subsistente incommunicabiliter in natura rationali, seu intellectualli. Aliàs, si eo, quod vna ratio partialis alicuius essentiae reperitur in aliqua natura, ea posset denominari semper illa denominatione essentiali, quæ competit habenti illam essentiam, seu naturam; etiam Leo, in quo reperitur ratio animalis, posset dici homo incompletè, vel semihomo, quod, quam absurdum sit, nemo est, qui non videat; Cumque in materijs theo-

logi-

logicis, & maximè in hac de Myſterio Sanctiſſimæ Trinitatis ſit viſtanda vocum nouitas, aliena à modo loquendi SS. PP. & Conciliorum, loquutiones dictæ non ſunt admittendæ.

Ad Confirmationem ex S.Tho. reſpondeo: ibi S. Doctorem nullo modo contradicere ſiſ, quæ docuit locis ſupracitatis; imò potius ea ibi confirmare; docet enim ibidem, ſubſtantiam vno modo dici quidditatem rei, quam Græci Vſiam; nos eſſentiam vocamus; alio modo ſubiectum, vel ſuppoſitum, vel quod ſubſiſtit in genere ſubſtantix, & hoc nomine ſignificante intentionem, vocari (dicit) ſuppoſitum; nomine autem rei ſecundum, quod per ſe

exiſtit, & non in alio, ſubſiſtentia. Illa enim ſubſiſtere dicimus, quæ non in alio, ſed in ſe exiſtunt. Hæc ibi habet S. Thom. ex quo patet nomen ſubſiſtentix, non ſolum ſignificare perſonam, ſed etiam ſubſtantiam quamcumque, quatenus per ſe exiſtit, & non in alio; ac proindè non dici ad conuerſentiam cum hypoftaſi; ſed latius patere illa. Vide prædictum articulum, & clarè perſpicias ipſum, ex S. Seuerino Boetio, & notione illorum, quatuor nominum Perſona, hypoftaſis, ſubſiſtentia, & eſſentia, breui complexu docere id, quod hucusque cum S.P. dictum eſt.

## A X I O M A T E R T I V M.

*De unitate, vel multiplicatione ſubſiſtentix in Deo.*

Ex Lib. 7. de Trinitate Cap. 6.



**L**li (ideſt Græci) ſi vellent, ſicut dicunt tres ſubſtantias, tres hypoftaſes, poſſent dicere tres perſonas, tria proſopa. Illud autem maluerunt, quod fortè ſecundum linguæ ſuæ conſuetudinem aptius diceretur. Non enim aliud eſt Deo eſſe, aliud perſonam eſſe, ſed omninò idem &c. (in fine capitis). Aut ſi iam  
placet

placet propter disputandi necessitatem, etiam exceptis nominibus relatiuis, pluralem numerum admittere, ut uno nomine respondeatur, cum queritur, quid tria, & dicere tres substantias, siue tres personas, nulla moles, aut interualla cogitentur, nulla distantia quantulecumque dissimilitudinis, ut ibi intelligatur aliud alio, vel paulo minus, quocumque modo minus esse aliud alio potest, ut, neque personarum sit confusio, nec talis distinctio, qua sit impar aliud. Quod si intellectu capi non potest; fide teneatur, donec illucescat in cordibus nostris ille, qui ait per Proph. Nisi credideritis, non intelligetis.

## D V B I V M I I I

Vtrum Relationes Diuinæ ex propria ratione subsistant.

**C**ertum est Relationes Diuinas esse subsistentes, eo quod identificentur cum essentia Diuina, quæ subsistit. Difficultas in præsentia est, an vnaquæque habeat propriam subsistentiam, distinctam ratione à subsistentia absoluta, an verò quælibet earum subsistat eadem subsistentia absoluta. In qua duæ sunt oppositæ sententiæ.

Prima est Scoti quodlib. 4. ad primum, Capreoli in 3. distinct. 1. quæst. 1. artic. 3. ad 2. Durandi in 3. distinct. 1. quæst. 2. & in 1. distinct. 26. quæst. 1. num. 6. & aliorum apud Vasquez disput. 125.

cap. 1. asserentium huiusmodi relationes subsistere solummodo subsistentia essentiæ, ita ut, cum duo sint de ratione personæ, primo subsistere, secundo incommunicabiliter subsistere, subsistentia personis conueniat ratione essentiæ, incommunicabilitas ratione relationis.

Secunda sententia est, quamlibet relationem habere propriam subsistentiam realiter distinctam, à subsistentia alterius, ac proinde esse in Deo tres subsistentias relatiuas, præter absolutam, nec tamen propterea admittunt esse quatuor subsistentias; quia aliqui  
eorum

eorum negant illam absolutam, quam nos ponimus, ut faciunt Alensis, Bonaventura, & Marfil. locis supracitatis dubio præcedente: alij verò dicunt absolutam intimè includi in relatiuis; ut Suarez 3. par. quæst. 3. disput. 11. sect. 4. Fonseca lib. 5. metaph. cap. 8. quæst. 5. sect. 7. Molina quæst. 29. artic. 2. disput. 3. Caiet. 3. par. quæst. 3. artic. 2. & plures recentiores, maximè Thomistæ, quibus nouissimè subscribit P. Gonet tomo 5. disput. 5. art. 2. §. 2. cum quibus.

Dico: non solum in concreto, & adiectiuè, sed etiam in abstracto, & substantiuè concedendas esse in Deo tres subsistentias relatiuas. Probatur primo communiter hæc assertio ex Sacris Concilijs. Nam dicitur in Nicæno secundo in exemplari litterarum Theodori Patriarchæ Hierosolim. *Trinitatem quidem in tribus subsistentijs, unitatem verò in unitate Deitatis*. In Constantinopolitano tertio, quod & sexta Synodus dicitur actione 13. in exemplari satisfactionis inter Cyrum &c. *Si quis non confitetur Patrem, & Filium, & Spiritum Sanctum Trinitatem consubstantialem, unam Deitatem in tribus subsistentijs, anathema sit*. Est etiam celebre testimonium in eadem sexta Synodo Constanti-

nopol. Act. 11. in Epist. Sophronij, ubi habetur *Trinitatem itaque in unitate credimus, & in unitate Trinitatem glorificamus: Trinitatem quidem pro tribus subsistentijs, unitatem autem propter singularitatem Deitatis*. Sen igitur Sancta Trinitas numerabilis personalibus facta est subsistentijs, siue Sancta unitas extra omnem numerum est, & hæc quidem indiuisibilem habet diuisionem, & inconfusam genit coniunctionem. Cum diuiditur namque numerabilibus subsistentijs, & numeratur personalibus alternitatibus.

Probatur 2. Auctoritate SS. PP. nam S. Athanasius serm. de Deipara ait: *Vnum Deum in tribus subsistentijs prædicamus, in quibus una sit substantia*. S. Ambrosius in Symbolo Apostol. cap. 2. *Catholicum est, ut & unum Deum secundum unitatem subsistentia fateamur; & Patrem, & Filium, & Spiritum Sanctum in suam quemque subsistentia sentiamus*. S. Cyrillus Alexandrinus lib. 3. de Trinitate his verbis. *Omnis nostra fidei sermo huc tendit, ut unam dicamus Deitatis naturam, quæ in tribus subsistentijs propriè subsistit*. Denique S. Ioan. Damascenus lib. 1. de fide cap. 9. *Filius propriam habet subsistentiam, præter eam, quæ Patris est*.

Re-

Respondent aliqui: prædicta testimonia Conciliorum, SS. PP. & similia sumere subsistentiam pro personalitate, & idcirco pluraliter loqui de subsistentiis, quia sunt plures personæ, seu personalitates. Sed contra primo est, quia vel ista acceptio est propria, vel impropria; si primum dicas, habetur intentum: si secundum, præterquamquod est inconueniens detorquere loquutiones Synodorum, & Doctorum, ac PP. S. Ecclesiæ ad improprium sensum; illa verba sextæ Synodi: *S. Trinitas numerabilis facta est personalibus subsistentiis*, redderet sensum nugatorium; sic enim essent exponenda, facta est numerabilis personalibus personalitatibus, quem patet esse nugatorium.

Respondent alij Concilia, & SS. PP. loqui de subsistentiis in concreto, seu pro re subsistente, & idcirco, cum dicunt esse in Deo plures subsistentias, idem esse, ac si dicerent esse in Deo plures res subsistentes; ad quod non est necesse, ut subsistentiæ multiplicentur; sed sufficit, quod sint plures personæ eadem subsistentia gaudentes. Contra tamen est, quia etiam dato, & non concesso, quod loquerentur de concretis; cum huiusmodi concreta sint substantialia, ad-

huc necessario esset inferenda multiplicatio subsistentiarum, eo quod ad multiplicationem huiusmodi concretorum non sufficit multiplicatio subiectorum, sed ulterius requiritur multiplicatio formarum, ut est commune apud Philosoph. & Theologos, ubi ex professo de concretis loquuntur. Dixi dato & non concesso: nam ex ipsa voce, & modo loquendi est clarum, ea loqui de subsistentiis in abstracto; loquuntur enim de illis veluti de formis, seu quasi formis, quibus Trinitas multiplicatur, & numeratur, quod est loqui de subsistentiis non in concreto, sed in abstracto.

Ultimo respondent alij: tres subsistentias poni à Concilijs, & SS. PP. quia subsistentia absoluta, in personis Diuinis inclusa, diuersimodè ab illis modificatur, & diuersis incommunicabilitatis modis terminatur, eo modo, quo conceduntur in Deo plures potentie notionales, generatiue scilicet, & spiratiue, absque pluralitate rationis formalis producendi, quæ in vtraque est absoluta, per hoc solum, quod ratio illa absoluta diuersis relationibus terminetur. Ita Nazarius ad quæst. 39. 1. par. artic. 4. Controversia prima. Verum contra hanc doctrinam stat primo, quod sic



fic etiam possent dicere esse tres Naturas Diuinas, quia etiam hæc in Personis Diuinis inclusa diuersimodè ab illis modificatur; & diuersis incommunicabilitatis modis terminatur; quod tamen nullus Catholicus admittet; ergo nec etiam illud debet à nobis concedi, propter paritatem rationis. Secundo repugnat præ cæteris loquutio S. Ioan. Damasceni; qui apertè dicit, quod Filius propriam habet substantiam, præter eam, quæ est Patris, quod esset falsum, si ratio formalis subsistendi in Personis Diuinis non multiplicaretur; nam ex eo, quod substantia absoluta à paternitate, & filiatione diuersimodè modificetur, colligi solum potest, quod Filius habet substantiam sibi appropriatam, non tamen sibi propriam, & diuersam ab illa, quæ est Patris.

Probatur 3. ratione communi, quam tetigi in refutatione secundæ Resp. Quia videlicet sunt tres Personæ subsistentes, non solum adiectiuè, sed etiam substantiuè; sed substantiuæ non multiplicantur, nisi ad multiplicationem formæ; ergo &c.

Respondent aliqui ex aduersarijs, negando maiorem; & concedendo, esse quidem tres personas, quia sunt etiam tres perso-

nalitates, idest relationes personales, constituentes personas inesse incommunicabili; & asserendo esse vnum tantum subsistens substantiuè, idest Deum in tribus Personis; adiectiuè verò tres habentes eandem subsistentiam. Sed contra hanc responsionem stat, quod etiam dato, & non concesso, quod essent solum tres subsistentes adiectiuè, non haberetur intentum ab ipsis. Nam concretum adiectiuum, vt bene notat Gonetius loco citato, non potest plurificari; nisi plurificetur ratio habendi formam ab eo importatam; cumque in præsentia ratio habendi formam importatam per concretum adiectiuum non sit aliud, quam substantia, nam illa est prima ratio sustentandi, aut quasi sustentandi formam; manet omnino necesse esse, quod ipsa subsistendi ratio plurificetur.

Probatur 4. quia relatio Diuina est actualis entitas distincta ratione nostra à Deitate, sed actualis entitas formaliter constituitur per existentiam; ergo habet existentiam; illa existentia est omnino per se; ergo est substantia.

Hanc rationem, quæ est demonstratiua, infirmare conantur aduersarij, dicendo relationem secundum suam rationem, &  
 Quid-

quidditatem non esse actualem entitatem, sed solum quatenus identificatur cum essentia, & participat idem esse; Ad quod confirmandum dant instantiam in spiratione actiua; nam & ipsa est actualis entitas; de qua si dicitur habere existentiam, & subsistentiam distinctam inferunt dari quartam subsistentiam relativam. Quod si dicatur existere existentia communi, idem dicendum esse de alijs relationibus contendunt. Resp. tamen quod licet relatio præcisè in suo conceptu formali non inuoluat esse actualem entitatem contradistinctam ab eo, cum quo identificatur; nihilominus eam inuoluit, & importat, quatenus est idem, cum quo proximè, & immediatè identificatur; quod in præsentì est ratio personalitatis Diuinæ, vt contradistinctæ ratione nostra ab ipsa essentia, quæ ratio personalitatis, vt sic contradistinctæ, dicit in suo formali conceptu rationem subsistendi contradistinctam. Nec vrget instantia de spiratione actiua, quæ in suo conceptu formali dicit solummodo rationem relationis, & originis, & ratione eorum, cum quibus identificatur, non potest multiplicare personalitates, cum hæc sint duæ personalitates Patris, & Filij, quibus est communis ipsa

spiratio, actiua; quæ manent duæ, sicut erant; & sic non dicit subsistentiam distinctam ab illis. Hinc deducitur sequens ratio, &

Probatur 5. Quia sunt in Deo tres personalitates; sed personalitas dicit subsistentiam incommunicabilem; ergo sunt tres subsistentiæ incommunicabiles. Confirmatur, quia relatio Diuinæ habens ea, quæ requiruntur, constituit personam; vel ergo constituit subsistentem, & habetur intentum, quia constituit formaliter,tribuendo se ipsam; vel aduenit subsistenti, vt spiratio actiua; & hoc esset esse veluti formam accidentaliter aduenientem, non verò hypostaticam; quod reiecit S. Thomas 1. par. quæst. 40. artic. 3. vbi dicit, proprietates personales non intelligi aduenire hypostasibus Diuinis, tanquam formas subiecto, sed ferre secum supposita; & quæst. 9. de Potentia: Personam Diuinam significare distinctum subsistens in Natura Diuina. Ex quibus locis plures Auctores probant, hanc fuisse sententiam S. Thom.

Probatur 6. Quia in Deo est duplex esse, vnum absolutum, alterum relatiuum, & vtrumque est independens à sustentante; & pariter est duplex operatio, ad intra vna, ad extrâ altera,

ra, quæ supponunt utrumque principium subsistens; ergo semper ponendæ sunt subsistentiæ relatiuæ, diuersæ ab absoluta.

Probatur 7. Quia vnio humanitatis in Christo Domino ita terminatur ad subsistentiam Verbi Diuini, vt non terminetur ad alias subsistentias; sed si esset vna solum subsistentia sub diuersis modificationibus, non posset terminari ad vnâ personam, quin terminaretur ad alias; ergo diuersa subsistentia est in Verbo à subsistentijs Patris, & Spiritus Sancti.

Respondet huic argumento Durandus loco citato: vnionem humanitatis primò terminari ad naturam Diuinam subsistentem, & consequenter ad Personam Verbi. Sed in hac responsione non videtur posse saluari, quin omnes personæ sint incarnatæ; & propterea hæc doctrina communiter rejicitur.

Respondent alij: terminari ad subsistentiam, vt modificatam proprietate Filij, & factam ipsius propriam. Sed in hac etiam responsione vix saluatur, quomodo ad alias personas non terminetur, & propterea non saluantur loquutiones Conciliorum, & SS. PP. quod sint diuersæ subsistentiæ, quod importat diuersi-

tatem in ipsis subsistentijs; non verò in solis modis, seu modificationibus.

Dices primo hanc doctrinam esse omnino contra expressam auctoritatem S. P. N. Augustini lib. 7. de Trinitate Cap. 4. qui rationem subsistendi in Deo manifestè absolutam putat, & de relationibus non prouenire aliquod genus subsistentiæ: ait enim: *Nam si hoc est Deo esse, quod subsistere, ita non erant dicenda tres substantiæ, vt non dicuntur tres essentia, quemadmodum quia hoc est Deo esse, quod sapere, sicut non tres essentias, ita nec tres Sapientias dicimus: Sic enim quia hoc est illi Deum esse, quod est esse, tam tres essentias, quam tres Deos dicere, fas non est. Si autem aliud est Deo esse, aliud subsistere, sicut aliud Deo esse, aliud Patrem, aut Dominum esse, quod enim est, ad se dicitur; Pater autem ad Filium, & Dominus ad seruientem creaturam dicitur: relatiuè ergo subsistit, sicut relatiuè gignit, & relatiuè dominatur: ita iam substantia non erit substantia, quia relatiuum erit. Sicut enim ab eo, quod est esse, appellatur essentia; ita ab eo, quod est subsistere, substantiam dicimus: absurdum autem est vt substantia relatiuè dicatur: omnis enim res ad se ipsam*

Q 2 sub-

*subsistit* : quanto magis Deus. Quibus verbis aperte videtur rejicere tres substantias relativas.

Respondet P. Ludouicus Caspensis disput. 3. de Trinitate sect. 4. num. 33. sequutus Vasquez disput. 125. cap. 5. S. P. Augustino & D. Hieronymo nunquam placuisse vsum nominis hypostasis in ordine ad significandas personalitates Diuinas, & subsistentias, & sic communiter illud nomen adhibuisse ad significandam substantiam Diuinam. Vnde quando conuertebant vocem hypostasis iuxta linguam latinam, non substituebant nomen subsistentia, sed nomen substantia. Et quando ponebant Verbum subsistere, vel nomen subsistentia, quæ illis sonabat idem, quod substantia, volebant relatiuè posse accipi, sed solum esse ad se, & non ad aliud, idest secundum esse substantiale, & non relatiuum; quod si illi obtinuissent vsum, iam canonicè approbatum ab Ecclesia, & à Scholasticis, secundum quem hypostasis stat, non pro substantia, sed pro subsistentia incommunicabili; non ita se gererent scrupulosè, in admittendis tribus hypostasibus, seu subsistentijs, cum addito relatiuis.

Verius Responderi posse arbi-

tror, S. P. eo loco in argumento adducto non procedere definiendo; sed solum suo vſitatissimo more inquirendo. vt, patet ex principio capitis. Cuius euidentissimum indicium est, quod in cap. 6. quod est vltimum dicti lib. septimi, vbi resoluit difficultatem, concedit, vt possint dici tres substantiæ, tres hypostases, tres personæ & tria profopæ; subiungendo, quod in Personis eadem ratio est; & si disputandi necessitas adsit, etiam exceptis nominibus relatiuis, posse admitti numerum pluralem, dummodo excludantur illæ imperfectiones, quas ibi enumerat; quæ omnia habes in Axiomate; ex cuius sola lectione constat, nec displicuisse ei nomen hypostasis; non enim reprobat ibi vsum illum loquendi Græcorum, sed potius illum approbat; quod si non substituebant, nomen subsistentia pro hypostasi, hoc idem erat, quia licet verbum subsistere esset in vſu apud principes linguæ latinæ, pro diuersis significatis, non erat tamen in vſu nomen subsistentia, vt videre est apud selectiora, & correctiora vocabularia, quale est illud nostri Ambrosij Calepini; vnde ex eisdem Caspensi, & Vasquez contra ipsos ad hominem sic arguo. Subsistere, vel subsistentia apud S. P.

S. P. & D. Hieronymum sonabat idem, quod substantia, & volebant relatiue posse accipi, & si obrinuissent vsum, iam canonicè probatum ab Ecclesia, secundum quem hypostasis stat pro substantia, & non pro substantia, non se gererent ita scrupulosè in admittendis tribus hypostasibus, seu subsistentijs, cum addito relatiuis; hæc sunt verba ipsa Caspensis. Sed sic est, quod S. P. admittit, vt est clarum in Axiomate, & ex toto illo cap. 6. & tres hypostases, & tres substantias, sicut & tres personas, etiam sine explicita additione relatiuas, implicite tamen intellecta, vt constat ex illo capite; ergo à fortiori dixisset etiam tres subsistentias relatiuas, si tunc politioris litteraturæ Auctores nomine subsistentia vsi fuissent; qui enim non abhorruit à ponendis tribus substantijs, quod idem erat apud ipsum, non solum identicè, sed etiam formaliter, ac tres subsistentiæ, nec etiam à nominandis tribus subsistentijs abstinuisset. Falsum est igitur quod S. P. vnicam tantum subsistentiam absolutam in Diuinis agnoscat; sed ex ipsismet ipsius verbis, & tres hypostases, & tres substantias relatiuas concessisse est clarum.

Dices 2. S. Thomas 1. par.

quæst. 40. artic. 2. ad secundum negat personas distingui in esse, quo subsistunt, & quæst. 9. de Potentia artic. 5. ad 19. ait nullo modo concedendum esse, quod in Diuinis sit nisi vnum esse, cum esse semper ad essentiam pertineat, præsertim in Deo, cuius esse est sua essentia, & quæst. 2. de Potentia artic. 1. docet Essentiam non accipere esse per supposita, & ideo per vnum, & idem esse, esse & incommunicante, & in eo, cui communicatur. Et denique quæst. 8. de Potentia artic. 3. ad 7. ait quod relationes in Diuinis, esto constituent hypostases, & sic faciant eas subsistentes, hoc tamen faciunt, in quantum sunt essentia Diuina; relatio enim in quantum relatio non habet, vt subsistere faciat; ergo à primò ad vltimum de mente S. Thomæ est relationes Diuinas non subsistere nisi subsistentia absoluta, & communi modificata. Respondent aliqui Thomistæ S. Thomam in prædictis locis denotare solummodò essentiam Diuinam esse radicem, non verò rationem formalem subsistendi, & significare, quod, licet relationes Diuinæ vi suæ lineæ, & rationis formalis habeant, quod subsistant, & Personas Diuinas constituent, tamen vt hoc munus præ-

præsent, prouenit, tanquam à principio radicali, à Diuina essentia, quam includunt. Hanc respont. reijcit Gonetus tomo 5. Disput. 5. artic. 2. §. 4. vt parum conformem, imò discordantem à mente S. Thom. & aliam reddit ipse magis conformem sic. Quando S. Thomas dicit relationes Diuinas habere, quod subsistant ab essentia, non loquitur de subsistentia, vt dicit perfectitatem incommunicabilitatis, de qua in præsent agimus; sed de subsistentia pro perfectitate independentiæ sumpta; cum enim subsistentia sub hac acceptione sit maxima perfectio, prouenit non solum radicaliter, sed etiam formaliter à Diuina Essentia, non verò à relationibus, quæ ratione sui (in sententia S. Thom. & eius scholæ) non dicunt perfectionem. Alia acutè expensâ ad mentem S. D. habet loco citato prædictus Auctor.

Dices 3. Est commune proloquium: in Diuinis omnia esse vnum, vbi non obuiat oppositio relatiua; sed in hoc, quod est Patrem subsistere, nulla est oppositio relatiua; ergo in ea ratione subsistendi habent unitatem, & identitatem, non verò distinctionem realem. Resp. prædictum Axioma esse intelligendum cum grano salis; nam prædica-

ta transcendentalia, quæ necessario, non solum identicè, sed etiam formaliter identificantur cum relationibus, & personalitatibus Diuinis, multiplicantur & ipsa ad multiplicationem personarum; cumque hoc, quod est subsistere, sit prædicatum transcendente respectu personarum, sicut inhærere, siue esse in subiecto respectu accidentium; propterea, plurificatis subsistentijs, necesse est, quod plurificentur & personæ: quod acutè animaduertit S. P. quando in loco supracitato ex cap. 6. lib. 7. de Trinitate dixit, vt habes in Axiomatè: *si iam placet propter disputandi necessitatem, etiam exceptis nominibus relatiuis, pluralem numerum admittere, ut vno nomine respondeatur, cum quaritur quid tria? & dicere tres substantias, siue tres personas.*

Dices 4. In Deo est vnum tantum esse existentiae; ergo & vna subsistentia: quia hoc esse est perfectio simpliciter simplex, quæ est melior ipsa, quam non ipsa; ergo intra rationem essendi est infinite perfecta, & comprehendens omnem perfectionem sui generis; alias si esset multiplex, vnum esse non contineret perfectionem alterius. Resp. communiter esse absolutum, & essentialia esse vnum; sed esse relatiuum,

tium, & incommunicabile esse triplex; nam licet tam esse Diuinum, quam subsistere Diuinum absolutum sint perfectiones simpliciter simplices; nihilominus hoc non tollit, quo minus etiam subsistere relatiuum sit & ipsum perfectio simpliciter simplex: quemadmodum enim supradixi relationes Diuinas paternitatis, filiationis, & spirationis esse non solum perfectiones, sed etiam perfectiones simpliciter simplices; sic & in præsentī consequenter dico etiam ipsas subsistentias relatiuas esse perfectiones simpliciter simplices; nihil enim amplius potest opponi contra hoc, quam quod opponitur contra illud, quod iam supra solutum est.

Instabis: vel esse illud, & subsistere incommunicabile est diuersum ab absoluto, vel est idem, & differt solum ratione connotati. Si dicatur primum; iam illud absolutum non continebit perfectionem huius esse, & subsistere relatiui, & sic non erit infinitum in ratione essendi, & subsistendi, quod est inconueniens. Si dicatur secundum, iam habetur intentum; non enim erit amplius diuersitas, seu pluralitas in ratione subsistendi, sed solum in modo, seu modificatione illius subsistentiæ communis. Resp.

hanc instantiam nimis probare; ac proinde nihil probare. Si enim probaret intentum, probaret etiam relationes Diuinas paternitatis &c cum suis prædicatis transcendentalibus non distingui virtualiter ab essentia, quod non est dicendum; sicut ergo, licet essentia Diuina contineat in se omnem rationem essendi, & sit omnino infinita in hac ratione, & nihilominus ab illa virtualiter in omnium sententia contradistinguuntur relationes illæ, cum suis prædicatis transcendentalibus, sine quibus nec esse, nec concipi possunt, quæ tamen continentur radicaliter in ipsa Diuina essentia; sic subsistentia illa absoluta, licet infinita in ratione subsistendi contineat omnem rationem subsistendi, poterit continere vnam rationem subsistendi formaliter, illam scilicet, quæ importat perfectitatem independentiæ, & alteram, siue alias radicaliter, illas scilicet, quæ important perfectitatem incommunicabilitatis; quales sunt subsistentiæ relatiuæ.

Instabis vltcrius: est contra rationem subsistentiæ, vt terminetur vltcriori subsistentia; ergo vel tollenda absoluta, vel negandæ sunt relatiuæ. Probatur antecedens: Subsistentia enim facit naturam esse per se; unde

non

non apparet, quomodo existenti per se possit aduenire aliud existere per se, quod tamen est necessarium admittere, si in eadem persona est subsistentia absoluta, & subsistentia relatiua; aut enim relatiua terminabit absolutam; & sic ista non erit ulterius terminus naturæ, & consequenter nec etiam subsistentia; aut non terminabit, & sic illa non erit ultimus terminus. Confirmatur, quia si relationes adueniunt essentiae subsistenti, iam se habent ad illam, vt formæ accidentales, non verò vt formæ, seu rationes hypostaticæ; si adueniunt solum existenti, iam non datur subsistentia absoluta. Hunc nodum putant aduersarij insolubilem: quem tamen facile solui posse est certum, diuidendo, vt supra, sic. Alia est subsistentia dicens perfectatam independentiæ; alia dicens perfectatam incommunicabilitatis, & sic illam, vtpotè communem, non est inconueniens terminari ab ista, siue ab istis; & consequenter nec absoluta, nec relatiua sunt tollendæ: absoluta enim facit subsistere, siue esse per se prior modo, relatiuæ verò posteriori. Et sicut naturæ Diuinæ existenti per se identificantur relationes Diuinæ, quæ & ipsæ existunt per se, diuersimodè ta-

men; sic etiam eidem subsistenti per se absolutè optimè concipitur identificari subsistere relatiuum, absque vlllo inconuenienti.

Ad illud de ultimo termino. Resp. hoc conuenire subsistentiæ, non sumptæ in tota sua latitudine, in qua solum significat perfectatam; sed solum subsistentiæ constituenti personam, nam si in creatis, esto limitatis in suo esse, datur subsistere, quod non est ultimus terminus, quale est subsistere partium tam essentialium, vt materiæ, & formæ, quam integralium, vt sunt caput, pedes, manus &c. quæ adhuc separatæ subsistunt; quanto magis hoc in esse Diuino infinito, & illimitato possumus, supposita distinctione virtuali, ratione nostra distinguere. Ex his patet ad Confirmationem: relationes enim adueniunt essentiae subsistenti quidem, non tamen ultimo, & incommunicabiliter terminatæ.

Dices 5. Datis in Deo tribus subsistentijs, & existentijs relatiuis, omnino necessario sequitur esse etiam admittendas tres durationes, duratio enim nihil est aliud, quam esse permanens; & si concedantur in Deo tres durationes, erunt etiam admittendæ tres æternitates, tres im-

men.



mensitates &c. contra id, quod docuit S. Athanasius in Symbolo. Respondet Suarius Disput. 11. de Trinitate sect. 2. posse etiam concedi tres durationes, ac etiam tres æternitates, non tamen simpliciter, sed relatiuas, vel si magis placet, posse dici tres durationes, non verò tres æternitates, quia nomen durationis est abstractius, & non dicit tantam perfectionem, quantam dicit æternitas: duratio enim ut sic dicit solum permanentiam in esse; æternitas verò dicit perfectionem, & existentiam vitæ prorsus immutabilem, quod competit Deo solum ratione essentiæ. Alias rationes adducunt Zumel in suis Comment. ad artic. 2. quæst. 24. 1. par. S. Thom. & Arriaga disput. 49. sect. 2.

Sit igitur regula inuariabilis cum S. Athanasio in Symbolo, non esse dicendos in Trinitate tres æternos, tres immensos, tres Dominos: sed vnum æternum, vnum immensum, & vnum Dominum, sumptis his nominibus substantiue, ut sumpsit ea S. Athanasius; & docet S. Thomas 1. par. quæst. 39. artic. 3. & cum eo communiter omnes alij Theologi; qui simul docent, quod, sumendo ea adiectiue, verè dici possunt tres æterni, & tres immensi, id est tres personæ habentes

immesitatem, & æternitatem. Ex quo inferitur æternitatem, Immesitatem, & Dominium in Deo non multiplicari. Nam iuxta regulam supra adductam ad pluralitatem nomini substantiui requiritur & multiplicitas subiectorum, & multiplicitas formarum. Vnde si in Deo essent plures æternitates, & plures immesitates, cum sint plures personæ, non potuisset negare S. Athanasius tres æternos, tres immensos, & tres Dominos substantiue, ut negauit. Hanc doctrinam tradidit etiam S. P. lib. 5. de Trinitate cap. 10. ubi ait: *Sicut ergo non dicimus tres essentias, ita nec tres magnitudines, nec tres magnos &c. quia non ea magnitudine magnus est, quæ non est, quod est ipse, ut quasi particeps eius sit Deus: alioquin illa erit maior magnitudo, quam Deus. Ea igitur magnitudine magnus est, quæ ipse est eadem magnitudo &c.* Hoc & de Bonitate, & de Æternitate, & de Omnipotentia, omnibusque predicamentis, quæ de Deo possunt pronuntiari, quod ad se ipsum non translate, ac per similitudinem, sed propriè; si tamen de illo propriè aliquid dici ore hominis potest. Quæ in eo sensu, quo verba S. Athanasij explicant Theologi, accipienda sunt.

R

Quæ-

Quæri hic ulterius potest, an, præter existentiam absolutam, sint admittendæ in Deo tres existentie relatiuæ. Hæc difficultas, ultra communem dubitandi rationem, habet peculiare motuum in sententia, quam ego sequor in Axiomatibus Metaphysicis, nempe quod essentia, & existentia, nec etiam ratione ratiocinata distinguantur; ac proinde, si per S. P. non possumus dicere tres essentias, sic nec etiam poterimus dicere tres existentias. His tamen non obstantibus.

Conclusio est affirmatiua, nec est contra S. P. nam cum, ut supra vidimus, in cap. 6. lib. 7. de Trinitate admittat tres hypostasies, tres personas, ac etiam, propter necessitatem disputandi, tres substantias, idest relatiuas, consequenter loquendo non negasset tres etiam existentias relatiuas. Probatur autem ratione, quia omnia transcendentia sunt communia naturæ, & relationibus; ac proinde istis multiplicatis, necesse est, ut & illa multiplicentur, iuxta regulam supra allatam: Multiplicato inferiori, multiplicatur & superius in eo inclusum: sed existentia, sicut & essentia est prædicatum transcendens; ergo habet esse commune naturæ, &

relationibus: atque adeo multiplicatis relationibus, necesse est & ipsarum essentias pariter relatiuas multiplicari.

Ad motuum dubitandi, sumptum ex S. P. Respondeo hoc nomen essentia quandoque significare naturam, quandoque verò significare solum quidditatem alicuius rei, quæcumque illa sit, idest illa prædicata, sine quibus res illa, siue sit substantia, siue accidens, nec esse, nec concipi potest. Cum igitur S. Pater dicit, quod non dicimus tres essentias, certum est ipsum loqui de essentia, quatenus significat naturam Diuinam; nam in hoc sensu de illa loquitur in capitulis præcedentibus, non verò quatenus significat quidditatem cuiusque rei, ac propterea loqui de essentia absolute sumpta, non verò relatiua; nam, ut dixi, de relatiuis loquendo, disputantibus concessit etiam tres substantias relatiuas.

Dices: S. Thomas quæst. 39. 1. par. artic. 3. docet, in Deo dici tres existentes adiectiuè: At si essent tres existentie relatiuæ, iuxta trium personarum numerum, dici etiam possent tres existentes substantiuè, sicut dicuntur tres Personæ; ergo S. Doctor non agnouit aliam existentiam, præter illam absolutam, & communem.

munem. Resp. esse regulam generalem; ut cum est sermo de Deo, & nomina transcendentia communia essentiae, & relationibus absolute proferuntur, sumantur regulariter prout in essentia includuntur; iuxta quem sensum, & doctrinam non licet dicere in Deo absolute tres existentias substantiue, sed adiectiue tantum, quia est tantum unica existentia Diuinae naturae. Et hoc intendit eo loco S. Thom. Nam de cetero communiter cum addito affirmatur in Deo dari tres existentias relatiuas.

Quæri hic ulterius potest: utrum hoc nomen Persona significet relationem? Huius dubij solutio conducet ad pleniorē intelligentiam eorum, quæ docuit S. P. lib. 5. de Trinitate cap. 6. & 7. circa ea, quæ dicuntur substantialiter, aut relatiue, singulariter, aut pluraliter, & cætera huiusmodi. Procedit hoc quaesitum non de persona in communi, sed de persona Diuina ut sic, & ut communiter dicitur, ut tale incomplexum; quemadmodum ad exprimendum hoc incomplexum homo, quod est species animalis, vterentur hoc complexo, animal rationale.

Ratio dubitandi oritur ex eo, quod cum persona in Diuinis multiplicatur, videtur significa-

re relationes, quæ solæ multiplicantur; & ex eo, quod nomen persona non dicitur ad aliud; videtur significare absolutum.

Præmitto primo, non solum in nominibus connotatiuis, sed etiam in absolutis communiter distinguendum esse inter significatum materiale, & significatum formale. Formale dici solet illud, ad quod significandum principaliter, siue expresse est impositum nomen: materiale verò res, in qua expresse, ac principaliter significata necessario saluatur. Sit exemplum hoc nomen homo, quod formaliter significat compositum ex corpore & anima rationali, materialiter verò corpus habens caput, Cor, Hepar &c. sine quibus non saluatur tale compositum. Similiter, cum dicimus species, siue sensibiles, siue intelligibiles, formaliter significatur similitudo obiecti; materialiter verò talis qualitas, in qua saluatur ratio illa similitudinis.

Præmitto secundo, non esse idem formale significatum nominis, & directum; nec idem materiale, & in obliquo; sed posse fieri, ut idem sit directum, & materiale, & idem in obliquo, & formale; nam directum dicitur, quod in recto significatur, in obliquo verò, quod in alio ca-

fu, siue implicite, siue expresse. Quapropter Persona, ut abstrahit à creata, & increata, significat subsistens incommunicabiliter in natura rationali, abstrahendo à relatiuo, & absoluto. Persona creata, quia constituitur in esse per entitatem absolutam, materialiter significat quid absolutum. Persona Diuina, quia constituitur per relationem, materialiter significat relationem, sed tam creata, quam increata significat subsistens incommunicabiliter. Quo posito.

Dico: quod, licet subsistens ut sic non dicat ordinem ad aliud directe, nihilominus personam Diuinam significare relationem, non per modum relationis, sed per modum formæ hypostaticæ; ac proinde significare relationem in obliquo sub conceptu relationis, tam materialiter, quam formaliter; implicite tamen, & velut in obliquo. Quod sic probat. Quæcumque Persona Diuina constituitur in esse personæ per relationem, per quam etiam distinguitur ab alijs personis: sed hoc non exprimitur, nec importatur in recto ab hoc nomine persona Diuina, & tamen includitur, & inuoluitur essentialiter in conceptu personæ Diuinæ; ergo importatur implicite, & in ob-

liquo, modo dicto. Ex quo patet eandem relationem, & materialiter, & directe significari, & etiam formaliter, & in obliquo. Simpliciter tamen dicendum esse relationem materialiter significari, & formaliter significari subsistens incommunicabile, eo quod ad hanc relationem significandam simpliciter est impositum nomen Personæ. Et quia in Diuinis non saluatur hæc ratio, nisi in relationibus, per quas constituuntur personæ, necesse est, quod saltem materialiter significetur relatio per hoc nomen persona Diuina. Quemadmodum de qualitate in hoc nomine species, & de corpore in hoc nomine homo dictum est supra, materialiter importari.

Hanc doctrinam habes apud S. Thom. 1. par. quæst. 29. artic. 4. ubi ad hoc quæsitum respondet: in Diuinis personam significare relationem per modum hypostasis in natura Diuina. Et quæst. 9. de Potentia artic. 4. dicit materialiter significare relationem, formaliter verò subsistens distinctum in natura Diuina. Quæ responsiones, quidquid contradicat Caietanus, in idem coincidunt. In prima enim vult rem significatam esse relationem, modum verò signifi-

cant-

candi absolutum. Ex quo soluitur punctus difficultatis; nam, ratione rei nomen multiplicatur, ratione modi significandi non dicitur ad aliud. In secunda resp. ait materialiter significari id, in quo necessario saluatur ratio subsistentis incommunicabi-

liter in natura Divina, quod est relatio, & coincidit cum re significata; formaliter verò docet significari subsistens incommunicabiliter in tali natura, quæ ratio non saluatur nisi in relatione, sed significatur ad modum absoluti.

## AXIOMA QVARTVM.

*De constitutiuo, & distinctiuo Diuinarum Personarum.*

Ex Lib. 7. de Trinitate Cap. 6.



*Ec sic ergo Trinitatem dicimus tres Personas, vel substantias, vnā essentiam, & vnum Deum, tamquam ex vna materia tria quadam subsistant &c. Non enim aliquid aliud eius essentie est, præter istam Trinitatem; tamen tres personas eiusdem essentie, vel tres personas vnā essentiam dicimus, tres autem personas ex eadem essentia non dicimus quasi aliud ibi sit, quod essentia est, aliud, quod persona. Sicut tres statuas ex eodem auro possumus dicere; aliud enim illic esse aurum, aliud esse statuas. Et cum dicuntur tres homines eiusdem nature, possunt etiam dici ex eadem natura: quia ex eadem natura & alij possunt existere. Deinde non tantum est vnus homo, quantum tres simul: & plus sunt duo, quam vnus homo, & sic in statuis &c. At in Deo non ita est &c. Quod animalis homo non percipit. Non enim potest cogitare nisi moles, & spatia volitantibus phantasmatibus &c. Ex qua*  
immun-

*immunditia ; donec purgetur , credat &c. Ioan: 10. Ego , & Pater unum sumus : Unam secundum essentiam : sumus secundum relatiuum &c. aliquando tacetur unitas essentie , & sola pluraliter relatiua commemorantur . Ioan: 14. ad eum veniemus . Aliquando latenter omnino : Genesis primo : faciamus hominem ad imaginem , & similitudinem nostram .*

## D V B I V M I V.

Vtrum Personæ Diuinæ vltimò constituentur , & distinguantur per relationes.

**Q** Vinque sunt in hoc puncto diuersæ sententiæ Theologorum. Prima est nostri Gregorij Ariminensis in 1. distinct. 26. & 27. quæst. 1. asserentis distingui se ipsis , quod infert ex eo , quod ipse defendit , nempe personas non constitui in esse personæ , nisi se ipsis ; nam eo modo res ab alijs distinguuntur , quo in suo esse constituentur : pro ea citatur etiam Præpositius.

Secunda est Ferrariensis lib. 4. contra Gentes cap. 56. & Cardinalis Caietani in comment. artic. quæst. 40. pr. partis , asserentium constitutionem non esse à parte rei , nisi fundamentaliter ; & conuenire personis , non secundum se , sed prout à nobis concipiuntur .

Tertia est : constitui quidem ex essentia , & proprietatibus , sed has esse absolutas . Est Ioan. de Ripa , vt refert Scotus distinct. 26. quæst. 1. §. 3. quam opinionem probabilem putat ipse Scotus , & citra fidei incommodum posse defendi ; & tribuitur ab aliquibus S. Bonauenturæ , sed immeritò . Hæc sententia ponit in qualibet persona , præter essentiam , relationem , & originem , propriam entitatem absolutam incommunicabilem , per quam persona primò constituitur , & distinguatur ab alijs .

Quarta sententia est S. Bonauenturæ in 1. distinct. 26. artic. vnico , personas constitui , & distingui per origines ; relationes verò esse rationes cognoscen-

scendi distinctionem Personarum.

Quinta Sententia est Sancti Thom. 1. par. quæst. 40. artic. 20. & alibi sæpè, Scoti loco citato, qui fatetur esse communem: Durandi distinct. 26. quæst. 1. & aliorum communissima: nimirum constitui, & distingui per relationes. Pro solutione.

Præmitto primo. Constitutionem hanc personarum, de qua loquimur, non esse realem, sed per intellectum, & dupliciter posse à nobis concipi. Primo sub conceptu proprio, & distincto cuiuscumque personæ, ut Patris, & Filij &c. Secundo sub conceptu confuso, & communi, non quod concipiatur gradus personæ communis, abstractus ab hac, & ab illa persona singulari; sed ita ut hæc persona singularis prius concipiatur, ut est tale individuum personæ in communi, quam ut est Pater; quemadmodum Petrus potest concipi, ut est tale individuum hominis. Si Personæ Divinæ concipiuntur primo modo, non possunt concipi, nisi ut relatiuæ (ut infra probabitur) quia nihil aliud sunt, quam tales relationes Divinæ subsistentes, & sic concipitur prima persona constituta relatione Patris, seu generatione Filij. Secundo modo possunt concipi

ut constitutæ per relationem, non ut relatio est, sed ut proprietas personalis, eo quod in creatis, à quibus desumimus species, & cognitiones relationis, & personalitatis, aliud est personam constitui, aliud verò referri ad aliud. Et sic, licet in Divinis hæc duo sint ab eadem entitate reali, & ab eadem ratione formali, tamen possunt ita concipi, ut vnum præscindatur ab alio, non quidem præcisione perfecta, seu conceptu distincto, sed præcisione imperfecta, & conceptu confuso; & sic concipitur à nobis Pater, quando concipitur sub conceptu primæ personæ, non exprimendo an generet, vel non generet.

Præmitto 2. de ratione hypostasis esse, ut sit per se subsistens, & in se indivisa, quod autem sit ab alia distincta actu, & realiter, contingere ex eo, quod dantur aliæ hypostases. Quapropter, si contingat non multiplicari Personas in aliqua natura, nisi per processionem à prima, ut contingit in Divinis, nunquam concipietur huiusmodi pluralitas sine eo, quod aliquo modo concipiatur vnam originari ab alia; concipietur quidem necessario prima persona, ut subsistens, & indivisa in se, sed sine conceptu processionis, saltem im-

implicito, & confuso non poterit concipi, vt distincta ab alia.

Premitto 3. posse aliquid dici absolutum dupliciter, primo positiuè, quatenus in sua ratione includit esse ad se, & non ad aliud; secundo negatiuè, eo quod nec concipiatur in ordine ad aliud, nec positiuè includat esse ad se, aut excludat ordinem ad aliud, quo pacto dicitur esse, in sententia eorum, qui illud perfecta præcisione asserunt præscindi ab inferioribus, quod cum sit superius ad omnia prædicamenta, & sic commune relatiuis, & absolutis, est negatiuè absolutum, cum tamen substantia, & quantitas sint entia positiuè absoluta. Quibus positis.

Dico 1. Personas Diuinas non distingui per proprietates absolutas. Hæc est communior in scholis; ita vt aliqui sententiam oppositam parum tutam, alij erroneam iudicent, vt videre est apud Bannez, & Zumel in Comment. artic. 2. quæst. 40. 1. partis Sancti Thomæ. Probatur primo Auctoritate totius Sacræ Scripturæ, in qua nunquam Personæ Diuinæ nominantur, nisi nominibus relatiuis, vt Matth. Cap. ultimo: *Baptizantes eos in nomine Patris, & Filij, & Spiritus Sancti*. Ioan. Cap. ultimo: *Tres sunt qui testimonium dant in ca-*

*lo Pater, Filius, & Spiritus Sanctus*. Quod si constituerentur, & distinguerentur per absoluta, Christus Dominus, qui erudiebat Apostolos, & in eis, ac per eos totam Sanctam Ecclesiam, hoc aliquando exprexisset.

Huic instantiæ respondent Adversarij dupliciter. Primo Christum Dominum se accommodasse nostro captui; qui facilius intelligimus relationes, quam proprietates absolutas; nam & vulgus sæpius vtitur nominibus relatiuis, quam absolutis: communius enim dicitur Imperator, Rex, Dux &c. hoc iussit, aut fecit; quam Leopoldus, Ludouicus, Carolus &c. sic etiam domi nomina Patris, & Matris sunt vsitatiores; & in schola nomen Magistri, quam nomina propria. Secundo dicunt per nomina illa relatiua denotari originem vnius ab alia, quod erat de necessitate credendum; quod non denotabatur per absoluta.

Sed contra est, quia iuxta hanc doctrinam sequeretur Christum Dominum non tradidisse distinctam notitiam Personarum, & Proprietatum, quod est absurdum asserere. Et præterea cum articuli fidei debeant accipi iuxta sensum, quem præferunt verba, si nullum sequatur incommodum, & Verba Christi Domini efficiant hunc



hunc sensum, quod distinctio personarum sit per relationes; nullo modo debet quis ex proprio arbitrio excogitare, & multo minus asserere, quod sit per absoluta; Concilia enim, & SS. PP. unanimi consensu asseuerant distinctionem, & pluralitatem personarum esse ratione relationum, nullo vero modo ratione absolutorum. Primo enim Concilium Tolet. XI. loquendo de Personis Diuinis in confessione fidei, ait: *Hoc solum numerum insinuat, quod ad inuicem sunt, & in hoc numero carent, quod in se sunt.* Id est absoluta. Secundo Concilium Vornationense ait, *Patrem non ad se dici, sed ad Filium.* Tertio Concilium Florentinum in litteris vnionis definiuit: *Patrem generando, Filio dedisse omnia, quae sunt Patris, prater esse Patrem.* Ergo nihil absolutum est in Patre, quod non sit in Filio. Et Iess. 18. dicitur, quod *sola relatio multiplicat personas*. Præterea in Symbolis Apostolorum, Nicæno, & S. Athanasij non habemus nisi nomina relatiua. Idem sentiunt SS. PP. tam Latini, quam Græci; & Primo S. Pater lib. 5. de Trinitate planè docet, vt aduertit etiam Zumel loco citato Disput. 1. absoluta omnia esse, vnum, relatiua verò multa; quod aduertit etiam P. Ioan. Morandus Tract. 6. qui est de Sanctissima

Trinitate. quæst. 32. vbi in secunda Conclusionem ait Sanctum Patrem in cap. 5. dicti libri de Trinitate clarè docerè in Deo non esse nisi substantiam, & relationem; & quidquid ad se, non ad aliud dicitur, ad essentiam pertinere. & lib. 6. de Trinitate cap. 2. apud Zumel, ait, quod Pater, & Filius in omnibus absolutis conueniant; in solis autem relatiuis differant ab eodem etiam citari solent ex lib. 7. pariter de Trinitate cap. vltimum, & ex lib. 9. cap. 1. Clariora testimonia S. P. sunt tria. Primum ex lib. 5. de Trinitate cap. 2. vbi ait: *Quidquid autem ad se dicitur secundum substantiam dicitur &c. cum autem relatiuum negatur non secundum substantiam negatur, quia ipsum relatiuum non secundum substantiam dicitur.* Quod si Filius esset talis persona proprietate absoluta, iam diceretur Filius aliquid absolutum ad se, quod non diceretur Pater; & de Patre eodem modo; quare iam alter sine altero diceretur aliquid esse, quod esset absolutum. Secundum est ex lib. 7. cap. vltimo vbi illud Ioan. 10. *Ego, & Pater vnum sumus* ita explicat, vt vnum referat ad essentiam, *sumus* ad relationes. Tertium est ex lib. 9. cap. 1. vbi ait: *Credamus Patrem, Filium, & Spiritum Sanctum vnum esse Deum Creatorem vniuer-*

*se creatura, atque rectorem; neque Patrem esse Filium, neque spiritum Sanctum, vel Patrem esse, vel Filium, sed Trinitatem ad inuicem relatarum Personarum, & unitatem equalis essentie.* Cum S. P. sentiunt SS. Anselmus lib. de Processione Spiritus Sancti, Boetius Seuerinus lib. 1. de Trinitate cap. 12. Ex Græcis Nazianzenus Orat. 5. de Theologia. S. Cyrillus lib. 2. Thesauri cap. 3. & lib. 7. cap. 1. S. Ioan. Damascenus lib. 1. de Fide cap. 10. & 11. S. Basilii lib. 2. contra Eunomium. Et S. Greg. Nissenus ad Abelladium; & communiter alij PP. & DD.

Probatur verò ratione primo, quia omnis distinctio, quæ non est materialis, est secundum aliquam oppositionem; sed in Deo non habet locum distinctio materialis, aut alia oppositio, quam relatiua; ergo solum secundum relationem, & non secundum absoluta Personæ distinguuntur. Minor probatur quoad secundam partem, nam prima est omnino certa; quia in eo non habet locum oppositio contradictoria, aut priuatiua, in quibus alterum extremum est non esse; nec contraria, in qua alterum extremum est imperfectius; ergo solum relatiua; ergo &c.

Confirmatur quia vltimum con-

stitutiuum Personarum debet esse proprium vniuscuiusque personæ: sed nullum absolutum in Deo est proprium Personæ, quia in Diuinis omnia sunt communia, vbi non obuiat relationis oppositio: ergo nihil absolutum est constitutiuum Personarum in Deo.

Probatur 2. quia essentia Diuina propter suam infinitatem identificat sibi adæquatè omnem rationem, quæ non habet oppositionem cum alia; sed omne absolutum caret huiusmodi oppositione; ergo nullum absolutum est proprium vnius. Maior patet in omnibus attributis, ac etiam in spiratione actiua, quæ licet non identificetur adæquatè essentie Diuinæ, eo quod habet oppositionem cum processione; nihilominus, quia non opponitur nec paternitati, nec filiationi, vtrique identificatur; minor patet, quia absolutum non dicit ordinem ad aliud, siue vt ad terminum, siue vt ad correlatiuum.

Si dicas huiusmodi proprietates absolutas, non distingui se ipsas, sed per relationes, quæ illas consequuntur; quemadmodum de facto Pater, & Filius à Spiritu Sancto distinguuntur, non per suas proprietates relatiuas, quibus inter se opponuntur, sed per spirationem, quæ est relatio consequens.

quens. Contra est primo : quia Assertores huiusmodi proprietatum absolutarum supponunt personas non distingui per relationes, cum secundum ipsos supponantur extrema distincta antecedenter ad relationes ex natura rei. Secundo cum vnam personam distingui ab alia non sit aliud, quam vnam non esse aliam; hæc negatio necessario fundatur in ratione constitutiva Personæ; quia ex hoc, quod vtraque in suo esse constituitur, sequitur, ut vna non sit alia; ergo si constituitur proprietate absoluta, per illam præcisè, non verò per relationem sequentem distinguetur. Instantia de spiratione non est ad rem; nam, & si Pater, & Filius non opponantur Spiritui Sancto ut correlatiua, opponuntur tamen ei, ut terminus processionis est, qui non minus distinguitur à relatione opposita, quam correlatiuum. Denique si distinguerentur per proprietates absolutas, non verò per relationes, aut origines, possent esse plures personæ, quam tres; possent enim esse plures ingentæ.

Dico 2. Origines pertinere ad constitutionem Personarum, non tamen excludendo relationes, ut ponunt aliqui, qui hoc tenent, sed potius illas includendo. Antequam probetur hæc assertio: præ-

suppono primo originem in nobis dicere duo, motum scilicet, aut mutationem, & præterea relationem producentis ad productum; & cum in Deo non sit neque motus, neque mutatio, ideo originem in suo conceptu dicere solum relationem. Secundo aduerto hic non esse sermonem de origine actiua spirationis, quæ est coniuncta cum relatione spiratoris in Patre, & Filio, hæc enim, cum sit communis, non dicitur proprietas personalis, neque constitutiva Personæ, neque ut origo, neque ut relatio: ac proinde esse solum sermonem de tribus originibus, Generatione scilicet in Patre, Natiuitate in Filio, & Processione in Spiritu Sancto. Quibus positis.

Probatur conclusio primo. Quia idem est principium constitutivum, ac distinctivum Personarum; sed communiter SS. PP. docent origines esse principium distinctivum personarum; ergo sunt etiam principium constitutivum earumdem. Minor probatur Auctoritate S. P. qui lib. 7. de Trinitate cap. 6. ait: *In Deo Patre enim, & Deo Filio, si utriusque natura quaratur, uterque Deus, nec magis magnus alter altero Deus. Si autem origo Patris est Deus, de quo Filius Deus. Ecce quod distinctionem Filij à Patre agnoscit esse ratione originis;*

sic etiam lib. 5. de Trinitate cap. 6. ait: *Ideo quippe Filius, quia genitus, & quia Filius utique genitus: sicut autem Pater ad Filium, ita Genitor ad Genitum*: ubi idem non solum realiter (de hoc enim nulum erat dubium), sed etiam formaliter importatur in Diuinis per origines, ac per relationes modo dicto (excepta solum quadam leui diuersitate in modo nostro concipiendi, & significandi vocum, de qua infra). Idem docuerunt S. Ambrosius lib. 1. de Fide cap. 2. S. Ioan. Damasc. lib. 3. de Fide cap. 7. & S. Fulgentius lib. de Fide ad Petrum in fine. Idem sensit etiam Cardinalis Bessarion oratione habita in Concil. Florent. cap. 6. ubi ait: *Principalius distingui personam per relationes, consequenter per origines*.

Probatur 2. alia ratione; pro qua aduerto prius, quod origo, & relatio propria cuiusque personæ est idem ex natura rei actuali identitate, & sicut est per se subsistens suppositum, & personali proprietate, sic etiam origine; & sicut producit, aut producit origine actiua, aut passiua, sic etiam relatione; & sicut refertur, aut opponitur relatione, sic etiam origine; ita ut nihil conueniat personæ ratione vnus, quod non conueniat ratione alterius. Quapropter hæc

duo in re non differunt, neque actualiter, neque virtualiter, sed solum ex nostro modo concipiendi, & significandi vocum; quatenus eadem formalitas, quæ est origo, & à nobis non potest concipi prout est in se, sed concipitur per species personalitatis, originis, & relationis creatæ, modò apprehenditur per vnā speciem, modò per alteram, & sic formamus tres conceptus de illa Diuina formalitate, quorum neuter excludit alterum, sed vnus in alio implicite includitur. Quo prænotato, sic probò intentum. Conceptus relationis, & conceptus originis ita se habent, vt se mutuo essentialiter includant, & relatio de origine, & origo de relatione essentialiter prædicatur: ergo sicut de relationibus communiter dicitur vltimò constituere personas; ita & de originibus idem dicendum est. Quando enim aliqua prædicata ita se habent, vt se mutuo essentialiter includant, adeò vt ad inuicem essentialiter prædicentur, actus vnus est etiam alterius. Tota ergo diuersitas, quæ à nobis concipitur inter relationem, & originem, secundum rationem nostram est, quia origo consideratur vt via, quæ persona produciens tendit ad aliam produciendam, relatio verò concipitur vt forma, quæ iam in-

facto

facto esse persona producentis: re- fertur ad aliam producendam: & sic conceptus originis est pro- duci in via vnam personam ab alia: conceptus verò relationis, est pro- ductam iam esse in facto esse: quo- rum: uterque est relatiuus; nam: etiam in creatis actio, quæ forma- liter est id, quo agens in actu se- cundo, reducitur ad actum, de- formali dicit relationem; vt. dixi in Philosophia rationali, cap. de actione.

Probatur 3. quia relatio, & ori- go ita inter se comparantur, vt vna non sit prior altera, sed si- mul se habeant comparatione per- sonæ constitutæ, absque aliquo ordine; & cum aliunde origo ita sit propria personæ, in qua est, sicut est ipsa relatio, necesse est, quod sicut relatio pertinet ad constitutionem personæ, ita etiam pertineat origo. Nam in Diui- nis, vbi productiones sunt ater- næ, & absque vilo motu, aut mu- tatione non possumus neque re, neque ratione nostra distinguere omnino duas formalitates, origi- nis vnam, relationis alteram; ead- em omnino formalitas, qua vt in via intelligimus Personam ten- dere ad producendam Personam, est adeo perfecta, vt essentialiter sit forma, qua iam in facto esse refertur ad Personam productam, & è contra formalitas illa, qua

intelligimus personam in facto esse referri ad Personam produ- ctam, est essentialiter via ipsa, qua eadem persona tendit ad per- sonam producendam: hoc enim petit infinitas productionis ater- næ absque motu; & mutatio- nes.

Ex his facile solvuntur ea, quæ in contrarium opponuntur. Di- citurenim: origo actiua est actio; ergo supponit Personam prius constitutam; nam actiones sunt suppositorum: Origo autem pas- siua est via ad terminum, qui pro- ducitur; ergo debet præsupponi, & esse prior termino, qui consti- tuitur: ergo neutra potest consti- tuere personam. Præterea distin- ctio formalis aliquorum debet es- se per aliquid intrinsecum: atqui origo actiua, & passiua semper concipiuntur vt quid extrinsecum; actiua enim, vt progrediens à pro- ducente, passiua verò vt via ad terminum producendum: ergo formaliter per eas non possunt nec constitui, nec distingui personæ; esto casualiter sint tanquam viæ ad distinctionem; & sic in sensu causali possit dici eas distingui per origines; quatenus scilicet origo passiua terminatur ad aliquid in- trinsecum personæ, per quod for- maliter constituitur, & distingui- tur. Et hoc modo eludunt aduer- sarij argumenta in contrarium.

tum

tum ex auctoritate ; tum ex ratione desumpta .

Verum iuxta prædicta principia Resp. non solum causaliter ; sed etiam formaliter Personas constitui per origines ; & rationes illas procedere quidem in rebus creatis , in quibus actio est accidens ; non verò ubi est substantia , & in suo conceptu formali dicit , & inuoluit rationem relationis substantialis , formaliter constituentis personam , ut est in Diuinis ; in quibus solum secundum nostrum . imperfectum modum concipiendi , desumptum ex rebus creatis ; & corruptibilibus , ea concipiuntur cum imperfectionibus , quas habent in inferioribus ; cum tamen , rectè philosophando de Diuinis , debeamus illas excludere , quibus exclusis , nec remanebit conceptus actionis præsupponentis Personam constitutam , quia hoc est proprium actionum , quæ sunt accidentia , non earum , quæ sunt substantia , nec remanebit conceptus viæ contradistinctæ , & præsuppositæ ad terminum producendum , eo quod hoc conueniat solum illis actionibus , quæ sunt coniunctæ cum motu , vel mutatione aliqua , quales non sunt Diuinæ origines ; Ac proinde non debent , nec possunt concipi , ut quid extrinsecum personis ; sed sunt formaliter relationes substan-

tiales ; constituentes personas : quæ explicantur à nobis per nomina actionum , propter inopiam vocabulorum ; cum tamen in re non solum identicè , sed etiam formaliter , vel implicite , vel explicite , vnaquæque earum in conceptu alterius inuoluatur , & importetur . Plura alia de hoc puncto habes apud Casp. Disput. 4. de Trinitate sect. 3.

Dico 3. personas Diuinas distinguui formaliter per relationes , quæ licet sufficienter maneat probata ex dictis , maximè in prima Conclusionem ; nihilominus , ad vberiore claritatem , & doctrinam , eam sic explico , & probō . Non distinguuntur personæ per aliquid absolutum , nam in Diuinis omnia absoluta sunt communia ; ergo per relatiua , quia ut notauit S.P.N. lib. 5. de Trinitate Cap. 5. & 6. est tantum substantia , & relatio , quæ sæpè nomine originis significatur . Substantia est communis : ergo per relationes est habenda distinctio . Præterea distinctiuum vnius Personæ ab alia habetur formaliter , per quod formaliter habet esse incommunicabile ; sed hoc habetur à relatione , quæ propter oppositionem , quam includit , facit ut vnum relatiuum non possit esse idem cum suo termino , & correlatiuo ; ergo &c.

Dico

Dico 4. Diuinas personas constitui per relationes. Hæc conclusio, licet non habeatur ita expressè in Concilijs, & SS. PP. est tamen ita connexa cum præcedenti, vt, illa admissa, necessariò videatur etiam ista admittenda; iuxta illud principium: Per ea res distinguuntur, per quæ in suo esse constituuntur; vt propterea in Concilio Florentino sess. 19. Ioan. Eximius Latinorum Theologus dixerit: Personam ex substantia, & proprietate consistere, & quamquam hæc sola ratione differant, tamen substantiam communicari, proprietatem esse incommunicabilem; quod autem sit incommunicabilis prouenire ex natura relationis. Idem docent omnes alij Theologi, qui ponunt personas relationibus distinguere; & probant ratione, vltra prædictam; quia negatio vnius de alio debet fundari in aliquo positiuo; sed hoc positiuum in Diuinis non potest esse essentia, quæ est communis; ergo debet esse proprietas, quæ solum est relatiua. Denique illud est constitutiuum personæ, per quod res constituta formaliter habet esse subsistens incommunicabile; sed hoc habet formaliter per relationem vt sic in quacumque sententia, siue dicatur eam ferre secum, siue dicatur eam modificare: ergo &c.

Opponitur communiter contra hanc assertionem, quod paternitas vt sic supponit generationem tanquam rationem fundandam; nam idè persona est Pater, quia genuit; sed generatio præsupponit personam constitutam, cum generare sit suppositi; ergo persona constituitur per aliquid prius, non solum relatione, sed etiam origine. Hoc argumentum aliqui ita magni faciunt, vt difficilimum, & insolubile putent, quantumuis sit contra conclusionem certissimam. Proponitur autem specialiter de paternitate; quia licet generare, & esse genitum sit prius quam esse Filium, & spirari quam esse Spiritum Sanctum; nihilominus, cum origines passiuæ concipiantur per modum viæ ad suos terminos, non est opus præintelligere terminos constitutos per aliam rationem priorem origine; vt est in paternitate, cuius ratio fundandi concipitur per modum actionis progredientis à Persona.

Diuerfas huic difficultati exco-  
gitauerunt DD. solutiones. Durandus enim in 1. distinct. 36. quæst. 1. num. 17. respondet fundamentum relationis non esse originem, cum potius origo sit ipsamet relatio, & id à quo aliud, & quod ab alio; & eos, qui concipiunt origines esse fundamentum, malè  
in-

tum ex auctoritate, tum ex ratione desumpta.

Verum iuxta prædicta principia Resp. non solum causaliter; sed etiam formaliter Personas constitui per origines; & rationes illas procedere quidem in rebus creatis, in quibus actio est accidens; non verò ubi est substantia, & in suo conceptu formali dicit, & inuoluit rationem relationis substantialis, formaliter constituentis personam, ut est in Diuinis; in quibus solum secundum nostrum imperfectum modum concipiendi, desumptum ex rebus creatis, & corruptibilibus, ea concipiuntur cum imperfectionibus, quas habent in inferioribus; cum tamen, rectè philosophando de Diuinis, debeamus illas excludere, quibus exclusis, nec remanebit conceptus actionis præsupponentis Personam constitutam, quia hoc est proprium actionum, quæ sunt accidentia, non earum, quæ sunt substantia, nec remanebit conceptus viæ contradistinctæ, & præsuppositæ ad terminum producendum, eo quod hoc conueniat solum illis actionibus, quæ sunt coniunctæ cum motu, vel mutatione aliqua, quales non sunt Diuinæ origines; Ac proinde non debent, nec possunt concipi, ut quid extrinsecum personis; sed sunt formaliter relationes substan-

tiales, constituentes personas: quæ explicantur à nobis per nomina actionum, propter inopiam vocabulorum; cum tamen in re non solum identicè, sed etiam formaliter, vel implicite, vel explicitè, vnaquæque earum in conceptu alterius inuoluatur, & importetur. Plura alia de hoc puncto habes apud Casp. Disput. 4. de Trinitate sect. 3.

Dico 3. personas Diuinas distinguui formaliter per relationes, quæ licet sufficienter maneat probata ex dictis, maximè in prima Conclusionem; nihilominus, ad vberiore claritatem, & doctrinam, eam sic explico, & probō. Non distinguuntur personæ per aliquid absolutum, nam in Diuinis omnia absoluta sunt communia; ergo per relatiua, quia ut notauit S.P.N. lib. 5. de Trinitate Cap. 5. & 6. est tantum substantia, & relatio, quæ sæpè nomine originis significatur. Substantia est communis: ergo per relationes est habenda distinctio. Præterea distinctiuum vnius Personæ ab alia habetur formaliter, per quod formaliter habet esse incommunicabile; sed hoc habetur à relatione, quæ propter oppositionem, quam includit, facit ut vnum relatiuum non possit esse idem cum suo termino, & correlatiuo; ergo &c.

Dico



Dico 4. Diuinas personas constitui per relationes. Hæc conclusio, licet non habeatur ita expressè in Concilijs, & SS. PP. est tamen ita connexa cum præcedenti, vt, illa admissa, accessariò videatur etiam ista admittenda; iuxta illud principium: Per ea res distinguuntur, per quæ in suo esse constituuntur; vt propterea in Concilio Florentino sess. 19. Ioan. Eximius Latinorum Theologus dixerit: Personam ex substantia, & proprietate consistere, & quamquam hæc sola ratione differant, tamen substantiam communicari, proprietatem esse incommunicabilem; quod autem sit incommunicabilis prouenire ex natura relationis. Idem docent omnes alij Theologi, qui ponunt personas relationibus distinguere; & probant ratione, vltra prædictam; quia negatio vnius de alio debet fundari in aliquo positiuo; sed hoc positiuum in Diuinis non potest esse essentia, quæ est communis; ergo debet esse proprietas, quæ solum est relatiua. Denique illud est constitutiuum personæ, per quod res constituta formaliter habet esse subsistens incommunicabile; sed hoc habet formaliter per relationem vt sic in quacunque sententia, siue dicatur eam ferre secum, siue dicatur eam modificare: ergo &c.

Opponitur communiter contra hanc assertionem, quod paternitas vt sic supponit generationem tanquam rationem fundandi; nam idè persona est Pater, quia genuit; sed generatio præsupponit personam constitutam, cum generare sit suppositi; ergo persona constituitur per aliquid prius, non solum relatione, sed etiam origine. Hoc argumentum aliqui ita magni faciunt, vt difficillimum, & insolubile putent, quantumvis sit contra conclusionem certissimam. Proponitur autem specialiter de paternitate; quia licet generare, & esse genitum sit prius quam esse Filium, & spirari quam esse Spiritum Sanctum; nihilominus, cum origines passiuæ concipiantur per modum viæ ad suos terminos, non est opus præintelligere terminos constitutos per aliam rationem priorem origine; vt est in paternitate, cuius ratio fundandi concipitur per modum actionis progredientis à Persona.

Diuerfas huic difficultati exco-  
gitauerunt DD. solutiones. Durandus enim in 1. distinct. 36. quæst. 1. num. 17. respondet fundamentum relationis non esse originem, cum potius origo sit ipsamet relatio, & id à quo aliud, & quod ab alio; & eos, qui concipiunt origines esse fundamentum, malè in-

intelligere; & nullum saltem dari fundamentum, quam essentiam fecundam. Contra hanc responsionem stat primo, quod si fundamentum dicitur id, cui immediate inest relatio, est certum id non esse originem; sed hoc modo nec etiam potest dici, quod sit essentia fecunda; nam hæc sic accepta non est aliud, quam essentia ut est potentia generatiua; sed ut sit potentia generatiua debet esse modificata proprietate personali: essentia enim ut sic nec generat, nec generatur, quam etiam ipse Durandus vult esse relationem; ergo non potest ipsa essentia se sola esse fundamentum, nisi remotissimum, præter quod est assignandum proximum, quod debet præsupponi origini, & relationi. Si verò per fundamentum intelligat id, quod communiter dicitur ratio fundandi; nam communiter dicitur, ipsum generare esse fundamentum paternitatis; & præterquam quod sibi contradiceret, adhuc difficultas maneret insoluita, nam adhuc quærendum maneret, per quid constituatur persona, quæ debet præsupponi origini, & relationi; eo quod, ut habet principium illud metaphysicum: Actiones sunt suppositorum. In hoc loco videtur in-  
Caetanus in Comment. artic. 4. quæst. 4. 1. par. Resp. Rela-

tionem paternitatis posse considerari dupliciter, primo ut conceptam, secundo ut exercitam; & hoc secundo modo, quatenus scilicet exercet officium relationis, quod est referre ad aliud, non constituere personam Patris, ut argumentum conuincit et primo autem modo, id est quatenus expressè concipitur ut relatio, non tamen ut exercens munus referendi, constituere. Paulo aliter respondet Canariensis; qui ait posse considerari relationem dupliciter, primo ut est forma relatiui sicut in absolutis albedo est forma albi; secundo ut refert vnum ad alterum; & primo modo constituere, non verò secundo; & hoc confirmare nititur auctoritate S. Thom. loco citato ubi ait: relationem, ut relatio est, præsupponere actum notionalem; & ut est constitutiua Personæ præsupponi actui. Contra has subtilitates stat primo, quod vel relatio potest apprehendi velut in concreto, id est ut efficiens aliquod extremum, vel in abstracto, & arbitrariè, si dicatur hoc secundum, non constituet personam, ut patet; si primum, ergo concipitur ut exercens suum munus, quod nihil est aliud, quam referre, quemadmodum enim non potest concipi albedo in subiecto, quin concipiatur ut exercens suum mu-

mu-

munus, quod est facere album; ita non potest concipi relatio in suo subiecto, quin concipiatur illud referre, cum totum suum esse sit ad aliud se habere. Obstat secundo quod vel in illo priori, quando consideratur ut concepta, vel consideratur in ordine ad terminum, vel non; si dicatur hoc secundum, iam non consideratur ut relatio, sed ut forma absoluta; si primum, ergo concipitur ut exercita, & ut referens ad aliud.

Recentiores aliquot, ut euaderent difficultatem, in suis manuscriptis docuerunt per relationem, ut est forma hypostatica, constitui personam in communi, quæ possit concipi prius, quam persona determinata, ac singularis; ac proinde eo priori modo, præsupponi origini, & relationi. Verum hic modus philosophandi est contra communem sensum DD. & contra rationem; communiter enim tenetur cum S. Thom. Personam constitui per formam hypostaticam, quæ sit principium generationis, qualis non esset persona in communi, ut abstrahit à persona relativa, & absoluta; præterea à parte rei non datur persona in communi; nam quæcumque constituitur, necessario est singularis, & hæc numerò; talis enim requiritur ad generandum, & persona in commu-

ni non generat.

Vna ex melioribus solutionibus censetur illa Capreoli in 1. distinct. 36. quæst. 1. artic. 3. & nostri Ferrariensis lib. 4. contra Gentes cap. 6. qui respondent relationem dupliciter posse considerari: primo, ut relatio est sub proprio conceptu, & sic dicunt distinguere personas. Secundo, ut est forma hypostatica, & hoc modo dicunt esse constitutum earum. Et hoc videtur esse de mente S. Thom. in artic. 4. supracitato, ubi vult paternitatem sub ratione formæ hypostaticæ constituere personam nostro modo intelligendi, priusquam constituat Patrem, & ipsum referat ad Filium, & illum ab isto distinguat. Constat enim ex vna parte per Concilia, & SS. PP. ut supra visum est, in Diuinis solum reperiri substantiam, & relationes, & ex alia parte videtur dicendum esse relationem paternitatis ut sic, sub proprio conceptu, vel præsupponere, vel inuoluere in suo conceptu essentiali generationem, ut dictum est, quæ est à persona potente generare. Hæc autem duo non videntur aliter posse coherere, quam diuersimodè sumendo relationem; ita ut sub vna ratione sit prior se ipsa sub alia ratione.

Altera responsio satis sufficiens, & eneruans vim argumenti, mihi

T vide-

videtur illa quorundam recentiorum: qui dicunt aliter esse philosophandum in Diuinis, ac in creatis: quando ratio id conuincit, vt in præsenti. In creatis enim, cum persona constituatur in suo esse per absolutum, non per relationem, necessario ipsi relationi debet præintelligi persona constituta, sicut etiam debet præsupponi generatio; nisi dicatur cum sententia, quam ego sequor, ipsam generationem esse essentialiter relationem. In Diuinis verò, cum persona constituatur per relationem, quæ est substantialis, non verò accidentalis, vt est in nobis, non debet, imò non potest concipi persona, sine relatione, & origine, quæ inuoluuntur essentialiter in conceptu illius, vt supra explicatum est, & à relatione solum distinguuntur in modo significandi. Nec eneruat vim huius solutionis id, quod opponunt aliqui Neoterici, nempe quod sicut paternitas creata fundatur in generatione actiua, sic etiam debet fundari Diuina, quæ conuenit analogicè cum creata; ac proinde debet ipsam præsupponere vt rationem fundandi, nostro concipiendi modo priorem; eo quod, tam in humanis, quam in Diuinis verum est dicere persona est Pater, quia generat. Non officit inquam, quia ideò Paternitas dici-

tur analogicè de Diuina, & creata, quia ratio importata per nomen paternitatis non est eadem, & sicut differunt in ratione essendi, quia vna substantialis, accidentalis altera; ita differunt in ratione requirendi subiectum; accidentalis enim ideò prærequirit subiectum præcedens, quia de essentia accidentis est esse in subiecto, substantialis verò, eo quod substantialis, non prærequirit in re, licet in nostro modo significandi videatur prærequirere, quia per voces, & conceptus, desumptos ab istis inferioribus, & accidentalibus, nitimur illa inuisibilia, suprema, & supersubstantialia explicare, nostræ inopiæ gratia; Ad illam causalem Resp. necessario diuersimodè esse accipendam in creatis, ac in Diuinis; in creatis enim datur vera, & physica ratio causæ generationis, quæ est actio transiens, eo modo, quo explicari in physicis; in Diuinis autem non est sic; nam Pater, licet sit principium Filij, non tamen est causa illius, vt tenet Ecclesia Latina, & generatio, vt est in Patre, est idem formaliter cum illo; ac proinde illa causalis ibi est accipienda formaliter, eo modo, quo accipitur illa: ideò Petrus est homo, quia est animal rationale: non verò causaliter causalitate propriè dicta, & in hoc sen-

su communiter accipitur id, quod habet S.P. lib. 5. de Trinit. c. 6. *Ideo Filius, quia genitus, & quia Filius, utique genitus; sicut autem Pater ad Filium, ita Genitor ad Genitum.*

Dices 1. cum Gregorio Ariminen. Persona Diuina est omnino simplex; sed in re simplici constituens non potest esse aliud à constituto; ergo constituitur se ipsa, & non per proprietates absolutas, aut relatiuas. Probatur minor, quia vel illud aliud habet esse tantum per intellectum, vel à parte rei; non primum, quia iam non esset verè, & realiter constitutum; ad realem enim constitutionem requiruntur constituentia realia, ut patet; nec secundum, quia iam faceret compositionem cum alio, & tolleretur Diuina simplicitas: ergo nullo modo datur ibi constituens & constitutum. Confirmatur, quia proprietas personalis non est magis simplex, quam persona; sed illa quia simplex non constituitur per aliud; ergo nec ista.

Occasione huius argumenti orta est difficultas inter DD. an constitutio Diuinarum personarum sit realis, vel rationis. In qua Zumel, & cum eo plures recentiores docent constitutionem Diuinarum personarum quoad rem significatam esse realem, sed quoad modum, quo à nobis concipitur, non esse à parte rei; nam Diuinæ per-

sonæ habent à parte rei, independentè à nostris conceptibus, quid quid est necessarium, ut à parte rei sint constitutæ; habent enim primo naturam communem, deinde singulæ habent reipsa proprietatem identificatam, per quam realiter distinguuntur; sed nihil aliud requiritur ad constitutionem ergo &c. Negant verò modum esse à parte rei, eo quod nos concipimus proprietatem constituentem, ut distinctam à constituto, quæ verè non est distincta realiter. Et quidem constitutionem, modo dicto, esse à parte rei suaderi potest ulterius, & auctoritate, & ratione. Auctoritate quidem, nam in Concilio Florentino supra relato habetur: Personas Diuinas constare essentia, & proprietate, quod simpliciter dici non posset, si constitutio non esset à parte rei. Præterea in Concilio Lateranensi Cap. *Firmiter*: Personæ dicuntur discretæ proprietatibus; sed sunt discretæ à parte rei; & esse discretas à parte rei supponit eas esse constitutas; nam prius est personam constitui proprietate, quam per illam distinguui; ex eo enim, quod constituitur in esse personæ, sequitur negatio identitatis cum alia; ergo &c. Probatur etiam ratione, quia si paternitas esset à parte rei distincta realiter ab essentia, constitueret

perſonam, & eam diſtingueret; ergo multo melius conſtituit identifi-  
cata cum eſſentia; nam identitas  
facit, vt perfectius eſſentia deter-  
minetur proprietate.

Suarez Tract. 1. par. lib. 7. de Tri-  
nitate cap. 3. & cum eo Caſpenſis  
diſtinct. 4. de Trinitate ſect. 4. &  
alii docent Perſonas Diuinas ex  
natura rei conſtitui proprietati-  
bus conſtitutione virtuali. Cum  
enim in omni conſtitutione ſit ne-  
ceſſaria aliqua diſtinctio extremo-  
rum conſtituentium, & qualis eſt  
illa diſtinctio, talis ſit conſtitutio.  
Ponunt conſtitutionem in tota  
ſua latitudine triplicem eſſe. Pri-  
mam realem actualem, in qua  
quod realiter conſtituit eſt quidem  
aliquid realiter, & intrinſecum  
eſſentialiter conſtituti, ſed non  
ipſum totum conſtitutum, ſed ali-  
quid eius, & pars eſſentialis illius.  
Secundam virtualem, in qua vir-  
tualiter conſtituens eſt aliquid in-  
trinſecum conſtituti, cum tamen  
actualiter non ſit pars, ſed totum  
ipſum conſtitutum. Tertiam ap-  
pellant rationis, in qua conſtituens  
eſt aliquid conſtituti per rationem  
non verò totum ipſum conſtitu-  
tum, quia concipitur vt aliquid  
illius quidditatum, & non to-  
tum ipſum. Quo poſito. Primam  
conſtitutionem excludunt à Perſo-  
na Diuina, quia nihil habet, vt  
partem actualem. Secundam ve-

rò admittunt, quia ad huiusmodi  
conſtitutionem virtualem, eſſe rea-  
lem, non eſt neceſſaria actualis di-  
ſtinctio inter ea, quæ ad conſtitu-  
tionem concurrunt, ſed ſatis eſt  
quod in re conſtituta vt ſic verè  
ſit aliqua entitas communis, &  
aliqua propria, cum diſtinctio-  
ne virtuali inter commune, &  
proprium; hoc namque ſufficit,  
vt illa perſona habeat ſuum eſſe  
perſonale, & incommunicabile  
ex eo, quod eſt ſibi proprium, &  
non ex eo, quod eſt ſibi commu-  
ne cum alijs. Plura alia de hoc  
puncto acutè explicant ibi prædi-  
cti Auctores.

Caictanus in Comment. artic. 2.  
quæſt. 40. 1. par. & Ferrarienſis  
lib. 4. contra Gentes cap. 56. con-  
ſtitutionem hanc docent non da-  
ri à parte rei, niſi fundamentali-  
ter, vt indicaui ſupra in relatione  
ſecundæ ſententiæ, & conuenire  
perſonis non ſecundum ſe, ſed  
prout à nobis concipitur; eo quod  
conſtitutio non ſolum quoad mo-  
dum, quo à nobis concipitur,  
ſed etiam ſecundum ſe, & ex ſua  
intrinſeca ratione includit diſtin-  
ctionem actualem conſtituentis, &  
conſtituti; nam dicit rem conſtan-  
tem ex pluribus, quæ plura ſine  
diſtinctione eſſe non poſſunt; &  
cum ante operationem intellectus  
nulla ſit inter eſſentiam, & rela-  
tionem actualis diſtinctio, nec  
etiam

etiam erit illa constitutio, nisi fundamentaliter.

Vnaquæque ex his explicationibus est celebris in scholis, & cum sit difficultas magis de voce, quam de re, tutò vnaquæque amplecti potest; dummodo non admittatur compositio simpliciter dicta, quæ stare non potest cum Divina simplicitate, & absolutè prolata, idest sine addito, communiter sumitur pro reali, quæ essentialiter requirit partes realiter distinctas; quod non habet locum in Divinis: non sic est de constitutione, hæc enim abstrahit à reali actuali, virtuali, seu fundamentalis, & rationis.

Tertiam ego sequor, ut notavi in prima præmissa. Et ea posita ad Argumentum Ariminen. Resp. utramque rationem obiectivam constituentem habere esse independentem ab intellectu; sed non habere distinctionem realem, siue actualem ex natura rei, qualis habetur inter extrema constituentia composita physica in creatis: nam sic esset compositio vera, & realis, quæ Divinæ simplicitati repugnat; sed solum fundamentalem, seu virtualementem, cum qua optimè cohæret constitutio, quæ non est compositio simpliciter dicta, seu realis. Ad Confirmationem Resp. concessa majori, negando causalem minoris; non

enim dicimus idèò proprietatem non constitui aliquo ab ea distincto, quia simplex est; sed quia in abstracto, & per modum formæ significatur, nec constat formalitatibus virtualiter, seu fundamentaliter distinctis; quapropter cum persona v. g. Pater per modum totius, & concreti significetur, & constet ex natura; & Paternitate, quæ virtualiter distinguuntur, iam per aliqua inter se virtualiter distincta constituitur. Vel si magis placet, dic Argumentum probare quidem secundum rem non magis constitui personam, quam proprietatem; non verò secundum rationem; nam hoc modo persona dicitur constitui, quia concipitur ut includens aliquid commune, & aliquid proprium; non sic proprietates ratione diversis modi concipiendi eam. Ratio diversitatis est, quia persona concipitur, & significatur eo modo, quo concipiuntur concreta, proprietas verò eo modo, quo concipiuntur abstracta; quo pacto in sententia Thomistarum, homo per intellectum componitur ex animalitate, & rationalitate; ita tamen ut ipsa rationalitas, nec ipsum rationale, ut contradistinctum ab animali, constituitur, aut componatur amplius ex animali; quemadmodum enim in constitutione reali deveni-

tur

tur ad aliqua primo constituenta, quæ non constituuntur per aliud, sic etiam in constitutione per intellectum.

Dices 2. cum eodem. Idem non potest constituere se ipsū; sed quidquid est in personis Diuinis realiter cum illis identificatur; ergo nulla potest dari proprietas in personis Diuinis, per quam constituantur, & distinguantur; sed se ipsis immediate constitui, & distingui debent. Resp. distinguendo maiorem: idem omni modo identitatis, concedo: idem cum distinctione virtuali, & rationis ratiocinatæ, nego maiorem; sic etiam distinguitur minor, & negatur consequentia. Duplex enim datur rerum constitutio, vna compositionis, altera simplicitatis, id est, quæ compatitur secum simplicitatem. Exemplum primæ sit in homine, qui physicè constituitur ex anima, & corpore, & metaphysicè ex genere, & differentia. Exemplum secundæ in compositionibus metaphysicis, quæ etiam in entibus spiritualibus, quantumvis simplicibus reperiuntur, & passim admittuntur, non solum in creatis, sed etiam in Deo; non solum in Personis, sed etiam in natura Diuina, in qua constitutionem ex essentia, & attributis passim concedimus.

Dices 3. Constitutum dependet, & causatur à constituyente; sed Personæ Diuinæ non possunt

ab illo dependere, vel causari; ergo nec constitui. Resp. nihil vitare in Diuinis dari aliquid ratione nostra posterius, & in sui conceptione dependens ab alio, propter nostrum imperfectum concipiendi modum; vitandum tamen est nomen effectus, quod imperfectionem, ac dependentiam inferioritatis, quæ Deo conuenire non potest, importat. Pro qua aduerte, quod dependere, & causari stat dupliciter; primo pro dependentia, & causalitate reali, & formali. Secundo pro dependentia, aut causalitate virtuali: prima omnino excluditur à quibuscunque prædicatis Diuinis, tam communibus, quam personalibus; secunda verò solum excluditur à conceptu essentiae, seu naturæ Diuinæ, prout ab attributis contradistinctæ: cum enim illa sit prima radix omnium perfectionum, quæ sunt in ipso Deo, nec realiter formaliter, nec realiter virtualiter, nec formaliter per rationem potest aliquam perfectionem præsupponere, & consequenter non potest illo ex his modis causari, aut concipi causata. Aliæ verò perfectiones, sicut illam virtualiter, seu fundamentaliter aut radicaliter supponunt, & virtualiter ab illa dimanant, sic virtualiter dicuntur causari: nam licet verbum dependere, & causari videan.



deantur denotare imperfectionem; hæc tamen omnino tollitur, addito ly *virtualiter*, aut *formaliter per rationem*. Et cum his additionis passim à pluribus Theologis conceditur, & nouissimè à Gonet Disput. 11. de Trinitate artic. 1. Attributa dependere, & causari à natura Diuina, & Patrem à Paternitate, seu personalitate, per quam constituitur; sicut enim ly virtuale additum distinctioni excludit omnem imperfectionem, quam distinctio realis in prædicatis communibus posset, absolute prolata, indicare, seu arguere; ita etiam additum causalitatis, & dependentiæ,

Dices 4. Nec à Sancto Patre Nostro Augustino, nec à S. Hieronymo, nec ab ullo alio S. P. haberi, quod Personæ Diuinæ per aliquid constituentur; ergo gratis à nobis fingitur talis constitutio. Resp. dici quidem posse cum PP. personas se ipsis distingui; sed simul cum illis iam supra relatis admittendas esse proprietates, quibus distinguantur; alias nulla esset ratio distinguendi. Et cum in Concilio Florentino fuerit dictum Personas constare essentia, & proprietate, quod est idem ac constitui, nullo prorsus ex PP. reclamante; sed toto Concilio approbante; iam habetur sufficiens fundamentum ponendi huiusmodi

constitutionem, & distinctionem, per proprietates.

Antequam proponam argumenta aliorum circa hanc sententiam, vt à nostro Gregorio Ariminensi traditam, & explicatam: Aduerto eum non negare absolute, & omnino quascumque proprietates in Personis Diuinis: nam in loco citato, idest in 1. quæst. 1. ad distinct. 26. & 27. vt aduertit Vasquez Disput. 158. in primam partem cap. 1. distinxit proprietates, & docuit posse accipi primo pro ipsis Personis, quo sensu eas accepisse videtur etiam S. Hieronymus in Expositione fidei ad Damasum, vbi ait: *Non enim nomina tantummodo, sed etiam nomina proprietates, idest personas, vel, ut Græci exprimunt, hypostases, idest substantias consistemus.* Et hoc modo admittit Ariminensis in Deo esse proprietates, quia in Deo sunt personæ; & personas proprietatibus distingui, quia se ipsis distinguuntur; sed non constitui, quia nihil se ipso constituitur. Secundo docuit posse accipi proprietatem pro ratione aliqua ipsius personæ: & hoc adhuc dupliciter, idest vel pro ratione aliqua incomplexè significata, quæ sit in personis per modum formæ ante operationem intellectus, vt dicit esse Paternitas, & hoc pacto negat in Deo esse proprietates; ac pro-

propterea negat etiam hoc modo proprietatibus constitui, aut distinguere personas; aut pro aliquo complexè significato, ut quod Pater genuerit, quod Filius genitus sit; quod complexum in ratione, complexi nihil sit ante operationem intellectus. Et hoc modo concedit Gregorius in Deo proprietates, quibus solum distinguantur personæ, non verò constituentur. Ex qua doctrina, ab ipso tradita, & à Vasquez relata, patet eum solum refugisse constitutionem aduersantem simplicitati Diuinæ, idest compositionem, physicam veram, & realem, non verò constitutionem rationis, quam illud complexum importat. Quæ doctrina quoad illam ultimam partem, qua docet Personas Diuinas nullo alio ex natura rei distincto constitui, approbatur à Canariensi, & ab ipso Vasquez loco citato cap. 2. num. 8. solum displicet Vasquez, quod dicatur Personas nullo modo constitui; cum ceteri omnes Scholastici planè fateantur personas aliquo constitui, & distinguere, cum Ioanne Theologo Ecclesiæ Latinæ in Concilio Florentino, ut supra dictum est. Quod licet Gregorius asseruerit quoad sonum verborum, eo quod apud ipsum idem erat constitui, ac physicè, & realiter componi; reuera tamen ad-

misit constitui solum per intellectum; sicut species dicuntur constare genere, & differentia, & ipsis constitui, ut patet ex illo complexo, quod ipse admittit. Quam etiam sententiam in hoc sensu docuerat ante ipsum S. Thom. in 1. distinct. 26. quæst. 2. artic. 1. & postea Caietanus in Commentarijs artic. 2. quæst. 40. 1. par. & noster Ferrariensis lib. 4. contra Gentes cap. 26. & cum illis plurimi Thomistarum. Quapropter omninò immeritò notatur sententia Gregorij à quibusdam Neotericis hæresis, vel erroris, aut temeritatis, cum in sensu ipsius Gregorij explicata habeat eundem sensum, quem habet sententia Thomistarum: & certè si sententia Gregorij mereretur censuram, eam proferretur etiam mererentur omnes, qui negant distinctionem virtuales, intrinsecam inter Diuinam essentiam, & personalitates, ut eam negat acutè, & eruditè Petrus Hurtado de Mendoza Disput. sexta Metaph. sect. 4. subsect. 8. cuius doctrinam postea secuti sunt plures eruditi prælectores Societatis Iesu; eamque publicè Romæ propugnarunt; nemine censuris prædictis eam notando; imò censoribus fidei eam approbantibus. Quæ doctrina stante, certum est constitutionem non posse esse à parte rei, nisi solum fundamentaliter; quam

quam non placuit Gregorio appellare constitutionem, admit-  
tendo tamen complexum per in-  
tellectum, quod est idem ac con-  
stitutio per rationem nostram :  
per quod in nullo (quoad rem)  
discrepat à sententia Thomista-  
rum ; licet in voce videatur diuer-  
sitas. Verum cum de re constet,  
de voce non est curandum, ut  
sæpius notavi cum S. P. N. His  
prænotatis ad aliarum sententia-  
rum argumenta soluenda venio.

Dices 5. pro sententia Ioannis  
de Ripis, cum Scoto eam defen-  
dente. Prouerb. cap. 30. de Sa-  
pientia increata dicitur: *Quod no-  
men est eius, & quod nomen Filij  
eius scisti?* Ex quo loco sic ar-  
guit Doctor Subtilis: Salomon  
vocat secundam Personam Filium,  
& hoc supposito, quærit quod sit  
nomen eius; censet ergo habere  
aliud nomen, quam Filium; hoc  
nomen Filij est relatiuum; ergo  
illud aliud, de quo quærit, est  
absolutum, & hoc idem conse-  
quenter erit dicendum de Patre.  
Resp. communiter per nomen eius  
ibi intelligi essentiam, sicut alias  
in Scriptura fieri solet. Ut cum  
Moyſes interrogauit Dominum, ut  
habetur Exodi cap. 3. *Si dixerit  
mihi, quod est nomen eius? quid di-  
cam eis. Dixit Deus ad Moyſen:  
ego sum qui sum.* Supposito igitur  
nomine Filij, quod Verbo Diuino

tribuimus per analogiam ad crea-  
turas, quærit Sapiens quænam sit  
natura, seu essentia ipsius Filij, &  
ex modo loquendi insinuat esse  
inuestigabilem; Posset etiam di-  
ci supposito hoc nomine Filij,  
quod significat Verbum Diuinum  
abstractiue, Sapientem quærere,  
quod nam sit nomen representans  
eum, sicuti est.

Dices 6. pro eadem: Quælibet  
relatio supponit aliquod extre-  
mum, quod referat, quod in se  
sit aliquod absolutum, ut indu-  
ctione patet; sed hoc in Diuinis  
non potest esse essentia Diuina;  
nam hæc est identificata cum ter-  
mino; & id quod refertur debet  
esse aliquid distinctum realiter ab  
ipso termino; ergo erit ipsa per-  
sona, ut in se constituta per ali-  
quid absolutum. Resp. maiorem  
esse veram in creatis, nam rela-  
tio creata, cum sit accidens, sup-  
ponit aliquod subiectum, quod  
referat; falsa verò in Diuinis,  
quia, cum sint formæ hypostati-  
cæ, non supponunt extrema, sed  
constituunt; nec supponunt distin-  
cta, sed distinguunt; quapropter  
licet in creatis id, quod denomina-  
tiue est Pater, prius sit, quam id,  
quod est formaliter Pater; in Di-  
uinis tamen eadem res denomina-  
tur Pater, quæ Paternitate consti-  
tuitur.

Oppones: data hac doctrina

ipsa essentia esset denominanda, relata, quod est contra communem sensum Theologorum. Probatur hæc sequela, nam relatio aduenit essentia, tamquam forma subiecto; sed omnis forma denominat proprium subiectum; ergo & ipsa relatio debet denominare essentiam relata. Resp. cum S. Thom. quæst. 8. de verit. relationem de essentia dici, non per modum informationis, sed per modum identitatis, ratione cuius, licet non dicamus essentia generat, essentia est relata, dicimus tamen, in sensu identico, quod ipsa est generatio, & est relatio; de nominibus verò essentialibus in concreto dicitur etiam per modum informationis, eo quod talia nomina inuoluunt suppositum, à quo ex modo significandi præscindunt nomina abstracta; nec est verum, vniuersaliter quamlibet formam tribuere subiecto talem denominationem; sed solum quando subiectum est capax; nam gratia sanctificans in lapide non denominat illum gratum, aut Sanctum; & gratia Christi Domini non denominat illum filium adoptiuum; & paternitas in creatis non denominat potentiam generatiuam, cui immediate inest, sed personam. Cum igitur relatio non sit, nisi inter extrema realiter distincta, & essentia Diuina sit eadem in omnibus

personis, ipsa non potest referri ut quod, ac proinde nec etiam denominari relata, licet possit dici habens relationes paternitatis, filiationis &c.

Dices 7. Persona Diuina constituitur per subsistentiam; sed subsistentia in Deo est quid absolutum, ergo persona in Diuinis constituitur per proprietatem absolutam; maior est certa; minor probatur ex S. P. N. Augustino, qui lib. 7. de Trinitate cap. 4. ait: Omnis res ad se ipsam subsistit, quanto magis Deus? sed quod est ad se, & non ad aliud, est absolutum; ergo subsistentia in Deo est quid absolutum. Similia habet S. Thom. quæst. 9. de Potentia artic. 5. ad 13. vbi dicit: Personas Diuinas habere ab essentia, quod subsistant; sed quod conuenit Personis ratione essentia est absolutum; ergo &c. Resp. distinguendo maiorem: Persona constituitur per subsistentiam, ut dicit perfectatatem independentia ab alio, ut sustentante, nego maiorem; ut dicit perfectatatem excludentem, communicabilitatem alteri tamquam supposito, concedo maiorem. Sic etiam distinguo minorem: subsistentia in Deo est quid absolutum, sumpta pro perfectatate independentia, concedo minorem; sumpta pro perfectatate incommunicabilitatis, nego minorem. Ad pro-

probat. ex S. P. & ex S. Thom. re- prima acceptione, non vero in-  
 spondeo loqui de subsistentia in- secunda.

## AXIOMA QUINTVM.

*Quomodo Personis conueniant actus notionales.*

Ex Lib. 5. de Trinitate Cap. 14.



Num principium ad creaturam dicitur Deus, non duo, vel tria principia. Ad se autem inuicem in Trinitate, si gignens ad id, quod gignitur, principium est, Pater ad Filium principium est, quia gignit eum. Vtrum autem & ad Spiritum Sanctum principium sit Pater, quoniam dictum est de Patre procedit, non parua questio est. Quia si ita est, non iam principium ei tantum rei erit, quam gignit, aut facit, sed etiam ei, quam dat &c.

## D V B I V M V.

Quomodo actus notionales respiciant, & identificentur Essentiæ, Relationibus, & Personis.

**C** Vm actus notionales nihil aliud sint, quam origo vel actiua, vel passiuæ, qua vna persona vel producit, vel produci- tur, & per quam cognoscitur distincta ab alia, vt generare, & generari, spirare, & spirari, cer- tum est eos determinatis perso- nis conuenire. Nec etiam dubi- tatur in præsentī, vtrum actus notionalis in ratione præcisa actus notionalis adæquatè identificetur essentiæ quoad omnia, quæ in- cludit; vt sic enim certum est etiam

V 2 non

non posse adæquatè identificari essentia; nam origo actiua, & passiua, quæ sunt idem cum essentia, inter se realiter distinguuntur; & sic non reperiuntur in omni, in quo reperitur essentia, nisi per circuminfectionem. Difficultas ergo est: vtrum adæquatè identificentur personæ producenti, an verò personæ productæ. Et quidem de origine passiva conuenit inter omnes ipsam identificari cum personæ productæ; nam debet identificari adæquatè cum aliqua, & non potest cum producente, cum includat relationem illi oppositam; generatio enim passiva Filij, est relatio filiationis subsistentis, conceptæ veluti in fieri, & sic etiam processio Spiritus Sancti; ergo in ea, & cum ea simul producta, cum sint idem non solum realiter, sed etiam formaliter, vt supra dictum est. Præterea produci, & esse productum, non distinguuntur, nisi ratione nostri imperfecti modi concipiendi. Productum autem à producente realiter distinguitur. De origine ergo actiua, procedit dubium. In quo.

Prima sententia tenet etiam originem actiuam identificari personæ productæ, & realiter distingui à producente. Sic docuit Henricus quodlib. 6. q. 1. & in summa 1. par. ar. 54. q. 10. quod etiā tribuitur Scotto in 1. dist. 2. q. 7. & quodlib. 1. q. 3.

Secunda sententia, scilicet originem actiuam identificari adæquatè cum personæ producente, Generationem nimirum cum personæ Patris, & Spirationem actiuam cum Patre, & Filio, tribuitur S. Thom. in 1. par. quæst. 41. artic. 1. & videtur colligi ex ijs, quæ docuit in dicto articulo in resp. ad 2. vbi docet actus notionales à relationibus differre solum ex modo significandi, vt supra dixi, loquendo de constitutio personarum per origines, & relationes; eamque docuerunt Capreolus in 1. distinct. 27. quæst. unica, & Caietanus in Comment. dicti articuli. Extra scholam. Diu. Thom. eam docuit Durandus in 1. dist. 26. & alij. Pro solutione.

Pramitto 1. communem doctrinam circa actus notionales, idest eos non differre, nec etiam per intellectum, ab essentialibus, nisi ratione relationis connotatæ, quidquid dicat Henricus in contrarium. Nam cum Deus per suam intellectionem se comprehendat, & per suam volitionem se amet, quantum amabilis est, ac proinde vterque actus sit infinitus, & adæquatus, ei repugnat multiplicari, atque ideo non poterunt generatio, & spiratio, quæ intrinsece intellectionem, ac volitionem includunt, aliam intellectionem, ac volitionem importare.

tare præter eam, quæ essentialis est. Quandoquidem intellectio, & volitio simpliciter infinita vnica tantum esse potest; cum verò actus notionales non sint communes omnibus personis, vt sunt essentialis, qui in suo conceptu dicunt rationem absolutam; debent per aliquid contrahi ad vnā personam potius, quam ad aliam, & hoc aliud non poterit esse, nisi ipsa relatio, per quam vna persona ab alia distinguitur, cum in Deo nihil aliud sit, quam essentia, & relatio.

Præmitto 2. quod licet in his actibus notionalibus distinguatur communiter ratio communicationis à ratione productionis, eo quod essentia communicatur, & non producitur, relatio verò producitur, & non communicatur, nihilominus idem est terminus formalis processionis, & communicationis, & non est assignandus duplex terminus formalis, alter processionis, vt est communicatio, alter verò eiusdem, vt est productio; cum enim formalis terminus dicat aliquid aliquo modo distinctum à termino totali, saltem distinctione includentis ab incluso, & sit id, ratione cuius terminus totalis denominatur productus, vel communicatus, esto in productione possit assignari terminus totalis diuersus à termino formali; in communicatione ta-

men cum sola essentia propriè communicetur, non possunt hi duo termini distingui, quorum alter sit formalis, alter totalis, quia communicationis terminus est ipsa essentia omnino indiuisibilis re, & ratione. In productione verò cum totalis terminus sit persona ipsa producta, in qua est distinguere essentiam à relatione, variant DD. in assignando terminum formalem. Alij enim, vt Okamus, & Gabriel dicunt non esse quærendum terminum formalem, eo quod relatio à processione non distinguatur, & essentia non possit habere rationem termini, quia non producitur. Alij volunt esse relationem; quam sententiam tenuit Henricus in Sum. artic. 39. q. 1. Alij verò volunt esse essentiam; sic videtur indicare S. Tho. 1. par. quæst. 42. art. 6. ad 3. Et Scotus asseruit in 1. diff. 5. quæst. 2. & alij, qui putant non esse necessarium, vt terminus formalis producat ea productione, qua producitur terminus totalis, vt patet in productione hominis, in qua terminus formalis est anima, quæ tamen non producitur à generante. Pro quo aduerto aliter esse philosophandum in Diuinis, ac in creatis. Nam in creatis natura producitur diuersa productione ab ea, qua producitur personalitas; cum vterque terminus realiter distingua-

tur,

tur, & non minus natura accipiat esse per generationem, quam personalitas (vt fert communis opinio) & eatenus dicitur natura communicari, quatenus producit natura eiusdem speciei cum natura generantis; non sic in Diuinis, vbi cum natura sit ens à se, non solum excludens causam, sed etiam principium, non potest ipsa natura, seu essentia esse terminus productionis, sed solum communicationis; communicatur autem natura, quatenus in ea producit personalitas, quæ simul cum essentia constituit personam. Cum igitur prima persona in Diuinis, quæ nihil aliud est, quam ipsa essentia Diuina terminata paternitate, vt forma hypostatica in propria natura, producit relationem Filij; hoc pacto communicat naturam per generationem. Et cum Pater, & Filius producant relationem processionis in eadem natura, communicant Spiritui Sancto eandem naturam. Ex quibus patet generationem, ac inspirationem non reduplicare vnâ tantum rationem, seu formalitatem productionis, sed includere & communicationem, & productionem; & præterea aliter assignandum esse terminum formalem in generatione, vt generatio est, aliter in generatione, vt productio est. Et quidem generatio-

nis, vt productio est, terminus formalis videtur esse ipsa relatio, vt docuit Durandus in 1. distinct. 7. quæst. 2. Terminus enim formalis productionis est id, ratione cuius persona dicitur produci, & quod productionem terminat vt quo; hoc verò patet esse relationem, non autem essentiam. Hoc ostendi potest in creatis in generatione naturali; in illis enim generationibus, in quibus non producit nisi altera pars compositi, idest forma, non dicitur terminus formalis materia; sed ipsa forma: in generatione verò, in qua neutra pars compositi producit, qualis est generatio hominis, communiter docent Philosophi, nec ipsam formam dici terminum formalem, sed ipsam vñionem formæ cum materia; ac proinde aliud esse id, quod est forma geniti, & aliud quod est terminus formalis generationis; primum enim est id, quod constituit genitum in tali esse, seu specie; secundum verò est id, quod per se primo terminat generationem, & ratione cuius terminus totalis denominatur genitus. Generationis autem Diuinæ, quatenus generatio est, idest vt excludit communicationem, & productionem, formalis terminus erit essentia, eo quod generatio principaliter tendit ad communicandam



dam naturam genito, & ad assimilandum genitum generantis; assimilatio autem est in natura non in relatione: & præterea generatio Filij, & processio Spiritus Sancti in ratione processionis vniocè eiusdem rationis sunt, quod non potest esse ratione relationum, in hoc enim sunt diuersæ; ergo ratione essentiali. His positis.

Dico. Origines actiue identificari cum personis producentibus, quod sic Probo. Generare actiue nihil aliud est, quam intelligere notionale Patris, idest intellectio essentialis, vt est propria Patri; sed quod sit propria Patri habet per Paternitatem, quæ adæquatè identificatur cum Patre: & spirare actiue nihil aliud est, quam velle Patris, ac Filij notionale, idest velle absolutum, vt est proprium Patris, ac Filij: sed quod sit proprium habet à relatione spiratoris identificata cum Patre, & Filio, & distincta realiter à spiratione passiuæ: ergo quæcumque origo actiua identificatur cum persona, vel personis producentibus.

Dices 1. productio actiua, & passiuæ in qualibet re adæquatè identificatur termino producto; sed terminus productus realiter distinguitur à producente; ergo origo actiua in Diuinis non potest identificari cum personis producentibus. Resp. actionem quoad id,

quod importat in recto, idest intelligere, ac velle essentiali, identificari quidem cum termino producto, sicut etiam identificatur cum principio producente; verum quoad connotatum, idest quoad relationem, secundum quam opponitur termino producto, realiter ab illo distingui, ac proinde esse in persona producente.

Dices 2. productio actiua nihil aliud est, quam res in fieri; sed res in fieri est idem adæquatè cum se ipsa in esse producto; ergo semper productio actiua identificatur cum termino producto. Resp. maiorem nec etiam in creatis (in sententia, quam ego sequor, vt dixi in philosophia rationali cap. de actione, & passione) esse omnino veram; cum enim actio sit perfectio agentis, & quo agens reducitur ad actum secundum, de formali dicit relationem, quæ duplex poni debet. Altera, qua effectus in actu dicitur actu dependere à causa; altera, qua causa in actu dicitur referri ad effectum in actu, & vtræque appellatur à DD. quos sequor, actio; non est igitur verum productionem actualem nihil aliud esse, quam rem in fieri. Et sic concessa minori, negatur consequentia. Et hoc iuxta mea principia. In sententia aliorum. Resp. maiorem esse veram in creatis, non verò in Diuinis. Rationem dispar-

ta-

tatis assignant in eo, quod actio in creatis est accidens, & supponit agens in suo esse substantialiter constitutum, ac proinde ab illo emanat realiter vna cum termino, & ideo adæquatè identificatur cum termino, & ab agente distinguitur: in Diuinis autem actio est substantialis personæ producenti, & ipsam constituit, quoad relationem connotatam, & quoad significatum directum, quod est vel ipsum intelligere, vel ipsum velle substantiale, quod tamen directum etiam identificatur termino producto.

Dices 3. Non minus origo actiua ex vi potentiae productiuae, quam passiva propter oppositionem cum producente realiter ab illa distinguitur; ergo etiam actiua. Resp. negando antecedens; nam origo actiua ratione nostra concipitur progredi à potentia generatiua, vel spiratiua, quæ secundum rationem, & nostrum modum concipiendi, desumptum ex creatis, præsupponitur operationi. At passiva ratione termini, cum quo adæquatè identificatur, realiter procedit à potentia.

Dices 4. In creatis calefactio actio, & calefactio passio sunt idem realiter; ergo etiam in Diuinis actio, & passio. Resp. iuxta supradicta, in mea sententia antecedens esse falsum. In sententia verò aliorum, & maxime plurium Thomistarum, Resp. in creatis actionem, &

passionem identificari; eo quod vtrumque realiter procedat ab agente: sed in Diuinis originem actiuam solum per intellectum; & cum habeat oppositionem cum passiva debere esse in producente, & præterea cum ipso S. Thom. in 1. par. quæst. 4. art. 2. in creatis actionem, & passionem idem esse cum motu, qui recipitur in mobilibus, & secluso motu ipsam actionem nihil aliud esse, quam habitudinem principij ad id, quod est à principio, & passionem nihil aliud esse, quam habitudinem eius, quod est à principio ad principium, quæ habitudines in Deo sunt relationes oppositæ, cum ibi non detur motus.

Ex dictis fit clarum, qualiter in Diuinis non sit idem dicere, ac intelligere, quæ tamen in nobis identificantur; nam cum dicere supra intelligere importet relationem paternitatis, per quam opponitur Verbo producto; iam ipsum dicere est distinctum à Verbo, cum sit in Patre. In nobis verò, cum Verbum sit adæquatè idem cum ipsa intellectione, quæ producitur à nostro intellectu (vt dixi in Tom. 3. Philosoph. rationalis cap. 13. de Potentijs animæ rationalis, vbi pag. 492. dixi intellectiorem creatam consistere adæquatè in verbo mentis, & actione cum illo identificata; iam ipsa intellectio, & ipsa dictio sunt inter se identificata.

CON-

# CONTROVERSIA

## Q V A R T A.

De Notionibus Sanctissimæ Trinitatis, & singularum Personarum Diuinarum.

### A X I O M A P R I M V M.

*Solo lumine naturali non potest cognosci Mysterium Sanctissimæ Trinitatis.*

Ex Serm. 189. de Tempore.



*U*tum, & vas figuli de creatore disputat, & ad naturæ suæ rationem non potest peruenire, & curiosè querit scire de Mysterio Trinitatis: quod Angeli in celo scire non possunt. Quid enim dicunt Angeli in celo? Quis est iste rex gloriæ? Dominus virtutum ipse est rex gloriæ. Vide quid dicunt. pulchritudinem prædicant, & de Natura tacent &c. Ergo & nos simpliciter dicamus. Vis scire naturam Dei, hoc scias, quod nescias; nec in hoc contristeris, quia nescias, quia, & angeli nescierunt, & similiter omnes creature. Sed dicit aliquis quomodo ergo credo quod nescio? Quomodo Christianus sum, qui nescio quomodo sum Christianus? Dicam simpliciter, antequam aliqua de Scripturis profiteram. O Christiane, qui tibi videris nihil scire, si scias hoc ipsum, quod nescias, nonne magis plus videris à ceteris scire?

X

Genti.

*Gentilis homo videt lapidem & Deum putat. Philosophi vident celum, & Deum putant. Alij vident solem, & Deum putant. Tu vero vide quanta super istos habeas scientiam, qui dicis: Deus lapis esse non potest. Sol Deus esse non potest, quia alterius imperio currit. Vides quod in eo, quod dicis nihil te scire, magis nosti. Gentiles autem in eo, quod se dicunt scire, nesciunt, quia falsa sunt, que nouerunt. Simulque considera, quod voceris fidelis, non rationalis &c. In fine. Quando venerit cogitatio, & proposuerit quid est Deus, & que est ratio Trinitatis? nobis sufficiat credere quia est, & non temerè rationem querere Trinitatis, sed timere, & orare Dominum semper debemus, & illi soli scientiam nostram in hac parte exhibeamus, ut diebus ei, ac noctibus laudes canamus: cui sit gloria in secula seculorum. Amen.*

## D V B I V M I.

An, & quomodo Myſterium Sanctiſſimæ Trinitatis poſſit cognoſci ab intellectu creato.

**P** Ræmitto hanc difficultatem poſſe habere duplicem ſenſum. Primus eſt, an intellectus non illuſtratus lumine fidei, per ſolas vires naturales poſſit cognoſcere myſterium Trinitatis. Secundus eſt, an intellectus lumine fidei illuminatus poſſit rationibus naturalibus demonſtrare dari hoc myſterium. Loquimur autem de cognitione abſtractiua, nam loquendo de intuitiua certum

eſt, quod Beati vident eum ſicuti eſt: quo poſito.

Dico 1. Secluſa omni reuelatione non poſſe myſterium Sanctiſſimæ Trinitatis cognoſci. Aſſertio hæc eſt de fide, ut notauit Suarez lib. 1. de Trinitate cap. 11. & Valentia quæſt. 6. de Trinitate punct. 1. Probatur primo auctoritate Sacræ Scripturæ Matthæi cap. 11. vbi Chriſtus Dominus docuit nos, quod *Nemo nouit Patrem,*

*trem, nisi Filius, & cui voluerit Filius reuelare.* Et cap. 16. ab eodem Domino nostro dictum fuit Petro. *Beatus es Simon Bar-Ioana, quia caro, & sanguis non reuelauit tibi.* Erat autem ibi sermo, quod Christus Dominus esset Filius Dei; & consequenter de hoc mysterio.

Probatur ratione, quia nullum datur medium naturali lumine cognoscibile, quod ducat nos in cognitionem huius Sanctissimi Mysterij: ergo non est naturaliter cognoscibile à creaturis. Probatur antecedens: quia si daretur huiusmodi medium, vel esset à priori, vel à posteriori: Non à priori, eo quod tale medium, vel esset causa realis, & physica, & hæc non datur in ordine ad Deum, qui est essentialiter ens independens; vel virtualis, & hæc non potest esse, nisi vel essentia, vel aliquod attributum absolutum, quorum neutrum nos ducere potest naturaliter in cognitionem Trinitatis, sed ad summum unitatis Dei. Non à posteriori, idest ab effectibus, eo quod omnes effectus sunt à Deo ut vno; non enim operatur ad extra, nisi quatenus vnus est; idest per suam Bonitatem, Omnipotentiam, Sapientiam, Prouidentiam &c. quæ attributa sunt communia omnibus tribus personis; vnde ortum ha-

buit axioma Theologicum. Opera Dei ad extra sunt indiuisa: ex quibus sequitur effectus Dei ad extra posse solummodo ostendere per cognitionem naturalem Deum esse vnum; nullo autem pacto esse Trinum; ergo à primo ad vltimum nullum datur medium naturali lumine cognoscibile; quod nos ducat naturaliter in cognitionem huius Mysterij.

Dices 1. S. P. N. Augustinum lib. 18. de Ciuitate Dei cap. 23. referre vaticinium Sibyllæ Erythreæ de Filio Dei; & ostensum illi à viro clarissimo Flauiano, qui fuerat Proconsul, quemdam codicem Græcum in capitibus versus ordinem litterarum ita se habentem. *Iesus Christus Dei Filius Saluator.* Quæ carmina in latinum translata ibi refert. Similiter de Trimegisto, Orpheo, Platone, & alijs Philosophis refert Clemens Alexandrinus lib. 5. & 6. Stromatum cognouisse hoc mysterium, quod supernaturaliter non videtur potuisse esse; cum essent Gentiles, & solo rationis ductu philosopharentur, ergo talem cognitionem naturali lumine sunt assecuti. Resp. quod spectat ad Sibyllas, plures, & graues Auctores docere, eas, in premium suæ virginittatis, & aliarum virtutum, lumine supernaturali fuisse donatas à

Deo circa mysteria supernaturalia, de quibus vaticinatae sunt, & quidem de hac Sibylla, quam S. P. loco citato suspicatur fuisse Cumanam, non verò Erythream, ait, *ita etiam contra eos* (idest Deos falsos) *& contra cultores eorum loquitur, ut in eorum numero disputanda videatur, qui pertinent ad Civitatem Dei &c.* hos autem spectantes ad civitatem Dei esse solummodo veros fideles, idest dotatos lumine fidei, catholicorum nullus ignorat. Aliter etiam responderi potest ex eodem S. P. lib. 13. contra Faustum cap. 15. ubi ait: *Sibylla porrò, vel Sibylla, & Orpheus, & nescio quis Hermes, & si qui alij vel Theologi, vel Sapientes, vel Philosophi Gentium, de Filio Dei, aut de Patre Deo vera prae-dixisse, seu dixisse perhibentur, valet quidem ad Paganorum vanitatem revincendam, non tamen ad istorum auctoritatem amplectendam, cum illum Deum nos colere ostendimus, de quo nec illi tacere potuerunt, qui suis congenites populos idola, & demonia colenda partim docere ausi sunt, partim prohibere ausi non sunt.* (& in fine capitis subdit). *Quantum distat de Christi adventu inter predicationem Angelorum, & confessionem Demoniorum, tantum inter auctoritatem Prophetarum, & auctoritatem sacrilegorum.* Quibus verbis non

habuisse quosdam eorum veram fidem, sed tamen illos tacere de his mysterijs non potuisse docere: fortè ut essent inexcusabiles, habitata fortasse huiusmodi notitia vel à suis oraculis Daemonum, vel electione Sacrarum Scripturarum. Et quidem de Platone S. P. lib. octavo de Civitate Dei cap. 11. aliquibus, & validis coniecturis ostendit eum legisse, & approbasse Sacras Scripturas, quod tamen postea non determinat, sed ait: *Undecumque ista didiceris, siue praecedentium cum veterum libris, siue potius, quomodo dicit Apostolus, quia quod notum est Dei manifestum est in illis: Deus enim illis manifestavit &c.* vel fortasse nec ipsi in suis illis sententijs, & oraculis, quae de Patre, & Filio pronunciarunt, intellexerunt hoc mysterium, quod resonare videntur eorum verba: quod non est mirum, nam & de nostris veris Prophetis passim docetur non semper penetrasse mysteria illa, quae praedicabant. Et hoc de illis philosophis tenuit S. Thomas 1. par. quæst. 32. artic. 1. Cum enim sibi obiecisset in primo artic. Aristotelem in lib. 1. de Caelo, & Mundo dixisse: *Per numerum ternarium adhibuimus nos ipsos magnificare Deum, unum, eminentem proprietatibus eorum, quae creaturae sunt; & apud S. P. Augustinum* lib.

lib. 7. Conf. cap. 9. haberi : se in libris Platoniorum legisse, non quidem his verbis : sed hoc idem omnino multis, & multiplicibus rationibus suaderi, quod *In principio erat verbum, & verbum erat apud Deum, & Deus erat verbum.* Et cetera huiusmodi, quæ sequuntur in 1. cap. Euang. S. Ioan. & quæ in Glossa ad cap. 1. epist. ad Rom. & cap. 7. Exodi Magi Pharaonis defecerunt in tertio signo, idest in notitia tertæ Personæ Sanctissimæ Trinitatis, scilicet Spiritus Sancti, & sic ad minus duas cognouerunt. Et Trimegistum dixisse : monas genuit monadem, & in se suum reflexit ardorem, vt habet in lib. qui dicitur Pimander Dialog. 4. per quæ videtur generatio Filij, & processio Spiritus Sancti intimari. Respondet : Philosophos non cognouisse hoc mysterium, & Aristotelem in prædicto loco solum intendisse, antiquos vfos numero ternario in orationibus, & sacrificijs propter quamdam numeri ternarij perfectionem ; Auctoritatemque illam librorum Platoniorum non de generatione Verbi, sed de ratione Ideali, per quam Deus omnia condidit, procedere : quæ à nobis appropriatur Filio ; & sic Magos defecisse in cognitione tertie Personæ, quia deuauerunt à Bonitate, quæ appropriatur Spi-

ritui Sancto &c. Et denique dictum illud Trimegisti non esse de generatione Verbi, aut de processione Spiritus Sancti, & hunc esse illorum sensum ; quod Deus vnus genuit mundum vnum, propter sui ipsius amorem. Hæc ibi docet S. Thom. & quidem probabilissimè, nam nec in Sinagoga communiter erat notum hoc mysterium Sanctissimæ Trinitatis, vt passim docent Sacra Scripturæ expositores : Vt videre est apud Cornelium à Lapide Proæmio in Euangelia in Antithesi secunda legis, & Euangelij. Hoc adeo verum est vt propterea S. Epiphanius. hæres. 74. post medium dicat : *Deitas vna in M. i. se maxime denuntiatur : dualitas in Prophetis vehementer predicatur : Trinitas autem in Euangelio manifestatur, amplius iuxta temporum occasiones, ac generationes conueniens iusto in cognitionem, & fidem.* Vide, si plura cupis de hoc puncto, Vasquez in 1. par. Tom. 2. disput. 32. cap. 1. vbi, & alia Philosophorum dicta, notabilia protulit, & alia Apollinis Delphici oracula : & cap. 2. vbi, & Philosophos ex Moyse, idest ex sacris libris ab eo conscriptis hausisse notitiam probat ; vel à populo hebræo, vel Agyptio didicisse ex Eugubino lib. 1. de perenni Philosophia cap. 1. S. Cyrillo lib. 1. contra Iulianum.

Ex

Ex S.P.N. lib. 18. de Ciuitate Dei cap. 37. Eusebio lib. 10. de præparatione Euang. cap. 1. 2. & 3. & Theodoro de Græcanicis affectionibus, & de Sibyllis (quarum alia oracula protulit Lactantius lib. 1. Diuin. institut. cap. 6. & lib. 4. cap. 6. & 7. quæ in vnum collegerunt Iulius Sirenus in Opusc. de Prouid. circa finem, & Eugub. loco citato cap. 25.) dicit, constare ex prædictis DD. has Sibyllas non traditione, non Scriptura, nec communicatione populi hebræi, sed flatu Spiritus Sancti hoc Mysterium prædicasse; & ideo aliam esse de eis rationem, ac de Philosophis, & alijs, qui de dicto Mysterio loquuti sunt, eo quod istis non sit facta proximè reuelatio de hoc mysterio, sicuti Sibyllis: nec demonstratione, aut ratione naturali illud assequi potuerunt; & adhuc dato, & non concesso, quod esset aliqua ratio naturalis de hoc mysterio, non propterea esset consequens, Philosophos naturales sine errore propria virtute illam adinuenisse; eo quod fidei reuelatio non solum est necessaria, vt supernaturalia Mysteria cognoscantur; sed etiam, vt multæ veritates naturales sine errore sciatur.

Dices 2. S. Thom. quæst. 32. 1. par. artic. 1. concedit nos posse defendere, & cognoscere Myste-

rium hoc non esse impossibile: ergo possumus cognoscere esse possibile; ac proinde etiam esse; nam non impossibile, & possibile idem sunt, & in Deo ad intra est idem posse esse, & esse. Resp. S. Thom. ibi non velle, quod possumus cognoscere, & defendere hoc mysterium non esse impossibile absolute, & simpliciter, quo pacto non impossibile, & possibile conuertuntur; sed vult, quod, supposita reuelatione fidei, possumus manifestè cognoscere, & defendere Mysterium istud non esse impossibile, quantum est ex vi earum rationum, quæ naturali lumine intellectui nostro obijci possunt; manet tamen semper incui-dens, an, ob rationes alias, naturali discursu ostendatur impossibile. Esto per fidem certissimi sumus ob nullas omnino rationes esse Mysterium istud impossibile, sed omnino esse verum. Vide Præpositum quæst. 72. dub. 2. S. Obij-citur 4. Valentiam quæst. 6. de hoc Myst. punct. 1. S. ad quartum. Et Auerſam Quæst. 32. sect. 1.

Dices 3. S. P. N. Augustinum lib. 6. de Trinitate cap. 10. dicere esse in qualibet creatura vestigium Sanctissimæ Trinitatis; & præterea lib. 14. de Trinitate cap. 3. ex Genesi cap. 1. ostendere hominem peculiariter secundum mentem

esse



esse imaginem Sanctissimæ Trinitatis; ergo possumus ex illis cognoscere Trinitatem Diuinarum personarum esse; sicuti ex vestigio hominis intelligimus hominem transisse; & ex naturali imagine alicuius naturaliter venimus in cognitionem illius, cuius est illa imago. Resp. in creaturis esse quidem vestigium Trinitatis, quatenus relucet in illis Potentia, Sapientia, & Bonitas, quæ non sunt proprietates personales, licet, distinctis personis tribuantur ac proinde non ducere naturaliter in cognitionem Personarum. Non enim cognouissemus in creaturis esse vestigium Trinitatis, nisi, habita aliunde fide supernaturali de hoc mysterio, ita ratiocinaremur. Ad exemplum de vestigio hominis. Resp. esse disparem rationem; nam hoc refert figuram pedis humani, quæ est propria hominis: Creaturæ autem non representant naturaliter aliquid, quod sit proprium singularum personarum. Ad illud de imagine: Resp. eam non esse talem, ut afferat ipsa per se naturalem cognitionem Trinitatis; quandoquidem non fuisset nec etiam cogitaturi in homine illam Trinitatis imaginem; nisi ex reuelatione fidei nobis suppeteret.

Dices 4. Naturali lumine est notum quamcumque operationem

habere suum terminum; & eodem lumine est notum esse in Deo intelligere, & velle, per quæ producuntur Verbum, & Amor, qui sunt proprii termini actionum intellectus, & voluntatis; & præterea est etiam evidens in Deo non posse esse accidens; ergo à primo ad vltimum naturali, & euidenti demonstratione ostendi potest esse in Deo Verbum, & Amorem, qui distinguantur, & sint eiusdem rationis cum producente, & consequenter mysterium Sanctissimæ Trinitatis, quod his tribus consistit. Resp. Hæc omnia supponere esse in Deo veram actionem realem, nobis euidenter, & naturaliter notam; de qua solum est notum lumine naturali, quod habeat verum terminum; sed non est nobis hoc modo notum, intelligere, & velle notionaliter, aut terminos dictionis, & Amoris notionalis esse realiter distinctos; imò naturali lumine solum cognoscimus intellectionem, & volitionem in Deo non distingui realiter: eo quod naturaliter cognoscimus Deum esse simplicem, & immutabilem, quod naturali lumine, & sine reuelatione fidei non possemus conciliare cum hoc, quod est esse ibi productionem Verbi, & Amoris, cum distinctione reali à producente. Ex hac Responsione, & Doctrina facile satisfie-

ri potest argumento Raymundi Lullij, qui putauit se euidenter lumine naturali ostendisse existentiam Patris, & Filij, & Spiritus Sancti. Cuius argumenti infirmitatem clarè ostendit, & demonstrat Vasquez tom. 2. in 1. par. Disput. 133. cap. 1. 2. & 3. vbi etiam ostendit hunc Auctorem loqui de demonstratione, supposito lumine Fidei; sicut & omnes alij DD. Catholici.

Plura alia argumenta congerunt Auctores contra prædictam assertionem, quæ facilè solui possunt, aduertendo, quod, licet ex vna parte videatur lumine naturali inferri, quod in Diuinis debeant esse plures personæ; ex alia tamen parte lumen naturale solum semper reluctabit. Nam si dicas debere esse plures, quia hoc est maximæ perfectionis, esse communicatum sui; quia generatio est actus vitalis perfectus, ac proinde vitæ excellentissimæ conuenire debet; quia est omnipotens; & quia communicatio infinita in Diuinis debet habere terminum adæquatum infinitum: statim resistit aliud principium, quod in eadem vnica, & singulari essentia, & natura non possunt esse plures personæ cum illa identificatæ; nam, quæ sunt eadem vni tertio, sunt eadem inter se; ac propterea illam plurificationem non posse stare

sine pluralitate Deorum, quæ nullo modo est admittenda; subindèque prædictas rationes, & congruentias probare, & suadere supposito lumine fidei, & reuelatione habita de hoc mysterio. Aliàs, vt aduertit S. Thom. loco citato dupliciter derogaremus Sanctæ Fidei, si solum per rationes naturales niteremur illud probare. Primo quoad eius dignitatem, quæ est de rebus excedentibus captum humanum. Secundo quoad utilitatem, trahentes alios ad ipsam; eo quod, si infideles viderent nos vti solum rationibus naturalibus, quæ non conuincunt, existimarent nos aliundè non moueri, idèoque non solum respuerent, sed etiam nos irriderent.

Dico 2. Absque reuelatione, & fide non posse cognosci probabiliter, nec etiam cum aliqua suspitione, aut formidine hoc mysterium; sic docuit Suarez loco citato cap. 11. num. 10. & Ioan. Morandus quæst. 17. de hoc mysterio, & est communis. Probatur autem ratione, quia in tota natura nulum adest principium, per quod excitari possimus ad formandum talem cogitationem de tanto mysterio; imò principia naturalia videntur repugnare, vt est illud, *quæ sunt eadem vni tertio &c.*

Dico 3. Supposita reuelatione, & fide Trinitatis, multa adinueniri argu-

argumenta probabilia, quæ manuducunt ad cognoscendum tantum mysterium. Hæc conclusio est communis, & certissima. Huiusmodi sunt illæ rationes, supra compendio adductæ, quod sit summæ perfectionis se communicare in eadem natura; quod si creatura potest generare sibi simile, hoc debet Deus, iuxta illud Isaïæ 66. *Nunquid ego, qui alios parere facio, ipse non pariam.* Quod Deus est naturæ intellectualis, cuius est producere Verbum, quo pacto hoc mysterium nititur probare, & explicare S. P. lib. 15. de Trinitate cap. 10. Vbi, cum de nostro verbo mentali plura dixisset, conclusit: *Quisquis igitur potest intelligere Verbum, non solum antequam sonet, verum etiam antequam sonorum eius imagines cogitatione voluantur, iam potest videre per hoc speculum, atque in hoc enigmate aliquam Verbi illius similitudinem, de quo dictum est Ioan. 1. In principio erat Verbum, & Verbum erat apud Deum, & Deus erat Verbum.* Sic etiam in sermone primo de Verbis Apostoli contra Arrianos utitur similitudine solis, & ignis in quibus agnoscit tria, quæ à nobis separari non possunt, motum videlicet, splendorem, & calorem; & alibi, & maximè in libris

de Trinitate plures alias habet rationes, congruentias, similitudines, & exempla, quibus pulchrè explicat, & suadet hoc maximum mysterium, semper tamen, ut ipse S. P. protestatur, & præmisit in dicto sermone: *Hoc Catholica fide armati, atque instructi.*

Alias congruentias afferunt alij Theologi ex Richardo de S. Victore, quæ supposita reuelatione, ut supra, optimè conferunt ad explanationem huius mysterij: hoc enim pacto eas adductas fuisse ab isto Auctore testatur S. Thom. quæst. 32. 1. par. artic. 1. in responsione ad 2. Alij tamen, quorum placitum suppresso nomine citat Ioan. Morandus loco supracitato à num. 588. volunt Richardum eas aduxisse, ut demonstrationes; sed si hoc voluit, ut ait ibi Morandus, suo fine frustratus est, ut est clarum ex supradictis. Vide plura, & pulchra de hac questione apud Vasquez, & Suarez locis supracitatis apud Tanerum disput. 4. quæst. 1. dub. 2. Auerfam quæst. 32. sect. 1. & 2. ubi etiam agit an Diuinitus possit communicari viatori cognitio euidens quidditativa, & abstractiva Trinitatis. Et Ioan. Baptista Gonetum, tom. 5.

## A X I O M A    S E C V N D V M .

*De Notionibus Diuinarum Personarum .*

Ex Lib. 5. de Trinitate Cap. 6.



*Li*a notio est, qua intelligitur Genitor, alia, qua Ingenitus. Nam quamuis de Patre Deo virumque dicatur, illud tamen ad genitum, idest ad Filium dicitur, quod nec illi negant: Hoc autem, quod ingenitus dicitur, ad se ipsum dici perhibens (loquitur contra Arrianos). Cum verò ingenitus dicitur Pater, non quid sit, sed quid non sit dicitur. Cum autem relatiuum negatur, non secundum substantiam negatur, quia ipsum relatiuum non secundum substantiam dicitur.

## D V B I V M    I I .

An, & quot sint admittendæ notiones in mysterio Sanctissimæ Trinitatis.

**F**RANCISCUS ZUMEL in Comment. 1. par. quæst. 32. in Discursu artic. 2. obseruat S. P. Augustinum fuisse primum, qui in hac materia de Sanctissima Trinitate nomen notionis introduxit lib. 5. de Trinitate cap. 6. verbis præsentis axiomatis. Quo posito;

Præmitto 1. hoc nomen, *notio*, aliter accipi à Theologis. Aliter vero à Grammaticis, hi enim appellant notionem conceptionem, quam de re habemus, illi verò proprias rationes, & quasi notas cognoscendi vnamquamque Diuinam personam, propterea cum S. Thom. 1. par. quæst. 32. artic. 2. de-

definitur communiter: id, quod est propria ratio cognoscendi Diuinam personam. Ex qua definitione sequitur id, quod artic. 5. dictæ quæstionis docet, nempe de ratione notionis esse, vt sit aliquod speciale, idest non commune omnibus personis; nam per talia prædicata non discernitur vna persona, vt distincta ab alia; ex qua conditione excluduntur non solum prædicata essentialia, sed etiam prædicata Personæ, relationis, subsistentis, & similia, quæ sunt & ipsa communia omnibus tribus personis. Non est tamen de ratione notionis, vt per eam vnaquæque persona à qualibet alia distinguatur, & significet rationem vni solum conuenientem, quæ doctrina licet aliquibus displiceat, (qui propterea negant, produci, & esse ab alio, numerari inter notiones, eo quod conueniat duabus personis) est tamen communior in scholis; aliàs tollenda esset spiratio actiua, quæ ferè ab omnibus inter notiones numeratur. Cum igitur munus notionis sit ducere in cognitionem distinctionis personarum, ad rationem eius satis erit, si faciat cognoscere duas Personas distinctas à tertia, cui talis ratio, seu notio non conuenit; produci verò, & esse ab alio non excluditur à numero notionum propter causam

illam ab aduersarijs adductam; sed quia sunt rationes communes communitate prædicationis, quæ includuntur in specialibus notionibus Filij, & Spiritus Sancti, & propterea nulla est necessitas, aut vtilitas, propter quam debeant poni vt notiones, ab illis contradistinctæ.

Præmitto 2. Omnes has rationes: Notio, Relatio, Proprietas Personæ, & Proprietas personalis, licet possint cadere in eandem rem, nam omnes conueniunt Paternitati, Filiationi, & Processioni; non tamen, conuenire eis sub eadem ratione: Nam paternitas (idem dicendum respectiue de filiatione, & processione) dicitur notio Patris, quatenus per illam deuenitur in cognitionem primæ personæ; dicitur relatio, quatenus per illam respicit Filium; dicitur proprietas personæ, quatenus solum vni personæ conuenit; & dicitur proprietas personalis, quatenus est constitutiua personæ Patris. Ex hoc principio clarum, fit has rationes non æquè lacè patere; sed habere se veluti superius, & inferius; nam rectè sequitur: hoc est proprietas personalis; ergo est proprietas personæ; ergo relatio; ergo notio: sed non sequitur: est notio; ergo est relatio; Innascibilitas enim est notio, & non est relatio: nec sequitur: est

notio; ergo est proprietas personæ, vel personalis; quia spiratio actiua est notio, sed non est proprietas personæ, aut personalis, eo quod conueniat pluribus, & supponat personas constitutas.

Premitto 3. non esse eandem omnium sententiam circa notiones. Præpositiuus enim, propter simplicitatem Dei, negauit esse usurpandas notiones in abstracto. Ex ijs, qui illas admittunt, sunt, qui plures, & qui pauciores concedunt. Communiter admittuntur quinque vulgatæ cum S. Thom. 1. par. quæst. 32. artic. 2. & 3. Scotus in 1. distinct. 28. quæst. 1. Durando in 1. distinct. 264. quæst. 2. S. Bonauentura, Capreolo, & alijs. Non desunt tamen, qui è medio tollant innascibilitatem; fertur enim quod tempore S. Ambrosij, non admittebatur, ut notio; imò quod nec etiam spiratio actiua, fuerit pro tali communiter recepta. E contra Scotus in 1. distinct. 28. quæst. 2. §. ad Argumentum ad 3. non habet pro inconuenienti, si addatur inspirabilitas pro sexta.

Dico 1. necessariò ponendas esse notiones in Diuinis; quod sic probò. Interroganti hæretico, quomodo Deus sit vnus, & quomodo Trinus; respondendum est, esse Diuinitate vnum, & proprietate, seu relatione trinum; nec

sufficit si dicatur vnum substantia; Trinum personis; ut contendit Gregorius distinct. 26. quæst. 1. quia interrogationi factæ de constitutiuo, siue de ratione formali, respondendum est per aliquod signatum in abstracto. Secundo quia licet primæ illi interrogationi possit sic satisfieri; nihilominus, si ulterius quærat, quo, siue qua ratione persona sit persona, non poterit amplius responderi, nisi per abstractum.

Dico 2. Quinque solum esse admittendas notiones communiter receptas, idest innascibilitatem, paternitatem, filiationem, spirationem actiuam, & spirationem passiuam, siue processionem. Est D. Thom. loco citato artic. 3. & communior in scholis; & probatur hac ratione. Notio sumenda est secundum originem; Personæ enim non habent aliquid proprium, nisi secundum originem; origo autem vel sumitur actiue, quatenus aliqua persona producit, vel passiue quatenus producit; sed sic est, quod Pater producit Filium; ergo debet habere propriam notionem, quæ est paternitas; Pater, & Filius produciunt Spiritum Sanctum; ergo debent habere communem notionem communitate rei, non communitate rationis; nam hæc non sufficit ad notionem, & hæc est spiratio actiua.

ua. Passiue verò Pater non producit ab alio; ergo debet habere propriam notionem, & hæc est innascibilitas, siue improducibilitas: sumitur enim hic ex communi vsu innascibilitas, non solum prout opponitur natiuitati, sed etiam omni productioni ab alio. Filius verò est à Patre, & Spiritus Sanctus à Patre, & Filio; ergo debent habere proprias notiones: & ecce respectu Filij habetur filiatio; respectu verò Spiritus Sancti habetur spiratio passiuæ, siue processio; ergo quinque solum notiones.

Dices cum Scoto: si ponitur innascibilitas respectu Patris, tanquam notio, etiam respectu Filij erit concedenda inspirabilitas, vt notio; ergo sex erunt notiones.

Respondet Durandus in 1. distin. 26. quæst. 2. num. 10. Inspirabilitatem non esse rationem cognoscendi in Filio dignitatem distinctam ab ea, quæ cognoscitur per spirationem actiuam, cum dicat solum negationem spirationis passiuæ; Nam eo ipso, quod Filius est Spirator, sequitur, quod non sit spiratus; nulla enim res producit ea productione, quæ producit. Ingenitum verò dicere negationem essendi, non per illas productiones, quibus producit Filium, & Spiritum Sanctum

nam sic esse ingenitum, esset non procedere à se ipso; sed negationem essendi ab alia persona priori. Contra hanc responsionem stat, quod sicut dicitur inspirabilitatem includi in spiratione, ob rationem allatam; sic etiam, ob eandem rationem, dicendum erit innascibilitatem includi in paternitate, & spiratione; quemadmodum enim Filius, hoc ipso, quod spirat, intelligitur inspirabilis; ita Pater, hoc ipso, quod producit per intellectionem, & volitionem, intelligitur improducibilis; cum in Diuinis non sit alia emanatio, quam per intellectionem, & volitionem. Si dicas non intelligi per hæc improducibilem ab alia persona priori; etiam ego dicam Filium, hoc ipso, quod spirat Spiritum Sanctum, intelligi quidem inspirabilem ab illo, sed non intelligi, quin sit spirabilis ab alio.

Canar. & alij respondent: innascibilitatem, esto dicat solum negationem, sicut dicit inspirabilitas, esse tamen notionem, eo quod dicat non esse ab alio quocunque modo productionis, quod pertinet ad maximam auctoritatem personæ; inspirabilitatem verò non esse notionem, eo quod dicat solum non esse ab alio per voluntatem, quod non pertinet ad auctoritatem; sicut nec esse inge-

ingenitum est notio ex eo præcisè, quod dicat negationem solius generationis; hoc enim modo pertinet etiam ad Spiritum Sanctum. Contra hoc tamen est, quod pura negatio non dicit auctoritatem, & consequenter non posset constituere notionem.

Propterea Caietanus in Commentarijs quæst. 32. ad artic. 3. Respondet: verum quidem esse regulariter negationem non poni inter notiones, eo quod non pertineat ad dignitatem; innascibilitatem tamen poni propter tres rationes, propter quas non videtur habere rationem puræ negationis. Prima est, quia persona Patris sola in Trinitate se habet in ratione primi principij: unde ad explicandam rationem primi, quæ communiter per negationem melius explicatur, ac etiam ad denotandam auctoritatem illam, propter quam Filius in Evangelio omnia refert ad Patrem, illi attribuitur innascibilitas. Secunda est, quia innascibile, & Pater quandoque separantur, ut in creaturis, quarum quælibet generans est etiam genita, exceptis Adam & Eva, qui licet fuerint Genitores, non tamen fuerunt geniti: quandoque coniunguntur, ut in Deo; inspirabile autem, & genitum semper connectuntur. Tertia est ad com-

mendationem vnitatis in Diuina natura; nam, ponendo vnum innascibile, ponitur vnum caput, & principium. Sed contra est: quia nec etiam per ista apparet sufficiens disparitas inter has negationes. Primo quia auctoritas primi principij sufficienter videtur denotari per paternitatem. Secundo quia etiam inspirabile, & genitum non semper connectuntur in eadem persona, ut docet Caietanus; sed quandoque separantur: nam etiam Pater est inspirabilis, & tamen non est genitus.

Recentiores aliqui, ad euadendas difficultates, reduxerunt hunc nodum ad nomen, & dixerunt innascibilitatem esse veluti nomen collectivum, vnitè significans id, quod significant Paternitas, & Spiratio coniunctim; & idcirco esse à qualibet earum, seorsim accepta, distinctum; cumque illæ significant solum rationem principij, innascibilitas significat rationem primi principij, idest principij, quod non est ab alio. Sed contra est: quod communiter docetur, saluandum esse, quod innascibilitas notificet quid diuersum, non solum à singulis rationibus seorsim, sed etiam coniunctim; sunt enim inuentæ notiones ad cognoscendas dignitates personarum distinctas; quod si nihil aliud in-

note-



notesceret per innascibilitatem, quam per paternitatem, & spirationem, frustra adderetur hæc quinta notio. Nihil enim nouum innotesceret, si istæ tres notiones differrent solum in hoc, quod innascibilitas esset totum collectiuum, & illæ aliæ duæ partes collectiui; sicut nihil innotescit per humanitatem, quod non sit cognitum per animalitatem, & rationalitatem.

Melior solutio videtur esse illa eorum, qui dicunt innascibilitatem esse notionem distinctam à paternitate, & spiratione; eo quod expressè notificet rationem primi principij; quam illæ expressè non significant; nam licet illa persona, quæ est Pater, & spirator, non possit non esse principium, quia in Diuinis duæ tantum sunt productiones, & est impossibile, quod eidem personæ conueniat esse principium productiuum, & producibile per eandem, vel easdem productiones; Nihilominus ratio Patris, & ratio Spiratoris expressè, & formaliter solum dicunt esse principium aliorum, non tamen esse principium primum.

Si dicas: hoc posse per discursum facile, & per necessariam consequentiam inferri ex ratione paternitatis respectu filiationis; ergo neque propter hoc ponendam

esse hanc notionem. Resp. quod, si ad tollendam pluralitatem notionum hoc sufficeret, nec etiam spiratio actiua esset ponenda vt notio distincta à paternitate; nam facile, & necessariò per discursum inferri potest, quod persona generans, & producens per intellectum, vnde habet nomen Patris, debeat etiam producere per voluntatem. Innascibilitas igitur, quia significat expressè rationem primi principij, quæ ratio rectè explicatur per negationem essendi ab alio, licet in Patre sit ratio positua, meritò censetur notio distincta ab alijs; inspirabilitas vero, cum dicat solam negationem essendi ab alio non connotando rationem posituam distinctam ab alijs, meritò excluditur; nam prout est in Patre nihil notificat, quod per innascibilitatem non innotescat; & prout est in Filio dicit solam meram negationem spirationis passiua, fundatam in filiatione.

Si inles: hanc solutionem aperte repugnare cum Doctrina S. P. qui eodem cap. 6. lib. 5. vnde præsentis dubij axioma deductum est, expressè docet ingentum importare solum negationem, ait enim in fine illius Cap. *Cum igitur dicitur Pater non quid sit, sed quid non sit dicitur.* Et similiter cap. 7. ait: *Quod ergo dicitur ingentus,*

hoc

*hæc ostenditur, quod non sit Filius, & infra, Non ergo iam dicamus ingenuitatem, quamuis id latine dici possit; sed pro eo dicamus non genitum, quod tantum valet. Non ergo aliud dicimus, quam non Filium. Negativa porro ista particula non id efficit, ut quod sine illa relativè dicitur, eadem preposita substantialiter dicatur: sed id tantum negatur, quod sine illa aiebatur &c. Ergo (inferes) est expressa sententia S. P. Ingenitum dicere puram, & meram negationem. Respondet Vasquez Disput. 137. cap. 5. S. P. intelligendum esse de formali, & expresso significato, non verò negare significare pro materiali modum positivum substantiæ; nam & S. Basilii lib. 4. contra Eunomium cap. 2. ait: *Quare innascibilitas substantiæ modus, non substantia nomen est.* Simili modo loquuntur etiam S. Cyrillus lib. 1. Thesauri cap. 4. circa finem, & S. Ioan. Damascenus lib. 1. de Fide cap. 9. qui omnes dicunt significare modum substantiæ, seu existentie, & consequenter aliquid positivum. Hoc enim etiam dicimus (ait ibi Vasquez) de his nominibus, quibus aliqua attributa Dei significamus, ut *Immutabile, Incorporeum &c.* Et re vera hoc arbitror esse de mente S. P. nam & in lib. de Trinitate, & unitate Dei tom. 4. cap. 1. habe-*

tur *Spiritum Sanctum neque ingenuitatem fides declarat; quia si dixerimus ingenuitatem, duos patres affirmare videbimur.* Hæc verba non obscurè indicant, hoc nomen *Ingenitum* importare dignitatem, seu auctoritatem Patris, non procedentis ab alio: aliàs enim, si solum negationem præferret, dictum de Spiritu Sancto, non videremur dicere alium Patrem. Scio librum illum à Louaniensibus censeri incerti auctoris; sed nihilominus iidem fatentur in sua Censura, illum constare ex fragmentis doctrinæ S. P. & propterea cum idemmet S. P. loco citato dixisset: *Ingenitus porro quid est, nisi non genitus?* statim subdit: *Non ergo receditur à relativo prædicamento, cum ingenuus dicitur?* Quod utique stare non posset, si meram negationem diceret; hæc enim, cum non sit ens positivum, ad prædicamentum non spectat. Ratio autem, propter quam ibi magis sistit in negatione, quam in positivo, est, quia ibi disputabatur contra Arrianos, qui abutebantur hoc nomine ingenui, conficiendo sophisma contra Catholicos ex ratione illius: quasi esset secundum substantiam (id est essentiam; pro eadem enim omnino accipiebant illi hæc duo nomina) proprium Patris: Quia nec est ad Filium, nec conuenit Filio, & indè

indè postea inferebant suum erro-  
rem, idest Filium esse alterius sub-  
stantiæ, scilicet essentiæ à Patre; ;  
cui sophismati volens satisfacere  
S. Pater, dedit primo, vim nomi-  
nis non importare de formali  
nisi negationem geniti; admit-  
tendo tamen de materiali impor-  
tare aliquid positivum; vt dictum  
est.

Quæri hic solet: an possint sine  
errore negari notiones, vel muta-  
ri earum numerus. Resp. dupli-  
citer hoc fieri posse: primo quo-  
ad nomen tantum, affirmando  
scilicet, quod hoc nomen non  
sit ponendum in Divinis, vel ali-  
qua, quæ à nobis numerantur in-  
ter notiones, non esse sic appel-  
landa; vel alijs à prædictis quin-  
que hoc nomen applicando, vt  
de inspirabilitate posse fieri Sco-  
tus arbitrabatur. Imò Auerſa te-  
statur quæst. 32. sect. 4. Alios duo-  
decim, & alios triginta, & duas

posuisse notiones. Secundo pos-  
set hoc contingere, non quoad  
nomen, sed quoad rem, quam  
scholæ Theologorum intelligunt  
sub nomine notionum. Primo  
modo, dummodo esset cum ali-  
quo probabili fundamento, nul-  
lam videretur mereri censuram;  
si verò poneretur sine fundamen-  
to; vt videtur poni ille numerus  
duodecim, vel triginta duo, re-  
latus ab Auerſa, forsân saperet te-  
merarium, vt notant Tannerus  
Disput. 4. dub. 5. & Ioan. Morandus  
Tract. de Trinitate quæst. 18. Se-  
cundo autem modo esset hæresis  
eas negare, quia hoc esset negare  
Patrem v. g. non esse princi-  
pium omnino habens esse à se;  
Spiritus Sanctum non esse spiri-  
tum; & sic de cæteris, quæ ne-  
gationes omnino essent contra fi-  
dem. Vide S. Thom. 1. par. quæst. 32.  
artic. 4.

## AXIOMA TERTIVM.

### *De Actibus Notionalibus.*

Ex Lib. 15. de Trinitate Cap. 20.

**R**idenda est Dialectica Eunomij, à quo Eunomiani heretici  
exorti sunt. Qui cum non potuisset intelligere, nec crede-  
re voluisset Unigenitum Dei Verbum, per quod facta sunt omnia,  
Z Filium

*Filium Dei esse naturā, hoc est de substantia Patris genitum: non naturā, vel substantiā suā, siue essentia dixit esse Filium, sed Filium voluntatis Dei, accidentem scilicet Deo, volens asserere voluntatem, qua gigneret Filium: videlicet ideo, quia nos aliquid aliquando volumus, quod antea non volebamus, quasi non propter istā mutabilitē intelligatur nostrā natura, quod absit in Deo esse credamus. Neque enim quod aliud scriptum est: multa cogitationes in corde viri, consilium autem Domini manet in eternum, nisi ut intelligamus, siue credamus, sicut Deum eternum, ita eternam eius consilium, ac per hoc immutabile, sicut ipse est. Quod autem de cogitationibus, hoc etiam de voluntatibus verissime dici potest: Multa voluntates in corde viri, voluntas autem Domini manet in eternum. Quidam ne Filium consilij, vel voluntatis Dei dicerent, Unigenitum Verbum ipsum consilium, seu voluntatem Patris idem Verbum esse dixerunt. Sed melius, quantum existimo, dicitur consilium de consilio, & voluntas de voluntate, sicut substantia de substantia, sapientia de sapientia: ne absurditate illa, quam iam refellimus, Filius dicatur Patrem facere sapientem, vel volentem, si non habet Pater in substantia sua consilium, vel voluntatem. Acute sanē quidam respondit heretico versutissime interroganti. Virum Deus Filium volens, an nolens genuerit: ut si diceret, nolens, absurdissima Dei miseria sequeretur: si autem volens, continuo, quod intendebat, velut inuicta ratione concluderet, non naturā esse Filium, sed voluntatis. At ille vigilantissime vicissim quaesivit ab eo, utrum Deus Pater volens, an nolens sit Deus: ut si responderet, nolens, sequeretur illa miseria, quam de Deo credere magna insania est: si autem diceret volens, responderet ei, Ergo & ipse Deus est sua voluntate, non natura. Quid ergo restabat, nisi ut obmutesceret, & sua interrogatione obligatum insolubili vinculo se*

to se videret. Idem refert in lib. contra ferm. Arrianorum.  
cap. 1.

## D V B I V M I I I

Vtrum actus Notionales sint Voluntarij, & priores prædicatis essentialibus.

**C**onsequenter ad ea, quæ docuit hic S. Pater, veniunt inquirenda hæc duo; & quantum ad primum non multum hæreo; nam S. Thom. sua claritate, & breuitate nodum dissoluit quæst. 41. artic. 2. 1. par. ubi docuit: Patrem genuisse Filium voluntate se habente concomitater, non verò per modum principij, ac proinde generationem Filij non esse violentam, aut coactam, sed naturalem, non tamen liberam. Præterea etiam Spiritum Sanctum naturaliter procedere, quamuis per modum voluntatis, non tamen esse liberam (quod est contra Scotum, qui in 1. distinct. 10. quæst. 1. dicit productionem Spiritus Sancti esse liberam: dissensio tamen est de voce; nam ipse docet etiam esse necessariam; & non esse indifferentem ad esse, & non esse; sed accipit liberum pro eo, quod non agitur coactè, sed delectabiliter producitur, in quo benè sentit

quoad rem; sed eius loquendi modus extra ipsius scholam non recipitur; aliàs etiam Brutorum operationes possent dici liberæ. Est igitur Spiritus Sanctus naturaliter à voluntate, tanquam à principio, quod non obscurè indicauerat S. P. immediate post Axioma; sequitur enim ibi: *Sed Voluntas Dei, se & propriè dicenda est aliqua in Trinitate persona, magis hoc nomen Spiritui Sancto competit, sicut Charitas. Nam quid est aliud Charitas, quam voluntas?* Verum cum illa voluntas concomitans comparetur ad generationem, sicut ad obiectum præcisè, adhuc etiam remanet inquirendum, an possit dici se habere ad illam etiam antecedenter; ita quod placeat, vt vel quasi futura; an etiam consequenter vt placeat existens.

Difficultas igitur est de secundo puncto: Vtrum sit prius generare, quam velle generare, & quia

talis volitio est essentialis, generatio verò notionalis; Quæstio fit vniuersaliter: An essentialia sint priora notionalibus, an verò è contra. Essentialia dicuntur ea, quæ conueniunt Deo ratione essentiali, vt attributa, actus voluntatis, & intellectus, etiam quæ dicunt respectum ad creaturas, vt prædestinatio, & electio. In hac difficultate duæ sunt celebres sententiæ.

Prima est Scoti in 1. distinct. 6. quæst. vnica, qui absolutè ait essentialia esse priora notionalibus; & consequenter voluntatem generandi in Patre præcedere ad generationem; disponit enim inter hæc talem ordinem, vt in Patre sit prius ex natura rei intelligere absolutum, ad quod immediatè sequatur velle absolutum; postea, actus dicendi, ab ipso actu intelligendi absoluto diuersus. Hunc sequitur Caietanus. Qui & in Commentarijs supracitatæ quæst., & articuli, ac etiam ad artic. 3. quæst. 33. dicit essentialia necessaria esse priora notionalibus; non verò essentialia libera; in quo differt à Scoto.

Secunda est Capreoli in 1. distinct. 6. quæst. 1. Ferrariensis lib. 4. contra Gentes cap. 11. Canariensis in Comment. artic. 2. quæst. 41. 1. par. & citra omnem dubitationem est S. Thom. quæst. 2. de Po-

tentia artic. 3. ad 2. expressè, licet Caietanus conetur cum aliter exponere, & trahere in suam sententiam; & communior inter recentiores, vt videre est apud Ariagam disput. 46. sect. 5. num. 40. ponentes generationem non esse posteriorem voluntate generandi; sed solum eam comitari. Henricus in summa artic. 58. quæst. 2. & Gossredus quodlibet. 5. quæst. 1. relatus à Scoto loco citato, contendunt generationem esse priorem ratione voluntate generandi. Pro solutione.

Præmitto 1. posse aliquid esse prius alio in subiecta materia dupliciter: primo conceptione nostra solum; secundo ratione cum fundamento in re. Primo modo illud dicitur prius, quod licet ex sua natura non postulet concipi prius, nihilominus ex imperfectio modo cognoscendi concipientis prius concipitur. Secundo modo non dicitur prius, nisi id, quod postulat ex sua intrinseca ratione præintelligi. Exemplum primi modi habemus in processione ad extra, quæ in nostra conceptione est prior processione ad intra, licet secundo modo sit posterior; conclusa enim reuelatione de Mystério Sanctissimæ Trinitatis concipimus processionem ad extra, absque conceptione processionis ad intra, & tamen hæc potius esset illi

præ-

præintelligenda; eo quod Deus non operetur ad extra, nisi perfectè constitutus in suo esse, & essentia Diuina naturaliter postulat tria supposita; & sic est prius ex parte producentis Deum subsistere in tribus personis, & consequenter duas personas procedere, quam quidquam ab extra produci.

Præmitto 2. quædam prædicata essentialia expressè dicere ordinem ad notionalia, vt cum dicitur essentia communicabilis tribus personis, vt etiam voluntas generandi; (estto Canarien. loco citato contradicat, & putet hanc voluntatem esse notionalem, & propriam Patris). Nam re ipsa omnes personæ volunt generationem esse in Diuinis, licet sola prima velit se esse generantem. Alia sunt prædicata essentialia, quæ solum implicite dicunt talem ordinem, vt cum dicitur essentia infinita, in quo includitur, non tamen explicitè, quod sit communicabilis tribus.

Præmitto 3. huiusmodi actus essentialis, & notionales diuersimodè posse comparari, idest, vel inter se, vel in ordine ad ipsam essentiam Diuinam, vel in ordine ad aliquam personam, vel distinctè, vel in confuso conceptam. His positis.

Dico 1. respectu personæ con-

ceptæ sub propria ratione v.g. Patris vt sic, idest vt Patris, non esse prius intelligere, quam dicere, aut dicere, quam intelligere. Probatur 1. quia Pater vt sic non est prius, quam generare; imò ipsa generatione constituitur Pater: vt propterea lib. 5. de Trinitate cap. 6. S. P. admittat hanc conuertentiam: *Sicut Filius ad Patrem, sic genitus ad genitorem refertur, & sicut Pater ad Filium, ita genitor ad genitum.* Quod utique idè posuit, quia eo Pater, quo genitor, vt alibi dixit. Sed dicere in Patre non est aliud, quam intelligendo generare; ergo non potest Pater vt sic concipi vt intelligens, quin concipiatur vt dicens, & gignens.

Probatur 2. quia Pater non aliter dicit, aut producit Verbum, quam intelligendo; ergo vtrumque simul concipitur necessariò, si debet concipi Pater, vt Pater. Confirmatur, quia in Patre vtrumque simul est idem actus, videlicet essentialis, & actus notionalis, cum sola differentia connotationis relationis; sed in intellectione Patris vt sic, idest concepti vt Patris, connotatur relatio; ergo simul intelligitur esse dicere, & intelligere.

Dico 2. respectu Patris, vt est quædam persona, non concipiendo determinatè, seu explicitè, quod sit Pater; prius esse actum essentialis.

fentialem, quam notionalem. Probatur, quia, concipiendo hoc modo, intelligitur, ut est natura Divina subsistens incommunicabiliter, sine ordine ad aliam personam; ergo conceptione nostra erit prius actus essentialis, quam notionalis, esto semper implicitè, & materialiter concipiatur aliquid notionale, cuius tamen conceptus distinctus, & explicitus, ac determinatus debet consequi ad illum priorem de actu essentiali.

Dices actus essentialis debet se extendere ad omnia, nam intelligere Dei, seu talis Personæ est intelligere comprehensivum, & vel le sequitur ipsum intelligere in hoc, quod se extendit ad omnia. quæ concipiuntur à Divino intellectu; ergo obiectum eorum erunt etiam notionalia, & consequenter non poterit ullus actus essentialis, sine notionalibus concipi, ac proinde, vel semper simul erunt conceptione, vel notionalia priora essentialibus, cum obiectum semper præsupponatur intellecti, & volitioni. Resp. hoc argumentum, procedere de intelligere, & velle, prout sunt à parte rei; & probare, quod secundum se non sit prius unum altero, id est essentiali notionali, in eo sensu, quo in Symbolo S. Athanasij dicitur. *In hac Trinitate nihil prius, aut poste-*

*rius.* Unde si à nobis perfectè, & distinctè conciperentur, ut concipiuntur à Beatis, non posset concipi actus essentialis, quin conciperetur & notionalis. Sed quia concipiuntur à nobis imperfectè, propterea præscinditur à nobis ab eo, quod sint actus comprehensivi, & sic concipitur actus essentialis præcedens notionalem; tanto magis, quod concipimus illos per species creaturarum, in quibus relatio præsupponit essentialia, & fundatur in illis, & ad illa consequitur. Ad illud de obiecto. Resp. esse verum in illis, in quibus scientia accipitur ab ipsis obiectis, ut in nobis, non verò in illis, in quibus obiectum est idem realiter cum ipsa scientia; vel ipsum obiectum accipit esse ab ipsa scientia.

Dico 3. prius ratione esse generare, quam velle generare. Hæc assertio diuersimodè à pluribus probatur, quorum probationes non leues patiuntur difficultates. Probatur 1. communiter auctoritate S. Hieronymi, qui in commentarijs epist. ad Ephesios cap. 1. agens de Filio dicit, *numquam eum, ut esset, Paterna voluntas præcessit.* Hæc auctoritas patitur difficultatem, quia ibi S. Doctor videtur loqui de prioritate durationis, non verò de prioritate rationis.

Pro-



Probatur 2. ab alijs auctoritate Concilij Toletani XI. vbi dicitur, quod Sapientiam genitam nulla voluntas præcessit, sed sola natura. Sed nec ista videtur probare sufficienter intentum: nam potest dici Concilium ibi loqui contra Arrium, & excludere solum voluntatem, quæ antecedit per modum principij.

Probatur ab alijs 3. ratione: Quia generatio est obiectum voluntatis; sed obiectum est prius actui, qui tendit in ipsum; ergo prior est generatio, quam volitio, respiciens generationem. Contra hanc rationem opponitur, quod hic non est quæstio de prioritate; sed vtrum debeat prius concipi generatio vt existens, quam volitio eius.

Probant 4. alij ratione, quæ vtitur Vasquez; & est, quod in Deo solum debet poni ordo inter actus, qui verè sunt in ipso Deo; sed nullus est actus, quo velit generationem, vt futuram, aut possibilem; ergo solum, vt existentem; ac proinde est consequens ad ipsam. Probatur minor, quia generatio Diuina est necessariò existens, sicut ipse Deus est ens necessarium, & sicut Deus non potest esse neque futurus, neque possibile, ita neque generatio Diuina; ergo non potest dari volitio, quæ tendat in eam sub illis statibus,

sub quibus implicat eam esse, qualis esset volitio præcedens generationem, quæ compararetur ad illam per modum desiderij. Verum licet hæc ratio propius accedat ad probandum intentum, patitur nihilominus hanc difficultatem, quod licet in Deo re ipsa non sit hic ordo, tamen quæstio non fit de eo, quod est, prout est à parte rei; sed vtrum nostro modo concipiendi imperfecto, quo concipimus per species alienas, possit concipi volitio præcedens generationem.

Probatur igitur 5. fortius: Quia, vel loquimur de voluntate, vt concipitur in persona Patris, vt sic, vel vt concipitur in Deo absolute. Si primo modo, cum voluntas Patris ratione nostra supponat intellectionem, & intellectio Patris, vt Patris est, sit generatio, constat generationem debere esse priorem ratione nostra. Si loquamur secundo modo, certum est primò voluntatem generandi non posse esse priorem generatione, quia est prædicatum essentiale, dicens ordinem ad notionale, & ideò hoc prius concipi non potest; certum est etiam debere esse posteriorem, quia intellectio, quæ est in Deo, est secunda, & naturaliter producens verbum, vt dictio est: ergo prius in sua ratione perfici debet, quam intelligatur sequi volitio. In hoc autem falluntur aduersarij, quia

quia putant ex prioritate intellectiōis vt sic, quæ Deo prius ratione nostra conuenit, quam productio, rectè argui etiam, debere prius conuenire volitionem; cum tamen hæc sit in alio ordine, & consequenter supponat intellectiōnem in suo ordine perfectam, idest habentem illud omne, quod naturaliter ad eam sequitur.

Probatur vltimo: Quia intellectio præcedit volitionem; sed intellectio est idem actus cum dictione, qui est generatio; ergo sicut intellectio ratione nostra præcedit volitionem; sic etiam generatio debet illam præcedere.

Si opponas: Pater communicat Filio per generationem non solum essentiam, sed etiam omnia attributa, & consequenter etiam voluntatem generationis; ergo illa voluntas est prius in Patre, quam sit ipsa generatio. Resp. esse prius origine, non ratione, siue esse prius prioritate à quo, non prioritate in quo; quemadmodum etiam communiter dicitur: Pater est prior origine Filio, cum sit illud principium, à quo Filius accipit esse, & à quo producitur: non tamen dicitur prior ratione, aut conceptibilis pro vno instanti rationis, in quo non concipiatur Filius; relatiua enim sunt simul natura, & cognitione.

Dices 1. pro Scoto, & Caietano.

Etiam S. Thom. 1. par. quæst. 33. artic. 3. docuit absoluta esse priora respectiuis; sed velle generationem est quid absolutum, ipsum verò generare est respectiuum; ergo prius est illud, quam istud. Resp. maiorem esse veram, primo de illis absolutis, & essentialibus, quæ non dicunt ordinem expressum ad notionalia, secundo etiam de illis essentialibus, quæ comparantur ad notionalia eiusdem ordinis, vt est de intellectu respectu dictiōis, non verò de illis, vt comparantur ad diuersa, vt est in presenti.

Dices 2. Voluntas spirationis est prior, quam ipsa spiratio; sed est eadem ratio de spiratione, ac de generatione; ergo, sicut est prior illa, sic erit etiam prior ista. Respondent aliqui, data maiori propositione, negando minorem, eo quod Spiritus Sanctus procedat ex amore essentiali, & dilectio nostro modo concipiendi intelligitur vt ratio fundandi relationem spirationis. Sed contra est: quia videtur etiam esse ratio fundandi generationem, cum ista procedat à Patre volente ipsam. Propterea alij respondent, quod si comparantur inter se velle, & spirare, non vt actus, & obiectum, sed vt duo actus, aut vnus diuersimodè acceptus, prius est velle, quam spirare, sicut intelligere, quam dicere.

dicere: Si verò comparentur, vt actus, & obiectum, velle non est prius, quam spirare, quia est de ratione actus, & obiecti, vt obiectum non sit posterius actu, qui illum respicit. Si autem comparetur velle Patris, & Filij ad spirare, neutrum esse prius alio, eo quod in tali actu includatur spiratio, & in spiratione velle.

Dices 3. Antequam Pater concipiatur generare, est perfectè Beatus; sed perfecta Beatitudo includit comprehensionem essentia,

& omnium; quæ sunt in essentia, vna cum eorundem dilectione; ergo semper est necesse prius concipere in Patre actum voluntatis, & dilectionis, quam ipsam generationem. Resp. Patrem in quolibet signo durationis, vel naturæ esse completè beatum, & de hoc non disputamus; sed prius ratione concipi à nobis beatum essentialiter, id est comprehendens suam essentiam; quam concipiatur beatus etiam completiue quoad actum amoris.



# CONTROVERSIA Q V I N T A.

De singulis Personis Diuinis.

De Persona Patris.

## A X I O M A P R I M V M.

*Esse ingenum conuenit Patri solum.*

Ex Lib. 15. de Trinitate Cap. 26.



*I*deò cum Spiritum Sanctum genitum non dicamus; dicere tamen non audemus ingenum; ne in hoc vocabulo, vel duos Patres in illa Trinitate, vel duo, qui non sunt de alio; quisquam suspicetur. Pater enim solus non est de alio: ideò solus appellatur ingenus, non quidem in Scripturis, sed in consuetudine Disputantium.

## D V B I V M I.

Quomodo conueniat Patri esse ingenum.

**D**iuersimodè SS. PP. exponunt hoc nomen Ingenium. Nam S. Athanasius disputat. contra Arrium refert hanc vocem fuisse

ab Ecclesia adhibitam contra Sabellianos, qui tollebant distinctionem personarum, & consequenter dicebant Patrem natum esse de

*Arrium*

*& A*

*Ma-*

Maria Virgine: unde, ad excludendam generationem humanam à prima persona, DD. Catholici Patrem ingenuum appellabant; sed cum postea Arriati, hac voce abuterentur pro confirmanda sua hæresi, & dicerent solum Patrem esse ingenuum, & propterea diuersæ naturæ à Filio genito; putabant enim non posse Filium esse ingenuum, quin etiam esset factus, & quia factum, & non factum, non possunt esse eiusdem naturæ, sic etiam ingenuum, & genitum, diuersæ naturæ esse asserbant; & propterea SS. PP. ut constat ex S. Athanasio loco citato, & ex S. Ambrosio lib. de Incarnatione Cap. 9. ab hac voce, quæ aliquin in bono sensu fuerat in usu, refugebant, & reprehendebant Arrianos; quia, cum ipsi arguerent Nicænam Synodum, eo quod vteretur nominibus, quæ in Sacra Scriptura non continebantur, ipsi postea hac vterentur, vel potius abuterentur, quæ in illa expressè non habetur. Explicatis tamen postea huius nominis diuersis significationibus: Illi iidem Patres concesserunt in optimo, & Catholico sensu primæ Personæ tribui, eique re vera, & propriè conuenire; & licet posset etiam Spiritui Sancto accommodari; nam neque ipse est genitus; nihilominus usu factum est, ut tribuatur solum

Patri, eo quod accipitur pro negatione cuiuscumque processionis. Propterea Concilium Toletanum XI. ait: *Spiritus Sanctus, nec genitus, nec ingenuus creditur*: & S. Hilarius in lib. de Synodis: *Cum Deus unus sit, duo innascibiles esse non possunt*: & S. P. in Axiom. *Cum Spiritum Sanctum non dicamus genitum, dicere tamen non audemus ingenuum &c.* Ex his facillè conciliantur axiomata PP. circa hanc vocem, quæ alicui possent videri repugnantia, si attendantur ea, quæ communiter cum S. Thom. 1. par. quæst. 33. artic. 4. obseruantur à Theologis, videlicet hoc nomen multa significare, tum propter particulam *in*, quæ & negatiuè, & priuatiuè potest accipi, tum etiam propter *vi* *genitum*, quod per illam negatur, & significare potest multa, & primo id, quod est factum per veram effectiōem; secundo per generationem, quæ reperitur in creaturis; tertio quod per Diuinam generationem producit; quarto pro eo, quod in Diuinis accipit esse per processionem ab alio, siue sit per generationem, siue alio modo. Quocumque ex his modis accipitur, certum est quod sumpta particula *in* priuatiuè non potest hoc nomen ingenuum conuenire Deo, seu tribus Diuinis personis; eo quod priuatio dicit imperfectio-

Aa 2 nem,

nem, utpotè connotans subiectum, siue potentiam destitutam actu debito in esse. Si verò sumatur in negatiue, ut scilicet negat genitum primo, & secundo modo, idest, ut significat factum per veram effectiorem, aut productum per generationem illam, quæ reperitur in creaturis, idest in natura numericè diuersa, & cum nouitate essendi; hoc modo non solum conuenit Patri, sed etiam Filio, & Spiritui Sancto, ac etiam essentia Diuinæ, quæ licet, ut est in Filio, & in Spiritu Sancto, sit communicata, non tamen potest dici facta, vel genita. Si sumatur tertio modo, idest solum pro negatione eius, qui producit per generationem Diuinam, hoc modo conuenit & Patri, & Spiritui Sancto, ac etiam ipsi essentia Diuinæ, quæ nec generat, nec generatur. Sumpta verò quarto modo, idest pro negatione eius, qui per processionem accipit esse ab alio, inter tres Diuinas Personas solum Patri competit. Et hoc modo factum usu est, ut communiter sumatur in presenti. Quo posito: Adhuc remanet difficultas, quid significet hoc nomen ingenitum, seu innascibile in rigore. Vtrum scilicet negationem tantum, an verò etiam aliquid positium. Et quid, quatenus de solo Patre dicitur: in quibus sunt sententia opposita.

Prima est, quod dicat solam negationem essendi ab alio quocumque modo. Eam tenent Scotus distinct. 28. quæst. 2. Casar. in Comment. artic. 4. quæst. 33. 1. par. & alij, qui putant eam esse de mente S. Thomæ.

Secunda est Capreoli in 1. distinct. 28. quæst. 1. artic. 1. Durandi ibidem quæst. 1. S. Thom. 1. par. quæst. 33. artic. 4. & aliorum, asserentium dicere negationem fundatam in ratione primi principij.

Præmitto solutioni primo, quod si ingenitum sumatur negatiue, quatenus dicit non existens ab alio, tamquam à principio, vel à causa, posse etiam dici de essentia Diuina, quæ nec principiatur, nec causatur; nec tamen per hoc tolli, quominus ingenitum sit notio Patris, siue quia, ut aliqui volunt, satis est ad notionem, ut distinguat vnā personam ab alia, quod habet ingenitum, etiam si verificetur de essentia; siue quia S. Thom. loco citato ad secundum, & Durand. dicunt, quod esto essentia non principiatur, tamen, ut est in secunda, & tertia persona, est ab alio, non quidem producta; sed communicata: Pater verò nullo modo est ab alio. Si verò ingenitum sumatur aliquo modo priuatiue, improprie tamen, siue ad modum priuatiui, quatenus negat id, quod est aptum inef-

inesse, non quidem supposito, cui tribuitur, sed alteri supposito eiusdem naturæ, tunc ita conuenit Patri, vt non conueniat essentia, quia essentia vt sic non est suppositum; & Filio, ac Spiritui Sancto conuenit esse ab alio.

Præmitto 2. esse quasdam negationes, quæ significant aliquid positium, non solum in concreto, quod est commune omnibus negationibus, & formis accidentibus; sed etiam in abstracto, quod non conuenit omnibus; nam tenebræ formaliter dicunt solum negationem luminis; incorruptibilitas verò dicit entitatem posituam rei incorruptibilis; sic etiam inuisibilitas dicit entitatem posituam rei, quæ à nobis videri non potest: & ratio est, quia cum talis res positua, vt plurimum sit nobis ignota secundum se, illam nominamus per negationem alterius rei nobis notæ, habentis condiciones oppositas; Vnde nomen ipsum negatiuum non tam est impositum ad exprimendam negationem, quam ad significandum illud positium, ratione cuius conuenit ei illa negatio, quæ est ratio, quare repugnat subiecto formæ opposita. Quo posito.

Dico 1. Quod hæc nomina ingenitum, & innascibilitas, esto sint negatiua, nihilominus dicunt negationem fundatam in ratione

primi principij. Probatur, quia cum ratio principij sit positua, à nobis tamen explicatur per negationem essendi ab alio, per nomen ingenitum, quod esse, id est ab alio, reperitur in secunda, ac tertia persona; & nomen innascibilitatis imponimus ad significandam illam rationem, in qua fundatur talis negatio; ergo ista nomina ita sunt negatiua, vt tamen simul significant aliquid positium, non solum in concreto, sed etiam in abstracto.

Dico 2. Ingenitum formaliter significare negationem essendi ab alio, tanquam à principio personali, & materialiter significare ipsam Paternitatem. Hanc assertionem sic explico, & probo. Quidam arbitrantur significare negationem essendi ab alio, tanquam à principio, & tanquam à causa: Verum cum hæc notio ita sit propria Patris, vt alteri non conueniat, negatio essendi ab alio tanquam à causa non potest esse de ratione huius proprietatis; nam conuenit etiam essentia, & duabus personis productis. Significat ergo formaliter negationem principij, tum quia est nomen negatiuum; tum quia PP. communiter illud exponunt per huiusmodi negationem, vt dictum est in principio huius dubij; tum quia significat rationem primi principij,

pij; ratio autem primi optimè explicatur per negationem essendi ab alio priore secundum originem. Per hæc manet probata prima pars nostræ conclusionis. Secunda, nempe quod materialiter significet Paternitatem, probatur: Quia talia nomina significant materialiter eam rationem, in qua fundantur negationes, quas de formali significant; sed negatio, quam formaliter significat ingenuum, non est essentia Diuina, quatenus non est communicata ab alio, ut contendebat Scotus; nam idem esset fundamentum sui ipsius, negatio nempe negationis; eadem enim negatio formaliter est non esse communicatum ab alio, ac non esse ab alio tanquam à principio; ergo huiusmodi fundamentum est paternitas; nam in Patre non est alia ratio positiua, quam essentia, paternitas; & spiratio actiua; constat autem, nec etiam huiusmodi spirationem posse esse fundamentum talis negationis; hæc enim, nostro intelligendi modo, concipitur aduenire personæ iam constitutæ; erit ergo ipsa paternitas; cum nihil aliud remaneat, in quo possit fundari hæc negatio.

Dico 3. Illud materiale connotatum innascibilitatis non esse Paternitatem, ut Paternitas est, ac relatio formaliter; sed materiali-

ter, eo modo, quo communiter dicitur accidere personalitati primæ personæ, ut sit relatio. Hoc sic explico, & probo. Ex eo, quod Pater sit persona non existens ab alio, ut sunt secunda, & tertia, & quod una sit per generationem, altera per spirationem producta, necessario fit, ut persona producat per generationem, quæ est prima productio, sit improducta, quia neque à se potest produci per primam, aut per secundam productionem, quæ primam supponit; sed quod prima sit generans habet à paternitate; quia per illam habet, ut sit & subsistens incommunicabiliter, & primo producat; ergo à paternitate habet, ut sit innascibilis; quia verò paternitas non habet constituere primam personam, nisi quatenus est forma hypostatica, ideo innascibilitas non connotat paternitatem, nisi ut forma constitutiua personæ. Unde si per impossibile prima persona constitueretur per proprietatem absolutam, adhuc diceretur ingenua, & si per impossibile esset solum una persona Diuina, posset dici ingenua, & tamen non esset Pater. Verum tunc alia esset ratio ingenui, quam nunc; tunc enim solum denotaret negationem essendi ab alio, tanquam à causa, fundatam in summa perfectione essentia, cui repugnat ab alio pendere.

Ex



Ex hucusque dictis constat innascibilitatem esse notionem distinctam à paternitate, tum quia addit negationem supra explicatam; tum quia non dicit paternitatem sub propria ratione, sed materialiter. Constat etiam esse notionem solius Patris, quia licet Spiritus Sanctus non sit ab alio per generationem, est tamen alio modo; & ingenuum ex frequentiori usu disputantium, ut obseruat S. P. in Axiomate, negat omnem processionem; & merito negatur, seu absolute non conceditur, quod Spiritus Sanctus sit ingenuus, quia, esto formaliter non sit per generationem productus, illam tamen supponit.

Dices 1. S. P. lib. 5. de Trinitate cap. 2. ait: *quid aliud est ingenuus, nisi non genitus?* & S. Greg. Nazianz. orat. 2. de Pace ait significare vacationem principij; ergo per SS. PP. importat solam negationem essendi ab alio quocumque modo. Resp. SS. PP. loqui de significato formali, iuxta communem DD. expositionem.

Dices 2. Non apparet quid po-

situum possit importare hoc, quod est esse ingenuum; quia non importat essentiam, quæ est communis; non paternitatem, quia non esset notio distincta; non spirationem, quia est posterior; ergo solam negationem. Nec valet dicere cum Aureolo in 1. distinct. 28. quod, si diceret solam negationem, conueniret cuicumque rei, imò etiam non enti. Opponunt enim innascibilitatem esse notionem, ac proinde importare aliquid in persona, cui tribuitur; quod si non possit conuenire ei positivè, saltem conueniat ei negativè, ita ut sub illa ratione nulli alteri possit conuenire; quemadmodum infinitas, quæ licet sit negatio, tamen soli Deo conuenit, saltem in omni genere. Resp. negando maiorem; importat enim de materiali paternitatem, ut supra dictum est; nec inde sequitur, quod non sit notio distincta; nam de formali ipsa paternitas importat aliquid, quod formaliter non importat ipsa innascibilitas: ut patet ex dictis.



## A X I O M A   S E C U N D U M .

*Verbum in Diuinis est nomen Personale.*

Ex Lib. 7. de Trinitate Cap. 1.

**S**icut Filius refertur ad Patrem, ita & Verbum ad id, cuius est Verbum.

## D V B I U M I I .

An Verbum in Diuinis sit nomen Personale.

**F**uit error Origenis in expositione cap. 1. Euang. S. Ioan. quod Verbum in Diuinis non propriè, sed metaphoricè solum usurpari posset, quem postea secuti sunt Arriani ad tuendam suam hæresim, quod Filius sit substantiæ diuersæ à Patre. Vt propterea etiam à S. Thom. 1. par. quæst. 34. artic. 1. fons Arrianorum sit appellatus: quibus adhæserunt etiam Alogiani, sic dicti, ut refert S. P. in lib. de hæresibus hæresi 30. *Tamquam sine verbo, logos enim græcè Verbum dicitur, Quia Deum Verbum recipere noluerunt, Ioan: Euangelium respuentes, cuius nec Apocalypsim accipiunt, has videlicet Scripturas negantes esse ipsius. De*

quo in præsentī non disputo, cum iam in S. Eccles. communi consensu sit receptum, quod Verbum in Sacris Scripturis non solum metaphoricè, sed etiam propriè accipiat.

Difficultas est inter Scholasticos: an in significatione propria accipiat semper personaliter, an verò aliquando sumatur etiam essentialiter: in qua sunt tres sententiæ.

Prima est Durandi in 1. distinct. 27. quæst. 2. docentis propriè loquendo dici essentialiter; & solum secundum appropriationem tribui Filio; quemadmodum Amor tribuitur per appropriationem Spiritui Sancto; loquitur hic Auctor con-

consequenter ad sua principia de processionibus Diuinarum Personarum, quas negat esse per intellectum, & voluntatem; sed vult esse ex foecunditate naturæ; vt vidimus supra Controuer. 1. Dubio primo.

Secunda sententia est S. Thom. in 1. distinct. 27. quæst. 2. artic. 2. qui asserit sumi posse tam essentialiter, quam notionaliter. Sic etiam Ca-preolus ibi quæst. 2. artic. 1. concl. 4. Ferrarien. noster lib. 4. contra Gentes cap. 13. ver. Considerandum.

Tertia sententia est: posse sumi propriè loquendo solum personaliter: eam docuit S. Thom. 1. par. quæst. 34. artic. 1. quem sequitur Caietanus ibi, vbi etiam aduertit S. Doctorem tacitè retractare illud, quod docuerat quæst. 4. de Verit. artic. 2. & alibi; nempe posse dici etiam essentialiter. Et est communior inter Thomistas, tam antiquos, quam recentiores: cum quibus sentiunt Scotistæ distinct. 16. quæst. 2. & Gabibi quæst. 3. Solutioni.

Præmitto 1. iuxta S. Thom. Verbum in suo conceptu importare emanationem à dicente, de qua est dubium, an in Diuinis debeat esse secundum rem; an verò sufficiat, vt sit solum secundum rationem; si enim sufficiat emanatio secundum rationem, saltem in

sententia DD. qui distinguunt in Deo rationem intellectus per modum actus primi, & intellectionis per modum actus secundi, posset Verbum essentialiter dici; quia, iuxta illorum principia, nostro intelligendi modo concipitur intellectio manare ab intelligente, vt operatio; & quia quælibet persona est intelligens, quælibet habebit intellectionem, & verbum cum hac virtuali distinctione, & emanatione. Si verò necessariò requiratur emanatio realis, cum hæc supponat, vel includat distinctionem realem, quæ in Diuinis non est, nisi inter personas, non poterit propriè dici Verbum, nisi persona procedens per intellectionem.

Præmitto 2. quod quemadmodum in verbo vocali, quod est vox significatiua alicuius, est duplex respectus, alter ad proferentem verbum, qui est relatio effectus ad causam, alter ad rem significatam, quam ex intentione representat; ita etiam possumus in mentali distinguere respectum emanationis à dicente, & respectum signi, seu manifestationis ad rem significatam: primus respectus conuenit Verbo Diuino ratione proprietatis personalis, secundus verò ratione essentiae, & intellectionis absolutæ, quam includit; & ratione huius duplicis respectus po-

test. dici verbum alterius dupliciter, primo ut dicentis, ac proferentis, & sic dicitur Verbum solius Patris, secundo, ut manifestati, & significati, & sic potest dici Verbum & essentiae, & Patris, & sui ipsius, & Spiritus Sancti, & creaturarum.

Præmitto 3. in nobis hanc esse differentiam inter verbum nostrum, & dicere, ac intelligere; quod dicere est prius natura verbo, & hoc prius natura quam intelligere; nam dictio nihil est aliud, quam productio verbi, id est speciei expressæ, seu qualitatis repræsentatiuæ obiecti, quæ, ut est in fieri, appellatur dictio, ut est in facto esse, dicitur verbum; ipsi autem verbum est prius natura, quam intelligere, quia verbum dicit solum speciem secundum se, ut est forma quædam; intelligere verò dicit verbum, ut actuans intellectum, & faciens vitaliter intelligentem; vnde intelligere est effectus formalis ipsius dictationis, & ipsius verbi; nec unquam separantur in intellectu creato hæc tria; nam omnis operatio intellectus est dictio, ut potè realiter ab intelligente procedens, & cum sit actio, habet aliquem terminum, qui terminus alicui subiecto debet inhaerere. In Diuinis non sic se habent ista; nam licet dicere, quod soli Patri conuenit,

includat intelligere absolutum; ipsum tamen intelligere reperitur sine dicere; nam Filius, & Spiritus Sanctus intelligunt; neuter tamen dicit, verbum proferendo; & in ipso Patre est prius intelligere, quam dicere, aut producere Verbum; illud autem est absolutum, & essenziale, hoc verò relatiuum, & notionale, quod fundatur in illo, ut sæpè aduertit Sanctus Pater, His positis.

Dico 1. Verbum in Diuinis esse propriè nomen personale solum. Quod sit nomen propriè personale est de Fide, ex cap. 1. Euangel. S. Ioan. *In principio erat Verbum &c.* (vbi aduertit Erasmy, perperam dixisse, melius verti: *In principio erat sermo, quam: erat Verbum*; nam licet λόγος verti possit etiam sic; cum aliqui Patres antiquiores, ut S. Cyprianus, & Tertullianus, vertant; sermo; nihilominus Verbum est, aptius, ad significandum simplicitatem Filij, quia significat aliquid magis vnum, quam significet sermo). Quod verò sit solum personale non est ita certum; propterea.

Probat 1. auctoritate S. Patris lib. 5. de Trinitate cap. 13. vbi docet Verbum dici relatiuè. Et lib. 6. cap. 2. expressè ait: *Et quod dictum est. In principio erat Verbum in Patre, erat, Verbum intelligitur.*  
Aut,

*Aut, si in principio sic dictum est, ac si diceretur ante omnia: quod sequitur: & Verbum erat apud Deum, Verbum quidem solus Filius accipitur; non simul Pater, & Filius tanquam ambo unum Verbum. Sic enim Verbum, quomodo imago, non autem Pater, & Filius simul ambo imago, sed Filius solus imago Patris, quemadmodum & Filius, non enim ambo simul Filius. Quod verò adiungitur: & Verbum erat apud Deum; multum est, ut sic intelligatur Verbum; quod solus est Filius, erat apud Deum &c. Sic etiam lib. 7. cap. 1. & 2. ex professo negat Patrem esse verbum. Similia habet etiam S. Anselmus in Monologio cap. 54.*

Probatur 2. ratione. Quia Verbum in nobis dicitur conceptus, emanans realiter ab intelligente; sed in Deo nihil emanat realiter per intellectum, nisi Filius; ergo solum de Filio propriè dicitur, quod sit Verbum.

Opponunt Aduersarij: satis esse ad rationem Verbi, quod emanet secundum nostrum modum concipiendi, ut sensit olim S. Thomas locis supracitatis; ergo, non solum personalitè, sed etiam essentialitè potest dici Verbum in Diuinis. Resp. in hac explicatione non teneri visitatam acceptionem huius vocis *Verbum*, sufficere tamen, ut

qualecumque effugium, ad extenuandam nostræ conclusionis certitudinem: si enim per fidem non constaret de reali emanatione personarum, arbitraremur intellectiōnem Dei habere etiam rationem Verbi, & diceremus non esse de ratione Verbi, vt realiter emanet; sed hoc habere in intellectu creato, propter huius limitationem; nec esse requirenda omnia in Verbo Diuino, quæ reperiuntur in humano, vt constat in ratione accidentis, informationis, & inhesionis, quæ conueniunt verbo creato, vt patet, & Verbo Diuino nullo modo conuenire possunt. Nunc autem cum per reuelationem teneamus realem emanationem non dicere imperfectionem, vt dicerent informatio, & inhesio, si in eo admitterentur, meritò asserimus, quod de ratione Verbi sit realis emanatio, & sic esse nomen personale, non verò essentialè; & hoc eo magis, quod in vsu nominum loquendum est cum multis, vt docuit Aristot. lib. 2. Top. loco 5. Excluduntur verò inhesio, & informatio à Verbo Diuino respectu dicentis, non solum quia in Deo non habent locum accidentia physica, sed etiam quia hæc accidentia ipsi verbo in nobis, & non sunt de essentia eius, vt patet in nostro verbo vocali, quod non inhaeret dicenti.

Dico 2. etiam Dicere esse actum notionalem Patris. Hoc sequitur ex præcedenti assertionem. Et probatur, quia dicere nihil aliud est, quam verbum producere, seu proferre; sed est solius Patris Verbum proferre: ergo solius Patris est dicere; propterea S. Thom. quæst. .... de Verit. artic. .... ad 4. obseruat S. Anselmum videri sibi contrarium, dum Verbum attribuit soli Filio, & dicere singulis personis.

Contra hanc doctrinam opponitur, quod dicere non solum significat verbum producere, sed etiam manifestare aliquid; sed manifestatio conuenit omnibus personis; ergo etiam dictio. Et confirmatur ex S. Basil. lib. 5. contra Eunom. cap. 11. ubi dicit: *Dei Verbum Filius est, Filij autem Verbum Spiritus Sanctus*. Ergo etiam Filius dicit: ergo dicere non est solius Patris. Hoc confirmat S. Basil. ex illo Diu. Pauli: ad heb. cap. 1. *portans omnia verbo virtutis sue*; ibi enim est sermo de Filio, cui tribuitur habere verbum; sed nihil aliud procedit à Filio, quod posset dici Verbum, nisi Spiritus Sanctus: ergo etiam Filio competit dicere. Resp. manifestationem posse sumi dupliciter, id est vel passiuè, vel actiuè, & quidem, si sumatur passiuè, omnes personæ dicuntur manifestari Ver-

bo Diuino producto; sed hoc non est dicere: si verò sumatur actiuè, solus Pater est, qui Verbo dicit, & manifestat, quia, vt rectè aduertit Durandus loco citato, nullus dicitur manifestare per verbum ab alio prolatum. Ad confirmat. Respondent aliqui recentiores Spiritum Sanctum dici verbum Filij, quatenus est manifestatiuus eius, quando apparuit in figura sensibili columbæ in Iordane supra Christum Dominum, atque sic figuratiuè dici Verbum eius; Verum alia videtur esse mens Diu. Basilij loquitur enim ibi de Filio, vt est Deus, non verò, vt est homo: vitur namque loco illo citato Diu. Pauli, qui est de Filio, vt Deus est. Dicendum est igitur cum S. Thom. quæst. 4. de Verit. artic. 3. Græcos PP. consueuisse indifferenter vti nomine Verbi, & imaginis, ad significandam personam, quocumque modo producentem, in Diuinis; in quo tamen præferenda est consuetudo Latinorum, vt magis consona Sacra Scriptura. Vel etiam dic cum eodem S. D. in 1. par. quæst. 34. artic. 2. ad 5. S. Basilium loqui figuratè, & improprie; & sic etiam in textu Diu. Pauli ly Verbum figuratiuè sumi pro imperio; quo pacto solemus etiam appellare verbum regis eius imperium.

Dices 1. cum Durando contra pri-

primam assertionem: Verbum nihil aliud importat, quam actum intelligendi; sed hic in Diuinis est essentialis, & communis; ergo etiam Verbum. Resp. negando maiorem; intelligere enim dicit solam habitudinem ad rem intellectam; sed Verbum dicit etiam habitudinem realem termini producti ad producentem, & consequenter etiam distinctionem realem ab illo.

Dices 2. Dicere est correlatum Verbi; sed dicere importat actum essentialem, non verò notionalem; ergo essentialiter, & non personaliter dicitur Verbum in Diuinis. Probatur minor ex S. Anselmo in Monolog. cap. 58. ubi ait: *Sicut Pater est intelligens, ita Pater est dicens, Filius est dicens, & Spiritus Sanctus est dicens*: ergo dicere est actus communis, & essentialis. Præterea qualibet persona dicens dicit se, & alia, tam increata, quam creata; sed nullus actus notionalis conuenit omnibus personis, aut reflectit supra personam, à qua est, aut cadit supra creaturam; nam actus notionalis dicit productionem, quæ nec terminatur ad creaturas, nec ad aliam personam, quam ad illam, quæ per ipsam actum producit; ergo tam dicere, quam Verbum semper important aliquid essen-

tiale, & commune, non verò notionale, & personale. Resp. negando minorem. Ad probationem. S. Thom. loco citato artic. 1. ad 3. respondet S. Anselmum sumpsisse ibi dicere improprie pro eo, quod est intelligere, vel fortè ibi sensit cum DD. illis, qui docent: dicere supra intelligere addere solummodo emanationem secundum rationem. Ad Confirmat. Resp. dupliciter sumi posse ly dici: primo pro eo, quod est produci, aut terminare intrinsecè dictionem; secundo pro eo, quod est manifestari verbo: primo modo non solum in Diuinis, sed etiam in creatis dicitur tantummodo verbum; secundo modo dicuntur omnia, quæ verbo representantur, & in hoc sensu, dici, importat solum denominationem extrinsecam.

Dices 3. ex S. Ansel. in Monolog. cap. 31. 33. & 34. Dicere Summo Spiritui nihil aliud est, quam cogitando intueri. Sed intueri est commune; ergo etiam dicere. Resp. primo ex S. Thom. loco citato artic. 1. ad secundum. S. Anselmum ibi accipere cogitationem improprie pro contemplatione. Secundo Resp. sumi ibi intueri pro intellectione, ut terminata ad Verbum, quod concipit.

## A X I O M A T E R T I V M.

*Verbum Diuinum est expressiuum eorum omnium,  
quæ nouit Pater.*

Ex Lib. 15. de Trinitate Cap. 14.



*Verbum Dei Patris vnigenitus Dei Filius, per omnia  
Patri similis, & æqualis, Deus de Deo, lumen de  
lumine, sapientia de sapientia, essentia de essentia,  
est hoc omnino, quod Pater, non tamen Pater, quia  
iste Filius, ille Pater. Ac per hoc nouit omnia,  
quæ nouit Pater, sed ei nosse de Patre est, sicut esse. Nosse enim,  
& esse illi vnum est. Et ideo Patri sicut esse non est à Filio, ita  
nec nosse. Proinde, tanquam se ipsum dicens, Pater genuit Ver-  
bum sibi æquale per omnia: non enim se ipsum integrè, perfectè-  
que dixisset, si aliquid minus, aut amplius esset in eius Verbo,  
quam in ipso. Ibi summè illud agnoscitur, est est, non non:  
Et ideo Verbum hoc Veritas est, quoniam quidquid in ea  
scientia, de qua genitum est, & in ipso est. Quod autem in ea  
non est, nec in ipso est. Et falsum habere aliquid hoc Verbum  
nunquam potest, quia immutabiliter sic se habet, ut se habet  
de quo est.*





## D V B I V M I I I

Vtrum Verbum procedat ex cognitione omnium Personarum, & creaturarum.

**V**aldè celebris, & controuersa difficultas hæc est inter Theologos. An Filius, quatenus Verbum est, non solum ad Patrem intelligentem habeat respectum, vt docuit S.P. lib.7. de Trinitate cap.3. sed etiam ad omnia, quæ Pater intelligit; atque adeò etiam ad creaturas. Quod idem est, ac querere: Vtrum processerit Verbum Diuinum ex cognitione omnium, quæ Pater intelligit; ac proinde etiam ad ea omnia respectum habeat; tamquam repræsentans ea, modo intelligibili. Verbo enim intellecto, repræsentantur ea, quæ sunt intellecta, & quasi dicuntur, modo supra explicato. In hac quæstione sunt sex celebres sententiæ.

Prima est Scoti in 2. distinct. 1. quæst. 1. artic. 2. & quodlibeto 14. asserentia Verbum Diuinum procedere solum ex cognitione essentia Diuinæ; at Personarum non, nisi concomitanter, quatenus non possunt ab essentia separari (vt patet ex eodem in 1. distinct. 27.

quæst. 3.) ; creaturarum verò nullo modo; distinguit enim duo instantia naturæ: primum, in quo Pater cognoscit suam essentiam; secundum, in quo cognoscit creaturas, vt obiectum secundarium. Et rursus in primo instanti distinguit triplex instans originis. Primum, in quo Pater habet cognitionem suæ essentia à seipso. Secundum, in quo Filius accipit eam cognitionem à Patre. Tertium, in quo Spiritus Sanctus eam cognitionem accipit à Patre, & Filio. In secundo, instanti naturæ assignat etiam sua instantia originis respectu creaturarum, sed in quibus supponatur Verbum, iam productum in primo instanti naturæ; nam licet sentiat Verbum accipere cognitionem creaturarum, à Patre, cum tamen illam accipiat in secundo instanti naturæ, supponit iam Verbum esse productum in primo.

Secunda sententia est Vasquez Disput. 142. & 143. docentis Verbum procedere ex cognitione essentia, attributorum, & Patris,

tris, ac Filij; non autem Spiritus Sancti, neque creaturarum quocumque modo accipiantur. Sequitur etiam Philippus Gama-chaus.

Tertia sententia est Albertini tom. 2. suorum principiorum in prædic. ad aliquid quæst. 14. Theolog. dubit. prima, Arrubalis, Alexandri Pefantij, & aliorum affirmantium Verbum procedere ex cognitione omnium, quæ sunt formaliter in Deo; nullo autem modo ex cognitione creaturarum.

Quarta sententia est P. Raphaelis Auerfæ quæst. 34. sect. 3. & aliorum, qui docent procedere de cognitione omnium, quæ sunt formaliter in Deo, & creaturarum secundum esse possibile, non tamen de cognitione omnium personarum intuitiua, sed abstractiua. Huius sententiæ meminit etiam Præpos. quæst. 34. artic. 3. dub. 1.

Quinta est Caiet. in Comment. quæst. 34. ad artic. 3. Zumel ibi disput. 1. Molinæ ibidem disput. vnica. Suarez lib. 9. cap. 4. 5. 6. & 7. Tanneri Disput. 4. quæst. 4. dub. 3. Amici disput. 26. sect. 3. 4. & 5. & aliorum; qui sentiunt Verbum procedere ex cognitione intuitiua omnium, quæ sunt in Deo formaliter, & de cognitione creaturarum possibilem, non tamen

de cognitione creaturarum existentium.

Sexta sententia est procedere ex cognitione omnium, quæ sunt formaliter in Deo, & etiam omnium creaturarum, tam secundum esse possibile, quam secundum esse futurum, seu existens. Hanc puto esse S. P. tum in Axio- mate, tum alibi. S. Thom. 1. par. quæst. 34. artic. 3. Valentiz 1. par. quæst. 8. punct. 2. Arriagæ, Zunigæ. His positis, pro solutione.

Præmitto 1. id, quod supra etiam indicaui, ipsum nempe dicere, seu producere Verbum supponere intelligere essentiale, & illud includere, addendo relationem producentis Verbum. Quo posito, quæstio in præsentia est, an dicere, & Verbum productum supponant solum cognitionem essentia Diuinæ, an verò etiam personarum, & creaturarum: ita ut sit prius ratione nostra Patrem intelligere prædicta, quam producere Verbum, & consequenter prius quam Verbum sit: an verò oriatur solum ex notitia essentia, ut præsupposita dictioni; posterius autem sit, quod Verbum productum repræsentet personas, ac creaturas, eo quod intellectio essentialis post productionem Verbi sortiatur rationem repræsentatiui, tam personarum, quam crea-

tura-

turarum; nam Scotus, non solum locis citatis, sed etiam in primo distinct. 32. quæst. 1. contendit procedere ex notitia solius essentiae, & concomitanter personae ea notitia cognosci, quia sunt idem cum essentia; quia verò creaturæ sunt obiectum secundarium, vult eas cognosci in posteriori signo. Aliqui recentiores in suis M. SS. putant hanc quæstionem non habere locum in sententia eorum, qui tenent intelligere essentialē, & dicere esse diuersos actus; & mouentur ex eo, quod intellectio essentialis, quæ supponitur notionali, cum sit vnica, & perfectissima, terminatur ad omne cognoscibile, & consequenter fieri non posset, quin Verbum ex omnium cognitione procederet. Hanc sententiam veram non censeo, eo quod, non solum in horum AA. sententia, sed etiam, & multo magis in nostra, intellectio essentialis est vnica, & perfectissima; & consequenter eundem locum habere arbitror apud eos, ac apud nos; nisi fortè validiori ratione fulciantur, quam adhuc apud illos non vidi; Verum quidquid sit de hoc; certum est iuxta nostra principia quæstionem hanc habere locum. His positis.

Dico 1. Verbum procedere ex cognitione essentiae, personarum, & omnium creaturarum. Proba-

tur primo ex S.P. cum enim in axiomate dicat: *Verbum hoc veritas est, quoniam quidquid in ea scientia, de qua genitus est, & in ipso est; & antea dixisset: Ac per hoc nouit omnia, quæ nouit Pater, sed ei nosse de Patre est, sicut esse.* Manet omnem cognitionem cuiuscunque obiecti cum accipere à Patre, & consequenter procedere ex cognitione prædictorum obiectorum. Similia habentur in lib. de cognitione veræ vitæ cap. 14. & alibi in operibus S.P.

Probatur 2. ratione, quia Verbum procedit ex cognitione essentiae, & Paternitatis, vt concedit etiam Scotus; sed illa cognitio pro illo instanti, seu signo rationis terminatur necessariò etiam ad alia obiecta; ergo etiam ex cognitione eorum procedit. Probatur minor, quia cognitio illa essentiae, quæ præcedit; non solum est intuitua, vnde habet, vt necessariò cognoscat etiam Verbum, & Spiritum Sanctum, aliàs esset abstractiua, & imperfecta (cognoscere enim Patrem intuitiue, importat secum cognitionem etiam Filij, relatiua enim sunt simul natura, & cognitione, quæ si non est intuitiua, necesse est vt sit abstractiua; quod quidem de Spiratore. & Spirato dicendum est; intuetur enim Pater se ipsum, & Filium, vt sunt) sed etiam est comprehensiuua.

C c

Ex

Ex quo sequitur, quod debeat etiam esse cognitio creaturarum quarumcumque : ergo Verbum procedit omnino ex cognitione Essentiae, Personarum, & creaturarum. Confirmatur, quia necessario procedit ex cognitione beatifica, quae talis non esset in Deo, si non esset comprehensiva; deesset enim illi tunc cognitio illorum obiectorum, quod est contra rationem Beatitudinis Dei, cui nihil deesse potest.

Probatur 3. Quia notitia actualis tantum repraesentat actu, quantum potest repraesentari per speciem, quae est illius principium, concurrens quantum potest; sed essentia Divina, quae excellentiori modo praestat id omne, quod in alijs cognitionibus creatis praestat species impressa, est repraesentativa omnis obiecti cognoscibilis, utpotè infinita, & proportionata intellectui infiniti; ergo omnia praedicta necessario repraesentat. Hanc rationem tanti facit Arriaga. Disput. 52. sect. 1. num. 21. ut eam solum habeat pro sufficienti ad probationem huius conclusionis. Confirmatur: quia indubitatum est, Verbum Divinum, quatenus includit intellectum essentialem, omnia repraesentare; sed hoc habet ex vi suae processionis, ut optime arguit S. Pater in Axiomate; nam per illam communicatur ei

talis intellectio: ergo &c.

Probatur 4. Quia in Deo est vnica sola intellectio obiecti primarij, & secundarij; sed Verbum procedit indivisibiliter ex cognitione illa vnica vtriusque obiecti; ergo ex cognitione omnium praedictorum; quorum aliqua sunt obiectum primarium, ut essentia, & personae, alia sunt obiectum secundarium, ut sunt creaturae. Probatur minor, quia alias, vel esset ponendum duplex Verbum, vel saltem admittendum, quod aliqua cognitio Patris ut sic terminaretur ad Verbum; vtrumque est maximum inconueniens; ergo Verbum procedit indivisibiliter ex illa cognitione tam obiecti primarij, quam obiecti secundarij. Probatur sequela maioris: quia vel illa cognitio, ex qua non procederet Verbum Divinum, haberet aliquem terminum, sicut habet alia, vel non; si haberet, hoc esset aliud Verbum; si non haberet, iam daretur aliqua cognitio Patris ut sic, quae non terminaretur ad Verbum; & sic esset falsum quod docent SS. PP. idest Verbum procedere per cognitionem, qua Pater cognoscit omnia.

Dico 2. Verbum Divinum procedere ex cognitione intuitiva non solum essentiae, ac Paternitatis, sed etiam Verbi, & Spiritus Sancti,

cti, & creaturarum omnium existentium pro aliqua differentia temporis. Hæc assertio est contra illos DD. quos supra retuli, dicentes procedere solum ex abstractiua quorundam ex enumeratis obiectis, qui mouentur solum ex eo; quod cognitio intuitiua sit rei existentis vt sic, & in eo signo rationis, quo Verbum procedit, nec dum Verbum, aut Spiritus Sanctus, aut creaturæ existunt. Quorum rationi infra satisfacio.

Probatur verò conclusio quoad personas Diuinas: Quia verbum procedit ex cognitione illarum clara, & quidditatiua; sed personæ Diuinæ non possunt cognosci quidditatiuè quin cognoscantur, vt existentes, quod est idem omnino, ac cognoscere eas intuitiue; ergo cognitio personarum, per quam producit Verbum, est intuitiua. Probatur minor: quia de illarum ratione essentiali est existentia, cum sint omnino ens necessarium; ergo non potest cognosci earum quidditas, quin eodem actu cognoscatur earum existentia. Confirmatur, quia videntur, vt sunt idem realiter cum essentia, quæ necessariò videtur vt existens.

Probatur nunc quoad creaturas: Quia istæ ab æterno sunt determinatæ à Diuina voluntate ad exi-

stendum, & cognoscuntur secundum omnes, & singulas earum rationes; ergo clarè, & intuitiue.

Dices 1. Spiritus Sanctus procedit ex amore Diuinæ essentiae, & non creaturarum; ergo & Verbum ex cognitione solum Diuinæ essentiae. Probatur antecedens procedit ex amore necessariò, & naturali; sed amor creaturarum non est talis, sed est liber; ergo non procedit ex amore earum. Consequentia patet ex paritate; nam amor spiratus proportionaliter respondet notitiæ, seu sapientiæ genitæ.

Respondent aliqui cum Molina, & Zumel, negando consequentiam, & assignando disparitatem in eo, quod creaturæ etiam possibiles non sunt necessariò diligibiles, esto sint necessariò cognoscibiles. Hanc ego responsionem non amplector, quia de possibili- bus censeo esse necessariò diligibiles; vnde, consequenter loquendo, nego antecedens: & dico Spiritum Sanctum procedere etiam ex dilectione creaturarum tam possibilium, quam futurarum, propter rationes adductas; quæ licet sint de productione Verbi; nihilominus concludunt etiam de productione Spiritus Sancti, si proportionaliter ei accomodentur. Verum quia communiter Theolo-

gi docent Amorem creaturarum, existentium, seu futurarum non esse necessarium, sed liberum, remanet explicandum, quomodo procedat ex earum amore; & hoc eo magis habet difficultatem, quod communis sensus est: in Diuinis necessaria, & naturalia esse priora liberis; vnde sequitur vtramque productionem, vtpotè necessariam, debere esse priorem quocumque actu libero, tam intellectus, quam voluntatis.

His tamen non obstantibus. Resp. nullum esse inconueniens, quod idem amor comparatus ad obiectum necessarium sit necessarius, & comparatus ad contingens sit liber; cum vnico, eoque indiuisibili actu Diuino contineatur omnis perfectio actuum creatorum; Vnde argumentum conuincit quidem creaturas non posse esse principium Spirationis, aut Generationis, eo quod principium actionis non possit esse minus necessarium, quam sit actio ipsa; sed non conuincit cognitionem, & amorem ipsarum, quæ quoad obiecta primaria sunt necessaria, posse esse principia earum. Axioma illud Theologicum: quod necessaria sunt priora liberis, intelligendum est intra eundem ordinem, & eandem lineam, id est vt inter communia, & absoluta, communia necessaria sint priora communi-

bus liberis; & inter relativa relationes necessariae sint priores liberis.

Inftabis: ex dictis saltem sequi tam productionem Verbi, quam productionem Spiritus Sancti esse partim necessarias, partim liberas: necessarias, quatenus procedunt ex cognitione, & dilectione necessarijs; liberas, quatenus procedunt ex eisdem liberis. Resp. negando illationem; nam aliud est, quod aliquid contingens, aut liberum sit; aliud, quod contingenter, & liberè concurret ad productionem. Exemplum habemus in creaturis, quæ omnes liberè productæ sunt, & contingenter existunt; non tamen omnes liberè, aut contingenter operantur, aut producant: plures enim causæ necessariae sunt, & non possunt non operari: sic Sol liberè est productus, & tamen necessariò illuminat: sic ignis est effectus liber Dei, & tamen necessariò calefacit: sic etiam cognitio, & dilectio liberæ creaturarum futurarum existentes in Patre, licet quoad terminationem sint liberæ, & potuerint ad eas non terminari; sunt tamen, & quoad entitatem actus, necessariae, & ex suppositione quod sint, & ad eas terminentur, ita necessariò explicantur ad productionem personæ, & comunicantur, vt non possint non

non producere, & non communicari.

Dices 2. Si procederet ex notitia personarum, procederet etiam ex notitia sui ipsius; sed hoc non potest esse, nam ratione nostra prius est quod sit, seu producat, quam quod cognoscatur; præcedunt enim obiecta cognitionem, non verò cognitiones obiecta; ergo ex cognitione personarum non potest procedere. Resp. negando minorem; & ad rationem in ea contentam respondetur: illud principium esse verum, quando obiecta sunt causa scientiæ, vt in scientijs, & cognitionibus nostris: secus verò quando scientiæ sunt causa, vel producunt obiecta. Exemplum habemus in nobis in productione entis rationis (in sententia eorum, qui illud concedunt), in qua hoc ens non præcedit sui cognitionem; sed hæc præcedit illud, & dat ei esse.

Dices 3. Verbum dicit relationem realem ad id, de quo gignitur, sed non dicit relationem realem nec ad creaturas, nec ad Spiritum Sanctum, nec ad se ipsum; ergo non procedit ex istorum cognitione. Resp. dicere relationem realem ad id, à quo procedit, vt producti ad producentem, qualem relationem non dicit ad creaturas, nec ad Spiritum San-

ctum, nec ad se ipsum, quod aliqui explicant ex doctrina S. Thom. quæst. 4. de Veritate, quæ est de Verbo, artic. 5. dicendo: Verbum dicere relationem ad id, à quo est, non verò ad id, ad quod est; & ideo non potest dici, quod Verbum sit à creatura, sed benè quod sit Verbum de creatura. Sed quidquid sit de hoc, nam apud me habet aliquam difficultatem. Resp. malè inferri ex eo, quod Verbum procedat ex cognitione creaturarum, Spiritus Sancti, & sui ipsius, etiam procedere ex creaturis &c. & hæc esse principium Verbi. Nam licet in nobis, qui cognitionem accipimus ab obiectis, medijs speciebus, quas ista imprimunt, cognitio ipsa ab eis pendeat aliquo modo, tamquam à principio, & consequenter, sublato obiecto, tollatur cognitio, hoc tamen non habet locum in Deo, qui cognoscit omnia per suam essentiam, à cuius scientia, & voluntate tamquam à causa omnia creata pendunt, & accipiunt esse; Vnde tantum abest, quod ipsæ sint principium Verbi, aut Spiritus Sancti; vt potius è contra cum Patre vterque sint earum causa. Nec mirum videri debet, quod scientia creaturarum sit principium huius productionis, & non sint principium ipsæ creaturæ, nam de hoc habemus etiam in nobis exemplum.

plum. Artifex enim, qui habet ideam alicuius artefacti v.g. Arcæ, vt exemplificat S. P. Tract. 1. in Ioan. per suam scientiam, & ideam huius arcæ est causa physica eius, & tamen hæc arca in hac productione non est causa, alias esset principium, & causa sui ipsius, quod non potest esse; imò non solum creaturæ, sed nec etiam filiatio, aut processio Spiritus Sancti, possunt dici Principium productionis Verbi; nam alias Verbum procederet à se ipso, & ab eo, quod accipit esse ab ipso, nempe à Spiritu Sancto, & præterea esset imago sui, ac etiam eiusdem Spiritus Sancti, quæ repugnare nullus est, qui non videat. Nec obstat si dicas physicè quidem nec à se ipso, nec à Spiritu Sancto procedere, sed solum intentionaliter vt ab obiecto intelligibili; nam in productionibus Diuinis hæc duo separari non possunt, concurrere vt principium intentionale, & concurrere physicè, eo quod in Deo ipse concursus intentionalis ad productionem sit ipsemet concursus physicus, per actus nempe intellectus, & voluntatis. Sola itaque paternitas se tenet ex parte principij productiui, vel vt conditio, vel vt ratio constitutiva principij actiui, iuxta diuersitatem sententiarum; nam essentia Diuina non est principium productiuum.

Verbi, nisi quatenus est determinata per Paternitatem ad esse talis personæ, realiter à Filio distinctæ; illæ verò aliæ relationes non possunt dici principium Verbi, esto & ipsæ cum Diuina essentia identificentur, quia solum concomitanter se habent secundum proprias rationes.

Dices 4. Antequam intelligatur Pater volens, concipitur intelligens; sed in eo signo, in quo Pater est intelligens, est etiam dicens; ergo prius producit Verbum, quam cognoscat Spiritum Sanctum. Probatur consequentia, quia Spiritus Sanctus non potest cognosci, nisi existens, & in eo signo, in quo Pater est dicens, nondum existit, quia nondum est productus; ergo prius producit Verbum, quam cognoscatur Spiritus Sanctus. Resp. negando consequ. Et ad prob. eius Respondeo: in eo signo, quo Pater est intelligens, ac dicens, cognoscere etiam suam essentiam comprehensiuè, ac proinde cognoscere etiam Spiritum Sanctum.

Si instes: in eo signo nondum est volitio; ergo nondum est Spiritus Sanctus, qui per eam producit. Resp. secundum rem in quocumque signo est Pater, ac Verbum, esse etiam Spiritum Sanctum; ac proinde in quocumque cognoscitur vna persona, cognoscun-



scuntur etiam omnes, cum inter illas sit solum ordo originis, siue à quo, vt vocant; qui ordo nihil facit ad prioritatem cognitionis Dei: nostro verò modo concipiendi imperfectè, & inadæquatè, quia volitio supponit intellectionem in nobis, vnde desumimus species ad cognoscenda Diuina, prius concipitur Pater dicere, quam velle, quod tamen non facit, vt illa imperfectio sit refundenda in obiecto, sed potius tollenda, quemadmodum cum ex alijs prædicatis creaturarum conamur intelligere Diuina, semper vel implicitè, vel explicitè excludimus à prædicatis Diuinis illas imperfectiones, quæ sunt in nostro modo concipiendi, & in nostris intellectionibus; vnde etiam in præsentī ita debemus concipere intellectionem, & volitionem Diuinam, vt excludamus ab illis omnem prioritatem; & intelligamus in eadem cognitione omnes personas cognosci.

Oppones: saltem nostro concipiendi modo Verbum non potest dici procedere ex cognitione intuitiua Spiritus Sancti, cum iste nondum concipiatur existens. Resp. ad cognitionem intuitiuam, non requiri, vt in quocumque signo rationis concipitur existere cognitio, concipiatur etiam existere obiectum; vt est clarum in

scientia visionis, quæ est ab æterno de rebus futuris in tempore; sed fatis esse, si quandocumque existit realiter cognitio, vel existat realiter obiectum, vel saltem sit determinatum ad existendum. Responderi etiam potest, quod licet in eo signo, in quo Pater apprehenditur dicens, nondum apprehendatur Spiritus Sanctus, vt existens in actu exercito, quia nondum apprehenditur exercitium productionis; apprehenditur tamen in actu signato, idest vt obiectum cognitionis Patris.

Dices 3. prius est essentiam Diuinam concurrere cum Patre in ratione speciei intelligibilis, quam Patrem intelligendo producere Verbum; actus enim primus præsupponitur secundo; sed in illo priori essentia Diuina non est repræsentatiua Verbi in actu primo; ergo neque notitia, qua produci-  
tur Verbum, est actu repræsentatiua eius, nihil enim plus potest repræsentare species expressa, quam impressa, quia hæc est principium illius. Minor probatur, quia Verbum in illo priori, non est repræsentabile, vtpotè nondum existens, & non est aliter repræsentabile, quam vt existens; ergo &c. Resp. negando minorem. Et ad prob. respondetur: Verbum in illo priori esse repræsentabile, vt existens, quia

quia realiter existit, est à nobis non concipiatur ut existens in actu exercito, propter imperfectionem nostri modi concipiendi, quæ imperfectio non debet refundi, sed debet excludi ab ipso obiecto, ut dictum est.

Dices 6. cum Caiet. & Zumel Processio Verbi, est necessaria, & cognitio futurorum libera, eo quod pendeat à libero Dei decreto; ergo Verbum non potest procedere ex hac cognitione; nam alias talis processio esset libera. Resp. non sequi; nam bene potest stare, quod aliquid sit liberum, & nihilominus necessariò concurrat ad aliquem actum, ut supra probatum est. Unde est quidem libera illa cognitio respectu decreti; & creaturarum, ad quas terminatur; sed in productione Verbi necessariò concurrat.

Dices 7. in illo signo rationis, quo Verbum intelligitur procedere, nondum intelliguntur creaturæ futuræ; ergo non potest ex illarum cognitione procedere. Probatur antecedens: illarum futuritio supponit volitionem, quæ est posterior productione Verbi; ergo in illo signo nondum intelliguntur creaturæ futuræ. Resp. huiusmodi creaturas esse futuras; sed à nobis non concipi ut sic, nisi in actu signato, ut obie-

cum cognitionis Paternæ.

Dices 8. non potest procedere ex cognitione creaturarum possibilem; ergo multò minus ex cognitione futurarum. Probatur antecedens. Productio Verbi Divini est communicatio naturæ Divinæ; sed hæc formaliter dicit intellectionem essentiae, non verò creaturarum; ergo non potest procedere ex cognitione earum, neque ut futurarum, neque ut possibilem. Confirmatur, quia intellectio creaturarum concipitur advenire Deitati ut sic, tamquam perfectio secundaria. Resp. negando antecedens. Ad probationem negatur minor; nam intellectio illa terminatur etiam ad creaturas. Et sic ad Confirmationem negatur esse concipiendam ut perfectionem secundariam, respectu possibilem; præterquamquod hoc, quod est esse perfectionem secundariam, non tollit, quin, ut communis possit esse prior ratione nostra productione Verbi, & præcedere prioritate originis.

Dices 9. Verbum Divinum est magis necessarium, quam creaturæ possibilem; ergo si per impossibile, non essent possibilem, adhuc Verbum procederet; ergo de facto creaturæ possibilem non sunt id, de quo Verbum procedat. Resp. primo dato illo impossibile non

non futurum, nec illud Verbum, nec eum Deum, qui modus est &c. nos autem disputamus de eo, qui est, prout est. Resp. secundo Argumentum probare solum creaturas possibles non esse principium productionis Verbi, & sine illis fore, vt Verbum procederet; sed non probare, ex suppositione quod sint possibles, & vt tales cognitz, quod ex earum cognitione non procedat Verbum.

Quæres hic: An Verbum formaliter significet aliquid absolutum, an verò aliquid relatiuum. Ad hoc quæsitum S. Thom. in 1. distinct. 27. quæst. 2. & in quæst. de Veritate supra citata, respondet Verbum directè significare absolutum, & connotare respectiuium, quemadmodum hoc nomen scientia; Nam, vt dictum est, Verbum in Diuinis est nomen personale, & consequenter dicendum est significare formaliter relationem, non vt est relatio; sed vt est constitutiua personæ procedentis per intellectionem; debet enim significare aliquo modo id, per quod ab alio distinguitur, quod non est aliud, quam relatio; & similiter debet significare aliquid productum per intellectionem, & produci non conuenit absoluto, sed relatiuo: vt obseruat S. Thom. 1. par. quæst. 34. artic. 3. in resp. ad 4.

vbi dicit, ideam principaliter significare relationem ad creaturas, Verbum verò significare relationem ad dicentem; & propterea Caietanus ibi putat S. D. tacitè retrahere id, quod in quæst. 4. de Veritate artic. 5. docuerat, nempe quod Verbi nomen principaliter significat absolutum; & ait, sequi hanc retractionem ex determinatione primi articuli, quod Verbum sit nomen personale tantum &c. de Verbo enim creato verum est formaliter significare aliquid absolutum; nam significat id, quod productum est ab intellectu, quod est quid absolutum, idest qualitas expressiua rei; quod conuenit verbo ratione absoluti, non verò ratione relationis ad dicentem.

Quæres vltèrius: An respectus ad creaturas conueniat Verbo ratione proprietatis personalis, vt contendit Aureolus in 1. distinct. 27. eo quod specialiter hic respectus Verbo conueniat; an verò ratione absoluti, vt docent Scotus, & Capreolus ibidem, nec non & Ferriarum lib. 4. contra Gentes cap. 13. & S. Thom. loco citato ad primum. Ratio est: quia hic respectus est entis manifestatiui, & representatiui, seu expressiui, & propterea certum est, non conuenire Verbo ratione personalitatis præcisè, quia vt sic non dicit

expressionem, & manifestationem. Et præterea, cum hic respectus peculiari ratione. Verbo conveniat, non est dicendum convenire ratione solius absoluti, quod est commune omnibus; nam Verbum peculiariter dicitur esse id, quo creaturæ dicuntur; Respondetur ergo convenire ratione essen-

tiz. sic modificatæ per proprietatem Filij, quia illi convenit, ut est communicata à Patre per intellectum; unde etiam constat Verbum dicere eandem relationem, quam dicit Filius; sed implicite, & præter hanc, dicere respectum ad creaturas, quem non dicit Filiatio.

## AXIOMA QVARTVM.

*Spiritus Sanctus procedit etiam à Filio.*

Ex Lib. 15. de Trinitate Cap. 26.

**S**icut habet Pater in semetipso, ut de illo procedat Filius, sic dedit Filio, ut de illo procedat Spiritus Sanctus.

## DVBIVM IV.

*Utrum Spiritus Sanctus procedat à Filio.*

**D**E processione Spiritus Sancti à Patre nulla est controversia; est enim, non solum de Fide, sed etiam recepta ab ipsis Græcis schismaticis, & habetur expressè in Sacra Scriptura Io: 15. Cum autem venerit Paraclitus, quem ego mittam vobis à Patre, Spiritum veritatis, qui à Patre procedit &c. Tota difficultas deolvitur ad

processionem eius à Filio. In qua.

Dico Spiritum Sanctum procedere etiam à Filio. In hac assertionem consentit tota Sancta Romana Ecclesia, eamque de fide tenet, & profitetur ita in Symbolo Nicæno. Contradiciunt tamen Græci schismatici, qui tenent Spiritum Sanctum non procedere-

## DE SINGVLIS PERSONIS DIVINIS.

cedere à Filio; in quo errore sunt etiam Armeni, Rutheni, & Moschi, vt testatur Valentia quæst. 16. punct. 1.

Huius hæresis primus Auctor dicitur fuisse Theodoretus in refutatione anathematismorum, quos D. Cyrillus refert cap. 9. quæ refutatio habetur in tom. 2. Conciliorum, & in operibus S. Cyrilli; qui postea in Concilio Calcedonensi, opera S. Leonis Papæ, Ecclesiæ Sanctæ reconciliatus est, & in suam Sedem, ex qua pulsus fuerat, restitutus cum alijs, qui prius Nestorio fauebant circa annum Domini 430. Creuit postea hic error anno Domini 757. tempore Pipini Regis, Caroli Magni Patris, coram quo in magno Concilio Gentiliaci habito disputatum est inter Latinos, & Græcos de Sanctissima Trinitate, & de Imaginibus, & tunc nulla alia erat controuersia de Trinitate. Sic referunt Bellarminus lib. 2. de Christo cap. 21. & Valentia loco citato punct. 2. ex Adone Viennensi, Regino, Sigiberto, & Abbate Vespergeni in Chronico. Post annos deinde circiter centum, tempore Nicolai Primi, qui sedit Anno Domini 860. Græci apertius cum Latinis de hac re contendere ceperunt; nam eo tempore Theophilactus apertè cepit negare Spiritum Sanctum siue à Filio, siue

per Filium procedere, qui cap. 3. Ioan. arguit Latinos, quod credant Spiritum Sanctum ex Filio procedere; & Ioan. Diac. qui tunc vixit, lib. 4. vitæ S. Gregor. cap. 75. refert Græcos vertisse in græcam linguam Dialogos S. Gregor. & abrasisse illam particulam Filioque procedit. Baronius ad Annun. 867. num. marg. 67. refert Photium Romanam Ecclesiam, & omnes occidentales hæresis nomine iugillasse, eo quod assererent Spiritum Sanctum à Patre, Filioque procedere. Tandem anno Domini 1054. tempore Leonis IX. cepit perfectum schisma; nam antea solum iacta semina videbantur: Imperante enim Constantino X. qui dicebatur Monomachus, Patriarcha Constantinopolitanus, Michael nomine, cupiens Vniuersalis Patriarcha fieri, cuius dignitatis nomen iam diu antea sibi usurpauerant eius prædecessores, promulgauit Romanum Pontificem, & omnes alios Latinos excommunicatos esse, eo quod contra Decretum Concilij Ephesini ad Symbolum aliquid addidissent: nam, deiecto Romano Pontifice, ad se primatum de iure pertinere credidit, qui primus post eum esset. Neque hoc contenti fuerunt Græci; sed omnes Ecclesias Latinorum, quæ in eorum ditione erant, claudi iusserunt; & Impe-

rator constituit premium illis, qui in hoc contra Latinos aliquid scriberent. Hæc ita fuisse constat ex epist. Leonis IX. ad Imperatorem Constantinum, & Patriarcham Michaellem; & ex S. Anselmo, qui eo sæculo floruit, & scripsit contra Græcos lib. de Processione Spiritus Sancti; ex Sigib. in Chronic. Anno Domini 1054. & ex S. Antonino in histor. par. 3. tit. 22. cap. 13. §. 11. &c. Quibus positis.

Probatur nostra conclusio pr. ex cap. 15. Ioan. ubi habetur: *Cum venerit Paraclitus, quem ego mittam vobis à Patre, Spiritum veritatis, qui à Patre procedit &c.* Huic loco maximè fidunt Græci propter hæc postrema verba, in quibus non fit mentio de Filio; sed frustra: nam in antecedentibus satis insinuat processio etiam à Filio; cum enim dicat Filius, quod ipse mittet Spiritum Sanctum, eo ipso significat à se procedere; eatenus namque dicitur una persona mitti ab alia, quatenus ab illa procedit, & habet aliquem effectum proprium in creatura. Quo posito (quod infra, cum de missione, latius explicabitur, & probabitur) si Spiritus Sanctus à solo Patre procederet, non diceret Filius *Ego mittam*; nam missio ætius, non convenit nisi personæ, à qua persona missa proce-

dit, unde est quod Pater nunquam legitur missus; dictum est autem ibi à Patre, ne putaretur à solo Filio procedere, ut putavit Eunomius; & præterea ut intelligeretur vim spiratuiam, quæ est in Filio, à Patre communicari; non est autem additum, qui à Patre Filioque procedit, ne inutiliter repeteretur quod iam implicite dictum fuerat. Hoc loco utitur. S. P. N. lib. 4. de Trinitate cap. 20. ad hoc propositum sic: *Quod ergo ait Dominus, Quem ego mittam vobis à Patre, ostendit Spiritum & Patris, & Filij: quia etiam cum dixisset, quem mittet Pater, addit in nomine meo. Non tamen dixit, quem mittet Pater à me: quemadmodum dixit, quem ego mittam vobis à Patre, videlicet ostendens, quod totius Divinitatis, vel si melius dicitur Deitatis principium Pater est. Qui ergo à Patre procedit, & Filio, ad eum refertur, à quo natus est Filius.* Sic etiam arguit ex eodem loco S. Hilarius lib. 8. de Trinitate.

Probatur 2. ex cap. 16. eiusdem Evang. ubi Christus Dominus de spiritu sancto loquens ait; *Ille me clarificabit, quia de meo accipiet, & annuntiabit vobis.* Reddit hic Dominus noster causam, cur esset annunciandus, & clarificandus à spiritu sancto, cum ait *de meo accipiet*: nam possessum illud

lud (vt aduertunt communiter expofitores) Diuinitatem offendit, ficut etiam articulus; qui in græco textu præponitur, declarat: offendens autem quomodo fit accepturus, fubdidit: *Omnia, quacunque habet Pater, mea funt, Propterea dixi, quia de meo accipiet, & annuntiabis vobis.* Idefit de meo accipiet, quia eadem eft Patris effentia, à quo illum dixi procedere, & mea; dixit tamen de meo, non meum, cum nihilominus totam effentiam accipiat, vel quia non accipit totum id, quod eft in Filio; quia non accipit filiationem, ex qua fimul cum effentia conftituitur Filius; vel quia illud accipiet coniungitur cum illo & annuntiabis vobis. Spiritus enim fanctus non annunciauit omnia, quæ funt diuinitatis. Aliter explicat Theophylactus, ne cogatur fateri veritatem, dicendo: *ly de meo* effe intelligendum de meo Thefauro, ideft de Patre, quia Pater eft ille, vnde & ego accipio. Contra eft: quia, nec etiam iuxta hanc expofitionem fequitur intentum Theophyl. & Græcorum: nam Thefaurus fcientiæ, de quo accipit Spiritus fanctus, non eft Perfona Patris vt fic; non enim accipit perfonalitatem Paternitatis; fed eft effentia communis Patri, & Filio: cum igitur Spiritus fanctus à Filio accipiat fcientiam,

quæ eft idem omnino cum effentia, neceffariò fequitur quod ab illo procedat; propterea S. P. Tract. 99. in Ioan. verfus finem tractatus, explicans illa verba huius cap. 16. *Non enim loquetur à femetipfo, fed quacumque audiet loquetur.* Quæ de Spiritu fancto dicta funt, ait: *Si ergo & de Patre, & de Filio procedit Spiritus Sanctus, cur Filius dixit de Patre, procedit?* Cur putas nifi quemadmodum ad eum folet referre, & quod ipfius eft, de quo & ipfe eft? Vnde illud eft, quod ait, *mea doctrina non eft mea, fed eius, qui mifit me.* Si igitur hic intelligitur eius doctrina, quam tamen dixit non fuam, fed Patris: quanto magis illic intelligendus eft, & de ipfo procedere Spiritus Sanctus, ubi fic ait de Patre procedit, vt non diceret de me non procedit? à quo tamen habet Filius, vt fci Deus, eft enim de Deo Deus, ab illo habet vtiq; vt etiam de illo procedat Spiritus Sanctus: ac per hoc Spiritus Sanctus, vt etiam de Filio procedat, ficut procedit de Patre, ab ipfo habet Patre.

Probatur Auctoritate Conciliorum. Nam Tom. 1. Concil. cap. 14. Concilij Ephel. habetur Epiftola fcripta à S. Cyrillo ad Neftorium, in Concilio antea Alexandriæ celebrato; in qua funt hæc verba: *Spiritus appellatus eft veritatis, &*

veri-

*veritas Christus est; unde ab ipso similiter, sicut ex Patre, procedit.* Fuit approbata hæc epistola & ab ipso Concilio Ephesino, & à quarta synodo Act. 5. & à quinta synodo Act. vii. & à sexta synodo A. 17. & à septima synodo Act. 7. Quinque igitur Concilia generalia apud Græcos celebrata hoc docent; & quod magis mirere, est in septimo Concilio Generali, quod maxima è parte Græcorum fuit; ubi Actione septima legitur symbolum cum hac additione (*Filioque*). Græci autem in Concil. Florent. sess. 5. & septima dicebant: hoc non haberi in suis codicibus. Latini tamen protulerunt exemplar antiquissimum, & produxerunt hystoricum antiquum huius veritatis testem; & certum est, ait Bellarminus, non fuisse morem Latinorum corrumpendi libros; sed Græcorum.

secundum est Concilium Lateranense sub Innoc. III. anno Domini 1215. cui interfuerunt Græci, & consenserunt definitioni, quæ habetur in cap. 1. nempe Spiritum Sanctum à Patre, Filioque, procedere, ut patet ex cap. 4. eiusdem Concil.

3. Tertium Concilium est Lugdunense sub Gregor. X. anno Domini 1273. ubi interfuere Græci, & omnibus consentientibus cantatum est symbolum cum additione (*Fi-*

*lioque*) ter græcè, ter Latinè. Habetur hæc definitio in sexto Decret. tit. 11. cap. 1.

Quartum Concilium est Florent. anno Domini 1438. celebratum; ubi rursus idem post longissimas disputationes est definitum, consentientibus Græcis, & Latinis.

His Concilijs addit Bellarminus Toletanum Primum cap. 21. Tertium cap. 1. Octauum cap. 1. & Vndecimum cap. 1. Quæ celebrata sunt ante dissidium Græcorum, idest ante annum Domini 700. Ex quibus omnibus, ut obseruat dictus Cardinalis, apparet non solum sententia Ecclesiæ, sed etiam Græcorum pertinacia, & leuitas, qui toties in disputationibus victi, toties ad vomitum redierunt.

Probatur 4. auctoritate PP. Latinorum, & primo Tertulliani, qui in lib. contra Praxeam ait: *Spiritum Sanctum à Patre per Filium deducto*. Cardinalis Bessarion in fine orationis dogmaticæ dicit: Græcos non negare Spiritum Sanctum esse à Patre per Filium, sed *ly per* dicunt addi ad denotandam relationem; vel ad significandam consubstantialitatem; vel ut sit idem, ac *cum*: pro quo citant auctoritatem cuiusdam Poetæ. De his tribus explicationibus dicam infra, adducendo auctori-



Autoritates PP. Græcorum. secundo probatur auctoritate S. Cypriani Mart. in sermone de Aduentu spiritus sancti, vbi expressè ait: *Spiritus Sanctus à Patre procedens, à Patre, & Filio &c.* Tertio idem habent, & docent S. Hilarius lib. 2. de Trinitate. Quarto S. Ambrosius lib. 2. de spiritu sancto, quem Græci reiicere non possunt, cum in tertia synodo Generali, apud eos celebrata, habeant illum vt Sanctum Doctorem approbatum. Quinto S. Hieronymus in Epist. ad Heluidium quæst. 91. sexto Rufinus in explicatione symboli. septimo S. P. Augustinus Tract. 84. & 99. in Ioan. & lib. 15. de Trinitate cap. 17. 26. & 27. & lib. 3. contra Maximinum cap. 14. Octauo S. Prosper lib. 1. de vita contemplatiua cap. 18. Nono S. Leo I. magnus ille Pontifex, quem quarta synodus, quæ sexcentis, & triginta Episcopis constabat, summis laudibus extulit, de quo identidem repetebant: sicut credit Leo, ita & nos credimus: hoc habet in Epist. ad Turilium 91. alias 93. Decimo S. Fulgentius in lib. de Fide ad Petrum cap. 2. Vndecimo Idacius Clarus lib. contra Variamad. ultra medium. Duodecimo S. Boetius Severinus lib. 1. de Trinitate cap. 12. Decimotertio Hormisda Papa in Epist. ad Iustinum Imper. cap. 2. Decimoquarto S. Gre-

gorius Magnus Papa in Symbolo, quem edidit, & recitatur in eius vita lib. 2. cap. 2. idem habet lib. 2. Dialog. cap. vltimo & lib. 1. Moral. cap. 8. Hunc sanctum etiam Græci in suo Calendario habent, & vt verè sanctum honorant, vnde non habent eius sententiam, vt hæresim execrari. Decimoquinto Venerabilis Beda lib. 1. de Elementis Philosophiæ, & in collectaneis ex S. P. N. Augustino super Epist. S. Pauli, ad illum loc. epist. ad Galatas cap. 4. Misit Deus Spiritum Filij sui, adducit prolixam Disputationem S. P. Augustini, in qua probatur spiritum sanctum à Patre, Filioque procedere. Hi omnes ante exortum schisma floruerunt, & omnes vno ore hanc veritatem confitentur. Quos postea sequuti sunt omnes alij PP. Latini, qui post schisma scripserunt.

Probatur 5. auctoritate PP. Græcorum, ex quibus. Primum enumerat Bellarminus S. Gregorium Thaumaturgum in sua confessione fidei diuinitus accepta, quæ extat apud S. Gregorium Nyssenum in vita huius sancti. Secundus est S. Athanasius in symbolo, de quo dubitari non potest, quin sit opus eius, cum S. Gregorius Nazianzenus in Orat. de laudibus S. Athanasij, & S. P. Augustinus in exposit. Psal. 120: integrum versiculum huius

huius symboli adducat, citans nominatum Athanas. Episc. Alexandrinum, & in lib. 5. de Trinitate cap. 7. & Epist. 174. ad Pascendum, & in Enchirid. cap. 36. & serm. 95. de tempore utatur integris sententijs huius symboli, tacito nomine Athanasij, viri iam in Ecclesia notissimi. Nec possunt dicere à Latinis fuisse additam particulam illam *Filioque*; nam in græcis exemplaribus continetur, & in Concilio Toletano quarto cap. 1. recitatur confessio Fidei desumpta ex hoc symbolo verbatim, & illa particula ibi continetur. Fuit autem hoc Concilium celebratum circa annum Domini 633. ac proinde ante schisma Græcorum; ipsi Græci confitentur verum esse, quod hæc particula est ipsius S. Athanasij, ut refert Gennadius Scholarius in lib. de defensione Concil. Florent. cap. 1. sect. 5. & addit Græcos sui temporis dicere solitos, Athanasium fuisse ebrum, quando hæc scripsit; quod quam impie sit dictum, nemo Catholicus est, qui non videat. Hanc eandem processionem à Filio ipsemet S. Athanas. confitetur in Epist. ad Serap. & serm. 4. contra Arrianos. Tertius est S. Basilius lib. 2. & 3. contra Eunomium: & lib. 5. cap. 8. & alibi sæpè, dum conatur offendere eum non esse Filium Filij; quod

utique unico verbo potuisset expedire, dicendo eum non procedere à Filio, si tenuisset Græcorum erroneam sententiam. Quartus est Gregorius Nyssenus tribus in locis, nempe 1. Homil. 4. in Orat. Domini. sed hunc locum Gennadius prædictus refert à Græcis sublatum, & modo non inuenitur in exemplaribus, quæ extant. secundo in lib. 1. in Eunomium, qui locus refertur à Cardinali Bessarione in sua orat. cap. 6. sed hi libri tempore Bellarmini nondum erant in latinum versi. Tertio in lib. ad Ablabium, quod non oporteat tres Deos dicere, circa finem libri. Quintus est S. Gregor. Nazianz., qui in orat. 5. quæ est de spiritu sancto confitetur hanc veritatem, & eam confirmat exemplo Adam, qui à nullo; Euz, quæ ab Adam; & Seth, qui ab utroque processit: quibus tres Diuinas personas comparat, & processiones duarum explicat. Sextus est S. Cyrillus Hierosolymit. Catech. 17. septimus S. Ioan. Chrysost. Hom. 76. in Ioan. & tom. 5. Hom. 1. de symb. Octauus est S. Epiphani. hæresi 69. quæ est Arrianorum pag. 2. & in Anchor pag. 332. & infra ter, aut quater hoc docet. Nonus est S. Dydimus Alexandrinus lib. 2. de spiritu sancto ultra medium. Decimus est S. Cyrillus Alexandrinus lib. 11.

in

in Ioan. cap. 1. & cap. 25. & lib. 12. Thesauri cap. 2. & in lib. de recta fide ad Theodosium ultra medium, & lib. 5. 6. & 7. de Trinitate similia habet; præterquæ Cardinalis Bellarion in sua oratione cap. 7. ubi adducit locum expositionis ipsius in cap. 2. Ioelis. Vndecimus est Simeon Metaphrastes in vita S. Dionysij Areopagitæ. De prædicto Simeone fit honorificamentio in Concilio Florentino, Duodecimus est Anastasius (de quo, cum magno honore fit mentio in 6. synodo.) lib. 1. de rectis dogmatibus. Tertiusdecimus est Tarasius in Epist. ad Patriarch. Orientis, quæ habetur in septima synodo Act. 3. Quartusdecimus est Maximus, vir Doctus, & sanctus in cap. 4. Zacchar. Quintusdecimus est S. Ioannes Damascenus lib. 1. de Fide cap. 18. Horum omnium PP. tam Latinorum, quam Græcorum sententias habes apud Cardinalem Bellarminum lib. 2. de Christo cap. 24. & 25. fideliter adductas, & ubi oportet, explicatas, post quas sic concludit. Habemus igitur quindecim testes Latinos, & quindecim Græcos, qui ante dissidium nostrum exortum apertissime docuerunt Spiritum sanctum à Patre, & Filio produci, ac spirari, ut iam intollerabilis planè Græcorum obstinatio videri debeat.

Aduerte hic S. Cyrillum Alexandrinum lib. 11. in Ioan. cap. 1. & cap. 25. & S. Ioan. Damascenus lib. 1. de Fide cap. 18. asserere Spiritum sanctum procedere à Patre per Filium, quod etiam nunc concedunt Græci, negantes nihilominus eum procedere à Filio, & dicentes, quod idem sit *per*, ac dicere cum Filio; quod tamen non est de mente illorum sanctorum, ut ostendit Bellarminus locis citatis; nam inter cæteros, ipse S. Ioan. Damascenus eum vocat imaginem Filij; cum tamen optimè sciret de ratione imaginis esse, ut procedat ab eo, cuius est imago; quod si valeret glossa Græcorum modernorum, posset etiam dici procedere à Filio per Patrem, id est cum Patre: & præterea *ly per* in Scripturis semper significat causalitatem, seu originem. Aliæ duæ expositiones Græcorum, de quibus supra, nempe quod *ly per* significet relationem, vel consubstantialitatem, sunt frigidissimæ, ait Bellarm. nam sic etiam liceret dicere Filium procedere à spiratione per Spiritum sanctum. sic enim significarem relationem Patris spiratoris ad Spiritum sanctum, & consubstantialitatem Patris, & Spiritus sancti.

An S. Ioan. Damascenus senserit cum Theodoro, fuit in opinione tempore S. Tho. hic enim quæst. 10.

E c de

de Potentia artic. 4. & 1. par. qua ft. 36. artic. 2. ad 3. opinatur eum ita fenfiffe, eo quod lib. 4. cap. 11. dicat: *Spiritum Sanctum per Filium esse dicimus, ex Filio non dicimus.* Quem tamen Caiet. in Commentario dicti Artic. excusat ab hærefi, eo quod iste punctus nondum fuiffet ab Ecclesia definitus, ac proindè effet liberum unicuique tenere quam partem vellet.

Aliter eum Card. Bessarion in Concil. Florentino in fua oratione excufauit, dicendo, quod ita locutus fit contra hærefim Eunomij, & Macedonij, qui à folo Filio eum procedere dicebant, & vt offenderet Patrem effe primariam originem proceffionum Diuinarum, vsum fuiffe locutione illa. Card. Bellarminus loco citato cap. 27. dicit Theodoretum directè negaffe spiritum sanctum effe à Filio, vel per Filium: Damascenum autem negaffe effe à Filio, non negare autem effe per Filium; & exiftimaffe tutius effe dicere per Filium, quam ex Filio, quantum ad modum loquendi, propter prædictas hærefes Eunom. & Macedon. ficut post hærefim Nestorij Mariam, non Chriftiparam, licet re vera fit Chriftipara, fed Deiparam, quod negabat Nestorius, dicendum effe statutum effe; ac proindè ficut, propter illos hæreticos, rectè dicebatur spiritus sanctus effe à Patre per Fi-

lium, ita, propter errorem Græcorum, rectius nunc dicitur à Patre, & Filio.

Probatur 6. ratione, qua vtitur S. Thom. loco citato, quæ infra fufius explicabitur. Quia fi Spiritus sanctus à Filio non procederet, nullo modo diftingueretur realiter ab illo; fed effe de fide realiter eum diftingui ab illo; ergo neceffe effe, vt ab illo procedat. Probatur fequela maioris: Quia in Diuinis omnia funt vnum, vbi non obuiat oppositio relatiua, vt effe commune Axioma Theologorum; & non poteff ibi dari oppositio relatiua, nifi vbi interuenit origo vnus ab alio; nam inter Patrem, & fpirationem actiuam, & fimiliter inter Filium, & eandem non datur diftinctio realis, quia non obuiat oppositio relatiua, & hæc non obuiat ibi, quia non mediat origo illius ab illis duabus perfonis; ergo non admiiffa proceffione Spiritus sancti à Filio, non poteff faluari diftinctio realis inter eos.

Probatur 7. hac alia ratione. Concedendum effe actum notionalem intellectus effe priorem actu notionali voluntatis, fiue admittatur omnem intellectiõnem, & volitionem effentialem effe priores illis actibus notionalibus, fiue non; fed in illo priori communicatur Filio voluntas, per quam Pa-

Pater spirat; ergo in alio signo Spiritus sanctus procedens à Patre per voluntatem, procedit etiam à Filio habente eandem voluntatem.

Probatur 8. Diuino testimonio, seu Iudicio, quo argumento Belarminus loco citato cap. 30. disputationem concludit, & est: quod vsque ad tempus schismatis ita floruit Græcia viris Sanctis, & doctis, vt tunc omnia Concilia Generalia celebrata fuerint apud Græcos: sed post illud, idest per annos iam 800. nullum habuerint virum sanctum, miraculis clarum, nullum Concilium, paucissimos homines doctos. Imperium eorum per Turcas Christi hostes euersum, & penitus destructum, & ipsi in miserrima seruitute, & captiuitate degere coacti sint. Et quod magis mirere: in ipsa solemnitate Spiritus sancti, idest in Pentecoste capta fuit Constantinopolis à Turcis; Imperator occisus, & imperium omnino extinctum. Gerardus enim mercator in sua Chronologia probat anno 1452. die 28. Maij indixisse Mahumetem exercitui suo vltimam oppugnationem Constantinopolis, & sequenti die captam Ciuitatem: illo autem anno dies Pentecostes fuit 28. Maij, vt ex aureo numero, & littera Dominicali, vnde festa mobilia indicantur, constat. Erat enim aureus

numerus 9. & littera Dominica. A. Propterea multi comparant Ecclesiam Græcam regno Samaritæ, quod separauit se à vero templo, & tandem in captiuitatem adductum est; Nam Græci in Concilijs, quater, aut quinquies, & fortasse etiam sæpius conuicti, & ad veram fidem conuersi, semper ad suum vomitum schismatis redierunt: donec ad hanc miseram captiuitatem, & seruitutem peruegerunt.

Obijciunt 1. Græci Auctoritatem sacrarum Scripturarum in quibus nunquam legitur Spiritum Sanctum procedere à Filio, imò Ioan. cap. 15. expresse dicitur, *qui à Patre procedit*; & nulla fit mentio de Filio; quod non videtur verisimile fuisse prætereundum à Christo Domino, cuius verba sunt illa: ergo &c. Resp. primo ab auctoritate negatiua nullum desumi argumentum. Resp. secundo cum S. P. Tract. 99. in Ioan. supra adducto: *Ibi etiam intelligendus est & de ipso (idest Filio) procedere Spiritus Sanctus, ubi sic ait de Patre procedit, vt non diceret de me non procedit &c. A quo autem habet Filius vt sit Deus &c. Ab illo habet & tique, vt etiam de illo procedat Spiritus Sanctus.* Vide eundem S. P. lib. 3. contra Maximinum cap. 14. vbi docet nominari solum Patrem, quia est principalis auctor Spiritus

tus Sancti. Non ergo rectè concluditur à Græcis ex ista auctoritate negatiua, cum ibi non sit dictum à solo Patre; Imò S. Thomas 1. par. quæst. 36. artic. 2. in respon. ad primum ait, quod etiam si ibi dictum fuisset à solo Patre, non tamen propterea excluderetur Filius ab hac ratione principij, eo quod quæcumque Patri tribuuntur, sunt etiam tribuenda Filio, ijs solum exceptis, quæ spectant ad mutuam oppositionem originis, & è conuerso; alioquin, vt notauit etiam S. Anselmus lib. de processione Spiritus Sancti cap. 8. cum Matthæi cap. 11. dicitur: *Nemo norit Filium, nisi Pater*: sensus esset, quod neque Filius se ipsum, neque Spiritus Sanctus eum cognosceret. Nec obstat si dicas ly *nemo* idem valere, ac nullus homo; nam, vt rectè obseruat ibi S. Anselmus, non fuisset opus adducere, *nisi Pater*: Imò fuisset superfluum. Cum igitur spiratio actiua Patris non pertineat ad oppositionem cum Filio, erit communis Patri, & Filio; & hæc est ratio, quam Christus Dominus assignauit Ioan. cap. 16. cum dixit: *de meo accipiet*; & cum ait: *Omnia, quæcumque habet Pater, mea sunt*.

Opponunt 2. Auctoritatem Sacrorum Conciliorum, & primò Concilij Nicæni, in quo tradita

est fides Sanctissimæ Trinitatis, nulla facta mentione de tali processione. Secundo in Concilio Constantinopolitano primo definitur, quod à solo Patre procedat. Tertio in Concilij Ephesino, & Calcedonenfi determinatur sub anathemate, ne quid addatur Concilij Nicæno, & Constantinopolitano: Quod adeò religiosè seruatum fuit illis temporibus, vt Leo Tertius Summus Pontifex, vt refert etiam Magister sententiarum, distinct. 1. i. iusserit exarari Symbolum Constantinopolitanum in tabula argentea, sine additione *Filioque*, & poni in Altari post corpus S. Pauli. Vixit autem iste Pontifex circa annum Domini DCC. à Christo nato: quo tempore iam fuerat facta illa additio, quam Pontifex iste, hoc suo facto, videtur sustulisse; Ergo malè addiderunt Latini particulam illam *Filioque*. Resp. à Concilio Nicæno fuisse implicite definitum procedere etiam à Filio, quando fuit definitum procedere à Patre. Non est autem facta mentio de illo, quia nondum erat orta disputatio, & hæresis hæc de Spiritu Sancto, vtrum à Filio procederet; sed benè, vtrum à Patre, quod negabat Eunomius; vt propterea etiam S. Basilius Epist. 78. dicat sententiam de Spiritu Sancto sine omni diligentia positam fuisse in eo Concilio;

cilio; eo quod nondum esset exorta quæstio de Spiritu Sancto, quod etiam habet S. Gregor. Nazianzen. Epist. 7. quæ est ad Cledonium. Ad prohibitionem factam in Concilio Ephesino, & Calcedonen. Resp. prohiberi ibi ne addatur aliquid, quod reddat sensum contrarium, non verò additionem verborum, quæ faciunt ad declarationem eorum, quæ implicite erant definita. Sic respondet etiam S. Thom. loco citato, & artic. 4. quæst. de potentia supracitato. Responderi etiam potest cum Cardinali Bellarmino loco citato cap. 29. prohibitionem extendi solum ad Laicos, vel Clericos, aut Episcopos particulares, vt non obscure indicant illa verba decreti: *Eos autem, qui fuerint ausi, aliam fidem componere, siue porrigere, aut proferre his, qui volunt ad veritatis cognitionem conuerti &c. Istos siquidem Episcopi fuerint, aut Clerici alienos. Episcopos quidem ab Episcopatu, Clericos à Clericatu. Si verò Laici fuerint anathematizantur.* Quapropter cum additio illa *Filiæque* sit facta auctoritate Summi Pontificis in aliquo Concilio- rum Latinorum, vt obseruat etiam S. Thom. dicto artic. 4. de potentia, licet sit incertum in quo, & post dictam additionem fuerint celebrata tria Concilia Generalia, videlicet sextum, septimum, &

octauum, antequam Græci dissentirent, quod tamen non poterant ignorare, cum in principio cuiusque Concilij Gen. fuerit in vsu recitare Symbolum & profiteri fidem Catholicam; manet eos frustra inniti prædicto fundamento illius prohibitionis, maxime contradicente illis illo principio: Quod par in parem non habet iurisdictionem.

Dicunt aliqui in Tertia Synodo gen. lectum fuisse quoddam Symbolum Nestorianorum, & librum Theodoret, in quo negabatur Spiritum Sanctum à Filio procedere, nec tamen hoc fuisse reprobatum. Resp. primo retorquendo argumentum, nam in eodem Concilio fuit lecta epistola Cyrilli de Anathematismis Cyrilli, & Nestorij, vt supra dictum est, vt etiam factum fuit in quarto, & quinto, in qua expressè dicit Spiritum Sanctum à Filio procedere, & tamen non fuit reprobata, sed approbata. Resp. secundo Theodoretum non solum negasse procedere à Filio, sed etiam per Filium, quod tamen Græci admittunt. Resp. tertio Concilium satis indicasse, quid senserit, approbando doctrinam S. Cyrilli, & damnando Nestorium, licet noluerit expressè de hoc puncto disputare.

Ad instantiam de Leone Tertio.  
Re-

Respondendo hunc S. Pontificem sic ordinasse, ne videretur damnare doctrinam illius Concilij, tanquam contrariam nostro Symbolo, in quo solum explicatur, quod implicite dictum erat in Nicæno, & Constantinopolitano; sicut enim per Symbolum Nicænum non fuit abrogatum Apostolicum, & per Constantinopolitanum, non fuit abrogatum Nicænum, ita nec per nostrum ullum ex illis. Alias leuiore obiectio ex PP. habes apud Bellarminum loco citato, cum suis responsionibus.

Obijciunt 3. cum Theophylacto. Spiritus Sanctus est vnus; ergo ab vno principio, & vnica spiratione; ergo non à duobus. Resp. quod licet etiam sint duo supposita Diuina spirantia, non tamen sunt duo principia, sed vnicum tantum, propter vnicam virtutem spiratiuam; quæ inest in ambobus: vnde dicitur communiter, quod licet sint duo spirantes, non tamen propterea sunt duo Spiratores; stante regula concretorum substantialium, per quam ad eorum multiplicationem, non sufficit multiplicitas subiectorum, seu suppositorum, sicut sufficit ad multiplicationem adiectiuorum, sed præterea requiritur multiplicitas formarum, quæ hic non habetur.

Obijciunt 4. Pater in se habet

totam vim spiratiuam; ergo sufficit ad productionem; ergo frustra, vel superflue concurreret Filius. Confirmatur primo. Quia Pater, vt est prior origine Filio, habet non minus vim spirandi, quam generandi; nam habet simul volitionem, & intellectiorem; ergo simul, & solus generat, & spirat. Confirmatur secundo. Pater prius origine spirat, quam Filius, quia prius origine habet virtutem spirandi; ergo in illo priori Spiritus Sanctus procedit à solo Patre. Resp. negando secundam consequentiam nam Pater est etiam sufficiens principium creationis Mundi, & tamen, eo non obstante, omnes tres personæ Mundum creant: Est tamen, hæc differentia; nimirum quod tres personæ creant vnum Mundum, est solum necessarium ex parte producentium, non autem ex parte Mundi producti; necesse est enim omnes tres personas creare, quia habent eandem numero potentiam creatiuam, non est tamen necesse, quod Mundus creetur à pluribus. Quod autem duæ personæ producant Spiritum Sanctum, hoc est necesse tam ex parte producentium, quia habent eandem potentiam spiratiuam, quam ex parte Spiritus Sancti producti; eo quod nisi produceretur à duabus personis,



nis, non distingueretur ab illis, ipso Filius exercet vim spirati-  
& sic non essent tres personæ. uam. Ad confirmat. secundam.  
Ad primam confirmationem. Resp. ly habere prius origine so-  
lum denotare vim spirandi non-  
Quod licet prius origine habeat communicari Patri ab alia per-  
simul vtramque vim, nihilominus sona, vt communicatur Filio,  
nostro modo intelligendi prius non tamen hinc sequi Patrem in  
exercet generatiuam, quam spi- aliquo signo rationis spirare, in-  
ratiuam, & cum in illo priori quo non spirat Filius.

## A X I O M A Q V I N T V M.

*Neceſſe eſt Spiritum Sanctum procedere à Patre, & à Filio.*

Ex Lib. 3. Contra Maximinum Cap. 14.



*D*E Patre est Filius, de Patre est Spiritus San-  
ctus: sed ille genitus, iste procedens: idè ille Fi-  
lius est Patris, de quo est genitus: iste autem Spi-  
ritus vtriusque, quoniam de vtroque procedit &c.  
Amborum est ergo Spiritus Sanctus, proceden-  
do de ambobus.

## D V B I V M V.

Vtrum, si Spiritus Sanctus non procederet à Filio,  
distingueretur ab eo realiter.

**Q**uestionem hanc inutilem libet 7. quæst. 4. vt refert Scotus in.  
existimauit Gotfredus quod. 1. distincta, & 1. quæst. 2. vtpotè ex hy-  
po-

pothesi impossibili procedentem; cum quo sentit noster Gregorius Arimin in 1. distict. 11. quæst. 1. artic. 2. Eorum fundamentum potissimum est ex eo, quod omnia, quæ sunt in Deo, sunt summo modo necessaria, & consequenter opposita sunt summo modo impossibilia. Huiusmodi est Spiritum Sanctum non procedere à Filio, quod est directè contra id, quod docet fides Catholica. Quapropter cum ex regulis dialecticorum, ex impossibili sequatur quodlibet, hoc est quælibet pars contradictionis; consequenter ex prædicta suppositione impossibili æquè benè, & rectè inferretur Spiritum Sanctum distingui realiter, & non distingui realiter à Filio: ac proindè quæstio erit inutilis, & infructuosa, cum ex ea nihil certi, aut determinatè saltem probabiliter colligi possit.

Scorus è contra loco citato, quem communiter sequuntur Theologi, admodum vtilè censet esse argumentari ex suppositione aliqua impossibili (vt in hac quæstione apparet). Nam ex tali hypothese per locum intrinsecum, & hypothese permanente non potest inferri vtraque pars contradictionis.

Doctrinam Scoti sic explicat Vasquez 1. par. Disput. 147. cap. 1. Supposito, quod in homine non

esset animal, maneret tamen in eo rationale, si aliquis inquireret, an maneret aliquid, quo homo ab equo distingui posset, non sequeretur vtraque pars contradictionis; sed dicendum esset mansurum nihilominus aliquid, quo homo ab equo differret, eo quod maneret illud, quo nunc formaliter ab eo distinguitur. Si tamen quis argueret hoc modo. Non manente animali, non posset manere rationale; ergo non posset manere ratio illa, qua differentia constituitur: rectè colligeret, non tamen per locum intrinsecum permanente suppositione, sed alia parte suppositionis ex alia destructa. Quæstio autem præsens procedit hypothese semper perseverante, ex quo solum licet inferre, & hoc est per locum intrinsecum ex suppositione argumentari. Sic ergo in proposito quæritur, permanente suppositione facta; nempe, quod Filius à Patre gigneretur, sed Spiritus Sanctus à Filio non spiraretur, in eadem tamen natura, vt modo, procederet, perseveraretque eadem filiatio, & spiratio passiva, an maneret aliquid, quo Filius, & Spiritus Sanctus inuicem possent personaliter distingui; retenta autem hypothese nequit vtraque pars contradictionis inferri, vt in cursu disputationis patebit. Est autem

tem utilis admodum hic modus disputandi, & arguendi, vt intelligamus, quæ sit formalis ratio, & causa necessaria distinctionis inter Filium, & Spiritum Sanctum: vtrum spiratio actiua, an filiatio. Nam si Spiritus Sanctus non procedens à Filio, ab eo non distingueretur, sequitur necessariam rationem distinctionis in Filio nunc esse spirationem; si verò adhuc distingueretur, sequitur aliam esse rationem distinctionis, ablata enim causa distinctionis, aufertur per locum intrinsecum distinctio. Porro autem, cum hæc suppositio, quam Latini impossibilem esse dicunt, Græcis necessaria videatur, non erit inutilis disputatio, si ex illa contra ipsos probemus Filium non posse distingui à Spiritu Sancto; Quod cum Græci asserere merito refugiant, cogentur necessario concedere processionem Spiritus Sancti à Filio; nam si ex eorum suppositione deducemus absurdum, & impossibile ad Trinitatem, manifestè ostendemus eam esse absurdam, & impossibilem. Hic etiam modus arguendi in rebus alijs creatis vtilissimus esse solet Methaphysicis, & Logicis, vt ostendant rationem formalem eius, de quo disputant; quando enim, circumscripto quocumque alio, & aliqua ratione solum manente, seque-

tur effectus, & ablata tolleretur, absque dubio est ea ratio formalis illius. His positis. Tres sunt in hac quæstione celebriores Theologorum sententiæ.

Prima Scoti loco supracitato, cum quo sentiunt Ocam in 1. distinct. 11. quæst. 2. Gabriel ibid. Henricus Quodlibet 5. quæst. 9. & alij, qui volunt, data prædicta hypothesis, fore vt adhuc distingueretur realiter.

Secunda est sententia quorundam modernorum, qui distinguunt de spiratione in actu secundo, & in actu primo; docentque contra Scotum, sublata spiratione, omnino, & simpliciter à Filio tolli etiam distinctionem, sed sublata solum actuali, & manente potenciali, volunt adhuc fore vt distingueretur spiratum à spirabili, & hoc dicunt non negari à S. Thoma, sed non fuisse sub his terminis propositam quæstionem.

Tertia sententia est S. Thomæ 1. par. quæst. 36. artic. 2. Alensis 1. par. quæst. 42. memb. 4. Alberti in 1. distinct. 11. S. Bonaventuræ Duran. Richard. Gregor. ibid. & communior: ex data scilicet hypothesis nullam fore distinctionem realem inter Filium, & Spiritum Sanctum.

Præmitto 1. solutioni: hic fieri quæstionem de distinctione enti-

titatiua, & reali, quæ est inter rem, & rem, non verò de formali, & quasi specifica emanationum, vel terminorum, quæ stare potest simul cum identitate personæ. Sicut enim spiratio actiua, & paternitas in prima Persona sunt rationes specificæ, & formaliter diuersæ, se compatientes in eodem supposito; sic nemo dubitat, fore diuersam rationem generationis passiua, & processions, seu spirationis passiua, etsi nulla esset inter has oppositio, se compatientes in eadem persona diuerso modo considerata.

Præmitto 2. non esse sensum huius hypothese: An stante Filio, & Spiritu Sancto eo modo, quo nunc, cum eisdem constitutiuis, relationibus, respectibus &c. distinguereetur Spiritus Sanctus, si non procederet; certum est enim tali pacto distingui; quia nunc de facto distinguuntur, & esset in hoc sensu hypothesis inutilis, quia supponeretur quod esset probandum; & posset sequi ex illa, sic intellecta, utraque pars contradictionis; idest quod distinguereetur, quia nunc de facto est distinctus realiter à Filio, & sic supponeretur permanere; & quod non distinguereetur, si distinctio est propter originem, eo quod hæc est hypothesis, si non procederet. (In hoc sensu arbitrantur aliqui

Gottfredum, & Ariminen. dixisse esse hypothesein, & questionem inutilem, & superfluum). Sensus ergo est: an sumendo Filium, & Spiritum Sanctum ut sic, absque alijs, quæ conueniunt ei ratione originis, quam habet Spiritus Sanctus à Filio; idest sumendo Filium absque spiratione actiua, & sumendo Spiritum Sanctum absque relatione spirati ad Filium; an adhuc Spiritus Sanctus distingueretur realiter à Filio, si ab eo non procederet, ita ut nunc etiam ratio formalis distinctionis realis non sit origo, eo quod ipsa ablata, posset salua manere prædicta distinctio. In hoc sensu.

Dico 1. ex illa hypothese dari necessario sequi, quod Spiritus Sanctus non distingueretur realiter à Filio.

Cardinalis Caiet. 1. par. in Comment. artic. 2. quæst. 26. probat hanc assertionem hoc argumento. Sicut se habet forma ad aliquid constituendum, ita se habet ad illud distinguendum ab alijs, cum hac tamen differentia, quod forma absoluta cum constituat rem in se, & non in ordine ad aliud, ita distinguit illam secundum se, & consequenter ab omnibus alijs; forma verò relatiua, cum constituat subiectum in ordine ad aliud correlatiuum, solum habet distinguere illud à suo correlatiuo; alias enim

enim se haberet in plus distinguendo, quam constituendo; sed relatio non potest distinguere à correlatiuo, si non intercedat oppositio relatiua, quæ in Diuinis non potest esse, nisi ratione originis; ergo hac sublata nulla erit ibi distinctio. Sed contra est, quia, vel Caietanus loquitur de distinctione formali relationis, vel de reali: si de formali, præterquam quod esset impertinens responsio, esset etiam falsum, quod solum formaliter distinguat à correlatiuo; nam relatio vt relatio distinguit formaliter subiectum à quocumque alio prædicamento, & relatio talis, vt est Paternitas, à qualibet alia re: si loquatur de distinctione reali, potest relatio distinguere realiter, non solum ab opposita relatione, sed etiam à disparata impossibili, & talem contendit Scotus esse relationem spirati, & geniti, eo quod non possint in eandem personam conuenire. Aliter ergo probanda est.

Probatur igitur 1. ex illis Concilijs, & PP. quos adduxi Controuersia præcedenti in Dub. Axiomaticis, à quibus docetur personas distingui per relationes originis; nam ex dicta hypothese nulla esset huiusmodi relatio; ergo nulla realis distinctio.

Probatur 2. ex illo axiomatico

S. Anselmi, communiter recepto: In Diuinis omnia sunt vnum, vbi non obuiat oppositio relatiua; sed in data suppositione nulla esset oppositio relatiua; ergo essent vnum, & idem Filius cum Spiritu Sancto, & consequenter nulla distinctio realis. Aliqui Recentiores tanti faciunt in suis M. SS. prædictas auctoritates, & hanc rationem, vt sententiam Scoti appellent temerariam, vel periculosam; sed falluntur, nam facile vendicatur Scotus ab his censuris, si dicatur PP. & Concilia loqui de distinctione illa, quæ actu interuenit inter personas, non autem de eo, quod esset in prædicta hypothese: Vtrum scilicet foret alia ratio distinctionis; propterea, dictis auctoritatibus censeo insinuari quidem magis relationes originis esse causam adæquatam distinctionis, & illis sublati nullam manere distinctionem, sed, & hoc, & eius oppositum manere intra limites probabilitatis.

Probatur 3. ratione: quia in Deo nihil est aliud, quam essentia, & relationes; sed essentia non distinguit; ergo relationes debent distinguere; sed non omnes relationes possunt distinguere; nam illæ, quæ sunt disparatæ, & non sunt oppositæ, non distinguunt, vt patet in paternitate, & spiratione actiua, quæ

sunt disparatæ, & non distinguunt; ergo solæ relationes oppositæ distinguunt; sed non opponuntur nisi ratione originis; ergo sublatis originibus, seu processionibus nulla erit distinctio.

Scotus respondet: non requiri tantam distinctionem in productionibus actiuis, nec in relationibus consequentibus ab illas, quanta requiritur in passiuis; eo quod ex vna parte nihil vetat idem principium per diuersas actiones communicare suum esse; & ex alia parte repugnat eandem personam duplici productione accipere suum esse. Hæc solutio optimè procederet, si processio passiuæ sit à generatione passiuæ; sed, cum ex hypothese nulla esset origo, remanet ostendendum, cur, cum in eadem persona Patris se compatiuntur relationes disparatæ, non se comparentur disparatæ in eadem persona Filij; sicut enim persona Patris, quatenus generat, est Pater; & quatenus spirat est Spirator, sic & altera persona, quatenus terminaret generationem esset Filius, & quatenus terminaret spirationem esset Spiritus Sanctus; nec inde sequeretur idem bis produci secundum rem, sed productionem, quæ re ipsa esset vna, à nobis non apprehendi vnico, sed duplici conceptu; vt de facto contingit in productione actiua generationis,

& spirationis, quæ, quia non opponuntur, distinguuntur sola ratione; nec etiam sequeretur eandem personam esse genitam, & non esse genitam, sed solum esse genitam & spiratam. Confirmatur hæc ratio: Quia si relationes disparatæ vt sic non habent distinguere personas; relationes verò geniti, & spirati hoc habent, debent id habere ex aliqua propria, & peculiari ratione; sed sublata oppositione secundum originem, nulla est talis ratio assignabilis; ergo &c.

Probat 4. Quia in Deo ponenda est summa vnitas cum distinctione personarum; sed tollitur hæc summa vnitas, si ponatur personas distingui per aliud, quam ratione oppositionis; quæ sola impedit, ne opposita sint vnum; ergo ratione solius oppositionis, & processionis personæ distinguuntur.

Dices: paternitas, & Spiratio passiuæ non sunt relationes oppositæ, sed disparatæ, & tamen realiter distinguuntur; sic etiam filiatio; ergo ad realem distinctionem earum sufficit esse disparatas, & non requiritur eas esse oppositas.

Respondent aliqui illas realiter distingui, eo quod paternitas realiter identificatur cum spiratione actiua opposita, & sic etiam filiatio.

tio. Sed contra hanc responsio-  
nem stat primo, quod propter ean-  
dem rationem posset etiam dici  
spirationem actiuam distingui rea-  
liter à filiatione, eo quod identi-  
ficatur paternitati oppositæ fila-  
tioni. Contra est secundo, quia hoc  
modo etiam essentia distingueretur  
realiter à processione, eo quod  
& ipsa identificatur cum spiratione  
actiua.

Respondent alij, distingui, quia  
sunt in diuersis suppositis. Sed con-  
tra est; quia propter hoc Scotus  
contendit posse esse relationes dis-  
paratas in diuersis personis, absque  
oppositione.

Melior responsio videtur esse  
eorum, qui dicunt: processionem  
Spiritus Sancti opponi paternita-  
ti, & filiationi secundum origi-  
nem: omne enim relatiuum op-  
ponitur non solum suo correlati-  
uo, sed etiam termino, ad quem  
refertur; qui terminus in creatis  
simpliciter consideratus ut pluri-  
mum est quid absolutum; in Di-  
uinis verò personis, quæ consti-  
tuuntur relationibus, est semper  
relatio. Dixi in creatis terminum  
simpliciter consideratum esse ut  
plurimum quid absolutum, eo  
quod in sententia, quam sequor,  
licet omnis relatio sit mutua, non  
tamen propterea habet pro termi-  
no formaliter aliam relationem,  
sed absolutum illud, in quo fun-

datur correlatio: in præsentī ve-  
rò cum terminus, quem respicit  
spiratio passiuā, sint Pater, & Fi-  
lius ratione paternitatis, & fila-  
tionis, in quibus fundatur rela-  
tio spirationis actiue, necesse est  
ut contradistinguantur ab illa,  
ratione terminationis, quod non  
haberet filiatio in data hypothēsi,  
eo quod non respiceret, nec respi-  
ceretur ab ipsa processione ut ter-  
minus.

Dico 2. Sublata origine actuali  
Spiritus Sancti à Filio, non mane-  
re ullam rationem distinctionis  
realis inter ipsos. Hæc assertio est  
contra A. A. secundæ sententiæ.  
Probatur primo. Quia SS. PP.  
absolutè docent personas distingui  
per relationes originis; sed rela-  
tiones, quæ de facto distinguunt,  
sunt relationes, quæ consequun-  
tur actualem productionem, non  
verò possibilem; ergo sublata actua-  
li non manet distinctio. Adde,  
quod sicut in nostra sententia,  
non potest distingui in intellectu-  
ne, & volitione Diuina actus pri-  
mus, & actus secundus, propter  
ibi dicta; ita nec etiam in produ-  
ctionibus Diuinarum personarum,  
nisi quoad vocem, eo quod nos  
non possumus Diuina concipere,  
nisi per conceptus creaturarum,  
in quibus hæc duo distinguun-  
tur, & consequenter nec etiam ea  
nominare, nisi vocibus, quibus  
ista

ista exprimimus: de cætero cum ibi sit summa actualitas, & necessitas essendi, & producendi, quanto magis excludimus per actus reflexos huiusmodi potentialitates à Diuinis perfectionibus, & productionibus, eo perfectius, & verius illa attingimus.

Probatur 2. Quia cum dicitur Spiritus Sanctus, vt spirabilis à Filio, distinguitur realiter ab illo, vel sumitur Spiritus Sanctus, vt persona actu existens à Patre, vel secundum esse obiectiuum; si secundo modo, non est ens, & non potest realiter posituè distingui à Filio; si primo modo, vel ex hoc præcisè, quod à Patre supponitur habere esse, supponitur esse persona distincta à Filio, vel non distincta; si primum, ergo de facto non distinguitur per actualem originem à Filio; si secundum, ergo non manet in Filio potentia spiratiua; nam hæc necessario requirit distinctionem à producibili, alioquin posset idem producere se ipsum. Quapropter, licet de facto propter actualem originem præcindatur in multorum sententia conceptus spiratiui, & spirantis; sublata tamen per intellectum spiratione actuali, esset etiam tollenda potentia spirandi; nam hæc requirit distinctionem productiui à producibili, quæ distinctio non potest esse sine actua-

li productione. Ex quo apparet nunc esse quidem duplicem rationem distinctionis in Filio, ipsam videlicet filiationem, quatenus constituit terminum processionis, ac principium spiratiuum; & ipsam relationem Spiratoris; sed hac sublata, quia Filius nec esset terminus, nec principium spiratiuum; omnino sublatum iri fundamentum distinctionis realis.

Dices 1. cum Scoto: in ea hypothesis adhuc Filius constitueretur per filiationem persona incommunicabilis; ergo adhuc esset distinctus à quocumque alio. Confirmatur primo. Quia per illud res à quocumque alio distinguitur, per quod constituitur in suo esse, sed Filius constituitur secunda persona, non per spirationem actiuam, sed per filiationem; ergo &c. Confirmatur secundo. Quia in Cap. *Firmiter* definitur Personas Diuinas constitui proprietatibus personalibus; sed sublata spiratione actiua, adhuc manerent proprietates personales secundæ, & tertiæ personæ, filiatione nempe, & processio; ergo adhuc manerent personæ distinctæ. Responso antecedenti, negando consequentiam, nam data illa hypothesis Spiritus Sanctus non esset alius à Filio. Ad primam Confirmationem respondent aliqui, limitando illud axioma ad solum constitutum



tiuum absolutum, & negando illud de constitutio relatiua; sed hoc videtur gratis excogitatum, ad effugiendam difficultatem; nam cum hoc esse distinctum ab alio nihil aliud sit, quam hoc non esse illud, & omnis negatio fundetur in aliqua affirmatione, hanc rem non esse aliam non potest fundari, nisi in hoc, quod hæc res est talis entitas, & illa talis, & sic non nisi in constitutio cuiusque rei. Nam vt rectè obseruat Angelicus Doctor quaest. 10. de potentia artic. 5. oppositio secundum affirmationem, & negationem consequitur distinctionem rei, non illam causat; & ideo hoc non est illud, quia vtrumque habet propriam entitatem. Resp. igitur. negando consequentiam. Nam de facto Filius distinguitur quidem à Spiritu Sancto etiam per filiationem, cum per illam constituitur etiam terminus processionis, & principij; sed in facta suppositione Spiritus Sanctus non haberet per quid ab illo distingueretur; & eadem persona conciperetur duobus conceptibus inadæquatis, filiationis, & spirationis passiue, quemadmodum modo concipitur duobus etiam inadæquatis, generationis scilicet, & spirationis actiue. Ad secundam Confirmationem. Resp. Concilium loqui de distinctione vt est de facto,

non verò ex hypothesi.

Dicitur. si Spiritus Sanctus procederet à Filio, & non à Patre, adhuc realiter distingueretur à Patre; ergo, etiam si à solo Patre procederet, distingueretur adhuc à Filio. Consequentia patet, quia si semel admittitur distinctio realis, sine oppositione relatiua, est semper admittenda. Antecedens probatur, quia alias idem esset Pater, & Spiritus Sanctus, & sic Pater à Filio produceretur. Respondent plures recentiores huic argumento, negando antecedens; volunt enim esse parem rationem, vtriusque. Ad id, quod inferitur, fore vt Pater à Filio procederet, concedunt sequi, & dicunt non esse mirum, quod ex vno impossibili sequatur aliud. Verum, si liceret hoc effugio vt, potuissemus ab initio hanc questionem prætermittere: Hoc enim est id, quod intendebant Gorifredus, & noster Ariminen. Ex impossibili scilicet sequi aliud, seu quodlibet. Cum igitur pro fundamento huius difficultatis ponatur non sequi ex quocumque impossibile aliud; sed solum ex illo, quod includit impossibilia, aliter respondendum est; negando scilicet consequentiam: si enim à solo Filio procederet, cum Filius sit à Patre, saltem mediata ab eo procederet; & sic cum illo haberet op.

oppositionem mediatam, ut habet Nepos cum Auo; si verò à solo Patre procederet, nec mediata, nec immediata opponeretur Filio.

Dices 3. Adhuc in facta suppositione spiratio esset diuersa productio à generatione. & illa posterior, sed per generationem produceretur persona Filij; ergo per spirationem produceretur alia persona. Consequentia probatur dupliciter: primo, quia non esset minoris virtutis vna productio, quam altera; secundo, quia non posset vna persona, producta per generationem, iterum produci per aliam productionem. Resp. negando maiorem, & consequentiam, cum suis confirmationibus. Tunc enim processio passiva esset vna realiter cum generatione, sicuti est nunc spiratio actiua; ac proinde conciperetur inadæquatè sub conceptu generationis, & spirationis passivæ, & sic non esset minoris virtutis vna, quam alia, esset enim realiter eadem; nec sequeretur vnā personam bis produci, sed semel tantum vnica productione.

Dices 4. hanc esse expressam sententiam Sancti Anselmi: nam in lib. de processione Spiritus Sancti cap. 4. ubi, cum dixisset Filium esse alium à Spiritu Sancto, quia ille de Patre nascendo est,

hic verò procedendo; subdidit: *Nam si per aliud non essent plures Filij à Spiritu Sancto, per hoc solum essent diuersi.* Ergo &c. Respondet S. Thom. loco citato questione de potentia: S. Anselmum loqui disputatiuè, non definitiuè; & 1. par. quæst. 36. artic. 2. in resp. ad septimum, cum in argumento sibi obieisset hanc eandem Auctoritatem, respondet, concedendo Filium à Spiritu Sancto differre quidem ex diuerso modo productionis, ut docet ibi Sanctus Anselmus; sed ulterius vult hanc diuersitatem non fore, si à Filio non procederet. Verum contra primam responsionem stat, quod S. Anselmus ibi absolutè loqui videtur, & ex prima sententia, ut indicat contextus ipse; nam soluens ibi dubitationem, quare Filius, & spiritus sanctus, cum sint vnus Deus, non procedat vterque ut genitus; respondet esse diuersos, propter adductam rationem; & talem esse huiusmodi diuersitatem, ut si non diuersificarentur per aliud, illa sola ratio esset sufficiens. Contra secundam responsionem stat, quod Sanctus Anselmus ibi decernit fore diuersas origines solum ex principiis, in quibus Græci, & Latini conveniunt, antequam contra Græcos ostendat procedere à Filio. Videtur ergo dicendum S. Anselmum ibi inclinasse

nasse in sententiam Scoti, quod tamen ibi indicat Angelicus Doctor; dum subdit non fore diuersitatem illam, si à Filio non procederet. Verum Auctoritati huius sancti opponimus torrentem PP. qui distinctionis realis causam referunt in actualement originem, ut visum est in Controversia precedenti, in Dubio Axiomatis, & hæc satis quoad scoti sententiam.

Dices 5. pro secunda sententia sublatâ per intellectum spiratione actuali, non tollitur quidquid realiter est spiratio, nam alias tolleretur etiam essentia; ergo adhuc manet conceptus spiratiui; sed hoc manente, adhuc manet ratio distinctionis; ergo sublata actuali spiratione Filij adhuc maneret realis distinctio à Filio. Respondent aliqui: sublata per intellectum huiusmodi spiratione actuali, adhuc posse concipi Filium ut spiratiuum; sed absque fundamento in re, quia tolleretur distinctio requisita. Hæc ratio gratis additur ab illis, nam assignatur pro ratione id, quod est in questione. Melius ergo respondent ij, qui

dicunt non esse fundamentum in re concipiendi Filium ut spiratiuum, propter summam ipsius actualitatem; vnde, quemadmodum dicitur in æternis esse idem posse, & esse, sic etiam rectè potest dici, esse idem posse, & agere, quod non solum de identitate secundum rem, sed etiam secundum rationem est intelligendum, ut dixi in Controversia de scientia Dei.

Dices 6. pro eadem sententia: Dato quod creatura à solo Patre produceretur adhuc distingueretur à Filio, & à Spiritu sancto, quatenus ratione principij communis posset ab illis pendere; ergo si per impossibile sola voluntas Patris spiraret, adhuc Spiritus sanctus distingueretur à Filio potente spirare. Resp. in dato exemplo manere adhuc sufficientem rationem distinctionis realis, non in proposito; sed quia prædicta creatura adhuc esset ens essentialiter dependens, & Filius, & Spiritus sanctus adhuc essent ens essentialiter independens; inter quæ essentialiter, & ab intrinseco implicat identitas realis.



Gg

AXIO.

## AXIOMA SEXTVM.

*Pater, & Filius sunt vnum principium Spiritus Sancti.*

Ex Lib. 5. de Trinitate Cap. 14.



*I* quod datur, principium habet eum, à quo datur, quia non aliunde accepit illud, quod ab ipso procedit; fatendum est Patrem, & Filium principium esse Spiritus Sancti, non duo principia; sed sicut Pater, & Filius vnus Deus, & ad creaturam relatiue vnus creator, & vnus Dominus; sic relatiue ad Spiritum Sanctum vnum principium.

## DVBIVM VI.

Vtrum Pater, & Filius sint vnum principium Spiritus Sancti.

**C**VM Græci negarent spiritum sanctum à Filio procedere, ne cogerentur admittere duo principia ipsius: Concilium Lugdunense definiuit procedere ab vtroque, non tanquam à duobus principijs, sed tanquam ab vno, quæ definitio habetur cap. vnico de summa Trinitate in sexto. Propterea reprehenditur Ariminensis, qui in 1. distinct. 12. quæst. 1. asserit illam propositionem: Pater, & Fi-

lius sunt vnum Principium spiritus sancti, non esse veram in rigore sermonis, sed solummodo in sensu intento à Concilio, hunc autem esse, quod spiritus Sanctus procedat à Patre, & Filio eodem modo, & perinde ac si ab vno principio procederet, cum tamen sint propriè duo principia; quod nititur probare primo ex verbis Concilij, vbi ait: *Non tanquam ex duobus principijs, sed tanquam*

*ex uno; non duabus spirationibus, sed unica spiratione procedit.* Ex quibus ille sic arguit. Quia simpliciter est vnica spiratio, non addidit *tanquam*, vt prius fecerat, cum de principio loquitur: Ergo illa particula denotare voluit Concilium non esse propriè vnum principium. Probat secundo ex S. Hilario, qui lib. 1. de Trinitate non procul à fine asserit, quod Spiritus Sanctus à Patre, & Filio auctoribus confitendus est: quod si essent vnum principium, diceret à Patre, & Filio auctore. Ergo &c. Verum hæc sententia non est admittenda; nam ibi Concilium damnat asserentes spiritum sanctum procedere à duobus principijs: non enim condemnaret Concilium propositionem, quæ in rigore sermonis, & proprio significato esset vera; vt definiret aliam impropriam, & in rigore falsam; nec argumenta ipsius conuincunt oppositum. Ad primum enim. Resp. particulam illam *tanquam* non esse diminuentem vnitatem principij, sed solum expressiuam, & declaratiuam veritatis, nec fuisse iterum addendam, cum iam semel apposita sufficeret. De hoc habemus exemplum in Euangel. S. Ioan. cap. 1. vbi dicitur: *Vidimus gloriam eius, gloriam quasi unigeniti à Patre &c.* vbi ly *quasi* non diminuit, sed explicat. Ad

Auctoritatem S. Hilarij. Resp. accipi ibi nomen Auctoris, non substantiue, sed adiectiue: sic explicat S. Thom. 1. par. quæst. 36. artic. 4. in respon. ad 7. vbi etiam reijcit illam explicationem Arimæensis, quæ videtur fuisse etiam Magistri sententiarum: qui tamen in hoc communiter non recipitur.

Durandus in primo sententiarum distinct. 1. quæst. 3. dicit quæstionem hanc non esse de re, sed de modo loquendi; eo quod est certum Principium spirandi esse vnum, & Supposita spirantia duo, non tamen propterea putat Controuersiam esse leuem, eo quod ex verbis inordinatè prolatis incurritur hæresis: & perindè se habere, ac si quæreretur: Vtrum, cum Deitas sit in tribus personis propter vnitatem formæ significatæ; tres personæ sint dicendæ vnus Deus; an verò propter pluralitatem suppositorum tres Dij; Quem admodum dicimus esse vnum Deum, propter vnitatem formæ; sic etiam propter vnitatem virtutis spiratiuæ dicendæ erunt vnum principium spiratiuum; quo pacto dicimus etiam tres personas esse vnum principium omnium creaturarum propter vnitatem potentie creatiue.

Vt perfectè explicetur hæc difficultas, & vt perfectè soluat

quæstio, videndum est unde concreta substantiua desumant suam unitatem, vel pluralitatem; De abstractis enim nulla est difficultas; eo quod sit certum eam sumere ab unitate, vel pluralitate formæ significatæ, cum nihil aliud præter illam significant; De concretis verò adiectiuis conuenit ferè inter omnes, unitatem, & pluralitatem eorum desumi ab unitate, vel pluralitate subiecti; quidquid sit de forma significata: nam si in aliquo sint plures artes, non tamen propterea ille dicitur esse plures artifices, sed vnus; & si in tribus subiectis Diuinitus ponetur vnica albedo, non diceretur ea esse vnum album, sed tria alba. Hinc est quod locutiones illæ Sancti Athanasij in Symbolo: *Non tamen tres omnipotentes &c. nec tres æterni. Sed vnus æternus.* Exponuntur de nominibus substantiue sumptis, non verò adiectiue; nam adiectiue sumendo, rectè possunt dici tres omnipotentes, tres immensi, tres æterni &c. idest tres personæ habentes omnipotentiam, immensitatem, æternitatem &c. Ad Concreta ergo substantiua deuoluitur tota difficultas, de quibus, licet aliqua in superioribus Controuersijs dictum sit; nondum tamen expendi præcipuos modos explicandi DD. quos placet in præsentia af-

ferre, & explicare.

Primus sit ille Durandi in 1. distinct. 1. quæst. 3. vbi licet approbet regulam Sancti Thomæ traditam 1. par. quæst. 36. artic. 4. quod concreta substantiua sumant unitatem, & pluralitatem à forma significata; negat tamen si vna persona Diuina assumeret plures humanitates, fore vt dicerentur plures homines; aut, si tres personæ assumerent vnā humanitatem, fore vt dicerentur vnus homo; quod consequenter ad prædictam regulam Sancti Thomæ erat concedendum. Fundamentum Durandi est, quia nominibus vtendum est, iuxta eorum impositionem; videmus autem non dici vnum hominem, nisi unitati naturæ correspondeat unitas suppositi; nec dici plures homines, nisi plurificentur Naturæ, & supposita; ergo &c. Contra est, quod hinc sequeretur, non dici vnum tantum, nisi vsu loquentium: propterea cum nomen Deus naturam Diuinam significet; sicut nomen homo naturam humanam; si illi non obstat pluralitas suppositorum ad pluralitatem nominis, nec etiam obstarè deberet in illa hypothesis.

Secundus modus est Martij in 3. quæst. 2. artic. 3. & Gabriel in 3. distinct. 1. quæst. 2. artic. 3. qui censent unitatem, & pluralitatem in crea-

tis

tis defumendam esse à suppositis, siue vnum plures naturas assumat, siue plura vnam. Verum vrgentur eadem difficultate; nam hoc pacto etiam dicendum esset, esse tres Deos, cum sint ibi tria supposita; eodem enim modo, ante reuelationem Mysterij Sanctissimæ Trinitatis, nomen Deus significabat Naturam Diuinam, sicut homo significat naturam humanam; nec enim est variata significatio huius nominis post reuelationem huius Mysterij.

Tertius est Caietani 3. par. quæst. 3. artic. 7. ad secundum, & Canar. ibi, qui volunt ad pluralitatem requiri pluralitatem suppositorum, vt in adiectiuis, & præterea etiam pluralitatem formarum, quæ in illis non requiritur; ac proinde neque si vna persona duas humanitates assumeret, neque si tres personæ eandem, forent plures homines; primo quidem modo defectu suppositorum: secundo verò defectu formarum. Fundamentum ipsorum est, quia S. Thom. in 1. par. quæst. 36. artic. 4. ad 2. negat Patrem esse duo principia, licet habeat duas rationes principiandi substantiue significatas, Patris scilicet, & spiratoris. Et ex eo, quod in 3. par. loco citato docet, quod si vna persona assumeret duas humanitates, non dicerentur duo homines; quia ex usu

loquentium non plurificatur nomen, nisi plurificatis personis. sed in hac explicatione manet adhuc difficultas: Quomodo tres personæ sint vnus Deus; nam si ad pluralitatem substantiui non sufficit pluralitas formæ, sed requiritur etiam pluralitas suppositorum; cur ad vnitatem sufficiet vnitas formæ sine vnitatem suppositorum.

Quartus Modus est S. Thom. 1. par. quæst. 39. artic. 3. vbi tradit hanc regulam: quod in adiectiuis vnitas, vel pluralitas attenditur secundum supposita, in substantiuis verò secundum formam significatam; propterea Thomistæ laborant in conciliando hoc loco cum supracitatis. Caietanus ait assignasse discrimen, quod ad multiplicationem substantiui non est satis multiplicatio suppositorum, vt in adiectiuis, sed requiritur etiam multiplicatio formarum. Sed contra est, quia æquè de pluralitate asserit attendi secundum formam, & nunquam meminit suppositorum. Alij aliter conciliare nituntur.

Verum quidquid sit de hoc; Censeo esse tenendam regulam, quam in dicta quæst. 39. assignat propter efficaciam rationis, quam ibi adducit; videlicet, quia substantiua significant formam per modum substantiæ, & per se stant;

tis; substantia autem, sicut per se habet esse, sic etiam habet per se unitatem, vel pluralitatem, quæ consequuntur ad esse: adiectiua, verò, quia significant formam per modum adiacentis, & accidentis, ac innitentis alteri; & accidens, sicut habet suum esse in ordine ad subiectum, sic etiam in ordine ad illud habet unitatem, & pluralitatem; & propterea, secundum unitatem, vel pluralitatem ipsorum, habent & ipsa vel vnum, vel alterum.

Duo tamen sunt in hac regula aduertenda. Primum est esse quædam nomina media, quæ quoad modum significanti sunt substantiua; quoad rem verò significantam sunt adiectiua, vt artifex, creator, Opifex &c. in quibus regula Doctoris Angelici deficit; nam quoad unitatem, & pluralitatem sequuntur subiectum, non formam: Si quis enim habeat duas artes; dicitur vnus artifex; fortasse ex eo, quia huiusmodi nomina imposita sunt magis ad significantum subiectum, vt habet formam, quam formam vt est in subiecto; Quod si Deus dicitur vnus artifex, & vnus Creator, licet habeat tria supposita, in quo videtur habere locum regula concreti substantiui; hoc est, quia Deus est artifex, & creator, quatenus est hic Deus sub-

sistens in tribus personis; quem admodum etiam si tres personæ assumerent vnâ numero naturam, diceretur vnus artifex ratione illius, quamquam essent tres personæ.

Secundum est nomina substantiua essentialia directè, & formaliter significare naturam, connotando supposita, vt adiectiua formam, connotando subiectum; personalia verò, vt Petrus, suppositum &c. formaliter & directè significare personalitatem, connotando naturam; & cum vtraque directè significant per modum substantiæ, in Deo propriè dici tres personas, & vnum Deum. Quibus positis,

Dico propriissimè Patrem, & Filium esse vnum principium spiritus sancti, ac etiam vnum spiratorem; eo quod hæc nomina sunt concreta substantiua; posse tamen dici duos spirantes, & duos æternos propter regulam assignatam, & explicatam.

Dices primo, vel nomen principij in illa propositione supponit pro essentia, vel pro aliqua proprietate communi Patri, & Filio, vel pro persona; non primum; essentia enim est communis etiam spiritui sancto; nec secundum, quia hæc proprietas non posset esse aliud, quam spiratio communis,



nis, quæ tamen est posterior principio spirandi; ergo debet esse persona; & sic cum sint duæ personæ, erunt etiam duo principia.

Respond. huic argumento Gabriel in 1. distinct. 12. quæst. 1. ad 2. Nomen principij supponere pro constituto ex essentia, & spiratione, quod sit quantum constitutum per intellectum; atque ita supponere aliter, quam cum tres personæ dicuntur principium creaturarum; nam tunc supponit pro essentia communi. Fundamentum Gabrielis est, quod principium productiuum spiritus sancti est aliquid notionale commune Patri, & Filio; non est autem assignare aliud commune. Et confirmat hoc, quia per paternitatem Pater respicit Filium, non verò spiritum sanctum, & sic de filiatione.

Contra hanc responsionem opponunt aliqui, quod siue sumatur spiratio pro actione spirandi, siue pro relatione, quæ sequitur, semper est posterior principio spirandi, eo quod relatio supponat actum, & actus principium agendi. Hanc oppositionem conatur infringere aliqui, dicendo relationem spiratoris aliquo modo antecedere se ipsam, quatenus constituit spiratum; vt dicunt alij de paternitate. Sed frustra;

nam spiratio quocumque modo accepta supponit personam Patris, & Filij. Melius ergo destruitur responsio Gabrielis, si dicatur, quod intellecta persona Patris, & Filij, constituta per suam proprietatem, sufficienter intelligitur spiratio, secluso quocumque alio.

Dicendum igitur nomen principij supponere pro essentia, & volitione, vt est determinata per relationem paternitatis, & filiationis; nam vt sic illa essentia rectè concipitur vt principium spirandi. Ad fundamentum Gabrielis. Resp. in principio spirandi distingui rationem formalem principij, quæ est essentia, & volitio communis secundum rem, & conditionem requisitam, quæ est paternitas, & filiatio, vt præcedunt origine processionem per volitionem; quæ relationes, quamuis secundum rem non sint communes; tamen ratione conditionis requisitæ secundum rationem conueniunt. Vtraque enim origine præcedit processionem per volitionem, ac proindè principium spirandi partim est commune secundum rem, partim est commune secundum rationem, cum fundamento tamen in re. Ad Confirmationem Zumel, & alij respondent per paternitatem non constitui Patrem in esse principij for-

formalis; sed eam esse solum conditionem. Cui responsioni addendum est, esse quidem conditionem requisitam, non tamen sub ratione paternitatis; sed ut constitutiva personæ prioris origine, quam processio per volitionem, & idem dicendum est de filiatione.

Dices 2. si principium est vnum propter virtutem spiratuiam vnam; ergo propter virtutem generatiuam, & spiratuiam, quæ est in Patre, Pater dicendus erit duo principia: & si propter vnitatem suppositi Pater dicitur vnum principium; Pater, & Filius propter pluralitatem dicentur plura principia. Respondent plures Thomistæ maximè ex recentioribus, S. Thomam negare, quod Pater sit duo principia, quia secundum rem est vna ratio principiandi, posse tamen dici duo principia, secundum rationem, & re vera,

secundum regulam traditam, sic esset dicendum. sed obstat, quod idem S. Thom. quæst. 36. artic. 4. causam huius refert in vnitatem suppositi; quare videtur sentire idem, quod Caietanus 3. par. quæst. 3. artic. 7. docet, nempe S. Thomam requirere ad pluralitatem substantiui, etiam pluralitatem suppositorum: Sed contra hoc est, quod idem Angelicus Doctor in 3. distinct. 1. quæst. 1. artic. 5. ad secundum, expressè dicit spectandam pluralitatem formæ, non verò suppositorum, & si Verbum assumpsisset duas naturas, quarum vna diceretur Iesus, altera Petrus, futuros duos homines, contra quam docuit tertia parte consequenter ad regulam traditam, & melius; nam, qui vidisset duas humanitates, non dubitasset appellare duos homines.

## AXIOMA SEPTIMUM.

*Spiritus Sanctus Patris, & Filij Spiritus est.*

Ex Lib. 5. de Trinitate Cap. 11.

**I**lle Spiritus Sanctus, qui non Trinitas, sed in Trinitate intelligitur, in eo, quod propriè dicitur Spiritus Sanctus, relatiue

*latius dicitur, cum & ad Patrem, & ad Filium refertur; quia Spiritus Sanctus & Patris, & Filij Spiritus est; sed ipsa relatio non apparet in hoc nomine, apparet autem cum dicitur Dominum Dei.*

## D V B I V M V I I.

Vtrum Spiritus Sanctus petat per se produci à duobus.

**N** Vllus Catholicus negat spiritum sanctum procedere à duobus; vt supra visum est; cum in vtroque sit eadem vis spiratiua. Est etiam communis sensus Theologorum procedere necessario à duobus, vt sit tertia persona distincta; quod tamen consequenter loquendo non esset asserendum ab ijs, qui docent fore vt distingueretur à Filio, etiam si ab eo non procederet. Difficultas præsens est: Vtrum processio ista ita exigit ex sua ratione esse à duobus suppositis, vt si fingamus esse ab vno tantum, vt in hypothefi, de qua supra; tolleretur eius ratio, aut aliqua proprietates Spiritus sancti. Hæc quæstio non videtur esse diuersa ab ea, in qua quæritur: Vtrum potentia spirandi per se exigit duo supposita; quidquid contradicat Vasquez tom.2. primæ partis disput.

150. cap.1. vbi ait: Certum esse, quod potentia spirandi per se, & necessario est coniuncta, vel potius identificata duobus suppositis: & quæri solum: vtrum pluralitas suppositorum comparatur per se, & in quarto modo, idest per modum principij ad Spiritum Sanctum, dato quod per se sit in duobus suppositis; nam eadem necessitate, qua potentia spirandi est per se in duobus suppositis secundum rem, eadem quoque spiritus sanctus à duobus procedit; & sicut quæri potest: Vtrum spiritus sanctus ex vi suæ processionis formaliter petat esse à duobus; quæri etiam potest: vtrum potentia spirandi vt sic determinet sibi duo supposita, an vnum tantum; eadem enim ratione de vtraque quæstione iudicandum est. In qua duæ sunt celebriores sententiæ.

Hh

Pri.

Prima est Scoti in primo distinct. 12. quæst. 2. assertentis non requiri per se pluralitatem suppositorum; sed solum procedere à duobus, eo quod eadem virtus spiritalia sit in duobus. Hanc probabilem existimat etiam Caietanus.

Secunda sententia est Henrici in summa artic. 34. Capreoli in 1. distinct. 12. quæst. 1. Caietani 1. par. ad quæst. 36. artic. 4. Vasquez loco citato, Suarez lib. 10. cap. 6. quos sequuntur Ruuius, Amicus, Alarcon, Arriaga, & alij, & communiter tribuitur Sancto Thomæ, tam in 1. par. loco citato in responsione ad primum quam in 1. distinct. 11. quæst. 1. artic. 2. scilicet requiri per se duo supposita ex parte principij. Propterea.

Dico 1. de facto spiritum sanctum procedere, ut amorem mutuum, & sic à duobus. Et probatur ex S.P.N. hic in Axiomate, ac etiam lib. 6. de Trinitate cap. 5. ubi ait: *Etiam Spiritus Sanctus in eadem unitate substantia, & equalitate consistit. Siue enim sit unitas amborum, siue sanctitas, siue Charitas, siue ideo unitas, quia Charitas, & ideo Charitas, quia sanctitas, manifestum est quod non aliquis duorum est, quo uterque coniungitur, quo genitus à gignente diligitur, generatoremque suum*

*diligit, sanctique non participatione, sed essentia sua, neque dono superioris alicuius, sed suo proprio seruantes unitatem Spiritus in vinculo pacis.*

Probatur 2. quia Spiritus sanctus procedit per volitionem, quæ secundum rationem supponit processionem per intellectionem; sed per primam processionem vis spiritalia Patris communicatur Filio, & sic, prius quam procedat, supponitur vis spiritalia in duobus; ergo à duobus, ut amor mutuum eorum, procedit.

Dico 2. spiritum sanctum ex vi suæ processionis formaliter, & intrinsecè postulare duo supposita spiritalia. Probatur primo auctoritate S.P. in dicto Cap. 5. lib. 6. de Trinitate, ubi ait: *Spiritus ergo Sanctus commune aliquid est Patris, & Filij quicquid illud est: at ipsa communio consubstantialis, & coæterna* (nota h. Consubstantialis) *prosequitur deinde S.P. Quæ si Amicitia conuenienter dici potest, dicatur, sed aptius dicitur charitas. Et hac quoque substantia, quia Deus substantia, & Deus Charitas, sicut scriptum est. Si ergo huiusmodi communio est consubstantialis, & substantia, processio per se ei competit esse ab his duobus; nihil enim magis per se est, quam quod consubstantiale, & substantia est.*

Pro-

Probatur 2. quia de ratione talis processionis est procedere per modum amoris mutui; qui, ad hoc vt sit mutuus, essentialiter, & per se requirit ad minus duos; ita vt Richardus à S. Victor. lib. 3. de Trinitate cap. 3. 7. & 11. doceat non posse amorem esse perfectum, & iucundum, nisi sit saltem duorum; & cap. 16. ait nihil definiri contrarium naturæ, si plenitudo sapientiæ dicatur esse in vna persona tantum: in vna namque persona plenitudo sapientiæ esse potest; at plenitudinem amoris natura sua exigere, plura supposita, vt perfectus sit; perfectio enim amoris in eo consistit, vt mutuus sit; ergo cum Spiritus sanctus procedat non solum vt amor, sed etiam vt amor mutuus, & perfectus, per se exigit duo supposita, à quibus procedat.

Probatur 3. Quia spiritus sanctus procedit, vt nexus Patris, & Filij; non posset autem hanc characteristicam proprietatem habere, si ab vno tantum procederet, quod descripsit S. P. loco citato supra pro prima assertionem, cum ait: *manifestum est, quod aliquis duorum est, quo uterque coniungitur, quo genitus à genitore diligatur; genitoremque suum diligat; quod etiam docent alij PP. relati à Vasquez disput. 151. cap. 1.*

Ergo necessario, & essentialiter, ac per se requirit produci à duobus personis. Quod etiam docuit S. Thom. loco citato ad primum, cum ait procedere vt vnitiuum duorum:

Dices 1. pro Scoto: si Spiritus sanctus postulet per se produci à duobus, vel hoc esset propter rationem amoris procedentis, vel quia est amor Diuinus; Non primum, quia ad productionem amoris non requiritur per se aliud, quam obiectum amabile, & voluntas; sed hæc omnia possunt saluari in vna persona; ergo non requiruntur necessario, & per se duæ. Minor probatur in amore sui ipsius, ac etiam in amore alterius non mutuo, qui saluatur communiter in vna sola persona. Secundum probatur, quia si conciperemus voluntatem, vt est in Filio non esse foecundam, sed tantum vt est in Patre, vt accidit in intellectu, adhuc intelligeretur spiratio Diuina, ac etiam eius terminus, qui esset Spiritus sanctus: ergo per se non requiruntur duo supposita ad eius productionem ratione amoris Diuini. Confirmatur, quia nec vis spiratiua in alterutra persona est imperfecta; nec alterutri deesset conditio requisita ad spirationem; quæ est proprietas anteceden-

dens origine ipsam processionem voluntatis. Resp. ad maiorem : postulare per se produci à duobus , non ex eo præcisè , quod sit amor procedens , sed quod sit amor Diuinus procedens perfectus , quod non haberet , vt docet Richardus locis citatis , si non procederet à duobus suppositis : sicut nec etiam haberet esse nexus duorum . Ad Confirmationem . Resp. virtutem spiratiuam in alterutra persona esse quidem perfectam ; sed per se requirere esse in vtraque , & productionem esse ab vtraque , propter supradicta .

Dices 2. Esse principium spiritus sancti ita conuenit Patri , & Filio simul , vt tamen vterque seorsim habeat perfectam rationem principiandi ; ergo , dato quod alter non spiraret , adhuc maneret spiratio in altero ; ergo non est per se ab vtroque . Hæc vltima consequentia probatur , quia terminus ab eo tantum est per se , à quo necessariò recipit suum esse . Resp. distinguendo antecedens : reperitur tam in Patre , quam in Filio seorsim principium productiuum quo tantum , & præcisè , concedo antecedens : principium quo , & conditiones requisitæ , vt vnusquisque eorum seorsim possit operari , nego antecedens . Pateritas enim , & filiatio requirun-

tur , vt conditiones necessariæ , vt supradictum est ; & ideò negatur vtraque consequentia . Ad probationem vltimæ consequentiæ Resp. terminum in nostro casu necessariò recipere esse ab vtroque , quia altero deficiente , deficeret conditio necessariò requisita . Neque hoc arguit imperfectionem vllam in Patre , vel Filio seorsim , sed prouenit ex natura talis termini ; qui cum sit nexus duorum , à duobus petit produci ; nec etiam sequitur Patrem , & Filium singulatim sumptos non esse principium perfectum spiritus sancti , tum quia eadem virtus totalis spiratiua est in vtraque persona singulatim ; tum etiam , quia conditio requisita non spectat ad rationem principij .

Dices 3. Creatio iuxta D-Thomam & plures alios Theologos ita est de facto à tribus personis , vt si essentia saluaretur in vna persona , nihilominus adhuc etiam posset esse ab illa , quia ratio essentia & omnipotentia est communis ; sed non minus est communis Patri , & Filio voluntas , quæ est vis spiratiua , quam essentia tribus ; ergo sicut creatio , & creatura non sunt per se ex tribus , ita neque spiritus sanctus est per se ex duobus . Resp. cum S. Thoma in 1. distinct. 11. quæst. 1. artic. 2. esse disparem rationem ;

crea-

creaturæ enim ad sui productionem requirunt solum omnipotentiam, vbiicumque hæc sit; At spiritus sanctus cum procedat vt Amor mutus, & vt distinctus à Patre, & Filio, ac proinde vt tertia Persona in Trinitate, requirit necessariò duo supposita. Propterea Alarcon Disput. 9. de Trinitate cap. 4. in fine: obseruat in spiritu sancto esse prædicatum intrinsecum, exigens ad sui productionem duo supposita; in creaturis verò non esse prædicatum vllum, quod exigit omnipotentiam esse in tribus. Vide etiam Arriagam Disput. 50. sect. 7. numero 37.

Opponunt aliqui ex Modernis hoc discrimen procedere de facto; eo quia, cum spiritus sanctus de facto procedat vt amor mutus, in tali modo procedendi dicit ordinem ad duo supposita, quem non dicunt creaturæ ad tria; sed de possibili militare eandem rationem, eo quod procedere vt amorem mutuum nihil aliud addit supra rationem amoris, quam respectum rationis; quatenus scilicet idem amor, qui est à Patre, concipitur tendere in Filium, vt in obiectum, & è conuerso; quæ relatio consurgit ex eo, quod vis spiratiua est in vtroque; ergo, cum vtrique persona sit perfectè constituta in actu primo ad spiran-

dum, si altera non spiraret, procederet idem amor substantialiter; sed non cum eadem relatione rationis: & hoc modo exponunt auctoritatem illam D. Thom. & id, quod habet in quæst. 36. 1. par. artic. 4. ad primum. Sed frustra primo, quia in æternis est idem esse, ac posse; & nos quærimus hic de facto de spiritu sancto, qui nunc est: an per se petat esse à duobus; non verò de spiritu sancto chymarico, qualem isti fingunt, cuius existentia implicat; si enim non implicaret, iam daretur à parte rei. Secundo, quia falsum est illam relationem esse solum rationis; nam sicut de facto in creaturis cognitio, & amor relatione reali respiciunt & principium, à quo producuntur, & obiectum, in quod tendunt; multo magis in Diuinis, vbi est perfectissima ratio producendi, procedendi, & tendendi in suum obiectum.

Dices: si esset verum, spiritum sanctum petere per se procedere à duobus, iam Pater, & Filius producerent illum, quatenus Pater, & Filius sunt, non verò quatenus spirator; sed hoc est falsum; ergo & id, vnde sequitur, Resp. ly quatenus in presenti posse sumi dupliciter: primo ita vt reduplicet rationem formalem; secundo vt reduplicet solam conditionem requisitam ex parte principij

cipij quo . si primo modo sumatur , negatur sequela maioris ; si verò secundo modo , conceditur ; nam re vera Pater , & Filius vt tales , sunt conuenientes in eadem virtute spiratiua , tamquam principio quo Spiritus Sanctus ex vi suæ processionis ; & quatenus huiusmodi sunt quid subsistens , consequenter principium quod ; & propterea rectè potest

dici procedere ab ipsis vt sunt distincti , quia hoc requiritur ; sed tamen etiam vt conueniunt in vna virtute spiratiua , quod est idem ac dicere Spiritus Sanctus requirit , vt sit ab vna virtute , quæ sit in pluribus distinctis . Videatur Zumel disput.4. ad artic.4. quæst.36.1.par. & Ioan.Morandus Tract.6. qui est de SS. Trinitate quæst.28.





# CONTROVERSIA S E X T A.

De Missione Diuinarum Personarum.

## A X I O M A   P R I M V M.

*Alicui Persona Diuina conuenit mitti.*

Ex Lib. 2. de Trinitate Cap. 5.



*Vm eum (idest Filium) Pater Verbo misit, à Patre, & Verbo eius factum est, ut mitteretur. Ergo à Patre, & Filio missus est idem Filius &c. Cum itaque hoc à Patre, & Filio factum esset, ut in carne Filius appareret, congruenter dictus est missus ille, qui in ea carne apparuit. Misisse autem ille, qui in ea non apparuit.*

## D V B I V M I.

Vtrum alicui Personæ conueniat mitti.

**P** Ræmitto Missionem includere duos respectus: vnum missi ad mittentem, alterum missi ad terminum; qui enim mittitur ab aliquo mittitur: & quoad primum respectum, posse concipi aliquem à mittente mitti tribus modis: primo per imperium; secundo per con-

consilium; tertio per originem, siue processione. Ex quibus duo primi important aliquam imperfectionem in eo, qui mittitur, & ideo Personæ Diuinæ non possunt conuenire: primus enim importat subiectionem; secundus verò ignorantiam. Tertius nullam prorsus importat imperfectionem; eo quod nulla est imperfectio ab alio habere originem.

Quoad secundum verò respectum aduerto aliquem posse mitti ad aliquem terminum, vel locum duobus modis. Primo ad terminum, in quo prius non erat vlllo modo; & sic mittuntur homines, & Angeli: non potest verò mitti sic Diuina persona; cum enim quælibet sit immensa, non potest mitti ad vllum terminum; in quo antea nullo modo esset. Secundo ad terminum, in quo prius quidem erat, sed tamen non omnibus modis, quibus poterat esse, & in hoc sensu procedit dubium. In quo.

Dico: Missionem aliquibus Diuinis personis conuenire. Probatur primo ex sacra Scriptura. Ioan. cap. 8. *Non sum ego solus, sed ego, & qui misit me Pater.* Et Cap. 3. *Misit Deus Filium suum.* Cap. 15. *Cum venerit Paraclitus, quem mittam vobis à Patre.*

Probatur 2. ratione. Quia nomine missionis hic venit æterna

processio Personæ Diuinæ cum habitudine ad effectum temporalem, siue visibilem, siue inuisibilem. Sed Filius, & spiritus sanctus ab æterno procedunt, ille à Patre solum, iste à Patre, & Filio: & in tempore quodammodo exeunt, eo sensu, quo Christus Dominus dixit: *Exiui à Patre, & veni in Mundum.* Et hoc vel in ordine ad æternam manifestationem, vel collationem alicuius doni creati. Ergo rectè dicti sunt missi. Et de Filio S. P. in Axiomate dicit: *Filius congruenter dictus est missus &c.*

Dices 1. Missio dicit Minorationem, & consequenter imperfectionem in eo qui mittitur; importat enim dependentiam, & subiectionem in illo; ergo non potest conuenire Personis Diuinis. Resp. tunc solum importare has imperfectiones; quando is, qui mittitur, exit per imperium, vt cum seruus mittitur à Domino, vel per consilium, vt cum quis edoctus ab alio de eo, quod ignorabat, ex eius consilio procedit ad aliquod opus, quo casu in missio importatur ignorantia. Quæ non habent locum in Diuinis; vbi solum importatur missio per originem, cum habitudine ad effectum &c. quæ rectè cohæret cum æqualitate personarum, & nullam inducit imperfectionem.

Di-

## DE MISSIONE DIVINAR. PERSONARVM.

Dices Christus Dominus habuit præceptum à Patre de suis operationibus, & consequenter in omnibus missionibus processisse per imperium, & non solum per originem. Resp. tale præceptum non fuisse impositum Personæ Diuinæ, vt in natura Diuina existenti, in qua procedit æqualis Patri; sed fuisse impositum ratione naturæ humanæ, in qua minor est Patre.

Dices 2. qui mittitur separatur ab eo, à quo mittitur; sed nulla ex Diuinis personis potest sepa-

rari ab alia; ergo nulla potest mitti. Resp. ad missionem sufficere solam distinctionem originis, cum habitudine supradicta; & nullam esse, aut posse ibi esse separationem naturæ, cum sint omnes tres vnum in natura: nec loci; nam persona missa non incipit esse, vbi nullo modo prius esset; hoc enim fit per motum localem, qui non habet locum in Diuinis. Per hæc potest responderi ad quæcumque alia argumenta desumpta ex motu locali.

## AXIOMA SECVNDVM.

*Misso in Diuinis dicitur solum temporaliter.*

Ex Lib. 2. de Trinitate Cap. 5.



*Lenitudo temporis cum Venisset, misit Deus Filium suum factum ex muliere: idest factum in tempore, vt incarnatum Verbum hominibus appareret, quod in ipso Verbo sine tempore erat, in quo tempore fieret. Ordo quippè temporum in æterna Dei Sapientia sine tempore est.*

## D V B I V M I I

Vtrum missio Diuinæ Personæ sit æterna,  
vel temporalis.

**F**undamentum dubitandi est :  
quia Missio ex dictis includit  
duo. Primum est processio vnius  
Personæ ab alia, quæ est æterna.  
Secundum est progressus ad ali-  
quem terminum, qui est tempora-  
lis. Quapropter missio partim vi-  
detur esse æterna, partim tempo-  
ralis, æterna quantum ad princi-  
pium, temporalis quoad termi-  
num.

Præmitto solutioni cum S.Tho.  
1.par.quæst.43.artic.2.has rationes,  
& sex prædicata in Diuinis habere  
distingui Generatio, & Spiratio,  
Processio, & exitus, missio, & datio.  
Quo posito.

Dico 1. Generationem, & Spi-  
rationem in Diuinis dici solum  
ab æterno, vt docet Angelicus  
Doctor loco citato, & Probatur.  
Quia in his tam habitudo ad prin-  
cipium generans, & spirans, quam  
habitudo ad terminum generatum,  
& spiratum sunt æternæ: quapro-  
pter, cum ibi nihil sit temporale,  
manet quod vtraque, quocumque  
modo sub his rationibus conside-  
retur, sit solum æterna.

Dico 2. cum eodem Sancto Do-  
ctore. Processionem, & exitum  
dici & æternaliter, & temporaliter.  
Quod probatur, quia Filius  
ab æterno processit, vt sit Deus,  
& temporaliter, vt sit etiam ho-  
mo. Ratio à priori est, quia hæc  
prædicata significant solam origi-  
nem, abstrahendo à termino. Er-  
go indifferenter possunt dici, vel ab  
æterno, vel ex tempore, prout ap-  
plicantur processionem, quæ habeat  
vel terminum æternum, vel tem-  
poralem.

Dico 3. Missionem, & Datio-  
nem in Diuinis dici solum in tem-  
pore, iuxta illud Apostoli ad Gala-  
tas cap.4.ver.4. *Cum venit plenitu-  
do temporis misit Deus Filium suum.*  
Ratio est: quia, licet hæc duo si-  
gnificent seu inuoluant Processio-  
nem æternam, simul tamen deno-  
tant terminum temporalem.

Dices 1. Quemadmodum missio  
dicitur temporalis propter termi-  
num temporalem; sic etiam pote-  
rit dici æterna propter processio-  
nem æternam. Resp.negando con-  
sequentiam. Ratio est, quia missio  
non

non existit, nisi quando existit eius integra ratio; quod fit solum, quando ad processionem æternam accedit terminus temporalis; Quapropter cum per terminum temporalem compleatur, & perficiatur, dicitur solum temporalis. Quemadmodum creatio, quæ licet existat per potentiam Dei, quæ est æterna, completur tamen per effectum temporalem; & ideo dicitur temporalis, non verò æterna.

Dices Christum Dominum includere duo, idest naturam humanam, & Verbum Diuinum, quorum illa est temporalis, & hoc æternum; & ratione huius dicitur fuisse ab æterno, & ratione illius in tempore; ergo similiter missio, ratione vtriusque, poterit dici & temporalis, & æterna. Resp. esse disparem rationem; nam Christus supponit pro persona Diuina, cui per communicationem idiomatum conueniunt prædicata vtriusque naturæ, tam Diuinæ, quam humanæ. At missio Diuinæ Personæ non supponit pro sola processione æterna, sed pro coniuncto ex processione æterna, & termino temporali, & ideo solum dicitur temporalis, sicut etiam creatio.

Dices 2. ex S. Gregorio Hom. 26. in Euang. habetur: *Eo mittitur Filius, quo generatur*. Sed generatio Filij est æterna; ergo & missio. Resp. cum S. Tho: loco citato in re-

spon. ad primum S. Gregorium loqui ibi de generatione Filij temporali à Matre, non verò de æterna à Patre. Vel, si magis placet, cum eodem Angelico Doctore, quia Filius habet vt possit mitti, quia est genitus ab æterno.

Dices 3. Cuicumque conuenit aliquid temporaliter, mutatur; sed personæ Diuinæ non possunt mutari; ergo missio illarum non est temporalis, sed æterna. Resp. maiorem esse falsam; nam in tempore, & ex tempore conuenit Deo esse Dominum, & Creatorem, & Verbo esse Incarnatum, & tamen non potest dici quod Deus, aut Verbum Diuinum mutantur. Ratio est, quia hæc sunt prædicata relatiua, quæ solum per positionem termini, sine vlla intrinseca mutatione fundamenti, adueniunt, & recedunt: posito termino adueniunt, & sublato siue destructo recedunt; vt patet etiam in creatis in similitudinibus, in paternitate, in dominio, & similibus, vt sæpe docet etiam Sanctus Thomas, & dixi in logica cap. de Relatione. Et sic cum in præsentī Diuina personæ incipit esse nouo modo in aliquo, vel ab aliquo, habetur temporaliter, non quidem per mutationem Diuinæ Personæ, sed per mutationem creaturæ: & ideo, concessa minori, neganda est consequentia.

## AXIOMA TERTIVM.

*Missio inuisibilis Personæ Diuinæ, fit solum secundum donum gratiæ gratum facientis.*

Ex Lib. 3. de Trinitate Cap. 4.

**S**piritus Sanctus procedit temporaliter ad sanctificandam Creaturam.

## D V B I V M I I I.

Vtrum missio inuisibilis Diuinæ Personæ sit solum secundum donum gratiæ sanctificantis.

**D**Væ sunt in hoc puncto Theologorum sententiæ oppositæ. Prima tribuitur à Vasquez Caietano in Comment. artic. 3. quæst. 43. 1. par. S. Tho: & est Durandi lib. 1. sent. distinct. 14. quæst. 3. S. Bonaventuræ distinct. 15. artic. 2. quæst. 1. Arriagæ Disput. 55. sect. 4. dicto 6. qui docent missionem inuisibilem fieri non solum per donum gratiæ sanctificantis, sed etiam per donum fidei informis; imò per cogitationem, & dilectionem Dei quamcumque, eo quod per hos effectus Deus acci-

piat aliquo nouo modo esse in creatura.

Secunda sententia est S. Thomæ loco citato, cui subscribit Vasquez in dubitatione circa doctrinam prædicti articuli; qui docent, loquendo absolutè, & simpliciter, missionem inuisibilem fieri solum per donum gratiæ sanctificantis. Propterea.

Dico cum S. Thomæ, absolutè, & simpliciter loquendo, prædictam missionem fieri solum per donum gratiæ gratum facientis. Probatur primo ex verbis S. P. in

Axiom-

Axiomate, ex quibus sic ducitur argumentum. Spiritus Sanctus procedit temporaliter ad sanctificandum; sed sanctificatio creaturæ non fit nisi per solam gratiam sanctificantem; ergo solum per hanc mittitur inuisibiliter persona Diuina.

Probatur 2. Quia præter modos communes, quibus Deus dicitur esse in quacumque creatura, etiam ab initio productionis cuiusque, nempe per essentiam, potentiam, & præsentiam: est etiam speciali modo in creatura rationali, ut obiectum cognitum in cognoscente, & amatum in amante; & quia creatura cognoscendo, & amando attingit Deum, ideo non solum speciali modo dicitur Deus esse in creatura rationali, sed etiam in ea habitare ut in suo templo. Sed nullus effectus potest esse huius ratio, nisi gratia gratum faciens. Ergo per solam gratiam gratum facientem fit missio inuisibilis.

Probatur 3. Quia Missio inuisibilis fit, ut creatura habeat Deum inhabitantem in se, iuxta illud Christi Domini: *Venimus, & apud eum faciemus*. Sed illud solum dicimur habere, quo liberè possumus vel uti, vel frui; & habere potestatem fruendi Diuina persona est solum per gratiam gratum facientem. Ergo solum per eam fit missio inuisibilis.

Dices 1. Cum quis prophetat, aut facit miracula, non facit hæc nisi per virtutem Spiritus Sancti; sed hæc possunt fieri etiam per personas existentes in peccato mortali, ut patet in Caïpha, & Saule; ergo potest dari missio Diuinæ personæ ad alia, præter quam per gratiam sanctificantem. Præterea Deus à nobis potest cognosci, & diligì, non solum ut auctor gratiæ, sed etiam ut auctor naturæ, & ab ijs etiam, qui non habent gratiam sanctificantem per actus non formatos gratia, & charitate, ut cognitione, & dilectione naturali, vel etiam attritione supernaturali, quæ sit per amorem Dei, sed imperfectum, & non attingentem essentiam Charitatis supernaturalis, puta per amorem concupiscentiæ, quod non potest fieri, nisi per auxilium supernaturale: ergo etiam hoc modo potest fieri missio. Denique non apparet ratio efficax, cur non posset dici Personam Diuinam mitti duobus modis, nempe, vel ut inhabitet, & permaneat, vel ut per transitum sit, & moueat, cum utrobique sit nouus semper effectus, ratione cuius potest dici nouo modo tunc Personam Diuinam esse in creatura, quam mouet.

Respondet Vaquez loco citato, per hæc solum posse dici fieri missionem secundum quid, quia aliquo

uina persona mittitur, solum secundum dona gratiæ gratum facientis, non est amplius ipsa persona, quæ donetur, sed ipsa gratia, & solum dona eius; quod est error eorum, qui dicunt Spiritum Sanctum non donari, sed solum eius dona; ergo &c. Resp. per donum gratiæ gratum facientis fieri, ut non solum anima liberè ipso dono creato utatur; sed etiam ut ipsa Diuina persona fruatur, quod est formalissimè ipsam Personam Diuinam dari, & donari: ac proinde prædicta communis assertio nullum continet errorem.

Dices 3. Illa particula *secundum* denotat rationem causæ, & est sensus quod gratia sanctificans sit causa, quod persona Diuina mittatur, & inhabitet: sed hoc est falsum; nam potius è contra res se habet; est enim Persona Diuina, quæ facit, ut habeatur Gratia, & Caritas, iuxta illud D. Pauli ad Rom. 5. *Charitas Dei diffusa est in cordibus nostris per Spiritum Sanctum, qui datus est nobis*. Ergo non rectè dicitur, quod Spiritus Sanctus mittatur secundum dona gratiæ gratum facientis.

Respondet S. Tho: illam particulam secundum non significare, quod gratia gratum faciens sit causa, quod habeatur Diuina Persona; sed quod disponat ani-

mam ad illam habendam. Posset etiam dici, quod cum in hac missione, & mansione sit distinguere tria genera causarum, nempe materiale, siue subiectiuam, quæ est ipsa anima; Finale, quæ est ipse Deus super omnia dilectus; & efficientem; quæ est ipsa persona Diuina, non quidem sola, sed simul cum alijs, iuxta commune proloquium. Opera Trinitatis ad extra sunt indiuisa: requiritur causa formalis informans ipsum subiectum. Quæ licet non sit causa, quod persona inhabitet, sed solum dispositio; requiritur tamen ad perfectam rationem mansionis, iuxta superius dicta, ut forma informans subiectum.

Dices 4. S. P. Augustinus lib. 4. de Trinitate Cap 20. docet, quod Filius, cum ex tempore mente percipitur, mitti dicitur; sed Filius non solum per gratiam sanctificantem, sed etiam per gratias gratis datas mente percipitur, id est per fidem, & scientiam; ergo persona Diuina alio modo mittitur, quam per solam gratiam gratum facientem. Respondet S. Tho: loco citato, Filium posse quidem cognosci per aliquos effectus; non tamen per aliquos effectus inhabitare in nobis, vel haberi à nobis, sine gratia gratum faciente. Quod non siliuit

San-



Sanctus Pater ; nam eo loco , cum dixisset : *Tunc unicuique mittitur , cum à quoquam cognoscitur , atque percipitur quantum cognosci , & percipi potest .* Subiungit statim . *Pro capto vel proficiente anima in Deum , vel perfecta in Deo anima rationalis .* Quæ verba profectò important , & requirunt ipsam gratiam sanctificantem .

Dices 5. Cum Rabano . Spiritus Sanctus datus est Apostolis ad operationem miraculorum , sed hoc non est donum gratiæ gratum facientis , sed gratiæ datæ : ergo Persona Diuina non datur solum secundum gratiam gratum facien-

tem . Resp. S. Thom. quamlibet gratiam gratiæ datam esse manifestationem gratiæ gratum facientis ; & idcirco Apostolum vocare eam manifestationem Spiritus ; Quod si detur casus , vt sit solum signum sine gratiæ sanctificante (vt in Caïpha , Saule , & Balaam , quando prophetauerunt existentes in statu culpæ læthalis) non diceretur dari simpliciter Spiritus Sanctus ; sed cum limitatione , & determinatione , vt Spiritus propheticus . Propterea posui in Conclusionem absolutè , & simpliciter loquendo , Missionem solum secundum gratiam sanctificantem .



## AXIOMA QVARTVM.

*Patri non conuenit mitti ; sed Filio , & Spiritui Sancto .*

Ex Lib. 2. de Trinitate Cap. 5.

**S**olus Pater numquam legitur missus .

DVBIVM

## D V B I V M I V.

Vtrum Patri conueniat mitti sicut Filio,  
& Spiritui Sancto.

**D**ico missionem conuenire solum Filio, & Spiritui Sancto, non verò Patri. Probatur primo Auctoritate S.P. in Axiomate. Secundo probatur ratione: Quia missio in suo conceptu essentiali, vt supra dictum est, importat processionem ab alio, quæ in Diuinis est secundum originem, sed Pater non est ab alio, vt est Filius, & Spiritus Sanctus. Ergo mitti non conuenit Patri; sed Filio, & Spiritui Sancto.

Dices 1. Mitti Diuinam personam, est idem formaliter, ac eam dari, sed Pater dat seipsum (non enim haberi potest, nisi ipse donet se ipsum). Ergo potest dici quod etiam Pater mittat se ipsum. Resp. quod mitti formaliter non importat solum liberalem communicationem, qualis est illa, qua Pater dat se ipsum creaturæ ad fruendum; sed præterea importat Auctoritatem dantis respectu illius, quod datur; & sic dari conuenit tantum personæ, quæ est ab alio, quales sunt Filius, & Spiritus Sanctus; ac proinde eis so-

lum conuenit mitti.

Dices 2. Missio fit per inhabitationem Diuinæ personæ in nobis secundum gratiam gratum facientem, vt dictum est in præcedenti dubio; sed etiam Pater inhabitat in nobis ratione talis gratiæ, iuxta illud Ioan. 4. *Ad eum veniemus, & mansionem apud eum faciemus.* Quod est dictum de omnibus tribus personis; ergo mitti non minus conuenit Patri, quam Filio, & Spiritui Sancto. Resp. quod ad veram missionem præter inhabitationem per gratiam requiritur in persona, quæ mittitur, processio ab alio, quam non habet Pater, & ideo non potest dici missus.

Dices 3. Quidquid conuenit alicui personæ, conuenit omnibus, præter notiones, & personas, idest rationes personales singulares, & proprias cuiusque personæ in particulari: sed missio non significat neque notionem, cum fiat tantum quinque, & in eis non numeretur Missio &c. neque rationem personalem propriam alicuius personæ

K k in

in particulari; conuenit enim duabus personis; ergo cuilibet Personæ Diuinæ conueniet mitti. Resp. quod licet Missio non sit nec persona, nec notio, nihilominus, ut importat processionem à mittente, includit in sui significatione implicitè notionem in generali, quatenus scilicet esse ab alio est commune duabus personis productis, & ideo non conuenit Patri, qui non producit.

Dices 4. Missio Personæ Diuinæ attenditur solum secundum dona gratiæ gratum facientis, ut dictum est, & consequenter secundum donum Charitatis, quæ vel est idem realiter cum ipsa gratia sanctificante, vel cum ea inseparabiliter coniuncta: sed hæc dona attribuantur solum Spiritui Sancto non vero Patri, aut Filio: ergo solum Spiritui Sancto conuenit mitti, non vero Filio. Resp. quod licet omnia dona, ut dona sunt, attribuantur Spiritui Sancto, nihilominus quædam secundum proprias rationes attribuantur Filio, ut sunt ea, quæ pertinent ad intellectum. Ad illud de Gratia, & Charitate. Resp. diuersam esse missionem Filij ab illa Spiritus Sancti, eo quod in effectibus respiciant quidem ambæ

ipsam gratiam, & ipsam Charitatem; sed ita ut missio Spiritus Sancti sit quidem formaliter per ipsam charitatem secundum modum charitatis; quatenus scilicet per charitatem anima ipsi Spiritui Sancto assimilatur: Missio verò Filij, cum sit Verbum spirans amorem, non attendatur secundum quamlibet perfectionem intellectus, sed solum secundum illam instructionem, quæ prorumpat in affectum amoris, ac proinde una est ab alia, siue eam præsupponit.

Dices 5. missio Filij, & Spiritus Sancti habent vnum, & eundem numero effectum, nempe gratiam sanctificantem: ergo sunt una, & eadem missio, non verò diuersæ. Resp. negando consequentiam; nam primo distinguuntur ratione processionis, cum Filius mittatur ut genitus, Spiritus verò Sanctus, ut spiratus: præterea, licet quoad effectus communicent in radice gratiæ, distinguuntur tamen in ipsis effectibus gratiæ; nam missio Filij est ad illuminandum intellectum, missio verò Spiritus Sancti ad inflammandum affectum: & sic patet quod una non potest esse sine alia, & quod neutra est superflua.

## AXIOMA QVINTVM.

*Missio inuisibilis fit ad omnes, qui sunt participes gratiæ.*

Ex Lib. 3. de Trinitate Cap. 20.

**S**ecundum quod Filius mittitur inuisibiliter, fit inuisibiliter in hominibus, aut cum hominibus: hoc autem antea factum est in Patribus, & Prophetis.

## DVBIVM V.

Vtrum missio inuisibilis fiat ad omnes, qui sunt participes gratiæ.

**R**esp. affirmatiuè. Et probatur primo Auctoritate S.P. qui loco citato in Axiomate tertio docet missionem inuisibilem esse ad sanctificandam creaturam; & præterea etiam in lib. 4. eiusdem operis de Trinitate Cap. 20. ait: *Aliter mittitur, ut sit cum homine: (loquitur de Sapientia Dei) aliter missa est, ut sit ipsa homo (idest Sapientia genita) in animas enim Sanctas se transfert, atque amicos Dei, & prophetas constituit, sicut etiam implet Sanctos Angelos, & omnia talibus mysterijs congrua per eos operatur.* Sed omnes, qui sanctificantur, sunt participes gratiæ. Er-

go omnes, ad quos fit talis missio, sunt participes gratiæ.

Probatur 2. quia missio Diuinarum personarum requirit, ut qui mittitur incipiat nouo modo esse ubi prius non erat, qui nouus modus in eo, ad quem fit dicta missio inuisibilis, attenditur secundum innouationem per gratiam, & inhabitationem Diuinarum personarum: ergo in omnes, ad quos fit missio inuisibilis, reperiuntur hæc duo, & consequenter Diuinæ gratiæ sunt participes.

Dices 1. Patres veteris testamenti fuerunt participes Diuinæ

Kk 2 gra-

gratiæ, & tamen ad eos non est facta missio inuisibilis; ergo missio inuisibilis non fit ad omnes illos, qui sunt Diuinæ gratiæ participes. Antecedens quoad secundam partem probatur ex illo Ioan. cap. 7. *Nondum erat spiritus datus, quia nondum erat Iesus glorificatus*. Ergo missio inuisibilis non fit ad omnes, qui sunt participes gratiæ. Resp. Euangelistam ibi loqui de missione, seu datione, quæ fit cum signo visibili, quæ facta fuit in die Pentecostes.

Dices 2. Profectus in virtute non est nisi per gratiam: sed missio inuisibilis non attenditur secundum profectum virtutis; hic enim est continuus in animabus Sanctis; Charitas enim aut semper proficit, aut deficit, & sic missio inproficientibus esset continua: ergo non semper missio inuisibilis fit ad omnes participes gratiæ. Resp. etiam secundum profectum virtutis, & augmentum gratiæ fieri missionem inuisibilem; Nam ut dicit S.P. lib. 4. de Trinitate cap. 20. *Tunc cuiquam mittitur Filius, cum à quoquam cognoscitur, atque percipitur quantum cognosci, & percipi potest pro capto vel proficientis anima in Deum, vel perfecte anima rationalis in Deo*. Nihilominus, ut docet Sanctus Thomas 1. par. quest. 43. attenditur præcipue talis missio cum quis proficit

in aliquem nouum actum, vel nouum statum gratiæ, v.g. cum quis proficit in gratiam miraculorum, aut prophetiæ, vel ex ferrore Charitatis exponit se martyrio, vel abrenunciat omnibus, quæ possidet, vel aggreditur quodcumque opus arduum.

Dices 3. Christus Dominus, & Beati plenissime sunt participes gratiæ. Sed ad eos non fit missio; de ratione enim missionis est, ut fiat ad aliquid aliquo modo distans; Christus autem ut homo, & Beati omnes sunt perfecte vniti Deo: ergo missio inuisibilis non fit ad omnes participes gratiæ. Resp. cum S. Tho: loco citato artic. 6. ad 3. Christo Domino fuisse factam missionem inuisibilem à principio incarnationis, non autem postea; ex tunc enim fuit plenus gratia, & omni sapientia. Ad Beatos verò esse factam missionem in principio Beatitudinis eorum, & successiue fieri vsque ad diem iudicii secundum aliquas reuelationes.

Dices 4. Sacramenta nouæ legis continent gratiam sanctificantem, quam conferunt, & tamen ad ea non fit talis missio; ergo missio inuisibilis non fit ad omnes participes gratiæ. Resp. cum S. Tho: loco citato ad quartum: Missionem sumi à termino; in Sacramentis verò gratiam sanctifi-

can-

cantem non esse formaliter vt scursum ab agente in patiens; ac formam iustificantem, sed solum instrumentaliter, sicut forma artificiatum in instrumentis artium, & secundum quemdam di-

proinde non esse participantia gratia eo modo, quo requiritur ad missionem.

## AXIOMA SEXTVM.

*Conueniens fuit Filium, & Spiritum Sanctum  
visibiliter mitti.*

Ex Lib. 2. de Trinitate Cap. 5.



*V*m itaque hoc à Patre, & Filio factum esset, vt in carne Filius appareret, congruenter dictus est missus ille, qui in ea carne apparuit, misisse autem ille, qui in ea non apparuit. Quoniam illa, quæ coram corporeis oculis nostris foris geruntur, ab in-

teriore apparatu nature spiritalis existunt: propterea conuenienter missa dicuntur &c. (infra). Iam in promptu est intelligere etiam de Spiritu Sancto cur missus dicatur. Facta est enim quadam creatura species ex tempore, in qua visibilis ostenderetur Spiritus Sanctus, siue cum in ipsum Dominum corporali specie velut columba descendit; siue cum, decem diebus peractis post eius ascensionem, die Pentecostes factus est subito de celo sonus, quasi ferretur flatus vehemens, & viso sunt illis lingue diuise tamquam ignis, qui & insedit super unumquemque eorum. Hac operatio visibiliter expressa, & oculis oblata mortalibus, missio Spiritus Sancti dicta est.

## D V B I V M V I

Vtrum conuenienter fuerit facta missio  
visibilis Filij : & Spiritus  
Sancti.

**R**esp. affirmatiue cum S. Tho-  
ma loco supracitato artic. 7.  
& Probatur ratione ipsa , qua uti-  
tur S. Tho: ibi , & antea S. P. eo lo-  
co , à quo desumptum est Axio-  
ma . Quia nempe inuisibilia Dei  
homini per visibilia manifestari  
oportuit: hic enim est modus con-  
naturalis homini , & Deus omni-  
bus prouidet secundum vniuscuius-  
que modum : ergo , sicut se ip-  
sum , & processiones æternas , quæ  
sunt inuisibilia , per visibilia corpo-  
rea hominibus quodammodo de-  
monstrauit : ita conueniens fuit ,  
vt inuisibiles missiones personarum  
secundum aliquas visibiles creatu-  
ras manifestaret : & hoc est visibili-  
ter mitti , vt ait S. P. in Axio-  
mate .

Aduerte hic cum S. Tho: in his  
missionibus visibilibus Filium mitti  
in carne , quia mittitur vt sancti-  
ficationis auctor . At Spiritum  
Sanctum , quia mittitur vt sanctifi-  
cationis donum , mitti in signis ,  
quæ sunt sanctificationis indicia , &  
prout talia sunt .

Dices 1. Si conueniret Spiritui Sancto visibiliter mitti , dice-  
retur de eo quod sit minor Patre ;  
sicut dictum est de Filio , quia vi-  
sibiliter missus est : sed numquam  
legitur quod Spiritus Sanctus sit  
minor Patre ; ergo non conuenit  
ei mitti visibiliter . Resp. esse di-  
sparem rationem de Filio , ac de  
Spiritu Sancto ; nam de Filio di-  
citur , quod sit minor Patre , non  
præcisè ex eo , quod visibiliter  
missus est , sed quia visibilem crea-  
turam , in qua missus est , nempe  
visibilem carnem assumpsit in vni-  
tatem Personæ . Non sic de Spiritu  
Sancto qui numquam creaturas , in  
quibus apparuit , assumpsit in talem  
vnitatem .

Dices 2. Missio visibilis atten-  
ditur secundum aliquam creaturam  
visibilem assumptam , vt in Filio ;  
sed Spiritus Sanctus numquam as-  
sumpsit aliquam creaturam visibi-  
lem ; ergo Spiritus Sanctus non  
mittitur visibiliter . Minor proba-  
tur , quia alias posset dici , quod  
mittitur in omnibus creaturis , quia

in

in omnibus est prorsus eodem modo, ac in illis, in quibus, seu ratione quarum, dicitur missus. Si dicatur esse in his speciali modo, quia est in illis, ut in signo expressivo suæ præsentiae, & assistentiae. Contra est, quia etiam hoc modo est in Sacramentis, & in omnibus figuris legalibus; & tamen ratione illorum non dicitur missus. Respondet tamen S. Th. loco citato Spiritum Sanctum dici visibiliter missum in quantum fuit monstratus in quibusdam creaturis sicut in signis ad hoc specialiter factis. Nam & illa columba, & ille ignis ad hæc tantum significanda repente extiterunt; quod idem sentit de flamma, quæ in rubo apparuit Moyse, & columba, quam populus in deserto sequebatur; & fulgoribus, & tonitruis, quæ fiebant cum lex daretur in monte. Ad hoc enim illarum rerum tunc primo extitit species, ut aliquid significarent, & prædicarent. Ex quibus infert, quod neque visiones imaginariæ Prophetarum fuerunt missiones visibiles Spiritus Sancti, ut docet S. P. lib. 2. de Trinitate cap. 6. eo quod non fuerunt exhibitæ oculis corporeis per formas corporeas; neque signa Sacramentalia novi, & veteris testamenti, quia in illis aliquæ res præexistentes assumuntur ad aliquid significandum.

Dices 3. Quælibet creatura visibilis est effectus demonstrans totam Trinitatem, vel ut imago, vel saltem ut vestigium eius; ergo per creaturas visibiles non magis dici potest mitti Spiritum Sanctum quam aliam personam. Resp. quod sicut Diuinæ Personæ diuersis nominibus appellantur, quamuis inter ipsas personas nulla sit naturæ diuersitas, aut separatio; imò & appropriatur unicuique aliquod attributum, licet illud idem sit omnibus commune, v. g. Patri potentia, Filio Sapientia, & Amor Spiritui Sancto: ita nullum est inconueniens, quod ad demonstrandam hanc, vel illam personam assumatur specialiter hæc, vel illa creatura, licet quælibet res creata sit effectus totius Sanctissimæ Trinitatis.

Dices 4. Filius visibiliter missus est per dignissimam creaturam visibilem, nempe per naturam humanam; ergo & Spiritus Sanctus, cum sit æqualis Filio, debuit mitti secundum aliquas creaturas rationales. Respondet S. Thomas loco citato in respon. ad quartum, esse disparem rationem, nam Filius fuit missus ut sanctificationis auctor, ac proinde oportuit, ut eius visibilis missio fieret secundum naturam rationalem, cuius est agere, & cui potest competere sanctificari. Non sic debebat esse



esse in missione visibili: Spiritus Sancti; nam ad eam sufficiebat aliqua creatura, quæ esset indicium sanctificationis, ad quod sufficiebat alia creatura. Nec oportuit, ait ibi Angelicus Doctor, quod creatura visibilis ad hoc formata esset assumpta à Spiritu Sancto, idest vnita ei per vnionem hypostaticam in vnitatem personæ, eo quod non assumeretur ad indicandum, sed solum ad indicandum, ac proinde nulla fuit necessitas, quod duraret, nisi quamdiù perageret officium suum. Quibus addere possumus, quod officium missionis visibilis Filij erat perpetuum, cum æternum haberet sacerdotium; & ideo in æternum manere oportebat in ea natura, in qua solum potest esse Sacerdos: non sic Spiritus Sanctus cuius missio visibilis erat transiens.

Dices 5. Ex S. P. N. Augustino lib. 3. de Trinitate cap. 5. & 45. habetur, ea quæ sunt visibiliter per Angelos, Diuinitus dispensari per ministerium Angelorum. Ergo quando visibiles species apparuerunt, fuit totum factum per ministerium Angelorum, & consequenter ipsi Angeli dicendi sunt missi, non verò Spiritus Sanctus. Resp. ab eodem Sancto Doctore. Creaturas illas visibiles fuisse quidem formatas ministerio Angeli-

co, non tamen ad significandum Angelorum personas, sed solum ad significandam personam Spiritus Sancti, qui erat in illis specialiter, vt significatum in signo, & ideo non representabant Angelos.

Dices 6. Cum Spiritus Sanctus mittitur visibiliter, hoc fit ad manifestandam missionem inuisibilem; Manifestantur enim inuisibilia Dei per visibilia creaturarum: ergo ad quem missio inuisibilis facta non fuit, nec etiam missio visibilis fieri debuit; & contra quibus missio visibilis facta est, consequenter etiam missionem inuisibilem factam fuisse dicendum est. Hoc tamen patet esse falsum; nam multis quotidie fiunt missiones inuisibiles, quibus nulla missio visibilis facta est: ergo cum apparent huiusmodi species creaturarum non potest dici quod tunc mittatur Spiritus Sanctus. Respondet Angelicus Doctor: non esse de necessitate missionis inuisibilis, quod manifestetur exteris per aliquod signum visibile. Et ratio est illa, quam assignat Sanctus Paulus Apostolus Epist. prima ad Corint. cap. 12. nempe quod manifestatio Spiritus datur alicui ad vtilitatem Ecclesiæ. Quod principaliter factum est per Christum Dominum, & per Apostolos, & ad aliquos primi-

mitiuos Sanctos, in quibus quodammodo Ecclesia fundatur: Et ideo Christo Domino fuit facta talis missio ab instanti suæ conceptionis, ad ostendendam inuisibilem missionem. In Baptismo vero facta est in specie columbæ, ad ostendendam auctoritatem ipsius Saluatoris ad dandam gratiam per spirituales regenerationem; ideo enim Pater dixit: *Hic est Filius meus dilectus*. In transfiguratione sub specie nubis lucidæ, ad ostendendam exuberantiam doctrinæ, & ideo dictum est: *ipsum audite*. Ad Apostolos sub specie status, ad ostendendam potestatem ministerij in dispensatione Sacramentorum, ut dixit eis Dominus: *Quorum remiseritis peccata remittuntur eis*. Et in die Pentecostes sub linguis igneis, ad ostendendum officium doctrinæ. Vnde dicitur, quod *ea-perunt loqui varijs linguis*.

Si quæras utrum apparitiones illæ visibiles Diuinarum persona-

rum, quæ in Scriptura Sancta leguntur factæ Patribus veteris testamenti, sint dicendæ veræ missiones. Respondet S. P. N. lib. 2. de Trinitate cap. 17. negatiuè, eo quod non fuerint factæ ad designandum inhabitationem Diuinæ personæ per gratiam, sed ad manifestandum aliquid aliud. Quem sequitur Sanctus Thomas loco citato in respon. ad sextum, dicendo: non debuisse fieri missionem visibilem Spiritus Sancti; eo quod prius facienda esset missio visibilis Filij, quam Spiritus Sancti; eo quod Spiritus Sanctus manifestet Filium, sicut Filius Patrem.

Ex hac explicatione, visibilis missionis, & rationis, propter quam fit, inferitur quod, quando missio inuisibilis est solum inuitatem personæ particularis, cui fit, non est necesse, quod sit coniuncta cum missione visibili.



## A X I O M A   S E P T I M U M .

*Persona Diuina mittitur & ab ea , à qua procedit ,  
& etiam à se ipsa .*

Ex Lib. 2. de Trinitate Cap. 5.

**A** Patre & Filio missus est idem Filius &c. quapropter Pater inuisibilis una cum Filio secum inuisibili eundem Filium visibilem facienda , misisse eum dictus est .

## D V B I U M   V I I .

Vtrum aliqua persona mittatur ab alia persona , quam ab ea , à qua æternaliter procedit .

**D**ico 1. Si persona mittens intelligatur esse principium , & causa effectus , secundum quem attenditur missio : Omnes tres personas posse dici mittere personam missam . Probatur ex Isaia cap. 48. ubi Propheta loquitur de Filio , & in persona eius dicit *missi me Dominus Deus , & Spiritus eius ;* & tamen Filius non procedit à Spiritu Sancto . Ergo persona mittitur etiam ab ea , à qua non procedit ; & hoc est quod docet S. Pater in Axiomate cum dicit Filium mis-

sum fuisse à Patre , & à se : quod etiam adducit S. Thomas loc. cit. artic. 8.

Dico 2. Si mittens designetur , vt principium personæ , quæ mittitur , tunc non posse dici quamlibet personam mittere , sed solum illam , cui conuenit esse principium illius personæ , quæ mittitur . Et hoc modo Filius mittitur à solo Patre , & Spiritus Sanctus ab utroque , & Pater à nullo , & ideo S. P. lib. 4. de Trinitate cap. ultimo ait : *Pater à nullo*

nullo mittitur, quia à nullo est.

Dices 1. Mittens debet habere auctoritatem respectu missi; sed respectu Divinæ personæ non potest haberi auctoritas, nisi secundum originem; ergo necesse est, quod persona, quæ mittitur, mittatur solum à persona, à qua habet originem. Respondeo hoc argumentum confirmare nostram secundam conclusionem, & nihil derogare personæ, cum enim dicitur mittens debere habere auctoritatem respectu missi, non significat superioritatem, siue excellentiam maiorem, sed solum dignitatem principij, idest quod persona missa habeat originem ab ea, à qua mittitur; cum quo rectè fiat, quod omnes tres personæ concurrant ad eundem numerò effectum, ratione cuius Persona illa dicitur mitti.

Dices 2. Si in aliquo sensu potest dici, quod persona Divina mittitur ab ea, à qua non procedit; poterit etiam dici, quod Spiritus Sanctus mittatur ab homine; nam & in ordinatione Diaconi; & in ordinatione Sacerdotis dicitur ab Episcopo: *Accipe Spiritum Sanctum &c.* Sed hoc est contra doctrinam S. P. N. Augustini qui lib. 15. de Trinitate cap. 26. ait: *Quomodo ergo Deus non est, qui dat Spiritum Sanctum? imò quantus est, qui dat Deum? Neque enim aliquis discipulorum eius dedit Spiritum Sanctum.*

*Orabant quippè, ut venirent in eos, quibus manus imponebant; non ipsi eum dabant.* Ergo dicendum est personam Divinam non mitti villo modo, nisi ab eo, à quo procedit. Resp. non posse dici absolute hominem dare Spiritum Sanctum; sed solum ministerialiter, seu instrumentaliter; neque enim potest causare effectum gratiæ, ut causa principalis, & hoc est quod intendit S. P. loco citato.

Absoluo hoc exiguum opusculum de tam arcano, & profundissimo Trinitatis Mysterio eisdem verbis, quibus S. P. N. absoluit suum de eodem celeberrimum opus: à quo hæc desumpsi: & simul cum eo sic oro.

*Domine Deus noster, credimus in te Patrem, & Filium, & Spiritum Sanctum. Neque enim diceret veritas: Ite, baptizate omnes gentes in nomine Patris, & Filij, & Spiritus Sancti, nisi Trinitas esset. Nec baptizari nos iuberet Domine Deus in eius nomine, qui non est Dominus Deus. Neque diceretur voce Divina. Audi Israel, Dominus Deus tuus unus est; nisi Trinitas ita esset, ut unus Dominus Deus esset. Esset Deus Pater ipse esset, & Filius Verbum tuum, Iesvs Christus ipse esset, & donum vestrum Spiritus Sanctus, non legeremus in litteris veritatis: Mi-*

*sit Deus Filium suum. Nec tu, & unigenitè, dices de Spiritu Sancto quem mittet Pater in nomine meo, & quem ego mittam vobis à Patre. Ad hanc regulam fidei dirigens intentionem meam quantum potui, quantum me posse fecisti, quasui te, & desideravi intellectu videre quod credidi; & multum disputavi, & laboravi. Domine Deus meus una spes mea, exaudi me, ne fatigatus nolim te querere, sed queram faciem tuam semper ardentè. Tu da querendi vires, qui inuenire te fecisti, & magis magisque inueniendi te spem dedisti. Coram te est firmitas, & infirmitas mea, illam serua, istam sana. Coram te est scientia, & ignorantia mea. Vbi mihi aperuisti, suscipe intransentem. Vbi clausisti, aperi pulsanti. Meminerim tui, intelligam te, diligam te. Auge in me ista, donec me reformes ad integrum. Scio scriptum esse: in multiloquio non effugietur peccatum; sed utinam prædicando Verbum tuum, & laudando te tantummodo loquerer: non solum fugerem peccatum, sed meritum bonum acquirerem, quamlibet multum sic loquerer. Neque enim homo de te Beatus, peccatum præciperet germano in fide Filio suo, cui scripsit dicens. Prædica Verbum, in ista opportune, importune. Nunquid dicendum est istum non multum locutum, qui non solum opportune, verum etiam importune Verbum tuum Domine non*

*tacebat? Sed ideo non erat multum, quia tantum erat necessarium. Libera me Deus à multiloquio, quod patior intus in anima mea misera in conspectu tuo, & ✠ confugientem ad misericordiam tuam. Non enim in cogitationibus taceo, etiam tacens vocibus. Et si quidem non cogitarem, nisi quod placeret tibi, non utique rogarem, ut me ab hoc multiloquio liberares. Sed multe sunt cogitationes meae, tales quales nosti, cogitationes hominum, quoniam vanae sunt. Dona mihi non eis consentire, & si quando me delectant, eas nihilominus improbare, nec in eis velut dormitando immorari. Nec in tantum valeat apud me, ut aliquid in opera mea procedat ex illis, sed ab eis mea saltem sit tuta sententia, tuta conscientia, te tuente. Sapiens quidem, cum de te loqueretur in libro suo, qui Ecclesiasticus proprio nomine iam vocatur: multa (inquit) dicimus, & non peruenimus, & consuetudo sermonum vniuersa est ipse. Cum ergo peruenierimus ad te, cessabunt multa ista, quae dicimus, & non peruenimus; & manebis vnus omnia in nobis; & sine fine dicemus vnum, laudantes te in vnum, & in te facti etiam nos vnum. Domine Deus vnus, Deus Trinitas, quaecumque dixi in his libris de tuo, agnoscant & tui: Si qua de meo, & tu ignosce, & tui. Amen.*

LAVS DEO.

# INDEX NOTABILIVM.

Primus numerus paginam secundus columnam indicat.

## A

**A**bbatis Ioachim error circa Trinitatem Personarum damnatus à Concil. Later. sub Innocentio III. pag. 43, 2.

**A**ctiones immanentes Intellectus, & Voluntatis Dei sunt id, quo producit Verbum & Spiritus Sanctus, & quomodo. 9, 2.

**A**ctio est perfectio agentis, & de formali dicit relationem, & est etiam in ipso agente. 159, 2.

**A**ctio secluso motu est habitudo principij ad id, quod est à principio. 160, 2.

**A**ctus Notionales sunt ipsæ Origines. 155, 1. Non identificantur adæquate Essentiæ. 156, 1. Non differunt ab essentialibus nisi per relationes connotatas. ibid. 2. Sunt voluntarij. 179, 1.

**A**lbedo eadem numero in duobus parietibus non haberet oppositionem, aut relationem realem. 96, 2.

**A**liqua realiter, & formaliter identificantur, & tamen vnum non est de conceptu quidditatiuo alterius. 47, 1.

**A**logianorum hæresis de Processione Verbi Diuini. 1, 1. Vnde sic appellati. 192, 1.

**A**mor idem comparatus ad obiectum necessarium est necessarius, & ad contingens est liber. 204, 1.

**A**ngelorum Ministerio fuerunt formata figuræ illæ, in quibus vt in signis repræsentabatur Spiritus Sanctus. 264, 1.

**A**pparitiones visibiles Diuinarum Personarum factæ PP. Veteris Testamenti non sunt dicendæ Missiones. 265, 2.

**A**rgumentum à commutata proportionem non valet nisi circa quantitatem molis, & cur. 90, 3.

**A**rriani negarunt Verbum in Diuinis esse nomen proprium. 192, 1.

**A**tributa Diuina sunt communia tribus Personis Diuinis, quia adæquate identificatur Naturæ Diuinæ, non sic relationes. 45, 1. Quodlibet eorum est illimitatum. 61, 2. Quomodo dicant perfectionem infinitam. 68, 1. Sunt perfectiones reales Dei, licet ab eo non distinguantur realiter. 72, 1.

**A**uctoritas Imperatoris Iustiniani ex Concilio Toletano secundo, adducta à Vasquez contra subsistentiam absolutam Dei, non habetur in Codicibus Castig. 114, 1.

**A**xioma illud Necessaria sunt priora liberis. Quomodo intelligendum. 204, 1. illud aliud In Diuinis omnia sunt vnum ubi non obuiat oppositio relatiua. Explicatur. 227, 2.

## B

**B**eata Clara de Monte Falco ordinis nostri Monialis in suo corde habuit tres globulos repræsentantes Mysterium Sanctissimæ Trinitatis. 74, 1.

## C

**C**ausæ plures secundæ contingenter existunt, & necessariò operantur.

# INDEX NOTABILIVM.

- rantur. [204.2.](#)  
 Censura Vasquez reiicienda. [112.1.](#)  
 Christus Dominus habuit præceptum  
 in suis Missionibus non vt Persona  
 Diuina; sed ratione Naturæ huma-  
 næ. [249.1.](#)  
 Circumfessio Diuinarum Persona-  
 rum facit vt perfectio vnus sit for-  
 maliter in alia. [76.2.](#)  
 Cognitio intuitiua quomodo exigit  
 obiecti existentiam. [207.1.](#)  
 Cognitio creaturarum futurarum est  
 libera respectu illarum, & necessa-  
 riò concurrat ad productionem Ver-  
 bi. [208.1.](#)  
 Cognitio creaturarum possibilium non  
 est perfectio secundaria; & si esset  
 nihilominus concurreret ad produ-  
 ctionem Verbi Diuini. [208.2.](#)  
 Compositio quomodo repugnet sim-  
 plicitati Dei. [37.1.](#)  
 Concilium Florentinum, & Toleta-  
 num XI. expresse docuerunt dari  
 Relationes inter personas Diuinas.  
[30.1.](#) In Rhemenfi Gilbertus suum  
 retractauit errorem, de distinctio-  
 ne reali Diuinarum relationum ab  
 essentia. Diuus Bernardus interfuit.  
[34.1.](#) In Florentino habetur perso-  
 nas, & relationes ab essentia sola  
 ratione distingui. [36.2.](#) & [37.1.](#) In  
 Lateranensi sub Innocentio Tertio  
 damnatus fuit error Abbatis Ioa-  
 chim de Trinitate Personarum; &  
 vindicatus Magister sententiarum,  
 ab errore, quem illi tribuebat dictus  
 Abbas. [34.2.](#) Toletanum XI. Vor-  
 matienfe, & Florentinum docent,  
 pluralitatem Personarum haberi per  
 relationes, non verò per absolutas.  
[137.1.](#) In Calcedonensi Theodoretus  
 opera S. Leonis Papæ reconci-  
 liatus, & suæ sedi restitutus fuit.  
[211.1.](#) In Gentiliaco coram Pipino  
 disputatum est de Sanctissima Tri-  
 nitate inter Latinos & Græcos.  
[211.1.](#) In Toletano XI habetur Re-  
 lationes Diuinas ad inuicem oppo-  
 sitas esse realiter distinctas. Sicut  
 etiam in Lateranensi Cap. *Firmiter*.  
[86.1.](#) In Ephesino fuit lecta Episto-  
 la S. Cyrilli ad Nestorium, in qua  
 habetur Processio Spiritus Sancti à  
 Filio, & fuit approbata, vt etiam  
 in Quarta, Quinta, & Septima Sy-  
 nodo. [214.1.](#) *Decretum* Ephesini de  
 non addendo aliquid Symbolo ad  
 quos spectet, & quomodo intel-  
 ligendum iuxta verba eiusdem.  
[221.1.](#) In Concilio Generali septi-  
 mo Actione septima legitur Symbo-  
 lum cum illa particula *Filioque*.  
 Lateranense sub Innocentio Ter-  
 tio. Lugdunense sub Gregorio X.  
 & Florentinum sub Eugenio Quar-  
 to idem statuerunt, sicut etiam fe-  
 cerant Toletanum Primum, Ter-  
 tium, & Vndecimum. [214.2.](#) In  
 Nicæno cur non fuit facta mentio  
 de hac Processione Spiritus Sancti  
 à Filio. [221.1.](#) Lugdunense definiuit  
 Spiritum Sanctum procedere à Pa-  
 tre, & Filio non tamquam à duo-  
 bus Principijs; sed vt ab vno.  
[234.](#)  
 Concreta substantialia vnde sumant  
 vnitatem, & pluralitatem. [236.1.](#)  
 Concurfus intentionalis Dei ad ali-  
 quid producendum est etiam phy-  
 sicus. [206.1.](#)  
 Congruentiæ manucentes ad cogni-  
 tionem Sanctiss. Trinitatis. [169.1.](#)  
 Constitutio Diuinarum Personarum  
 datur à parte rei, [148.](#) non tamen  
 da-

## INDEX NOTABILIVM.

atur compositio realis. 149.1. Constitutiva illarum habent esse independentem ab intellectu; non tamen distinctionem realem, aut actua-  
lem ex natura rei. ibid.

Constitutio est duplex: compositorum, una, Simplicium altera; quomodo admittatur in ea dependentia, vel Causalitas. 150.1. & 2.

Creaturæ futuræ in actu signato sunt, cum earum cognitio concurret ad productionem Verbi Divini. 208.1. Si creaturæ non essent possibiles; nec produceretur Verbum Divinum; nec esset Deus qui est. 209. 1.

### D

**D**eus quomodo dicatur, & sit substantialiter Sapiens. 32.1. Videt suam Essentiam ut est; ideoque non distinguit absoluta à relationis; videt tamen distinctionem virtualem ut est, & ut terminatur ad novos conceptus, actualement videt quæ sit à nobis. 44.1. & 2.

Dicere, & intelligere quomodo distincta sunt in Divinis. 160.2. Dicere est actus notionalis Patris, & est idem ac Verbum producere. 196. 1.

Distinctione Virtuali sufficienter explicat communicabilitas Essentiæ, & incommunicabilitas Personæ. 44.1. ac etiam locutiones PP. & Conciliorum. 45.2. Quæcumque distinctio perfecta importat quod unum non sit de conceptu alterius. 53.2. Realis inter absoluta non reperitur, nisi in Creatis. 92.2.

Donum Gratiæ gratum faciens facit ut anima fruatur ipsa Divina Persona. 255.1. Dona Gratiæ attribuuntur

Spiritui Sancto, quædam tamen attribuantur etiam Filio. 258.1.

Durandi sententia, negans Personas Divinas esse per Intellectum, & Voluntatem, censura digna iudicatur à DD. 1.1.1. sicut etiam illa, quæ distinguit realiter Spirationem, actiuam à Paternitate, & Filiatione. 88. 1.

### E

**A**equalitas reperitur perfectius in Divinis, quam in creatis. 97.1. In aliquo sensu est relatio rationis, in alio realis. ibid.1. & 2.

Essentia Divina quomodo dicatur communicari non communicatis Relationibus. 41.1. & 2. Eius formale constitutum est actualis intellectio ipsius Dei. 22.1. Non potest comparari cum relationibus Divinis, sicut comparatur ratio entis cum suis inferioribus. 49.1. & 62.1. Cum dicitur, Essentia Divina est Paternitas; qualis prædicatio sit per S. Tho: 49.2. & 50.1. De ratione ipsius est non esse productam ab alio. 52.2. Non est de intrinseco conceptu relationum ibid.1. Vt ratione nostra contradistincta ab attributis non imbibitur intimè in illis. 61.2. Vt ratione nostra à relationibus præcisa, existit per se existentia perfecta, quæ in creaturis dicitur subsistentia. 106.1. &c. Non operatur, nisi ut est in Personis, & tam ipsa, quam Personæ sunt operatiuæ. 115.1. Nostro imperfecto modo concipitur ut prius existens, quam Verbum Divinum. 208. 1.

Excessus, & inæqualitas non habent locum in Entibus infinitis. 73.1. quod



# INDEX NOTABILIVM.

quod in Personis Diuinis pulchrè explicatur à S.P. **74.1.**

Existere per se est perfectio simpliciter simplex, quæ formaliter debet conuenire Essentiæ vt sic. **107.1.**

Existencia Diuina appellatur etiam rectè substantia ab Agathone Summo Pontifice, à S. P. N. à SS.DD. Hieronymo, Hilario, Cyrillo: Ioan. Damasceno & S. Tho: quidquid in contrarium dicat Vasquez. **107.**

## F

**F**ecunditas quomodo conueniat Deo, & creaturis. **10.1.**

Filius in Diuinis rectè dicitur genitus Natura, & per intellectum. **10.2.** non est Filius quia imago. Sed e contra. **25.2.**

Filiatio quomodo sit in Patre, & non constituat eum Filium. **84.2.**

Filius dicitur mitti quo generatur, vel ratione generationis temporalis, vel quia ex eo quod est genitus ab æterno habet posse. **251.2.** Qua ratione dicatur minor Patre; numquam verò Spiritus Sanctus, licet & hic fuerit missus. **262.2.**

Formale constitutum Diuinæ Naturæ est intellectio Diuina. **22.1.** & **26.1.**

Forma quælibet non semper tribuit subiecto suam denominationem, sed solum quando subiectum est capax. **154.1.**

Fundamentum relationis realis debet esse distinctum in vtroque extremo. **26.**

## G

**G**enerationis viuentium definitio, & quænam includat mutationem. **16.1.** Generatio, & spiratio in

Diuinis verè dicuntur esse ab æterno. **250.1.**

Giberti Porreftani error circa relationes Diuinas: illius retractatio. **34.1.** Eius fundamento satisficit. **39.1.** & **2.**

Gratia sanctificans est dispositio ad perfectam mansionem Diuinarum Personarum in anima. **255.2.** In Sacramentis est solum vt in instrumentis. **261.1.**

Gratia gratis data est manifestatio gratiæ gratum facientis. **256.2.**

Gregorij nostri Ariminensis sententia de constitutione Diuinarum Personarum non meretur censuram. **152.2.**

Græci Schismatici negant Spiritum Sanctum procedere à Filio. **210.2.** & c. Initium & progressus huius erroris. **211.1. & c.**

## H

**S** Hieronymus, & alij SS. DD. docuerunt dari in Deo substantiam absolutam: ideoque censuram Vasquez in hoc non est admittenda. **112.1. & c.**

*Hypostasis* & *Persona* fuerunt voces dilu controuersæ inter PP. Latinos, & Græcos. **102.1.**

Hypothesi facta quod natura Diuina non esset nisi vna persona; idem esset omnino per quod existeret per se, & id per quod incommunicabiliter existeret. **115.1. & c.** hypothesi impossibili quomodo liceat arguere. **224.**

**I**dem secundum diuersa connotata à parte rei est principium conueniendi, & differendi. **43.2.** Identitas, æqualitas, & similitudo in Diuinis quomodo sint relationes reales;

# INDEX NOTABILIVM.

les, vel rationis. **95.1.& 2.**  
**Immanentia** vnius Personæ in alia,  
 nullam continet repugnantiam, aut  
inconueniens. 79.2. satisfit obiectis.  
**80.**

**Indigentia** quid importet, & in quo  
 differat ab exigentia. **67.2.**

**Ingenitum** esse à PP. diuersimodè **26.**  
cipitur. 186.1. & à DD. 188.2. Sum-  
 ptum negatiue potest dici etiam de  
 Essentia Diuina. ibid. communiter  
 dicit negationem fundatam in ra-  
 tione Primi Principij; sicut etiam  
 innascibile. **189.2.** connotatum ma-  
 teriale eorum non est Paternitas for-  
 maliter sumpta; sed materialiter tan-  
 tum. **190.1.& 2.**

**Innascibilitas** est notio distincta à Pa-  
 ternitate. **191.1.**

**Intellectio** est formale constitutum  
 Diuinæ naturæ. **22.1.& 26.1.**

**Intellectio**, & volitio non dicunt op-  
 positionem. **4.1. sunt** in Deo vna  
 simplicitissima; sed virtualiter  
 duplex actio. **8.1.**

**Intelligere**, & velle quandoque acci-  
 piuntur vt prædicata absoluta,  
 quandoque vt notionalia. **2.1.&c.**

**Intelligere**, & dicere quomodo differ-  
 rant inter se. **179.1.&c.**

**S. Ioan. Damascenus** vindicatus ab er-  
 rore circa Processionem Spiritus  
 Sancti ab Eminentissimis Cardina-  
 libus Caietano & Bessarione. **218.1.**

**L**atius patet ratio entis increati  
 quam ratio Deitatis, siue Essentiæ  
 Diuinæ. **60.1.**

**Loca difficilia** S. P. N. circa quæstio-  
 nem an Relationes Diuinæ dicant  
 perfectionem. **81.1.& 2. Explicantur**  
 alijs sententijs eiusdem S. P. **82.1.&c.**

Lumine solo naturali nulla præsuppo-  
 sita reuelatione non potest cognos-  
 sci, aut colligi esse plures Personæ  
 in Diuinis à **163. vsque ad 169.**

M

**M**anifestatio sumitur vel actiue,  
 vel passiue, hoc secundo mo-  
 do omnes Personæ manifestantur  
 Verbo, non verò primo. **196.1.&c.**

**Medium** quomodo possit dari inter  
 ens increatum, & ens creatum.  
 Missio quot respectus includat. 247.  
**1.** nomine missionis respectu Diui-  
 narum personarum quid veniat.  
248.2. nullo modo importat imper-  
 fectionem. ibid. non requirit, nec  
 potest habere separationem natu-  
 ræ, aut loci à mittente. **249.2.** Di-  
 citur solum temporaliter sicut etiam  
 datio. **250.2.** non existit nisi quando  
 existit eius terminus temporalis.  
**251.**

**Missio** inuisibilis fit secundum donum  
 Gratiae sanctificantis **252.2.** vt crea-  
 tura habeat Deum inhabitantem  
 in se. **253.1.** ratione solius Prophe-  
 tiæ, vel operationis miraculorum,  
 aut Auritionis non dicitur proprie  
 missio. **254.1.** Missio tam visibilis  
 quam inuisibilis conuenit solum  
 Filio, & Spiritui Sancto. **259.1.**  
 includit in generali notionem ef-  
 fendi ab alio **258.1.** Filij distingui-  
 tur ab illa Spiritus Sancti, & ratio-  
 ne processionis, & ratione effe-  
 ctuum. **258.** Inuisibilis fit ad omnes  
 qui sunt participes Gratiae. **259.1.**  
 & **2.** Fit etiam ad progressum in  
 Gratia, & virtutibus, præcipue ta-  
 men ad nouum actum, vel statum.  
**260.2.** Quomodo facta fuerit Chri-  
 sto Domino, & Beatis. **260.2. visibi-**

M m

lis

# INDEX NOTABILIVM.

lis tam Filij, quam Spiritus Sancti  
conuenienter facta fuit. **261.1.&c.**  
Filij cur facta per creaturam ratio-  
nalem; non verò Spiritus Sancti.  
**264.1. & 2.** Inuisibilis non exigit  
necessario, vt manifestetur per vi-  
sibilem ibid. Visibilis fit ad vtilita-  
tem Ecclesiæ ibid. Explicatur exem-  
plis. **265.1.**  
Mitti conuenit aliquibus Personis Di-  
uinis. **247.** non tamen possunt mitti  
per imperium, vel per consilium.  
**248.1.** nec etiam ad terminum, in  
quo antea nullo modo essent. ibid.  
Mitti dicitur Persona Diuina se-  
cundum dona gratiæ sanctificantis.  
**255.1.& 2.** Quo sensu S.P. dicat Fi-  
lium: mitti cum mente percipitur.  
**256.1** Quo sensu posset dici Perso-  
nam mitti ab ea, à qua non proce-  
dit. **266.1.** Mitti cur non dicatur Spi-  
ritus Sanctus ab homine, cum di-  
cit. *Accipe Spiritum Sanctum.* **267.1.**  
& **2.**  
Multiplicatio inferiori debet etiam  
multiplicari superius, quando iden-  
tificantur realiter. **93.1.**  
Mysterium Sanctissimæ Trinitatis se-  
clusa omni reuelatione non potest  
à creaturis cognosci. **162.2.** Cogni-  
tio, quam habuerunt Philosophi  
ex lectione sacrorum librorum; &  
Sibyllæ, ex reuelatione fuit. **163.** vñ  
que ad **166.** Quo sensu S. Thomas  
dixerit nos posse cognoscere non  
esse impossibile. **166.2.**

## N

**N**egationes aliquæ significant ali-  
quid positium, non solum in  
concreto, sed etiam in abstracto.  
**189.** **1.**  
Nomen Principij respectu Spiritus

Sancti supponit pro essentia, & voli-  
tione, determinatis per. Paternita-  
tem, & Filiationem. **239.1.**

Nomen hoc Persona est commune tri-  
bus Diuinis suppositis & quomodo.  
**98. & 99.** significat relationem im-  
plicitè. **132.1.**

Nomen. *Qui est Deus ipse vt proprium*  
sibi imposuit. **106.2.**

Nomen Filij Dei requisitum à Salo-  
mone Prouer. cap. 30. quale sit. **153.**  
**1.& 2.**

Nomen notionis introductus fuit à  
S.P. in Tract. de Trinitate. **170.1.**  
aliter à Grammaticis, & aliter à  
Theologis accipitur. ibid.

Non est nobis notum lumine naturæ,  
dari intra Deum actionem habentem  
terminum realiter distinctum  
ab agente. **167.2.**

Notio quid sit. **171. in quo conueniant**  
notiones cum Relationibus, Pro-  
prietatibus, & Personis; & in quo  
differant. **171.2.** Non omnes eun-  
dem notionum numerum admit-  
tunt. **172.1.** Quinquè sunt communi-  
ter receptæ. ibid. **2.** Inter eas non nu-  
meratur inspirabilitas, & quare. **174.**  
**1.&c.** quid hæc significet. **176.1.**  
Quo sensu negare notiones esset hæ-  
resis, & quo solum temeritas. **177.**  
**1.& 2.**

Numerus in rebus corporeis habetur  
per separabilitatem realem; in spi-  
ritualibus verò numerus etiam per  
solam separationem rationis. **90.1.**

## O

**O**biecta præcedunt cognitionem  
quando illam causant, secus  
verò quando causantur ab illa.  
**205.** **1.**

Oratio S.P.N. Augustini pro comple-  
men-

# INDEX NOTABILIVM.

mente suorum librorum de Trinitate, & huius Operis. 267.2.  
 Origenis error quod Verbum in Diuinis non dicatur proprie. 19.1.  
 Origenes actiue identificantur cum Personis producentibus in Diuinis. 159.1. ratione nostra concipiuntur progredi à Potentia generatiua, vel spiratiua. 160.1. illis etiam formaliter constituuntur Diuinæ Personæ. 142.1. Actiue identificantur adæquatè cum Personis producentibus. 156.2.  
 Origenes pertinent ad constitutionem Diuinarum Personarum, & quomodo. 139.1.  
 Origo & relatio sunt idem ex natura rei. 140.1.  
 Origo, & progressus erroris Græcorum de Processione Spiritus Sancti, & schismatis eorundem. 211.1. &c.  
 Osus Episcopus nomen *Hypostasis* primus accepit pro supposito; seu subsistentia incommunicabili. 102.2.  
 P  
 Pater, & Paternitas in quo differant; & quomodo sint Deus. 61.2. Si non spiraret quomodo tolleretur relatio Spiratoris. 92.1. In eo conceptu sub propria ratione personæ Patris non est prius dicere quam intelligere, vel è contra. 141.1. Paternitas sola ex relationibus Diuinis tetinet ex parte principij productiui Verbi Diuini. 206.1.  
 Pater Æternus, eo ipso quo est dicens, est etiam cognoscens suam Essentiam comprehensiuè. ibid. 2. Paternitas, & spiratio actiua quo pacto distinguantur. 225.2.  
 Pater, & Filius sunt vnum Principium Spiritus Sancti. 234. Expenduntur

de hoc verba Concilij Lugdunensis. ibid. 1. &c. a sunt tales propriissime & propterea dicuntur vnus spirator. 237.1. & dicuntur tamen duo spirantes, & quare. ibid. 2. quo sensu dici posset *Quatenus Pater, & Filius sunt, producunt Spiritum Sanctum.* 245.  
 Particulæ *Tamquam*, & *Quasi* non semper dimittunt. 235.1.  
 Passio per *S. Tho.* secluso motu est solum habitudo eius, qui est à principio ad ipsum principium. 160.2.  
 Perfectio entitatiua in suo conceptu formali quid dicat. 65.1. Simplexiter simplex non exigit esse supra omnem aliam perfectionem. 70.1. Quælibet cuiuslibet Personæ habetur formaliter in qualibet alia Persona per Circumfessionem. 76.1. &c.  
 Perfectio Dei quomodo simul sit absoluta, & relatiua, & non constituat ens. per accidens. 84.1. Perfectiones relatiue continentur Eminenter in Essentia propter eius fecunditatem. 73.1.  
 Perfectas in Deo est duplex. 154.2.  
 Personæ Diuinæ sunt inuicem inexistentes etiam secundum relationes proprias. 78.1. sunt subsistentes non solum substantiue sed etiam adiectiue. 121.1. &c. non distinguuntur proprietatibus absolutis. 136.1. Distinguuntur formaliter per relationes. 42.2. per quas etiam constituuntur. 143.1. ideo non potest concipi persona sine relatione, & origine. 146.1. Eas constitui proprietatibus personalibus, vt habetur in Cap. *Firmiter*, quomodo intelligendum. 230. 2. &c.  
 Philosophi Gentiles, de quibus SS. PP.

## INDEX NOTABILIVM.

narrant scripſiſſe de Myſterio Sanctiſſimæ Trinitatis, quomodo illud cognouerint. **164.** in hoc non eſt eadem ratio de illis, ac de Sibyllis.

**166.** 1.

Prædicata in rigore contradictoria, nec rei finitæ, nec infinitæ concenire poſſunt. **41.1.** Transcendentalia, quæ formaliter identificantur cum relationibus, & perſonalitatibus Diuinis, multiplicantur & ipſa ad multiplicationem perſonarum.

**126.** 2.

Prius eſt ratione noſtra generare, quam velle generare. **82.2.**

Principia producentia non ſemper habent tantam diſtinctionem, quantam habent termini. **89.2.**

Procedere Spiritum Sanctum. vt Amorem mutuum dicit. relationem realem. **128.2.**

Proceſſiones Diuinæ non ſunt per modum effectus à cauſa. **2.1.** ſunt emanationes, quæ etiam actiones rectè dicuntur. **3.1.** Earum prima eſt per intellectum, ſecunda per voluntatem. **6.1.** nullo modo requirunt in Deo potentiam realiter paſſiuam. **7.2.** illa Filij licet infinita non exhaurit omnem vim productiuam.

**9.1.** non poſſunt eſſe plures, quam

duæ ibid illa Spiritus Sancti cur non ſit generatio. **16.2.**

Proprietas perſonalis Patris quomodo ſit, vel non ſit in Filio. **53.2.**

Quo ſenſu PP. dicant proprietatem Patris Eſſentiam Filij conſtituere.

**54.** 1.

**Q**uando liceat arguere ab hypothefi impoſſibili. **224.1. & 2.**

Quaternitas non eſt admittenda in

Deo ex Concilio Lateranenſi Cap. **88.1.**  
*Damnamus.*

Quæſtio illa vtrum, ſi Spiritus Sanctus non procederet à Filio, diſtingueretur ab illo, vtiliter agitur in ſcholis, contra Goſfredum.

**224.** 1. &c.

R

**R**elatio in comuni quid ſit. **29.1.**

In Deo ſunt ponendæ relationes reales. **30.1.** non ſolum ratione Eſſentiæ, ſed etiam ſecundum proprium relationis conceptum.

**ibid.2.** Actio realis eſt quædam relatio. **31.2.** Quo ſenſu à S. Tho: relatio dicatur realis ratione fundamenti. **32.2.** Relationes Diuinarum Perſonarum non diſtinguuntur realiter ab Eſſentia Diuina. **35.2.** nec etiam formaliter ex natura rei; vt habetur in Actis Concilij Florentini.

**36.1. & 2.** Non ſunt de intrinſeco conceptu Eſſentiæ vt ſic. **48.1.**

&c. Quomodo pertineant ad eſſentiam Diuinam. **54.2.** Non ſunt formaliter de Eſſentia Naturæ Diuinæ, vt ratione noſtra contradidincta. **55.2.** Quo pacto conueniat illis ratio in, & ratio ad. **62.2.** In ſuo conceptu formali dicunt perfectiorem contradidinctam ab eſſentia Diuina. **65.1.** Verè ſunt entia realia tam ſecundum eſſe in, quam ſecundum eſſe ad. **ibid.2.** ſunt maximè conuenientes ipſi Deo. **66.1.** ſine illis Pater non eſſet nec Pater, nec perfectus Deus. **ibid. 2.** ſunt perfectiones infinitæ ſecundum propriam lineam. **67.2. & 69.2.** Non poſſunt perfectè præcindi ab eſſe infinito. **68.2.** Habent infinitatem non ſolum à terminis, ſed etiam in-

## INDEX NOTABILIVM.

intrinsecè. 89.1. sunt etiam perfectiones simpliciter simplices. 70.1. Tres relationes quæ constituunt tres Diuinas Personas rectè dicuntur tres perfectiones relatiuæ. 70.2. dicuntur etiam rectè perfectiones quatenus conuenientes, & integrantes sunt. 71.2. sunt omnino inter se æquales secundum propriam rationem. 72.2. Pertinent ad Diuinam integritatem. 83.2. Quæ ad inuicem sunt oppositæ, realiter etiam distingui est de fide. 86. 1. Ad multiplicationem relationum sufficit distinctio virtualis. 91.2. Realis distinctio solum datur quando sunt oppositæ. ibid. Relationes identitatis, æqualitatis, & similitudinis in Diuinis, quo sensu sint rationis; & in quo reales. 95. 1. cum originibus ita comparantur relationes Diuinæ, vt non sit prioritas inter illas. 141. 1. In Diuinis sub proprio conceptu distinguunt Personas, & vt formæ hypostaticæ eas constituunt. 145.2. non supponunt, sed constituunt, & distinguunt extrema. 153.2.

Reuelatione, & Fide Mysterij Sanctissimæ Trinitatis supposita, plures inueniuntur coniecturæ & rationes probabiles manucentes ad eius cognitionem. 168.2.

S

**S** Abellian inuicem tantum personam in Diuinis admittentes, in sexta Synodo damnati. 114.2.

Scotus vindicatus à censura quorundam recentiorum. 227.2.

Spiritus Sancti processio cur non sit generatio. 16.2. Sententia singularis Durandi de hoc refertur: &

reijcitur, satisfis fundamentis ex SS. PP. desumptis. 10.1. & 19.1. &c. Diuersi modi explicandi hanc distinctionem. 20.1. Resoluitur cum S. Patre & S. Tho: 20.1.28.2.25.1. Alij dicendi modi reijciuntur. 24.2. quo sensu Spiritus Sanctus dicatur Verbum Filij à S. Basilio. 196. 1. & 2. procedit etiam à Filio. 210. &c. Probatur ex Scripturis Sacris, ex Concilijs, & Auctoritatibus quindecim PP. Latinorum, & totidem Græcorum, ac etiam rationibus. à 212. vsque ad 219. satisfis Græcorum obiectionibus. à 219. vsque ad 223. Quo sensu sit accipiendum, quod procedat à Patre, per Filium. 217.2. si non procederet à Filio non distingueretur realiter ab illo. 226.2. sublata origine actuali ab eo, & manente quocumque alio, non maneret villa ratio distinctionis realis inter illos. 229. 2. & data illa hypothese non esset alius à Filio. 230.2. si procederet à Filio, & non à Patre, quomodo ab hoc distingueretur. 231.2. Facta illa suppositione, spiratio non esset productio diuersa à generatione. 232. 1. & sublata spiratione actuali non manet fundamentum in re concipiendi Filium vt spiratiuum. 233. 1. & 2.

Spiritus Sanctus Patris, & Filij Spiritus est. 240. & de facto procedit vt amor mutuus; ideoque à duobus. 240. 1. ex vi suæ processiois formaliter & intrinsecè exigit duo supposita spirantia. ibid. 2. Procedit enim vt nexus Patris, & Filij. 241. 1. ideoque virtus spiratiua per se petit esse in utraque persona.



## INDEX NOTABILIVM.

na. 244.1. quæ reperitur tam in Patre, quam in Filio seorsim, vt principium quo præcisè; sed non habentur condiciones requisitæ ad producendum seorsim; sed in ambobus coniunctim. ibid. Quod provenit ex natura talis termini. ibid. 2. non sic creaturæ respectu omnipotentia Dei creantis. 245.1.

Spiritus Sanctus non dicitur simpliciter dari, cum datur gratia gratis data sine gratia sanctificante; sed solum cum limitatione. 256. 2. Dicitur visibiliter missus in quantum fuit monstratus in signis ad hoc specialiter deputatis. 263. 1. non mittitur ab hominibus. 267.1.&c.

Subsistentia latius patet, quam Persona, & hypostasis. 110.1. relatiua terminat absolutam, & quomodo. 128. 1. & 2. tam absolutam quam relatiua in Diuinis est perfectio simpliciter simplex. 127.1.

Substantia dicta est vel à subsistendo, vel à subsistendo, vel ab utroque. 109. 2.

Sibyllæ piè creduntur habuisse lumen supernaturale in præmium Virginitatis ex S.P. 164. Erythraæ, vel Cumanæ Vaticinium de Christo Filio Dei apud S.P. 163.2.

Syllogismi aliquot expositorii, licet consent terminis singularibus, non concludunt; quid ad eorum bonitatem requiratur. 40.1.& 2.

T

**T**erminus vltimo constitutivus Personæ non est substantia, quæcumque, sed substantia incommunicabilis etiam per S. Tho: 116. 1.&c.

Terminus formalis processionis, &

communicationis quomodo sint idem, & quomodo differant. 157. 1. totalis quomodo assignandus in productionibus Diuinis. 157. 1.&c.

Tres subsistentia relatiua in Deo sunt admittendæ non solum in concreto; sed etiam in abstracto. 110. 1. & 1.120.1.&c. Tres etiam durationes relatiua possunt admitti; & pariter tres existentia relatiua. 129. 1. &c.

Trinitas Personarum collectivè sumpta non est magis perfecta, quam singula Personæ diuinae. 74.2.

V

**V**erbum Diuinum à Patre procedere, vnde habeatur. 13.2.&c. Eius processionem esse veram generationem est de fide. 15.1. & ratione probatur. 16.1. in suo conceptu importat emanationem à dicente. 193. 1. est expressivum eorum omnium, quæ sunt in Patre. 193. Procedit ex cognitione essentia, Personarum, & creaturarum etiam futurarum, non solum quidditatiua, sed etiam intuitiva, à 201. usque ad 203. & licet procedat ex cognitione sui ipsius. Spiritus Sancti & creaturarum, non tamen procedit ab istis. 205.2. ei convenit respectus ad creaturas ratione essentia modificata per proprietatem Filij. 210.1.& 2.&c.

Verbum mentale habet duos respectus, sicut etiam vocale. 193.2. Quomodo differat in nobis Verbum nostrum ab eo quod est dicere, & intelligere, & quomodo in Diuinis. 194.1. Verbum est nomen personale in Diuinis. 194.2. quo pacto

## INDEX NOTABILIVM:

Et possit etiam dici essentialiter .  
195. 2.

Vestigium Sanctissimæ Trinitatis quo-  
modi sit in creaturis , & imago in  
homine . 167.1.

Vna est Persona in Diuinis , quæ à  
nulla alia procedit , & duæ proce-

dentes.4.2.illius vnitatem fide tene-  
mus , & ea posita ratione probamus.

5.

2.  
Vnio humanitatis in Christo Domino  
ita terminatur ad subsistentiam Ver-  
bi Diuini, vt non terminetur ad alias  
subsistentias. 123.1.

# FINIS.





100

100







